

*Eximio viro, D. Georgio Cruppe, Amico suo.*

MONUMENTA  
LITTERARIA  
SIVE,

OBITUS ET ELOGIA  
DOCTORUM VIRORUM.

Ex Historiis Illustris Viri Jac. Aug. Thuani.

OPERA C. B.



LONDINI,

Excudebat Io. Norton sumptibus Ios. Kirton,  
& Tho. Warren, in Coemeterio S. Pauli  
ad insigne Equi Albi.

M. DC. XL.







VENERANDAE  
MATRI ECCLESIAE  
HEREFORDENSI.

**I**bi, Mater veneranda, Monumenta hac Litteraria, exemplissimo illustris Thuani Opere operâ meâ collecta, lubens meritò dico consecroque. Tu Monumenta Majorum, à multis retrò seculis, piè conservas. Tu viva etiam utriusque virtutis ostentas Exemplaria, & cum secula non annos numeres, est tamen tua (quod dici solet) aquilæ senectus. Ut vetera omittam; nunc temporis Reverendissimum Episcopum in Cathedralâ; Decanum & Præbendarios in Capitulo, doctrinâ & pietate præstantissimos; sacræ Musicæ peritissimos in Choro; bonarum litterarum in Scholâ studiosos habes.

## Epistola Dedicatoria.

*His accedunt Bibliotheca duae, bene instru-  
tae: ex quibus Operarii tui in communem  
usum mel colligant. Quorum omnium ho-  
norificam hic à me mentionem fieri; & au-  
reola hac magni Operis à totius aetate humilli-  
mè oblata, exporrectis (oro) Tuorum fronti-  
bus & manibus accipi, alma Mater, non de-  
dignare. Ita Deus Te Tuosque amare pergat.*



## *Ad Auctorem.*

**T**Huane, Galliae lux & Togae decus:  
Nec Galliae solum lux, lux & totius  
Orbis; Togae decus nec solum vel Fori,  
Sed & scholarum: libros quotquot discimus,  
Quotquot docemus, singuli grates Tibi  
Meritò lubenter ferimus, & laudes Tibi.  
Tot eruditi, qui Tibi vitam debent,  
Tibi, dum vivunt littere, vitam dabunt.



Amico Lectori.

**Q**Uum hæc Collectanea perlegeris, bonas horas tuas, ut spero, non malè collocatas dices. Nonnihil sanè conferrent hæc ad magnum Opus, quod profundi vir iudicii D. Baconus in *Augmentis Scientiarum* desideravit, Historiam Litterarum. Tu quaeso, fac quod in te est, ne Bibliopolas Litterarum Memoriae studiosos pœniteat sui sumptus, cui, ut ex Typorum pulchritudine vides, non pepercerunt. Elogium ipsius Thuani ex optimo doctissimoque viro H. Casaubono apponendum censui; neque enim decuit eum sine præconio præteriri, qui tam multa & tam bene de aliis dixit. Denique, quo magis inoffenso pede librum percurras, Emendationes Erratorum præcipuas notavi, quas suis locis referre ne graveris. Cætera leviora esse speramus, quàm ut de iis candidi Lectorem ingenii moneri opus sit. Vale, quisquis es Amice, & brevi Principum Obitus & Elogia cum omnibus expecta.



---

*Emendationes.*

**P**Ag. 5 l. 4. Salignacus. 11, 23. VIIIb. incunte. 14 8.  
Sophonisba. 21 9. Gaspar. 31, 13. Dubravius. 32, 20.  
amplissimas. 37 7. injiciunt. 53, 6. Julioduno. 53, 10.  
consecravi. 61, 19. annis. 68, 15, 20. Argyropylo. 78,  
13. Reuchlini. 90, 12. Sanlovinus. 90, 20. Casaro-  
duno. 96, 17. Basilea. 99, 3. Hierosolymam. 99, 6. ven-  
tis. 106, 6. Adversaria. 108, 11. illius. 112, 24. incre-  
dibilem. 136, 5. studia. 136, 13. praeftans, B-136, 14.  
Menilius. 146, 6. Possiacum. 146, 23. scissura. 160,  
12. mandatu. 174, 10. Clivensem. 192, 4. & Pii. 198,  
1. Petrum. 335, 12. nomen.

---

---

**S I V E,**

*Obitus & Elogia doctorum viro-  
rum, ex Historiis illustris viri  
Jac. Aug. Thuan.*

CIO IO XXXI.

**T**igurini vincuntur; ipse *Zuinglius* in primis ordinibus fortiter pugnans occubuit. Religioni tributum à Tigurinis, & qui cum illis stabant, quòd cadavere flammis ab hostibus tradito, cor exuri non potuerit; cùm tamen

B

constet

constet in quibusdam corporis humani partem esse quandam , in quam nihil ignis possit : sicut de majore dextri pedis articulo Pyrrhi Epirotarum regis memoriæ proditum est , qui corpore rogo de more absumpto , unà cremari non potuit. Adeò turbatis odio aut amore animis , ut fit in religionis dissensionibus , pro se quisque omnia superstitione interpretatur.

---

## CIC I O XLVI.

**M***artinus Lutherus* turbarum contra Pontificiam auctoritatem conciliatarum auctor annos natus L X I I I. Islebi in patria , quod est Mansfeldicæ ditionis oppidum , moritur X I I Kal. Mart. illuc Vitembergâ , ubi docebat , a Mansfeldiis comitibus vocatus , & arbiter electus , ut dissidium , quod inter ipsos de finibus & hæreditate erat , componeret. Post cœnam proximè ante noctem

noctem quâ decescit, cùm rogaretur  
 num in illâ sempiternâ vitâ simus alter  
 alterum agnitori, ita esse ajebat, &  
 scripturæ testimoniis confirmabat. Ut  
 certatim cum vivum multi complexi,  
 sic nec morte quidem ab ejus amore di-  
 velli potuerunt. Mansfeldii siquidem  
 cadaver, quod hinc originem duceret,  
 in suis finibus sepeliri debere contende-  
 bant: sed vicit Ioannis Friderici aucto-  
 ritas, qui ut Vitembergam referretur,  
 atque ibi terræ honorificè mandaretur,  
 obtinuit. Morienti adstitit Iustus Jonas  
 Nortusa veteri Cheruscorum oppido na-  
 tus, olim Ioannis Friderici Saxonis VII  
 Viri liberorum educationi admotus,  
 eorûmque fortunæ calamitosissimis tem-  
 poribus perpetuus comes, & Lutheri  
 ipsius ad extremum constans minister,  
 qui decimo post anno atq; adeo climaete-  
 rico suo Eislefeldiæ, ubi docebat, fati con-  
 cessit.



## CIB ID XLVII.

**H**ic annus non solùm duorum maximorum Principum, & qui summi literarum fuerunt fautores, sed & doctissimorum virorum obitu tristis fuit. Nam *Franciscus Vatablus* in Ambianis natus, quem Hebræi ipsi Lutetiæ Hebraicas literas profitentem admirati sunt, Christiani verò maximo cum fructu docentem audiverunt, ex hac vitâ migravit XVII Kal. April. Is Græcæ linguæ peritissimus multa ex Aristotele in Latinam transtulit: dein relicto philosophiæ studio ad sacras literas se totum applicuit: multaque hujus generis sub ejus nomine circumferuntur, ac notationes inprimis in vetus Testamentum ab auditoribus ex illius prælegentis ore exceptæ: nam ipse siue naturali pigritiâ, quod illi exprobratum est, siue morte præventus, nihil omnino scripsit; Satisque habuit sacre linguæ

linguæ arcana discipulis diligentioribus  
 aperire, illustri nominis sui famâ & alie-  
 no præconio contentus : ex iis fuere, Io.  
 Salignæus nobilis Petrocorius, & Ioan.  
 Mercerus Uticensis Christianorum in  
 Hebraicis longè doctissimus, qui ad ma-  
 ximâs charissimi præceptoris laudes hanc  
 adjecit, quòd Hebraicorum carminum  
 rationem, quæ hætenus nobis incogni-  
 ta est, perspectam ille habuerit, quam &  
 se scriptis aliquando traditurum recepe-  
 rat. Eodem die quo Vatablus & *Iacobus*  
*Tufanus* Remus optimus linguæ Græcæ  
 Doctor Lutetiæ decessit, cum eodem quo  
 Vatablus die in regionum professorum  
 collegium cooptatus fuisset, ut qui in eo-  
 dem vitæ curriculo simul desudassent, ne  
 mortis quidem tempore divellerentur.  
 Nec multo post XIII Kal. Iun. *Beatus Re-*  
*nanus* Selestadiensis annum agens LXII  
 Argentinæ, cum è balneis rediret, mori-  
 tur; vir in humanioribus litteris, antiqui-  
 tate & piâ doctrinâ exercitissimus, in-  
 genio miti, ut qui in cogitatione de con-

stituendâ ex omnium consensu in religi-  
 one concordia consenuerit, summus Des.  
 Erasmi observator, qui eandem viam in  
 his turbis institit. Hujus etiam anni ini-  
 tio XVII Kal. Febr. matura mors *Joan-*  
*nem Schonerum* Caroloostadiensem, jam  
 septuagenarium Norimbergæ nobis eri-  
 puit, ubi ille domicilium fixerat, Astro-  
 nomia, quam post Regiomontanum o-  
 pere illo egregio resolutarum Tabula-  
 rum maximè illustravit, scientiâ infig-  
 nem, & illâ inprimis, quæ ex positu a-  
 strorum de cujusque fortunis judicium  
 fert, multis observationibus ab illo lo-  
 cupletatâ. Exeunte anno in vivis esse de-  
 siit Augustæ Vindelicorum *Conradus Peu-*  
*tingerus* qui pridem vivere desierat annis  
 attritus, quippe completo LXXXII ætatis  
 anno, vir ut natalibus sic dignitate cla-  
 rus, & cujus memoriam tabula Peutin-  
 geriana postea a M. Velsero edita apud  
 doctos renovavit. Romæ sub id obierunt  
*Petrus Bembus* patricius Venetus, & *Iaco-*  
*bus Sadoletus* Mutinensis Carpentoracti  
 Episco-

Episcopus, uterque versu & pedestri oratione politissimus scriptor : verum illius multa licentiosius, ut temporum nequitia, & Domini, cui serviebat, mores ferebant, scripta extant; hujus contra seria ferè omnia, & digna personâ quam sustinebat. Vtriusque in dispari morum instituto, fortuna tamen par fuit. Nam & ambo simul à Leone X, ut primum summum sacerdotium inivit, ex omni doctorum numero delecti, quorum in conscribendis epistolis operâ & ingenio uteretur : dein & in Collegium Cardinalium eodem anno à Paulo III allekti sunt; sub quo & fatis concessere; Bembus ex vulnere in latere ad parietem accepto, dum equo veheretur, anno ætatis LXXVII; Sadoletus sub autumnii tempus, Bembo circiter septennio minor; atque illi quidem Hier. Quirinus Ismerii F. qui omni officio vivum coluerat, statuâ nobili artificio ex marmore factâ, inque celeberrima S. Antonii æde Patavii locatâ, parentavit; hunc Io. Petrus Carafa Sabino-

rum



rum Episcopus , quo die primùm post  
ejus obitum senatus habitus est , coram  
Pontifice , & mox Iac. Gallus civis Ro-  
manus in Laurentii æde luculentâ ora-  
tione laudavere : sepultus est sine ulla fu-  
neris pompa, ita enim testamento præscri-  
pserat , in æde B. Petro in exquiliis sacrâ.

---

CIO IO XLVIII.

**H**Oc anno debitum naturæ persolvit  
*Gregorius Cortesius* , à Paulo III in  
Collegium Cardinalium cooptatus, olim  
in S. Benedicti Cassinensi cænobio pro-  
fessus , & postea ipsius cænobii præsul ;  
quà ex eadem officina eodem tempore  
prodierunt Isidorus Clarius, & Io. Bapti-  
sta Folengius : is antiquâ & nobili fami-  
liâ Mutinæ natus , sed moribus ac erudi-  
to ingenio longè nobilior fuit , cujus ta-  
men paucula ad nos monumenta perve-  
nerunt , ab Hersilia Cortesia fratris F.  
diu postea publicata ; obiit Romæ XI  
Kal.

Kal. VIII. Sept. in basilica XII Apostolorum perhonorificè sepultus. Ex eadem urbe Mutinâ natus *Marius Molza* eodem anno in vivis esse desiit, versibus Latinâ & vernaculâ linguâ scriptis apud suos cum primis clarus.

---

## CLO IO XLIX.

**O**Dosii Bigerronum decessit *Margaritha* Francisci soror, Henrici Labretani Navarræ regis conjux, foemina omnibus ingenii & animi dotibus exulta: quæ tamen apud Ecclesiasticos malè audiebat, quòd fratris in Lutheranos malè animati iras pro viribus temperaret, & apud ipsam tutus esset illis receptus. Certè Iacobum Fabrum Stapulensem à Theologis Parisiensibus post Gul. Bricconeti Episcopi Meldensis obitum, exagitatum apud se retinuit, & Girardum Rufum, qui Cleriacense opimum admodum in Aginnatibus cœnobium à Francisco in ejus gratiam

C

gratiam obtinuerat, sæpius apud fratrem, quò Lutheri doctrinæ sectator esset, accusatum, fremente licet Sorbonicorum Collegio, constanter tutata est, & post omnia Oleronensi Episcopatu in Benearnensi provincia donavit. Ejus nomine & fabellarum volumen imitatione Io. Bocattii editum circumfertur; si tempora & juvenilem ætatem, in qua scriptum est, respicias, non prorsus damnandum, certè gravitate tantæ Heroïnæ, & extremâ vitâ minùs dignum. Decima Musa & quarta Charisà studiosis omnibus, aut una IX Musarum, & trium Charitum instar appellari meruit, versibusque passim editis, & nūmis perculsis, his Elogiis ornata est: præcipuè vero à III fororibus Anglis, Anna, Margarita & Iana Semeriis: non minùs ob Splendorem generis, quàm ingenii elegantiam, & eximiam eruditionem cum rara morum probitate conjunctam æternâ commendatione dignis celebrata est; edito hecatondisticho, quod Ioan. Auratus, Ioachimus Bellaius, Ioan. Antonius

nus Bafius , Nic. Denifotus , præclara Gallia: noſtræ ingenia , vario carminum genere poſtea expreſſerunt. Mortuam funebri oratione laudavit Carolus Sammarthanus. Eodem anno in Norico in vivis eſſe deſiit *Iacobus Zieglerus* Lindavius , vir exquiſitæ doctrinæ , qui diu Viennæ Auſtriacæ docuit, & Turcicorum armorum terrore ſparſo , apud Volſangum Episcopum Pataviſem ex illuſtriorum Salmenſium familia receptum habuit , quo in otio multa commentatus eſt ; ex quibus quædam in ſelectos S. Scripturæ locos cum contrariis Candidi Ariani & Marii Victorini rhetoris de divina generatione epistoſis Io. Iacobi Fuggeri ſtudio publicata ſunt.

---

(Io Io L.

**I**o. Vafeus Belga, quippe Brugis in Flandria natus , hoc anno obiit, VIII Sept. ineunte Salmantica jam adfecta ætate , ad



Mathurinorum seu veræ Crucis ædem sepultus, qui diu in Hispania moratus, res etiam Hispanorum continuâ ac luculenta historiâ complexus est. Sub id & *Ioan. Pierius Valerianus* Bolzanus Beluno in Venetis oppido natus, Patavii annum LXXXII supergressus decessit, ad S. Antonii conditus, quò vergente senio concesserat, ut post longam veluti peregrinationem in nidulo suo, ex quo puer evolaverat, ad quietem æternam se componeret. Is Urbani patrui Franciscani, qui Leonis X præceptor fuit, curâ in litteris educatus inter doctissimos seculi sui meruit recenseri, & Mediceæ familiæ, cujus favori ac munificentie sua incrementa litteræ in Italia debent, addictus, diu in Aula Romana studiis invigilavit, & magna negotiâ tractavit. Ejus inter alia Virgilianæ lectiones, & Hieroglyphica maxime commendantur, quæ virum alioqui Poeticâ præstantem, in omni politioris litteraturæ, antiquitatis & scientiarum genere totâ vitâ versatum ostendunt. Obiit &

& hoc anno *I. Georgius Trissinus* peranti-  
 quâ nobilique *Vicetiæ* familiâ ad virtu-  
 tem & litteras natus, linguarum peritissi-  
 mus, & in omni scientiarum genere exer-  
 citatissimus: quæ omnia ad decus & illu-  
 strationem suæ *Italiæ*, atque adeo linguæ  
 vulgaris contulit, quam non intra angu-  
 stos *Etruriæ*, atque adeo unius *Florentiæ*  
 limites coerceri passus est, sed universæ *Ita-  
 liæ* eam gloriam communem esse voluit.  
 Qua in re *Florentinos* & famosam in ea ci-  
 vitate *Academiâ* adversariam habuit,  
 magnamque sibi apud eos invidiam con-  
 flavit. Primus genus carminis soluti scælici-  
 ter usurpavit, cum à temporibus *Fr. Pe-  
 trarchæ* *Itali* rythmis uterentur, & poë-  
 sim ad *Aristotelicam* normam exegit, lû-  
 culento de ea ad interpretationem tam à  
 multis triti quàm à paucis intellecti operis  
 scripto edito. Multa scripsit, & in primis  
*Italiam Liberatam*, novo etiam litterarum  
 genere à se inventarum usus, non pari scæ-  
 licitate, paucos quippe nactus sectatores,  
 cum in versibus solutis plures eosque viros

maximos habuerit; & in iis Ludovicum Alamanium, & Torquatum Tassum, qui Hierosolymam suam eo carminis genere scriptam maluisse satis testatus est, cum ultimum opus, quod Divinam Hebdomada indigitavit, his versibus scripsit. Primus item inter Italos Comœdias dedit & Tragoedias, & Sophonista ejus magno in precio habetur. Architecturâ maximè delectatus est, ab eoque Andræas Palladius & ipse Vicentinus, cujus quæ in eo genere exstant tantopere commendantur, ex communi fama etiam ab iis, qui alioqui Palladii gloriæ minimè invident, secreta artis præcipuè didicisse creditur. Inter commentandum, nam ejus vita nunquam fuit desidiosa, magna negotia sub Leone X & Clemente VII gessit, & obitis plerisque eorum jussu legationibus, & apud Carolum V & Ferdinandum fratrem præcipuæ existimationis fuit, comitis titulos ob nobilitatem & virtutem ab iis promeritus: cum summos honores in aula, in qua consenuit, sperare posset, vitæ cœlibis pertæsus, conjugat-

conjugalem elegit, semel atque iterum ductâ uxore; tandemque Romæ laboriosæ vitæ finem imposuit, anno ætatis LXXII: Diruto monumēto, dum templum instauratur, in quo conditus fuerat, hæredes aliud ei ad S. Laurentii in majorum sepulchro Vicetiz posuerunt, ubi & ædes familiâ suâ dignas in urbis suburbio diu ante construxerat.

---

## C I O I O L I.

**M**artinus Bucerus Selestadii in Alsazia natus, quem relictâ Argentinâ in Angliam transmississe diximus, Cantabrigiæ diem suum obiit, pridie Kal. Mart. cum LXI ætatis annum ageret. Multorum carminibus epitaphiis celebratus, ac præcipuè duorum Suffolciorum fratrum, quorum mater semper ægrotanti assedit, & omnia humanitatis officia præstitit; paulo antequam moneretur, cum Germaniæ statum deploraret, vereri se sæpius dixit, ut in tan-



to multorum ardore Deum cognoscendi & Ecclesiæ instaurandæ, deficiente disciplina, quâ improbi castigarentur, & ordo in ministerio servaretur, laudabiles eorum conatus diu aut fœliciter procederent. Itaque optare unice se, ut quæ ad Edwardum regem de Ecclesiæ disciplina constituenda scripto comprehendisset, per Angliæ regnum locum haberent, & religiosè observarentur. Funus ejus magnâ frequentiâ celebratum, plus II CIO hominum illud deducentibus, & corpus in majore urbis templo conditum est. Hic etiam annus ultimus fuit *Andreae Alciato* Mediolanensis, qui primus purioris litteraturæ & antiquitatis cognitionem ad Iuris scientiam attulit; in Gallia diu Avarici Biturigum Cuborum, & postea Avenione publicè professus, ubi nostris hominibus postea ad eandem scientiam illustrandam exemplo suo viam prævit. Inclinatâ jam ætate, in Italiam relictâ Galliâ se contulit, & Bononiæ primùm, dein magnis stipendiis ab Hercule II evocatus Ferrariæ docuit; tandemque



demque multis editis scriptis emeritus senex Ticini, ubi & jus profitebatur, cum annos LVIII, M. VIII, dies IV vixisset, sic enim ex ejus genitura ab Hier. Cardano conscriptâ pater, sub principium anni prid. Id. Ian. placidè in Deo obdormivit ad B. Epiphanii sepultus. Eo junior *M. Antonius Flaminius*, Foro Cornelii nobili Galliæ togatæ oppido natus, sub id Romæ decessit, qui ad Poëtices, in qua inter Italos excelluit, & ad Philosophiæ studia etiam pietatem non vulgarem adjunxit, in Alexandri Farnesii Cardinalis eximii litteratorum fautoris familia diu versatus, ejusdem liberalitate sublevatus; arctam & cum Reginaldo Polo amicitiam coluit, ab eoque monitus divinam Davidicorum Psalmorum majestatem primus inter suos cum aliqua laude Latinis versibus expressit, & Fr. Spinulam suo exemplo ad eandem Poëtices laudem invitavit; majora utique præstiturus, nisi infirmitas stomachi, & alia valetudinis incommoda studiosis familiaria retardassent,

ac postremo non ita ætate provectum eripuissent. Eo tempore inter eos, qui emendationi Ecclesiæ seriò incumbi consultum ducebant, de iis quæ ad fidem & opera spectant, de gratia & libero arbitrio, de electione, vocatione, glorificatione in occulto controvertebatur: ac plerique aliter, quàm vulgo doceretur, de iis sentientes, se auctoritate B. Augustini tuebantur; in eamque rem opuscula ex ejus operibus collecta Augustinus Fregosus Sosteneus Venetiis anno CIO IOXLV excudi curaverat, additis notis ac scholiis: cui sententiæ accedebat Flaminius, cum in cæteris fidei capitibus doctrinæ per Germaniam tunc disseminatæ minimè adstipularetur. Nam & luculentum ipsius exstat inter vulgares clarorum virorum Epistolas de sacrosancto Eucharistiæ mysterio ex Ecclesiæ sensu scriptis mandatum testimonium. Itaque cum alii, quibuscum religionis causâ amicitiam coluerat, atque inprimis Galeacius Caraciolus Vicimarchio, patriam reliquissent, ipse in Italia

lia mansit ; neque tamen occultam censuram effugit, ejus nomine passim in epistolis , quæ postea publicatæ sunt , propterea expuncto. Flaminii mortem in annum superiorem rejicit Antonius Caraciolus , qui vitam Pauli IV scripsit ; qui & ipsum Paulum tunc Cardinalem Carafam dictum morienti astitisse, & cum de Flaminii , quem alioqui diligebat , fide dubitaret , magna pietatis & humanitatis officia præstitisse testatur. Sub id, & anno climacterico suo Veronæ , illustri præclarorum ingeniorum alumne, in patria obiit *Ioannes Baptista Montanus* medicus præstantissimus , cujus scripta magno in pretio habentur , partim ab auctore dum viveret publicata, partim à grato discipulo Ioanne Cratone , qui medicinam felicissimè sub III Imp. fecit , post ejus mortem edita. Paulo post *Ioachimus Vadianus* mortalitatem exiit, Fano-Galli apud Helvetios natus , Mathematicis artibus ac Geographiæ præcipuè quam scriptis illustravit , cognitione clarus , tum & ad extremum

tremum etiam Theologus non exigui inter suos nominis, & propter prudentiam cum summa integritate conjunctam ex umbrâ & pulvere litterario in lucem civilem evocatus, delato à civibus summo patriæ suæ magistratu, in cujus administratione non solum conceptam de se spem æquavit, sed etiam longè superavit; ut ejus exemplo confirmari possit, philosophis & litteratis hominibus reip. administrationem minimè interdicendam esse.

---

## CIVIO LII.

**H**Oc anno multi doctrinæ atque eruditionis famâ excellentes ultimum vitæ diem clauferunt. *Eberardus Bilichius* Tridenti, quò, ut concilio interesset, venerat, Id. Jan. decessit, ob ingenii in enodandis sacræ doctrinæ perplexis questionibus subtilitatem magni nominis Theologus. Nec multo post *Uratislaviæ* in *Silesia* obiit *Io. Cocchleus* *Norimberga* natus,



natus , insignis Theologus , & multis atque eruditis pro canonica Scripturae & Ecclesiae Catholicae auctoritate scriptis editis clarus ; praeterea acer in disputando , & in comitiis ac colloquiis Augustae , Ratisponae ac Vormatię sæpius cum principum Protestantium Theologis magnâ cum laude congressus. Ex Protestantium numero *Gaspar Hedio* Eselingensis , qui Basileae primùm & Moguntiaci Ecclesiastem egerat , dein Lutheri doctrinam amplexus , se *Matthiæ Zellio* , qui ante quadriennium mortuus est , Martino Buce-ro adjutorem præbuerat , postquam Argentine XXIV annos docuit. XV Kal. I Xbris fatis concessit. Quo eodem die *Andreas Osiander* Regiomontii in Borussia ad mare ex hac vita quoque migravit , cum ante quinquennium Norimberga eo confugisset. Is ibi novum dogma proposuit , & hominis justitiam non à fide , sed à Christi in nobis inhabitantis justitiâ pendere scripsit , ejusque sententię auctorem Lutherum laudavit : cumque multos

adversarios haberet, & Ioachimum Merlinum inprimis, qui Lutherum nunquam ita sensisse affirmabat, Alberti tamen Brandenburgici Borussiae ducis favore adjutus obtinuit, & Merlinum finibus excedere coegit: tum libris editis sententiam suam quamvis à recta doctrina alienam confirmavit, & cum Lutheri scripta contra se facere videret, in ipsum Lutherum debacchatus, eum & Philippum Melancthonem, ut novæ atque adeo Aristotelicæ Theologiæ conditores, quæ carnem potius quàm spiritum redoleret, probris ac virulentis scriptis proscidit; quibus & hoc erroneum dogma admiscuit, quo adserit Christum, etiamsi per primi parentis peccatum non fuisset perditum genus humanum, nasciturum tamen nihilominus fuisse. Obiit & anno climacterico suo, peste correptus Basileæ *Sebastianus Musterus* Engelhemii natus, olim Tubingæ in Franciscanorum sodalitia professus, postea abjecto cucullo Protestantium doctrinam amplexus. Is in Mathematicis multum profe-

profecerat, præceptore usus Ioan. Stœffero Iustingensi, insigni Mathematico, qui post longam multorum annorum vitam Tübingæ ante XX annos decessit; postea verò se totum Hebraicæ linguæ & sacris libris addixit, multis editis in utraque scientia monumentis de repub. optimè meritus, adeo ut Germanus Esdras ac Strabo appellatus sit. Decessit & hoc anno XI Kal. Maias Ingolstadii ad Danubium, ubi profitebatur, *Petrus Appianus* Benevicius Lejſnicæ in Misnia natus, astronomicæ rei scientiâ nostro ævo clarissimus, quam scriptis & novorum instrumentorum summo ingenio & accurata fide fabricatorum inventione illustravit, atque illo Cæsareo organo inprimis, quod Carolo V dicavit, eo nomine magnam laudem consecutus, & dignitate à Cæsare ipso auctus. Aliquanto post pridie Eid. IX bris *Iodocus Villichius* philosophiæ ac medicinæ studiis celebris, & vel magiricâ suâ à Conr. Gesnero publicatâ, ad posteritatem commendabilis, Francofordiæ ad Viadrum  
è

è vita demigravit. In Italia vero IV Eid.  
 Feb. Patavii fatis concessit *Lazarus Bonam-*  
*micus* Bassanensis jam provectâ ætate, quip-  
 pe .LXIII annum attigerat, in ea celeberrima  
 totius Italiæ Academia per XXI annos  
 summâ cum omnium admiratione professus,  
 & ob antiquitatis exactam cognitionem,  
 omnigenam eruditionem, raram eloquentiam  
 & acré judicium, tam ab Italis quàm à  
 peregrinis, quamdiu vixit, magnâ dignatione,  
 & meritò quidem habitus. Mortuum laudavit  
 Hieron. Niger Venerus oratione extemporaneâ  
 postridie habitâ. Idem mensis ultimus fuit  
*Lilio Gregorio Giraldo* patriâ Ferrariensi utriusque  
 linguæ & omnis politioris literaturæ & anti-  
 quitatis, quam variis scriptis illustravit,  
 longè peritissimo; qui fortunæ & corporis  
 adversitatibus, meliore utique fato dignus,  
 totâ vitâ conflictatus est, in direptione  
 urbis, cum in Herculis Rangonii Cardinalis  
 familia esset, bonis ejectus, & quod potius  
 re omni ducebat amissâ supellectile librariâ;  
 eandemque denuo fortunam ali-  
 quanto



quanto post expertus, cum Ioannes Franciscus Picus Mirandula Comes, cui & ille operam navabat, immani parricidio à Galeoto gentili suo occisus est. Inde cum se in patriam recepisset, cum Ioanne Manardo, & Cœlio Calcagnino viris doctissimis conjunctissimè vixit, arthritide sævâ diu vexatus, præcipuè à morte Manardi, ita ut non solum pedibus agrè se loco moliri, sed manibus debilitatis scribere omnino non posset, ac ne libros quidem evolvere, ad extremam senectutem, non solum tenuitate miseram, in qua à Renata Ferrarienti sublevabatur, sed sine litteris, in quibus vitæ doctus superiorem vitam exegerat, molestam, ætate perductâ; tandemque cum annum LXXIV ageret, in grabato suo decessit, in monumentum quod sibi in maiore urbis templo vivus paraverat, à Cynthio Ioanne Baptista Giraldo gentili & Prospero Pasetho hæredibus exasse institutis illatus. Exeunte dein anno III Eid. Decembris obiit Florentiæ *Paulus Iovius* luculentus historiarum scriptor,

E

ibique

ibique in Laurentii fano sepultus. Is Novocomo in Insubribus natus, ac Medicinam primò professus, Clementis VII beneficio Nuceriae Episcopus creatus fuerat: cumque ad Novocornensem Episcopatum omnibus votis anhelaret, suæque erga Mediceam familiam, in cujus laudes adeo profusus fuerat, observantiæ deberi id meritum fiduciâ putaret, tamen ab eo obtineri non potuit: quod in causa fuisse plerique credunt, cur Clementem in historiis avaritiæ & tenacitatis insimulet, cum alioqui homo gratosus se passim obnoxium prodat, eoque nomine ipsi in plerisque rebus fides derogeretur, quòd ad gratiam, & in odium scripsisse, & venalem calammum habuisse ferè omnibus persuasum sit. Constat certè cum à Francisco I litterarum parente & doctorum ingeniorum fautore eximio honorificam pensionem quotannis accepisse; Momorantium vero M. E. & magnum Palatii magistrum, cum Henrici II initiis in aulam revocatus promunere domesticorum regionum numerum

merum recenseret , Iovii nomen induci  
 iussisse , ex eoque tantam indignationem  
 illum concepisse , ut multa in Momoran-  
 tii invidiam libro historiarum XXXI<sup>o</sup> in-  
 fereret ; id alioqui minimè facturus , si  
 eundem , quem sub Francisco meruerat,  
 Momorantii favore ab Henrico honorem  
 & honorarium consequi potuisset ; vixit  
 annos LXIX, mens. VII, dies XXII. Abstulit  
 & idem annus magnum Hispaniæ lumen  
*Ferdinandum Nonium* Pinciâ Vaccæorum  
 oppido natum , atque inde nomen vulgo  
 sortitum , è nobilissimâ Gussmanorum  
 gente oriundum : qui cum sub Ælio Anto-  
 nio Nebrissensi in patria , in Italia Bono-  
 niæ sub Philippo Beroaldo litteris huma-  
 nioribus operam dedisset , & Græcam lin-  
 guam , ad quam eo seculo ferè incogni-  
 tam incredibili studio ferebatur , inibi  
 didicisset , inde comparatis magno pretio  
 exemplaribus Græcis , domum reversus ,  
 primus linguæ illius , qua omnis fere eru-  
 ditio continetur , usum in Hispaniam in-  
 tulit , & Ferdinandi regis , qui patris ipsius

in ærarii præfectura sedulo administrata  
fidem probasset, favore subnixus, cum ad  
honores virtutis vâ grassari posset, studia  
litterarum vitæ civili prætulit, & Francis-  
co Ximenio Cardinali, cujus pietati & a-  
nimi magnitudini tantum Hispania de-  
bet, operam suam & industriam in provi-  
denda illa ad omne ævum duraturâ Bibli-  
orum editione addixit, & postea Deme-  
trio Lucæ Cretensi, quem Cardinalis ille,  
ut litteras Græcas in nova Academia à se  
ingentibus sumptibus Compluti in Car-  
petanis paulo ante institutâ profiteretur,  
ex Italia evocaverat, in eo munere succes-  
sit; dein Salmanticam divertit, alteram to-  
tâ Hispaniâ maximè famosam Acade-  
miam, in qua & litteras Græcas ac Lati-  
nas profitendo consenuit, editis Hermo-  
lai Barbari æmulatione in Plinium, Me-  
lam & Senecam populares suos commen-  
tariis. Quod ad mores, vir pius & verax,  
sed dicax & aliorum acerrimus censor, de  
cetero fastus omnis ac gloriæ contemptor  
fuit. Vixit coelebs & abstemius, frugali  
sed



sed citra fordes mensâ amicos ac discipulos  
 excipiens ; tandemque octogenario ma-  
 jor legatâ scholæ Bibliothecâ, quam instru-  
 ctissimam habebat , & erogatis in paupe-  
 rum usum facultatibus, placidè in Deo ob-  
 dormivit , ad B. Susannæ humili sacello  
 juxta portam rivalem , qua ad Formim  
 fluvium itur, sepultus, ubi & ejus tumulo  
 quatuor , nec plura , sic enim extremis ta-  
 bulis mandaverat , verba inscripta sunt.  
*Maximum vitæ Bonum mors.*

---

CI<sup>o</sup> IO LIII.

**K** Al. Ianuar. hujus anni *Ioannes Rivius*  
 Athendori, quod est oppidum Occi-  
 dentalis Saxoniae, Albionis & Vitichindi  
 Saxonum Principum patrueium sacro la-  
 vacro auctoritate Caroli Magni abluto-  
 rum nobile , natus , Misenæ Hermundur-  
 orum , ubi ludo litterario praeerat , obiit,  
 cum annos cum seculo numeraret. Is Co-  
 loniae primùm , dein post Georgium Agri-  
 colam

colam Zuiccaviæ, postea Annebergi, ac tandem Misene, ab Henrico Saxone Mauritii VII viri patre evocatus, pueritiæ ac juventuti instituendæ sedulam operam XXV annos impendit, Latinæ linguæ ex Terentii præcipuè fabulis, quas & notis illustravit, hauriendæ & addiscendæ suis auctor & hortator assiduus: ad extremum, studiis Theologicis se totum mancipavit, in quibus & multa scripsit, ac postremò defecit, Georgio Fabricio Chemnicensi, qui ejus vitam descripsit, in munere scholæ regendæ successore relicto.

Haud multo post prid. Kal. Marr. Salfeldiæ in natali solo tabe extinctus est *Erasmus Reinholdus* qui secundum Ioannem Mullerum Regiomontanum, & Nicolaum Copernicum rem astronomicam maximè illustravit, additis ad Ptolomæicas & Alfonsinas directionum & motuum cœlestium Prutenicis tabulis exactissimè putatis cum logistica Astronomorum scrupulorum, plura præstiturus, nisi eum præmatura mors nobis eripuisset; nam

nam tantum annos XLII in vivis fuit:

Post eum exeunte VIIIbri *Iacobus Sturm* magnum Nobilitatis Germanicæ ornamentum, anno climacterico suo ex febrili quartana Argentinæ è vivis excessit, vir & rarâ eruditione & rerum agendarum peritiâ insignis, qui Ioanni Sleidæno ad scribendam historiam auctor & adiutor fuit, & Francisco in negotiis, quæ illi cum Imperii principibus & civitatibus erant, egregiam admodum ac fidam operam navavit.

Mense præcedenti VIII Eid. *Ioan. Bubravius Skala*, quod erat antiquum familiæ, antequam in equestrem ordinem cooptata esset, nomen, debitum naturæ persolvit, apoplexiâ suffocatus, Pelsinæ non ignobili Boëmiæ oppido natus, qui bello & pace impiger patriæ historiæ luculentâ scriptione bene de suis meritis, Ferdinando fidam operam navavit tempore belli Saxonici in Boëmiæ sedandis seditionibus; & post illud foeliciter confectum, in popularibus suis Principi justâ irâ accenso conciliæ

conciliandis , Olomucensi in Marcoman-  
nis Episcopatu ob id auctus , quem totum  
decennium summâ prudentiâ & sancti-  
monix laude tenuit.

Hic & annus abstulit *Ioannem Baptistam*  
*Egnatium* familiâ honestâ , sed in tenui re ,  
Venetiis natum , Angeli Politiani , qui bo-  
nas litteras in Italia intermortuas excitavit ,  
discipulum , quique eas non mediocri stu-  
dio illustravit , & scriptis & publicâ XL  
annorum professione , cum summâ totius  
Italiæ admiratione ; ob id ab illustrissimo  
Senatu eam gratiam consecutus , ut quan-  
quam publico munere defunctus , eodem  
stipendio , quod profitendo meruerat , quo-  
tannis donaretur ; & ejus bona ex Xviralis  
concilii decreto publico censu eximeren-  
tur. Tandem sacrum ordinem professus ,  
beneficii à repub. accepti memor treis am-  
plissimis patritii sanguinis familias , Moli-  
nam , Lauretanam & Bragadenam , supre-  
mis tabulis hæredes instituit , qua in hære-  
ditate præcipuè numeratur copiosa libro-  
rum supellex , nummis antiquis aureis , ar-  
genteis



genteis & æneis, aliisque præterea veteris ævi monumentis instructissima. Obiit octogenarius IV Non. Vtil. ad B. Marinæ honorificè funeratus.

Sed maximè omnium funesta, quamvis non omnino immatura mors fuit *Hieronymi Fracastorii* Veronæ loco nobili nati, qui ad exactam Philosophiæ & Mathematicarum artium, ac præcipuè Astronomiæ, quam & doctissimis scriptis illustravit, cognitionem summum judicium & admirabile ingenium attulit, quo multa ab antiquis aut ignorata aut secus accepta adinvenit, & explicavit, & medicinam, ut honestissimè ac citra lucrum, ita foelicissimè fecit. Poëticam vero ita excoluit, ut ad Virgilianam Majestatem proximè accessisse eum faterentur æmuli, & in iis Iacobus Sannazarius, alioqui parvus & amarulentus alienæ eruditionis laudator, qui visâ ejus Siphilide, non solum Ioannem Iovianum Pontanum, sed se quoque ipsum in opere accuratâ XX annorum limâ perpolito victum exclamavit. Ei certe hujus seculi in-

gens miraculum Iulius Cæsar Scaliger tanquam illarum, quas dixi, scientiarum & Poëtices summum fastigium consecuto aras erexit. Obiit in Caphis suis villâ amariſſimâ ad Baldi montis radices ſitâ, quo ſæpe ab urbe recedebat, ſeptuagenario major, ex apoplexiâ, VIII Eid. Vtil. Inde corpus ejus Veronam relatum, & ad B. Euphemie ſepultum eſt. Aeneæ illius & Andreae Naugerii Veneti viri doctiſſimi effigies ſcientiſſimè expreſſæ Patavii in Benedictino fornice viſuntur à Io. Baptiſta Ramuſio utrique amiçiſſimo poſitæ, additâ antiquæ aræ pervetuſtâ dedicatione ex ruinis Salonæ urbis erutæ, ut qui arctâ inter ſe neceſſitudine conjuncti vixerant, & pulcherrimarum rerum ſcientias ac politiores litteras adeo excoluerant, eodem in loco ſpectarentur, & à juventute Patavinâ univerſoque gymnaſio quotidie ſalutarentur.

Hic

## CICCO LIV.

**H**ic annus ultimus fuit *Ioanni Fero* professione Franciscano, qui in Moguntinenſi Eccleſia concionatorem egit, multaque ſcripſit tantâ moderatione, ut, ſciſſâ ob religionis cauſam Germaniâ, ab utraque parte gratiam meruerit, tandemque in laudabili munere ſuo affiduus die B. Mariæ natali ad meliorem vitam migravit.

Fuit & hic annus ultimus *Xiſto Betu-  
leio* Auguſtæ Vindelicorum nato, ubi ille & Gymnaſio præfuit per annos XVI, & rem litterariam, dum vixit, non mediocriter voce & ſcriptis editis iuvit, à Io. Baptiſta & Paulo Haintzeliis Auguſtavis fratribus vicem bene merito de ſe præceptori rependentibus honorificè ibidem ſepultus.

Eum mox ſecutus eſt *Simo Portius* Neapolitanus in patria anno ætatis LVII mortuus, olim P. Pomponatii Mantuani

celeberrimi ætate sua Philosophi discipulus, nequaquam præceptore suo inferior, sed in eo superior, quòd ad Peripateticæ scientiæ à doctoribus Barbaris hætenus tractatæ cognitionem linguæ Græcæ & bonarum litterarum ornamenta attulit; nonnihil, dum Aristotelicæ doctrinæ plus iusto tribuit, in disputationibus de anima & mente humana Pomponatii sui culpæ affinis creditus, plerisque aliis in eo genere opusculis, quæ extant, magnum nomen adeptus. Historiam piscium cum Pisis, ubi publicè profitebatur, scribere aggressus esset, allato Gul. Rondeletii libro, quem ille ex Guillelmi Pelisserii Episcopi Monpessulani commentariis composuit, ab incepto destitit, non sine occulto livore, quòd speratam ex eo opere gloriam sibi præreptam videret, neque committendum putaret, ut decus longo jam tempore partum, intempestivè augendæ famæ cupiditate decoqueret.

Eodem ætatis anno *Sigismundus Gelenius* in Boëmia natus Basileæ decessit, cum egestate



egestate totâ vitâ conflictatus & lautiorē fortunâ dignus ab Erasmo iudicatus, cuius industria præcipuè in vertendis plerisque scriptoribus Græcis & Plinio ad veterum codicum fidem emendando desudavit. Alii obitum ad annum sequentem incipiunt.

Sub id *Franciscus Franchinus* Consentiæ in Brutiis natus, non ita provectâ ætate Romæ, ubi fere vitam exegit, debitum naturæ persolvit. Is Marti Musas sociavit, & victricia Caroli V arma secutus, Algerianæ expeditioni interfuit, ejusque infœlicem ac periculosum successum luculentis versibus descripsit; Ulrico Huteno equiti Franco, quamvis in diverso scribendi genere ingenium exercuerit, quadantenus comparandus, cujus elegantes admodum dialogi, nec Luciani acumini cedentes, ex immaturo docti æquè ac strenui viri obitu, quasi parvæ tabulæ ex magno naufragio supersunt, & hodie mirâ cum suavitate ab æquis talium rerum æstimatoribus leguntur. Postea

Franchinus à Iulio III Massæ ac Populonia in Etruria Episcopus creatus, eâque in dignitate defecit, ad S. Trinitatis in colle hortulorum sepultus.

---

## CIC I O LV.

**H**Oc anno vivis exemptus est *Volfangus Lazius* Viennæ Austriacæ in patria ferè quinquagenarius, rerum Græcarum simul Romanarum & Germanicarum non indiligens scriptor, quod præclara ejus monumenta apud posteritatem testantur, patriæ suæ illustrator, & antiquitatis sollers indagator, ex medico Cæsareo à Ferdinando non solum in consilium, sed etiam ob egregia erga se ac rem publicam litterariam merita, in ordinem equestrem allectus.

*Conradus* item *Pellicanus* Rubeaquo in Alsatia natus, & diu Hebraicas litteras Tiguri magnâ cum laude professus, qui innumera fere Rabbiorum commentaria

ria non solum in sacram Scripturam, sed etiam de arcanis Iudaicæ doctrinæ ritibus scripta ex Hebraicis Latina fecit, hoc anno valde senex naturæ debitum persolvit.

His annumerabo *Georgium Agricola* Glauchæ Misniæ natum, qui de re metallica, fossilibus & subterraneis animantibus ita accuratè hoc seculo scripsit, ut omnis antiquos in eo genere longè superaverit, & exactâ non solum eorum, quæ à veteribus prodita sunt, explicatione, sed & multarum rerum, quas veniens ætas indagavit, vestigatione eam historię naturalis partem illustraverit: additâ post *Gulielmum Budæum*, *Leonardum Portium* & *Andream Alciatum* de ponderibus, mensuris, de pretiis metallorum & monetarum diligentissimâ tractatione: ac tandem hoc anno *Chemnicii Hermundarorum* haud longè à maximè famosis hoc ævo Saxorum VII virorum argenti-fodinis, ubi multa ipse coram priscis incognita exploravit, & observavit, ultimum vitæ diem clausit

clausit, XI Kalend. Decembris, cum annum ætatis LXI ageret.

Ante Agricolam fatis concessit VIII Kal. Iun. *Gemma* à Patria *Frisius* vulgo dictus, Lovanii medicinam publicè professus, sed Mathematicarum scientiarum, quas domi docebat, rarâ scientiâ longè illustrior fuit, quas etiam instrumentis summo artificio elaboratis cum primis illustravit: & in aulam Caroli V sæpe evocatus, cum se modestè excusaret, otium sibi gratiâ Principum potius esse insigni exemplo docuit: in quo & defecit, calculi malo extinctus, cum tantum XLVII annos exegisset, Cornelio *Gemma* filio relicto, qui easdem artes magnâ cum laude Lovanii professus, intermortuam patris gloriâ, sollertiâ propriâ ac doctissimis scriptis editis renovavit.

Aliquanto post III Non. VIIIbris. *Edwardus Vottonus* Oxonii natus & apud suos medicinam professus, editoque de differentiis animalium commentario, clarum inter litteratos adeptus nomen, anno climacterico



maetrico suo, relictâ munerofâ sobole,  
Londini decessit, ad Sancti Albani sepul-  
tus.

*Isidorus Clarus* patriâ Brixianus, profes-  
sione Benedictinus, in primis commemo-  
randus venit, qui Fulginii Ecclesiæ per  
septennium præfuit, vir tribus linguis do-  
ctissimus, qui ad doctrinam Christianam  
mores castissimos, vitam integerrimam,  
animum nihil præter charitatem & Eccle-  
siæ emendationem ac unionem spiran-  
tem attulit, tantâ in pauperes largitate,  
& in omnes benignitate usus, tantâque  
sanctitatis opinione inde concitatâ, ut post  
mortem turbâ ingruente & invitis custo-  
dibus ædes perrumpente, totis quadra-  
ginta horis ad deosculatorem patuerit,  
nullo fetore emissio. Vixit sexaginta annos,  
& febre violentissimâ correptus V Kal. Ju-  
nii placidè ad Deum migravit, in Ecclesia  
sua Fulginii sepultus.

Quo & eodem anno immaturâ mor-  
te erepta est *Olimpia Fulvia Morata* Ferrari-  
ensis, morum sanctimoniâ, ingenio &

eruditione cum quavis prisca ævi comparanda foemina. Huic parens fuit Fulvius Peregrinus Moratus Mantuanus homo doctus, qui filiam in litteris instituit, in quibus tantum profecit, usa etiam Chiliano Sinapio præceptore, ut Græcè & Latinè scribere eleganter, & versus utràque linguâ pangere didicerit, dein in Renatæ Herculis II Ferrariensis uxoris familiâ cum Protestantium doctrinam hausisset: ubi & in comitatu atque adeo amicitia Annæ Atestinæ, quæ postea Francisco Lotaringo Guisæ Duci nupsit, principem locum tenuit, totam se Theologicis studiis mancipavit. Postremò ob religionem natale solum vertere coacta, cum Æmilio fratre in Germaniam venit, & Andreæ Gruntlero medico nupsit, cum quo conjunctissimè, sed paucis annis vixit, & Heidelbergæ, ubi larem fixerat, VII Kalend. Novembris ex hac vita excessit, cum vix totos XXIX annos exegisset: eam mox Æmilius frater, & Andreas maritus secuti sunt, in eodem tumulo ad D. Petri conditi.

dit. Hujus miscellanea coegit & publicavit Cœlius secundus Curio, ob religionem & ipse Italiâ profugus, quæ fœminæ omni laude dignissimæ mores & rarâ eruditionem exprimunt, & quid à tam excellenti ingenio exspectari potuisset, nisi præmaturè adeo in vivis esse desuisset, clarè ostendunt.

Præcessit hos omnes *M. Antonius Majoragi* à Majoragio vico, in quo *Julianus Comes* ejus pater habitabat, ita vocatus, cum ante *Antonius Maria Comes* diceretur, ob idq; à *Fabio Lupo* & *Maximo Nigro* accusatus, à quo se crimine ille luculentâ in senatu *Mediolanensi* habitâ oratione purgavit, & non sine exemplo factum ostendit, ut nomen mutaret. Multum eloquentiâ valuit, & *Aristotelis* & *Ciceronis* de ea arte libros maximè illustravit. Hunc etiam adversus *Cœlii Calcagnini* calumnias defendit: & cum post egregiè navatam totos XIII annos in erudiendâ juventute *Mediolanensi* operam, ad sacræ doctrinæ studia se demum contulisset, in Deo ob-

dormivit, pridie Non. April. anno ætatis XLI, Mediolani in majori templo, tumulo à se vivo erecto à Bartholomæo Comite æceris fratre conditus.

Apud nos *Orontius Fineus* Delfinas patre medico Brigantione natus, prid. Non. VIII.bris. paulo sexagenario major, ultimum vite diem clausit. Is primus secundum Iacobum Fabrum Stapulensem, (qui scientiarum orbem in Gallia à multis seculis incognitum aut intermortuum excitavit, sed principia sola tradere contentus, cum ad majora pergeret, tantum fontes indicavit) Lutiæ Parisiorum magnâ frequentia Mathematicas scientias à Francisco præmiis invitatus docuit, & scriptis pro tempore eruditissimis illustravit.

Ex nostris & hoc anno Romæ decessit *Petrus Gillius* Albiensis, qui ad exactam utriusque linguæ, antiquitatis, veterum scriptorum, bonarum disciplinarum, ac præcipuè rei naturalis cognitionem, indefatigabile longinquas regiones lustrandi studium attulerat: quo incitatus, per XL  
amplius



amplius annos institutâ per Græciam, Asiâ utramque, & majorem Africâ partem diligenti peregrinatione, partim ut Græcos libros, sic enim à Francisco I. iussus erat, undique colligeret, partim ut multorum locorum positum describeret, morsuo eo, diu vagatus, cum raro Dei beneficio ex Gerbensium piratarum manibus elapsus esset, tandem in familiam munificentissimi litterarum patroni Georgii Armeniaci Cardinalis, qui Romæ regis negotia procurabat, tanquam in tutissimum portum se contulit, ubi dum ordinandis ac recolligendis, quas tanto tempore sparsim congefferat, narrationibus dies noctibus continuat, ardentissimâ febre correptus diem supremum clausit, annos natus LXV, & ad B. Marcelli funeratus est. Scripta ejus ne perirent, ejusdem Armeniaci Cardinalis in clientem amor, & propensum ad rem litterariam juvandam studium prohibuit, qui partem majorem eorum in Galliam adferri jussit, & publicanda curavit. Pars tamen eorum à Petro Be-

lono Cœnomano amanuensi & peregrinationum per aliquot annos comite subrepta creditur, qui licet ea suo, non Gillii nomine postea evulgaverit, tamen vel plagiarius non mediocrem à litteratis gratiam inivit, cum quod multi faciunt, illa publico minimè invidit.

---

## CIC IJ LVI.

**S**ub exitum VIIIbris, cum historiam huc illuc usque exactâ fide & diligentia pertexuisset, scribendi & vitæ finem fecit *Ioannes Sleidanus*, lue populari correptus, anno ætatis LI. Sleida in Ubiis oppido haud longè à Marcoduro natus & ab eo cognominatus, vir eruditione & rerum agendarum peritiâ hoc seculo clarus, qui adolescentiam apud nos fere egerat, & in Bellaïorum familia diu versatus, res magnas sub Ioanne Bellaïo Cardinali gesserat ac didicerat. Deinde incalcescente per Galliam in Lutheranismi suspectos animadversione, in Germaniam secessit.

secessit , & Argentinensi reipublicæ suam operam addixit , in eaque urbe tot rerum quas gesserat , aut à fide dignis acceperat , notitiâ fretus , commentarios scribere aggressus est.

Nec multo post *Ioannes Forsterus* Augustanus, vir linguæ Hebraicæ scientiâ clarus, quam & scriptis luculentis illustravit, cum longo tempore Vitembergæ docuisset, pridie Eid. Xbreis è vivis excessit, annos natus LXI.

Ante eum XV Kalendar. VIIbris. *Sebastianus Corradus* Arcelli , quod antea Bocardorum , nunc Iulii Tieni Scandiani Marchionis castellum est , VII Regio-Lepidi milliaribus natus obiit , in Domini- canorum æde Regii sepultus, qui tunc Bononiæ primarius linguæ Latinæ ac Græcæ professor, olim Baptistæ Egnatio operam navaverat , ejusque præceptis instructus maximè Ciceronem illustravit, & Quæstura illa sua ob rationem ejus summa fide relata , aliaque in eundem edita, apud doctos , præsertim P. Victorium, M. Anto-

Antoniūm Flaminium, Romulum Ama-  
læum, P. Manutium, præcipuum merito  
nomen adeptus est.

Nec prætermittendus videtur *Ioannes  
Gelida Valentia* (quæ Ludovico Vivi vi-  
ro doctissimo anno hujus seculi XLI Lo-  
vanii, ubi profitebatur, defuncto patria  
fuit,) natus; qui cum sub barbaris docto-  
ribus apud suos Philosophiæ operam de-  
disset, Lutetiam jam famosum toto orbe  
litterarum emporium venit, ubi sophisti-  
ces illius & inutilium quæstionum, quæ  
ex ea nascuntur, pertæsus, longè diversam  
studiorum rationem, quo erat ingenio acri  
& acuto, sibi mox ineundam sensit, & Ia-  
cobi Fabri Stapulensis litteris renascenti-  
bus facem præferentis doctrinâ ac præce-  
ptis meliùs instructus, etiam utriusque lin-  
guæ puriorem cognitionem jam grandior  
natu percepit, & animum ad Aristotelem  
suum illustrandum adjecit, quem & mag-  
nâ auditorum frequentiâ in Cardinalitia  
schola interpretatus est. Inde Burdigalam  
evocatus, ludo Aquitanico præfuit, Andrea  
Goveano



Goveano gymnasiarchâ interea ad Iohannem Lusitanorum regem in patriam profecto, ut Conimbricæ ludum aperiret, quo & secum cum Gelidam ipsum unâ cum Patricio & Georgio Buchananis Scotis, Nic. Gruchio, Gul. Guerenta Rotomagensibus, Elia Vineto Santone, Arnolfo Fabricio Vasatensi, aliis, ducere vellet, nunquam potuit persuadere homini Gallicanis moribus assueto, ut ad suos Hispanos redire vellet. Itaque Burdigalæ remansit, reditum Goveani opperiens; quo ante constitutum biennium in Lusitania mortuo, Gelida in precaria ludi præfectura, quam per Goveani absentiam veluti apud se depositam summâ curâ administraverat, à Senatu populoque Burdigalensi confirmatus est, eamque pari laude totum septennium tenuit, ac tandem hoc anno XI Kal. Mart. sexagenario major in summa rei familiaris angustia decessit, superstitite uxore & filiola; & cum multa domi effecta, quæ publico daturus esset, habere crederetur, nullis ingenii sui monumentis

H relictis;

relictis; tantum paucas ejus epistolas cum aliis aliquot Arnoldi Fabricii, Iacobus Businus longo post tempore Rupellæ publicandas curavit, hoc veluti ultimo pietatis officio, bene merito de se præceptoris gratiam potius rependens, quàm quòd eas expectationi de tanto viro conceptæ respondere existimaret.

---

## CICERO LVII.

**A**bstulit hic annus aurei illius seculi, quo P. Bembus, A. Naugerius, B. Egnatius, H. Præastorius, alique ejusdem melioris notæ viri in Italia floruerunt, litteratorum fere ultimum *Ioannem Baptistam Ramusium* Pauli I. C. filium, ut linguæ Græcæ Latinæque ac scientiarum omnium peritissimum, sic negotiis gerendis exercitatissimum; in quibus explicandis rara sollertia meruit, ut Senatus Venetus ejus operâ totos XLIII annos in gravissimis reipublicæ negotiis usus sit, tam in scribæ munere,

munere, quàm in oratorum ad principes diversis temporibus missorum comitatu. Hujus diligentiae debemus collecta ac digesta variarum navigationum volumina, quas & præfationibus doctissimis interdum illustravit, & in primis philosophicâ de Nili incremento ad Francaſtorium ob studiorum similitudinem conjunctissimum amicis disceptatione à veteribus plerisque agitatâ, à paucis hodie intellectâ. Scripsit præterea, sed imperfectum reliquit, de fluxu & refluxu maris tractatum, materiam multis tentatam, sed in qua nemo adhuc fecit satis. Profectâ demum ætate missionem à bene merita de se republica impetravit, & Patavii, ubi senectutis nidum posuerat, annos natus LXXII, ultimum diem clausit. Corpus inde Venetias translatum, & ad S. Mariæ hortensis sepultum fuit.

Hoc exeunte anno Venetiis jam senex obiit *Nicolaus Tartalea* Brixianus insigni de numeris & mensuris in VI parteis distributo opere, & aliis ad Euclidem scriptis

editis clarus, qui multa in eo genere à Luca Bragenſi monacho ſollertiſſimè inventa illuſtravit, multa correxit, & Hieronymi Cardani æmulatione varias quaſtiones ingenioſe pertractavit, ita tamen, ut practici numerorum calculi, qui in uſu inter negotiatores verſatur, majorem ſemper rationem habuerit.

Anteà *Petrus Nannius* Alkmariaë in Batavis natus, Lovanii ubi diu in Buſſidiana ſchola Græcam Latinamque linguam magnâ eruditionis non vulgaris laude profeſſus fuerat, multis ingenii ſui editis monumentis, quibus rem litterariam multum promovit, ultimum diem clauſit, XII Kal. Vtil: cum vitæ annos cum ſeculo numeraret, in primaria urbis æde cum honorifico Sigismundi Friderici Fuggeri elogio ſepultus. Huic in munere ſuffectus eſt Cornelius Valerius Vetteris itidem in Batavia natus, qui magna ingenii & elegantis in omni ſcientiarum genere doctrinæ laude floruit uſque ad annum hujus ſeculi LXXVIII, quo vitam cum morte commutavit.

Poſt



Post Nannium *Vitus Amerbachius* Vendingæ in Bojoaria natus, in Academia Ingolstadiensi Philosophiæ professor septuagenarius, Eid. VIIbrib. ad Deum migravit.

*Salmonium Macrinum* Iuliodano natum, qui hoc anno domi suæ senio plane confectus fati concessit, ne nunc silentio præteream, Poëticæ studium, cui primos adolescentiæ annos consecravit, apud nos ant ipsum fere neglectum facit. Is cum sub Iacobo Fabro Stapulensi prima discendi fundamenta jecisset, protinus ab Academia Parisiensi ad erudiendos Claudium & Honoratum Renati Sabaudi Tendæ comitis filios evocatus est, unde illi patuit ad aulam aditus, atque adeo ad Bellajorum, qui tunc meritis suis præcipuum apud Franciscum gratiæ locum obtinebant, amicitiam, & Iohannis Bellaii Cardinalis in primis, cujus ad eum multa carmina inter Lyrica, quibus potissimum Macrinus excelluit, hodie leguntur. Ex Lyricis autem illis præcipue laudantur, quæ cœlibis

vitæ pertæsus , cum de uxore ducendâ cogitaret , in Gelonidis suæ castissimos amores lufit , ex cujus postea matrimonio pulcherrimam sobolem sustulit, primitiasque ejus Charilaum nihilo parente in Poëtica inferiorem , sed longè linguæ Græcæ cognitione superiorem , qui Catharinæ Henrici tunc Navarrae regis sororis præceptor à matre datus, in tumultu Parisiensi postea cum permultis aliis indignâ morte periit.

Circa hæc tempora & fatis concessit *Angelus Caninius* Anglarensis , vir linguarum non solum Græcæ & Hebraicæ , sed Syriacæ & aliarum Orientalium rarâ & exquisitâ cognitione insignis , iis perdocendis diu in Italia , Venetiis , Patavii , Bononiæ , Romæ , atque in Hispania vagus : demum Andreæ Duditii Pannonii , cujus illustre nomen in litteris , & ob legationes ab eo obitas postea fuit , adolescentiæ admotus , Lutetiæ Parisiorum docuit , ac postremò in familiam Gul. Pratenfis Episcopi Claramontani migravit , & in Aruernis finem studiis & vitæ fecit.

Fuit

CIC I<sup>o</sup> LVIII.

**F**uit & hic annus doctrinâ illustrium virorum morte insignis. Nam XII Kalend. April. *Ioannes Bugenhagius* Iulini in Pomerania natus, moderato ingenio & eruditione rarâ excultus, obiit Vitembergæ, cum annum ætatis ageret LXXIII.

Et sexto post die apud nos *Ioannes Fernelius* Ambianus, natus LII annos, regis Archiatros, Lutetiæ ad B. Iacobi in macello sepultus, qui cum plures annos in Philosophicis ac Mathematicis studiis summâ cum laude exegisset, demum se medicinæ totum mancipavit, quam & foeliciter fecit, & universam doctissimis & politissimis scriptis complexus est: quæ etsi morte præventus non edidit omnia, ut nec propriarum observationum desideratissimos libros; tantum tamen veræ gloriæ iis quæ publicata sunt, Europâ totâ est adeptus,

adeptus, ut tanto viro disciplinæ suæ alumnos schola Medicinæ Parisiensis æternum sit jure gloriatura.

Eum & eodem anno secutus est *Ianus Cornarius* Zuicaviensis & ipse medicus insignis, qui plerisque antiquorum Philosophorum, medicorum ac Theologorum scriptis Græcis editis ac Latio donatis à studiosis non mediocrem inivit gratiam. Obiit in patria, XVII Kalend. April. cum annos cum seculi hujus cursu numeraret.

Ante eum *Iacobus Micyllus* Argentinæ anno hujus seculi III natus summâ cum Ioachimo Camerario necessitudine conjunctus, cum diu humaniores litteras Heidelbergæ secundâ famâ professus esset, & scriptis variis illustrasset, hoc anno V Kal. Februar. denatus est.

Paullo post *Ioannes Pena* Aquis Sextiis familiâ senatoriâ natus, rarâ Mathematicarum artium cognitione insignis, quarum amorem & gustum P. Ramo, dum in Prælæa schola Lutetiæ docerent, instillaverat,



verat ; multis Euclidæ non ante visis monumentis evulgatis & Latinitate donatis & explicatis , atque Catoptrici præcipuè , in quorum præfatione de usu cylindrici speculi multa dictu vix credibilia , & quæ plerosque in errorem superstitiosos induxerunt , doctissimè demonstrat ; cum plura ab admirando ejus ingenio expectarentur , in ipso ætatis flore , XXX tantum annos natus , violentâ febre ereptus est , X Kalend. VIIbris ad Carmelitarum in porticu sepultus.

Eodem mense Romæ obiit annum agens LXIX *Romulus Amaseus* , Utinæ , quæ Robortello & Luisino patria fuit , natus , sed origine Bononiensis ; qua in urbe diu litteras Græcas Latinasque magnâ cum laude professus est , & uxorem ex Vastavillanorum familia duxit , ob idque jure postliminii antiquæ patriæ restitutus pristina jura & immunitates meruit : postea & sub Paulo III Alexandri Cardinalis nepotis pueritiæ erudiendæ admotus , etiam honorificas legationes ad Cæsarem , cæte-

ros Germaniæ Principes & Poloniæ Regem obiit, & sub Iulio III jam conjuge elatâ principem locum inter litteratos in illa Aula tenuit. Quam laudem multis scriptis editis testatam reliquit, & Pompilio filio moriens, quasi jure hereditario transcripsit.

Postea XII Kalend. IXbris *Iulius Cæsar Scaliger* anno ætatis LXXV Aginni in Nitiobrigibus ubi uxorem duxerat, decessit : vir, quo superiorem antiquitas vix habuit, parem certe hac ætas non vidit. Nam ut nobilitatem omittam de qua inter omnes constat, ingenio, animi & corporis robore simul omnes æqualeis suos facilè superavit. Primâ adolescentiâ militaribus muniis obeundis maximâ cum fortitudinis ac sollertiæ laude decursâ, & quamvis serò ad studia applicato animo, tamen ingenii fœlicitate tantum profecit, ut ad exactissimam omnium Philosophiæ partium scientiam, etiam linguarum, Græcæ præsertim ac Latinæ, summam peritiam addiderit, atque in iisdem usum, sive pedestri

pedestri siue numeris astrictâ oratione scriberet, quo in utroque genere excelluit. Acerbius contra Erasimum, fortasse iustam ob causam, sed quæ tamen taleis viros inter se committere non decuit, inuentus est, non solum ea oratione, quæ per omnium manus volitat, sed alterâ quæ rariùs reperitur, qua se prioris auctorem profitetur, non minore acerbit te scriptâ. Sed virum à gente vere generosum postea præcipitis impetûs pœnituit, sibi que dolere scripto testatus est, quod non ante mortem cum eo reconciliatus esset, cuius summam doctrinam cum singulari pietate conjunctam, & exquisitum in litteris & de litteris iudicium atque adeo par minibus ingenium supra omneis admirabatur. Hic vir divinus cum veteribus comparatus, cum nemo unus esset, qui eum, siue ingenium siue fortitudinem spectes, exprimere posset, Xenophonti & Massaniissæ citra vanitatem componi meruit. Ex Andieta Aupia Lobeiaca nobili fœmina, cui annos XIII natæ jam provecta ætate

nupsit, plures liberos sustulit, ex quibus ultimus hodie superat Iosephus Iustus Scaliger, qui secundum patrem nunc inter litteratos & in re litteraria principem sine controversia locum tenet, vere eruditorum Phœbus, ut politissimi ingenii vir eum indigitavit. De hoc ut plura dicam, nec pudor ejus patitur, nec per ingentia ipsius erga me merita licet; quanquam minimè vereor, ne propterea minùs vera de eo prædicare videar; cum quicquid dixero, opinione omnium vero minus sit. Sed potius est ut tanti viri nomen per transennam appellasse contenti, cultum quo divinum ejus ingenium cum rarâ morum probitate conjunctum pro jure amicitiae, quæ mihi cum illo intercedit, prosequimur, venerabili silentio, ut in sacris fieri amat, obsignemus: tantum addam eundem, qui patris, fuisse filii de Erasmo, & hoc, de quo modo dixi, dissidio sensum.

Funestum & hunc annum fecit mors  
*Aloisii Lipomani*, primùm Methonensis,  
 dein



dein Veronæ, & postremo Bergomi Episcopi, vitæ integritate & eruditione præstantis, qui variis legationibus summâ prudentiæ laude defunctus, litterarum studium & scribendi diligentiam non intermisit, catenâ laboriosissimâ in Genesim, & Exodum & Psalmos inter occupationes illas elucubrât.

Sub exitum anni & *Andreas Tiraquellus* Fontenaii in Pictonibus loco honesto natus, ultimum diem clausit, cum vario litterarum genere excultus, tum celeberrimus nostrâ ætate Iuriconsultus, eâque solâ commendatione in Burdigalensem Senatuum sub Francisco I, dein in Parisiensem ab Henrico secundo cooptatus, ubi magnâ cum laude consenuit, æque ingenii ut corporis numerosâ fœcundus prole, cum singulis annos singulos libros ac liberos reipublicæ daret, magno non solum in præsens patriæ suæ ornamento, quæ Tiraquellos, item Imbertos, Brissonios, Vietas & Rapinos rara jurisprudentiæ, Mathematicarum artium, & politioris litteraturæ

lumina protulit, sed ad sempiternam Gal-  
liæ gloriam, quæ quod à Fontenaio acce-  
pit, in universum orbem Christianum;  
ubique doctrinarum splendor reful-  
get, benigna dispensatione edidit.

Ante eos, Toleti, in majore templo,  
cujus ipse Canonicus erat, *Ioannes Vergara*  
annum LXIV supergressus, diem supre-  
mum obiit IX Kalend. Mart. cum Francis-  
cum fratrem Græce Latineque doctissi-  
mum ante XIII annos eodem mense extu-  
lisset. Uterque egregiam operam in Com-  
plutensi Bibliorum editione cum Ferd.  
Pinciano & Antonio Nebrissensi navavit.

CIº Iº LIX.

**E**Odem anno, ut viros quoque doctri-  
nâ claros commemorem, *Franciscus*  
*Duarenus* Brioci fano in Armorico loco  
nobili natus, cum vix L ætatis annum at-  
tigisset, decessit, juris scientiâ secundum  
Andream Alciatum, quem Avarici Bitu-  
rigum

rigum Cuborum jus civile profitemem  
 audiverat, sua ætate clarissimus: ad quam  
 & politioris litteraturæ, & exactam anti-  
 quitatis cognitionem à magistro suo edo-  
 citus adjunxit: atque in eadem postea scho-  
 la ipse professus est, magna frequentia ac  
 celebritate cum Eguinario Barone popu-  
 lari suo, qui, ut erant tunc tempora, non  
 mediocrem sui famam excitaverat. Hu-  
 jus tamen nunc nomen obscurum, scripta  
 pæne hominum memoriâ exciderunt.  
 Duarenus vero jam provecta ætate mag-  
 nas & acreis contentiones cum Iacobo Cu-  
 jacio tunc juvene habuit, ex eoque non  
 obscuræ simultates inter auditores exortæ  
 sunt, ita ut schola Bituricensis in parteis  
 scinderetur, ob idque majus periculum  
 immineret, nisi cessisset Cujacius, & Va-  
 lentiam Segalaunorum migravisset; quo  
 nomine postea se Duareni memoriæ plu-  
 rimum debere prædicabat, cujus æmula-  
 tione factum esset, ut juris professionem,  
 quam tunc juvenis, seu præpostero paren-  
 tum consilio, seu ætatis levitate deserere po-  
 tuisset,

tuiſſet, ſemel apprehenſam mordicus reti-  
 nuiffet, & ad eam exornandam tam ſedulâ  
 & aſſiduam totâ vitâ operam impendiſſet.  
 Duareni nunc opera in magno pretio, uti  
 debent, apud doctos habentur, eaq; Cujacius ipſe plurimi ſemper fecit, cum ex qua-  
 tuor Franciſcanis, qui eâdem ætate ean-  
 dem ſcientiam profitebantur, unum Dua-  
 renum ſibi placere, cœteros juſ tantum  
 deliguriſſe diceret. Sed ſcriptis illius accidit,  
 quod ne ſuis accideret, ſummoperè ſem-  
 per veritus eſt Cujacius, ut nimirum præ-  
 lectiones ex ore recitantis in ſchola perpe-  
 ram plerunque ab auditoribus exceptæ,  
 quæque non eo conſilio fiebant ut ederentur,  
 poſt ipſius mortem, reliquis ejusdem  
 operibus, quæ vivus publicaverat, nullo  
 delectu admixtæ ſint: in quo inſignem  
 doctiſſimi viri manibus injuriam factam  
 indignabatur Cujacius, eamque, me ſæpius  
 appellato, & aliis qui ſub eo meruerunt,  
 à ſe ac ſcriptis ſuis deprecabatur.

Duareno adjungam *Æmarum Rancone-*  
*tum* Veſuna Petractorum ortum, qui Dua-  
 reno



reno ipsi ad multa in jure adinvenienda fa-  
 cem prætulit, virum omni politioris litte-  
 raturæ, & antiquitatis seu profanæ seu sa-  
 cræ, ac scientiarum genere excellentem,  
 nec sine miraculo dicendum, quippe qui  
 unus simul omnia exactè habuerit, quæ  
 singula singulos posteritati cōmendare po-  
 tuerunt. Nam & primus veros juris Ro-  
 mani fonteis aperuit, & humaniores litte-  
 ras ex utriusque linguæ scriptoribus illu-  
 stravit, tum omnis philosophiæ & Mathe-  
 maticarum artium arcana percalluit: ac  
 denique absolutam omnium rerum cog-  
 nitionem acri judicio adhibito percepit, &  
 primùm senator Burdigalensis, dein & in  
 Parisiensi curia alterius inquisitoriarum  
 classium præsidis munus magnâ cum lau-  
 de exercuit: donec perturbatis hoc anno  
 ob religionem rebus, eadem, quæ permul-  
 tos alios fortuna diris publicæ calamitatis  
 nexibus irretivit, & ipsum unâ involvit,  
 quamvis ob longè diversam à religione  
 causam in periculum vocaretur. Itaque in  
 Bastiliam arcem conjectus, quod ex astro-

rum iudicio, scientiæ etiam illius, quam cum Hieronymo Cardano excoluerat, apprime peritus, jampridem eventurum præ-  
 sagiverat, sexagenario major exquisito  
 mortis genere obiit. Nihil ferè scripsit, sed  
 uberem scribendi aliis materiam præbuit,  
 copiosâ & omni librorum tam editorum  
 quàm manu scriptorum ab ipso summâ  
 diligentia annotatorum suppellectile reli-  
 ctâ; unde doctissimi hujus ætatis viri  
 laudato plerumque auctore, aliquando  
 etiam suppresso, multa & ad suum decus  
 & in publicum valde utilia hauserunt. Ra-  
 ro autem homo etiam rebus agendis natus  
 interdum litteris operam dare visus est. Ita  
 quippe studiorum rationem instituerat, ut  
 levi cibo sumptu temporibus cum se quie-  
 ti dedisset, nocte concubio primoque som-  
 no exacto surgeret, eadem fere horâ, quâ  
 cœnobitæ nostri (quorum mores & insti-  
 tuta, in iis præcipue quæ ad vitæ rationem  
 & valetudinem tuendam pertinent, sum-  
 moperè laudabat) ad preces matutinas  
 fundendas quotidie surgunt, & cucullo  
 perinde,

perinde, ut illi, caput obnubebat, vestimento ad frigus ab humeris, cervice & auriculis arcendum accommodato, tum quatuor horas continuas lectioni ac meditationi impendebat; quo spatio mirum quantum se proficere ajebat, defæcato post primam quietem ingenio, & silentio ac noctis obscuro adjutus, nemine item meditationem interrumpente, quod interdiu contingere non potest. Tum hoc maximè ad valetudinem conferre asseribat: siquidem post primum somnum pituitâ supernatante, si surgas, eam excreare facile est, quæ, si continuato somno redormias, densatur & ventriculo adhæret, tractuque temporis noxios humores gignit, quâ re maxime studiosorum valetudo infestatur. Tum rursus se ad quietem componebat, & quod plerumque priore meditationi ingeniose inchoaverat, statim ab illo placido somno expergefactus felicissimè perficiebat. Inde se ad munia diurna conferebat. Græcè ac Latine, elegantissimè scribebat, ita ut libri ab eo annotati,

qui innumeri, dissipato post ejus mortem amplissimo illo omnis eruditionis reconditoris penu, per manus studiosorum etiam hodie passim volitant, non minùs pulchritudine scripturæ legentium oculos capiant, quàm raræ doctrinæ sparsis ubique notis ingenium pascant & instruant.

Paulo post *Ioachimus Perionius* animam de litteraria republica bene meritam Deo reddidit, *Cormeriaci* in *Turonibus* natus, & in cœnobio illius loci valde opulento, cui statim à pueris dicatus est, educatus & postremò mortuus. Is cum *Aristotelem* hætenus à *Ioanne Argyrapylo*, fideliter potius quàm ornate versum, auribus Latinis proponendum statuisset, dum elegantioris styli potius quàm veri rationem plerunque *Ciceroni* suo addictus habet, in contrariam ab *Argyrapylo* reprehensionem incidit, & *Nic. Gruchii* viri doctissimi & postea *Gul. Guerentæi* censuram expertus est, & cum *Ludovico Strebæo* litterariis velitationibus ob eandem causam



sam se exercuit. Sed major illi pro Aristotele contentio fuit cum Petro Ramo, quem eodem tempore Antonius Goveanus Lusitanus, sed qui quicquid ad politioram litteraturam & Philosophiam ac juris prudentiam illustrandam attulit (consultit autem ille plurima) non tam patriæ, quàm Galliæ, in qua bonas litteras à puero imbibit, & ad extremam ætatem permansit, debebat, elegantissimis orationibus, quæ editæ sunt, oppugnabat. Multa & Perionius ex patribus Græcis pari elegantia in Latinam linguam transtulit, & lucubrationes plurimas alias, quæ in manibus hominum habentur, publico dedit, quibus nominis famam satis inter sui ævi homines claram ad posteritatem propagavit.

Eodem anno vivis exemptus est *Robertus Stephanus* Parisiensis Typographus Regius, secundum Aldum Manutium Romanum, qui Venetiis, & Ioannem Frobenium, qui Basileæ eandem artem summâ laude exercuerunt, clarissimus: quos

ille longo spatio supergressus est, acri ju-  
 dicio, diligentia accurata, & artis ipsius  
 elegantia: cui ob id non solum Gallia, sed  
 universus Christianus orbis plus debet,  
 quam cuiquam fortissimorum belli du-  
 cum ob propagatos fines patria unquam  
 debuit: majusque ex ejus unius industria,  
 quam ex tot præclare bello & pace gestis  
 ad Franciscum decus & nunquam interi-  
 tura gloria redundavit. Sed migrante ad  
 Deum optimo non solum principe, sed  
 litterarum fautore ac parente eximio, in-  
 digna bene merito de patria cive tot editis  
 Hebraicis, Græcis & Latinis libris gratia  
 repensa est à Theologorum nostrorum  
 collegio, qui hominem reipublicæ invi-  
 gilantem & qualvis æquas condiciones  
 accipere se paratum demonstrantem, non  
 desierunt laceßere, donec ille vexationum  
 injustarum pertæsus, ex necessitate consi-  
 lium cepit, & relictâ patriâ Genevam ad  
 extremum se contulit; ubi tantâ pruden-  
 tiâ publicam simul & privatam rem cura-  
 vit, ut quamvis tot adversitatibus confli-  
 ctatus

etatus & incommoditatibus, quæ solum  
 vertentibus necessariò perferendæ sunt;  
 tamen in opere assiduus ad ultimum vitæ  
 spiritum laudabile rei litterariæ adjuvandæ  
 propositum constanter tenuerit, ac tan-  
 dem cum LVI annum vitæ ageret VII  
 Eid. VII br. fatis concessit, foris gloriâ dives,  
 & domi liberis, qui Genevæ manerent,  
 relictâ opulentâ supellectile. Hanc enim  
 legem ingrata patriæ pertæsus, non tam  
 ejus odio, quam justæ, ut putabat, ultio-  
 nis ratione in testamento dixit. Itaque Ro-  
 bertus filius, qui eandem artem Lutetiæ  
 summâ cum laude pro facultatibus exer-  
 cuit, ab hereditate paternâ omnino exclu-  
 sus est: quam Henricus tanto patre dig-  
 nissimus filius crevit, qui typographicam  
 non solum longo tempore itidem postea  
 exercuit: sed multa ad vivandam rem lit-  
 terariam propriâ industriâ contulit: inter  
 alia edito, æmulatione patris, qui linguæ  
 Latinæ penum olim condiderat, linguæ  
 Græcæ copiosissimo & multorum prin-  
 cipum gazis præferendo thesauro.

Idem

Idem annus & ante eum abstulerat prid. Non. Mart. *Lucam Gauricum* Geophanensem LXXXII annos natum Pauli III familiarem & ipsum Mathematicarum artium callentem, atque illius partis præcipuè, quæ ex astrorum positu de vita & fortunis hominum decernit.

Aliquanto post Mantuæ in patria decessit *Io. Baptista Folengius* professione Benedictinus, fere sexagenarius; vir insigni pietate ac charitate præditus, & moribus, ut scriptis politissimis; quæ neminem legisse unquam pœnitebit. Virum optimum de emendatione Ecclesiæ & scissurâ tollendâ serio cogitantem, & Isidori Clarii Episcopi Fulginatis ante quadriennium defuncti, de quo superius suo loco diximus, vestigiis eo in negotio insistentem, mors placida in eodem, in quo professus fuerat, cœnobio ad meliorem vitam transtulit, III Non. VIIIbris.

Nec prætermittendus videtur *Iacobus Milichius* Friburgi Brisgoiæ honesto loco natus, Philosophiæ ac Medicinæ studiis  
clarus,



clarus, suavitate item morum, quam oris  
speciei præferebat, omnibus acceptus; qui  
cum annos complureis Vitembergæ sum-  
mâ cum laude docuisset, postremo ibidem  
ex apoplexia obiit IV Eid. IXbris anno  
ætatis LVIII.

---

CI<sup>o</sup> I<sup>o</sup> LX.

**A**LIquanto & ante fatis concessit *Ioan-  
nes* Cardinalis *Bellaiorum* familiâ non  
solùm antiquitate & splendore inter suos,  
sed meritis erga nomen Gallicum illustris-  
simâ ortus, Gulielmi Langæi Subalpinæ  
olim provinciæ proregis, bello & pace cla-  
rissimi viri, & Martini superiore anno VII  
Eid. Mar. Glatiniaci in Cænomanis mor-  
tui, qui itidem militaribus & aliis summis  
negotiis ac legationibus totâ vitâ functus,  
postremo rerum quas gesserat, aut quibus  
interfuerat, historiam prudenter juxta &  
purè scriptam posteris reliquit, frater, ipse  
pariter & pace & bello clarus. Nam à pue-

ro litteris foeliciter institutus ita, ut & scitè  
 Latinè scribere, & versus eleganteis ac ge-  
 nerosi spiritûs plenos, quales hodie in ma-  
 nibus doctorum habentur, pangere sciret;  
 inde non tam fortunæ beneficio, quàm  
 merito suo à Francisco maximis negotiis  
 tractandis statim adhibitus, plurimas le-  
 gationes summâ cum prudentiæ ac præ-  
 cipuæ fidei laude obivit: etiam ejusdem  
 commendatione in Cardinalium Colle-  
 gium cooptratus: postea asperrimis tem-  
 poribus anno hujus XLIV adventante  
 Cæsaris exercitu, cum omnia in Parisio-  
 rum civitate, cujus ille Episcopus erat,  
 trepida essent, eam tuendam summâ cum  
 animi præsentia suscepit, productoque  
 vallo ac firmis propugnaculis quæ & ho-  
 die manent, incomparabili diligentia ex-  
 structis munivit. Sed Francisco vivis exem-  
 pto, cui ob fidem cum rara animi magni-  
 tudine ac vasta liberalitate, quod cum in  
 omni sua vita, tum maxime plurimis re-  
 gii sumptûs ædificiis à se exstructis satis  
 declaravit, conjunctam merito secundum  
 Cardina

Cardinalem Turnonium carissimus & ab intimis consiliis erat, ab invidis, qui in gratiæ locum successerant, & præcipuè à Cardinale Lotaringo ejus virtutis æmulo, pristinæ dignitatis & gratiæ loco motus, vir vel minimæ quantumvis occultæ injuriæ impatiens, Romam secessit, ubi ætatis prærogativâ Episcopus Ostiensis & sacri Cardinalium collegii princeps, alioqui virtute sua majora de rege & S. R. E. promeritus, hoc anno in suis ædibus, quas sibi juxta Dioclesiani thermas exquisitâ magnificentiâ struxerat, animam de Ecclesia, cujus emendationi semper in vita vere & ex animo studuit, ac Gallico nomine optimè meritam Deo tradidit.

Cum hujus gentilis *Joachimus Bellinus* in dispari fortuna, cæterum ingenio illustri familiâ digno, quod in Poëtica præcipuè exercuit, non illi inficiandus, Kal. Ian. ejusdem anni annum agens XXXVII ex subita nervorum resolutione Lutetiæ decessisset. Tristitia, quæ ille, cum in familia agnati Cardinalis Romæ esset, fecit, ludi

item rustici , & alia ad Margaritam , quæ Philiberto Sabaudia duci nupsit, collectanea præcipuè laudantur. In Latinis , quæ itidem Romæ fecit , minùs scælix fuit.

Ioachimo comitem addemus tertio post eum die in patria, cum LXII annos exegisset , mortuum. *Lalium Capilupum* Mantuanum artissima cum eo necessitudine conjunctum ; qui tantâ scælicitate Maronis conterranei sui versibus detorta significatione lusit , ut Ausonii & Probæ Falconiæ , atque aliorum , qui in simili argumento se exercuerant, laudem prorsus obscuraverit, in longe diversâ à Virgilii mente materiâ versatus ; præter alios uno & altero elegantissimo centone de Monachorum origine, vitâ, institutis, sacrorum nostrorum ritu , & de morbo Gallico , de quibus rebus nunquam Virgilio venire in mentem potuit , concinnato.

*Ia. Bonfadius* post eum commemorandus venit , Salonæ ad Benacum natus, soluto pedestrique scribendi genere in sua Latinaque lingua clarius. Sed tantas dotes diversi



diversi mores corruerunt , ita ut ob rem  
tacendam Genuæ , cuius urbis historiam  
aliquot annorum scripserat , securi percus-  
sus est , adhuc vegetâ ætate & infracto men-  
tis robore , quod ad ultimum usque spiri-  
tum servavit , scriptâ sub id elegantissimâ  
epistolâ , quâ Socratis exemplo animum  
tranquillum & intrepidum ad mortem  
se afferre contestabatur.

Nec debito fraudanda est elogio *Loisa*  
*Sigæa* Toleti in Carpetanis nata , linguæ  
Latinæ , Græcæ , Hebraicæ ad miraculum  
in hoc sexu perita , ob idque in aulam Re-  
ginæ Lusitanæ ascita , ubi & non modicas  
opes ex regali munificentia sibi paravit , &  
Angelam sororem paribus ingenii dotibus  
excultam habuit ; à Ioanne Vascæo lucu-  
lento rerum Hispanarum scriptore , L.  
Andrea Resendio , Alvaro Gomecio , &  
Fr. Luisino certatim laudata , quæ cum  
Burgis postea domicilium fixisset , à Fran-  
cisco Cueva marito ante diem superstite  
ex ipsa filio , elata est III Eid. VIIIbr.

Ut ad alios transeam , *Philippus*  
L 3 *Melanch.*

*Melanchthon* Vitembergæ hoc anno obiit XIII Kalend. Maias, ætatis suæ climactericum diebus LXIII egres-  
sus ex hemitritæo senibus ferè letali. Is Bretta oppido Palatinatûs Rheni natus & Heidelbergæ oriundus, patrem habuit Georgium usu tractandorum nostro more armorum insignem, ob idque Maximiliano Cæsari percharum, de cætero virum bonum & pium. Cum verò operam litteris daret, in ludo ad Hercyniæ-portam tunc celebri, sub Io. Hungero & Georgio Similero, in Io. Reachilini viri suâ ætate doctissimi familiaritatem venit, qui Philippi nomen, quod habebat ille familiæ significans solum nigrum Germanico sono in Græcum Melanchthonis mutavit, sicuti suum à fumo denominatum ab Her-  
molæo Barbaro olim in Italia in Capnionem conversum meminerat. Postea exortis in Germania propter religionem turbis, perpetuus M. Lutheri assecla. Longè diversum tamen à doctore suo ingenium ad eam causam attulit. Nam cum omni ope  
annitere-

anniteretur , ut doctrina quam tradebat,  
 esset perspicua, & ambigua explicarentur,  
 in eo summa alioqui erat altercationum ac  
 rixarum fuga, & maximum tranquillitatis  
 ac quietis studium, ut nisi de necessariis  
 contendendum minimè putaret : nam  
 posse conniveri ad nonnulla, ferri denique  
 multa debere. Qua animi moderatione  
 & æquitate, quanquam exacerbatis tunc  
 temporis summopere omnium animis,  
 maximorum tamen virorum opinione  
 dissidentium amicitiam ac benevolentiam  
 meruit. Certè Franciscus ante XXX annos  
 cognito Melancthonis peculiari ad se-  
 dandas eas, quæ in Ecclesiam invectæ  
 sunt, turbas, studio ex Gulielmo Bellaio  
 Langæo, protinus ad eum Guisa scripsit,  
 misso Barnaba Voræo Fossa, rogavitque,  
 ut quamprimum in Galliam se conferret,  
 de unione doctrinarum cum selectis ali-  
 quot doctoribus acturus, quo pulcherri-  
 ma illa sacræ administrationis concordia  
 sanciri posset. Biennio vero post Iacobus Sa-  
 doterus Episcopus Carpentoratensis cum  
 Romam

Romam venisset, & in Cardinalium Collegium præter spem ac votum coop-  
tatus fuisset, amantissimas litteras ad eum  
dedit, quibus significabat ardentissime ex-  
petere se, ut quantumvis locorum spatiis  
& opinionum dissidentiâ dividerentur,  
amore & studiorum communicatione in  
posterum conjungerentur. Sed qui ob-  
viam eam humanitatem in exteris ac di-  
versa sentientibus probavit, longè contra-  
riam fortunam inter suos & eandem do-  
ctrinam profitentis expertus est. Nam  
suborta repente in Germania factio eo-  
rum, qui ut se flagrantiore in religionis  
causa studio versari demonstrarent, om-  
nem conciliationis & concordie incundæ  
mediam viam aspernabantur, & cæteros  
paci studentes, quos Adiaphoristas & In-  
terimistas nominibus ad odium composi-  
tis vocabant, ut desertores & in pietatis  
negotio tepidos damnabant. Horum an-  
tesignani fuerant Matthias Flacius Illyri-  
cus, & Nic. Gallus, quibuscum totâ vitâ  
viro tranquillitatis alioqui cupido certa-  
men



men fuit. In quo proinde post mortem reprehensa est à suis ea quam dixi, rixarum & contentionum fuga: præterea nimium Philosophiæ & Mathematicarum artium studium, atque illius præsertim partis, quæ ex astrorum positu ac concursu de vita ac fortunis hominum decernit. Verum de iis omnibus diligenter & ornate admodum perscripsit Ioachimus Camerarius Melanchthoni totâ vitâ conjunctissimus, cujus accuratam narrationem legisse ut mihi jucundum fuit, ita ab iis qui Ecclesiæ paci consultum cupiunt, eam cognosci non inutile existimo.

Complureis filias reliquit Melanchthon, ex quibus Anna elocata est Georgio Sabino Brandenburgensi, Poëta inter Germanos non exigui nominis, qui à Petro Bembo, Gaspare Contareno Cardinalibus, Baptista Egnatio, Ludovico Becatello Italici, dum viveret, magno in precio habitus, hoc eodem anno socerum secutus, Francofordiæ ad Viadrum, ubi larem fixerat, decessit Kal. Xbris, ætatis suæ LIII.

M

Cum

Cum *Petrus Lotichius Secundus* multum eo junior, nam XXXII tantum annum attigerat, Solitariis oppido ad Drusi montem sito in Hanoviae ditione natus, omnium meo quidem iudicio, qui secundum Eobanum Hessum in Germania Poeticam attigerunt, praestantissimus, Heidelbergae Kalend. IXbris, ultimum vitae diem clausisset. Huius poemata triennio post auctoris mortem à Ioachimo Cartherario collecta & publicata sunt, fidem apud posteritatem factura, quid ab illo expectari debuerit, si longiorem ei vitam Deus annuisset.

Hos omnes praecessit mense Ian. mortuus *Nicol. Gerbelius* Phorcensis vir optimus & pariter doctrinâ ac suavitatem morum excellens, decrepitâ aetate senex, & qui juris scientiam olim Viennae in Austria professus, summâ studiorum consensione cum Io. Cuspiniano viro suâ aetate doctissimo vixerat, dein Argentinam, ubi vivere desiit, se contulerat.

Ut Gerbelius annum fere inchoavit, ita  
finiuit

finivit *Ioannes Driander Vetteris* in Catorum ditione natus, Medicinæ & Mathematicarum artium professor eximius, quas & doctissimis scriptis illustravit, & in Astronomicis multa adinvenit, novis instrumentis fabricatis, aut ab aliis inventa fecit meliora, ac tandem Marpurgi, ubi diu docuit, XIII Kalend. Ian. ad alteram vitam migravit.

---

## CLO IO LXI.

**S**ub id *Gabriel Faernus Cremonensis* ultimum diem clausit, immaturâ morte ereptus, qui in Pii IIII P. M. dum adhuc Cardinalis esset, & postea in Caroli Borromæi non minùs nobilitate generis, quàm morum sanctimoniâ illustrissimi Cardinalis, familiâ politioris litteraturæ studia excoluit, & exactâ in scriptis veterum ad codices MS. examinandis diligentia ac sollertiâ excelluit, quod quædam Ciceronis post obitum ejus publica-

ta, & Terentius in primis aliquot post annis à P. Victorio summo Faerni admiratore editus posteris testabuntur; non mediocrem etiam à studiosis gratiam promeritus fabellis Æsopicis vario; carminum genere expressis; majorem initurus, si Phædri cujus sive imitatione sive æmulatione luserat; nomen aut non dissimulasset, aut scripta quę legerat, & penes se habebat, non suppressisset. Verum ita fatis comparatum erat, ut quem Faërnus nobis invidit, eum viri optimi & undecunque doctissimi fidei ac industrię deberemus, qui ad alia innumera, quibus posteritatem devinxit; beneficia hunc cumulum adjecit, & veteratorem aulicum in tenebris apud Italos delitescentem nactus recensuit, ac paucis ante mortem diebus luce donavit.

Circa hæc tempora, nam de loco & die obitus mihi quantumvis diligenter indaganti minimè certo constat, finem vitæ ad publica commoda devotæ imposuit *Arnoldus Arlenius* in Campinia Atuaticorum regione trans Diesam amnem, qui Sylvam  
seu



seu Boscum-Ducis alluit, vico ignobili natus, indeque nominè ingeniosè ab ipso effecto Peraxylus nuncupatus, qui, quantum Gabriel Faërnus in Latinis scriptoribus castigandis sollertiam, tantam in Græcis adhibuit. Huic vel editione Iosephi Græcâ multum posteritas semper debitura est, quam ille ex V. Illustr. Didaci Hurtadi Mendozæ tunc apud remp. Venetam oratoris optimo exemplari publico dedit, adjectis etiam libris contra Appionem, qui nusquam alibi reperiuntur; Mendozâ dein, cui tunc navabat operam, ex Italia decedente ad Basileam amenissimum litteratorum secessum se contulit, ubi industriam per aliquot annos exercuit, & Henrici Stephani operâ foeliciter usus est. Viri de literis tam bene meriti memoriam quamvis incerto tempore ac loco heic renovare, quàm omnino indictum præterire satius visum est.

Meruit & qui in juventute erudienda tam gnaviter laboravit, ne indictus prætereat *Melchior seu Melior Volmarus* Ro-

rovilla Helvetiis fœderatâ civitate Longavillanorum ducum nostratium ditionis natus, qui Lutetiæ bonis litteris sub Iacobo Fabro Stapulensi imbutus, Avarici Biturigum utramque linguam Margaritæ Navarrae reginæ stipendiis magnâ cum laude professus est, ubi & jurisprudentiæ sub Andræa Alciato operam dedit, inde in Germaniam ab Ulrico Virtembergico duce Tubingam evocatus, diu in eâ scholâ jus & Græcos auctores interpretatus est, ac tandem rude donatus Isenam se contulit, ubi vir bene de re litteraria meritus, & magnâ studiorum consensione cum Ioachimio Camerario conjunctus, hoc anno decessit, cum LXIII vitæ attigisset.

---

CIO IO LXII.

**H**Oc eodem anno prid. Eid. IXbris, Tiguri *Petrus Martyr* Vermilius Florentinus, ingenio & eruditione inter suos præstans, variâ fortunâ ac diversis peregrinationi-

grinationibus totâ vitâ jactatus, qui nuper  
 è Gallia, ubi colloquio Possiaceno inter-  
 fuit, domum redierat, anno climacterico  
 suo in vivis esse desuit, relictâ unicâ filiâ,  
 quæ ad extremam inopiam ac propè men-  
 dicitatem ob flagitiosam mariti vitam re-  
 ducta, Senatûs Tigurini memoriæ patris  
 eam gratiam rependentis benignitate sub-  
 levata est.

Ante Vermiliûm *Bonifacius Amerbachius*  
 Basileæ natus I. C. anno ætatis LXVII in  
 patria obiit Kalend. Maii.

Nec multo post fatis concessit *Iacobus*  
*Hollerius* in Stampensi agro haud procul à  
 Lutetia ortus, Philosophiæ & Medicinæ  
 studiis compressis clarus, ad quam homo  
 dives, & quæstui, qui uberrimus ex ea pro-  
 fessione in populosa urbe colligitur, minùs  
 intentus acerrimum judicium attulit, ut de-  
 ploratos morbos, & ob festinationem ab  
 aliis per vicos vagâ mulos cursitatione fa-  
 tigantibus minùs cognitos summâ fœlici-  
 tate curaverit. Scribendo etiam magnam  
 temporis partem impêdit, sed in morbum  
 ex

ex mœtore publico contractum incidens ,  
 extremam manum illis immortalitate  
 dignissimis scriptis imponere non potuit,  
 quæ aut à plagiariis suppressa , aut postea,  
 sed incuriosè, edita sunt, magno famæ tan-  
 ti viri , sed majore reipublicæ dispendio ;  
 quod filium cognominem ejus aliquoties  
 postea conquerentem audiui , qui unus ,  
 quo erat admirabili ingenio, & omni litte-  
 raturæ ac scientiarum genere egregiè in-  
 structo præditus , eam jacturam sarcire  
 potuit, quamvis in dispari professione ver-  
 satus : & procul dubio est , si otium ei à  
 publico munere, & peregrinationibus lon-  
 ginq̃uis , quibus bonam ævi brevis ipsi à  
 Deo concessi partem contrivit , quin scri-  
 pta paterna multo meliora & ad auctoris  
 mentem castigatiora publico daturus fue-  
 rit.

Ante Hollerium *Gabriel Fallopius* Muti-  
 nensis Patavii , ubi publicè profitebatur,  
 obiit, VII Eid. VIIIbris, immaturâ morte ,  
 quippe cum tantum XXXIX annum exe-  
 gisset , cum Philosophiæ ac cœterarum  
 doctrina.



doctrinarum , tum rei anatomice inprimis , variis observationibus locupletatz , atque adeo utriusque Medicinæ laude ornatissimus , quam & doctissimis scriptis illustravit.

*Bassianus Landus* Placentinus in Patavina Academia professor , cujus extat de antiquis imaginibus commentarius , miserabili casu hoc anno periit , prid. Kalend. IXbris à sicario vulneribus aliquot confosus.

Annum clausit mors *Bartholomai Cavalcantii* antiquâ patritiâ familiâ Florentiæ anno CIO IOIII nati ex ea gente quæ olim Vidum Francisco Petrarchæ sui sæculi excellentissimo Poëtæ ac Philosopho viro optimo coætaneum dedit. Nam hujus ad illum carmina etiamnum extant. Bartholomæus autem ob libertatem patriâ profugus , à puero egregiâ optimarum scientiarum cognitione instructus , consilio & eloquentiâ præclaram maximis in rebus Paulo III & Octavio Farnesio ejus nepoti , sed maximè Henrico II in Senensium

N

causa

causâ, dum Francorum armis pristinam libertatem tueri afflictæ reipublicæ licuit, operam navavit, ac magna negotia ubique summâ cum prudentiâ & integritatis laude gessit: demum securâ inter Gallos & Hispanos pace, otii litterarii cupidus Patavium secessit, ubi studiis & vitæ finem fecit V Eid. Xbris, ad Francisci à Ioanne filio sepultus. Præcipua ingenii sui reliquit monumenta; de Rhetorica libros VII, & de optimæ reipublicæ statu commentarium quem Fr. Sansavinus auctori posthumum publicavit.

---

## CICERO LXIII.

**A** Pud nos sed dispari fato in vivis esse defierunt tres magni nominis in literis viri; *Ioan. Brodeus* Cæsaroduaio primariâ Turonum urbe familiâ honestâ natus, qui tyrocinium litterarum cum Petro Danesio fecerat, & in Italia Iac. Sadoleti, P. Bembi, Bap. Egnatii, Pauli Manutii perfami-

perfamiliares, ad puriores litteras Philosophiæ, Mathematicarum artium ac sacræ linguæ non mediocrem cognitionem ad-  
jecerat: dein in patriam reversus quietæ vi-  
tæ sed non otiosæ se dedidit, quod multæ  
reconditæ eruditionis lucubrationes abun-  
de testantur, quas vir bonus procul ab om-  
ni ambitione ac ostentatione positus alie-  
nis potius quàm suis auspiciis publicari  
passus est, eo rariore modestiæ exemplo,  
quòd nostro seculo homines non solum  
ex opibus, Magistratibus & aliis honori-  
bus, sed etiam ex litteris indignâ vanitate  
gloriam aucupantur; tandem apud B.  
Martinum, cui Collegio nomen dederat,  
in litteris assiduus consenuit, & sexagesi-  
mum annum prætergressus ineunte anno  
placide ad Deum migravit.

Eo junior, nam vix annum trigesimum  
tertium exceſſerat, *Stephanus Boetianus* Bur-  
digalensis Senator Sarlati, quod erat illi  
natale solum, in Petrocoriis ultimum vitæ  
diem clausit, admirando vir ingenio &  
multiplici eruditione cum exquisitâ facun-

diâ conjunctâ insignis , quam ad civilem scientiam ferè inflexerat , rarâ & supra ætatem prudentiâ rebus maximis gerendis par , nisi longius ab aula positus & præmatura morte ereptus esset , quæ & divini hujus ingenii fructus publico invidit; Michaelis Monrani tamen singularis ejus amici curâ factum est , ut non omnis mortuus sit , publicatis aliquot scriptis posthumis , quæ elegantiam miram & sensuum reconditorum acumen sapiunt : nec Anthoticon ejus sileri debet , cujus longe aliam in rem , quàm ex mente auctoris postea evulgati , honorificam mentionem suo loco fecimus.

Hanc litterarum jacturam cumulavit *Arnoldi Ferroni* itidem Senatoris Burdigalensis nondum plane quinquagenarii mors , qui patrias leges , ut bonum civem & præstantissimum jurisconsultum decuit , doctissimis scriptis illustravit , & historiam Gallicam secundum Paulum Æmilium ad excessum Francisci I prosecutus est , multaque alia scripsit , quæ memoriam  
ejus



ejus apud posteros commendant, & Attici nomen ipsi à doctissimo undiquaque nostrâ ætate Iul. Cæsare Scaligero attributum conciliaverunt.

Nec silentio sepeliri debet *Io. Baptista Gellus* Florentiæ natus, conditione longè ingenio inferiore, quippe calcearius, qui licet nullis litteris Latinis tinctus, Academię Florentinę alter conditor & magnum ornamentum exstitit, & linguâ patriâ dialogos Luciani æmulatione, sed majore prudentiâ & moderatione scripsit, quam libertate cœlo illo adhuc incognitâ alicubi impegisse creditus, ideoque censurâ notatus; tandem hoc anno jam senex naturæ debitam persolvit, ad Mariæ Novellæ in monumento suorum conditus.

Ex eadem pane officina prodiit *Vulfgangus Musculus* Dulsæ Lotaringiæ in finibus Alsatiæ oppido natus, magni inter suos nominis Theologus, qui Monasticam olim, dein abjecto cucullo Protestantium doctrinam professus, vitam aliquando opere manuario textrinam exercens tole-

ravit ; postea seriò animum ad litteras jam ætate provectior appulit, in quibus improbo labore tantum profecit, Martini Buce-ri, quantum licuit, sectator assiduus, ut famam concionibus quæsitam etiam laboriosissimis editis in S. Scripturam commentariis auxerit. Argentinæ primùm & Augustæ Vindelicorum, ac postremò III Kalend. VIIbris, Bernæ in Helvetiis, ubi ultimum diem anno ætatis LXVI clausit, pastoris munere defungens : quem ad nomen ipsius ludens quidam non musculum aut ex murium famelicorum, qui felium ungueis timent, numero esse dixit, sed ex his potius, qui catos rapaces territarent.

Eodem & hoc anno fatis concesserunt *Sebastianus Castalio* Allobrox, & *Henricus Glareanus* ; & hic quidem summus olim D. Erasmi amicus, & Musices scientiâ clarus Friburgi Brisgoiæ, ubi profitebatur, cum rem literariam diu voce & scriptis, quantum ea tempora ferebant, juvisset, annum agens septuagesimum quintum, animam Deo reddidit. Castalio vero cum  
purio-

puriorum linguarum cognitionem ad Theologicam scientiam adjunxisse se putaret, impuras manus multorum iudicio ad sacra tractanda attulit, cum à rebus ad tantum opus necessariis homo imparatissimus novam Bibliorum interpretationem insolenti temeritate molitus est, à Gallicis & Helveticis Ecclesiis, quarum alioqui doctrinam amplectebatur, in quibusdam dissidens; & Bernardino Ochino segregi, cuius & dialogos Latinos fecit, præcipuè in Polygamia astipulari creditus; unde pleraque contraria inter eos scripta emanarunt: tandem Basileæ non ita senex, quippe vix annum XLVIII supergressus, III Kalend. Ianuar. obiit ex lue pestilenti, quæ hoc anno vehementer per totam Germaniam grassata est, adeo ut Francofurti, Norimbergæ, Magdeburgi, Hamburgi, Gedani, & per civitates Vandalicas ac maritimas autumnino uno CCC hominum CIO contagione absumpta morerentur.

Paulò

## CIC IJ LXIII.

**P**Aullò antè, XIII Kalend. Iun. *Io. Calvinus* Novioduni in Veromanduis natus, acri vir ac vehementi ingenio, & admirabili facundia præditus, tum inter Protestanteis magni nominis Theologus, cum septennium integrum variis morbis ac cruciatibus conflictatus esset, nec minùs propterea in munere suo assiduus, aut à continua scriptione abstineret, tandem ex respirationis difficultate Genevæ, in qua XXIII annos docuerat, obiit, cum pæne quinquagesimum sextum vitæ annum explevisset.

Post eum *Martinus Borraeus* Cellarius Stugardiæ in Suevia natus, vir doctissimus, & præter Theologica aliis etiam scriptis editis clarus, Basilix pestē correptus moritur. V Eid. VIIIbris, cum annos LXV exegisset.

Quà ex eadem lue VI Kalend. Xbris  
Tiguri,



Tiguri, ubi profitebatur perit *Theodorus Bibliander* vir multijugæ eruditionis, valde senex, cui in munere suffectus est Io. Gul. Stukius, ille quidem admodum tunc juvenis; sed quem præter exquisitam in illa ætate eruditionem, singularis morum probitas apprime commendabat; cujusque incolenda Christianissimorum regum majestate eximia semper etiam deploratissimis temporibus fides existit. Novæ Bibliorum editioni anno **MDLXLIII** Tiguri publicatæ, quam Leo Iudæ inchoaverat, & moriens ut opus persequeretur, collegis in fidem religiose adactis transcripserat, ultimam manum imposuit Bibliander Chunrandi Pellicani, & Petri Cholini Tugiensis Græcæ linguæ peritissimi operâ adjutus: quam translationem in sua editione biennio post ad veterem adjecit Robertus Stephanus, suppressâ eorum, qui in illa laborarunt, mentione; & Hispani Theologi diu post recognitam per Gulielmum Rovillium denuo Lugduni excudendam curaverunt. Quod eo

commemorandum duxi, ut versionis tanti apud nos & Hispanos ipsos factæ origo cognosceretur, & insigne documentum extaret; quid utilitatis ex adversarii libris & industria, si semotis odiis charitatem & æquitatem induamus, ad Dei gloriam capi possit.

Hoc eodem anno *Pet. Franciscus Iambularius* homo sacris addictus, Latinis, Græcis, & Hebraicis litteris eruditus, qui multa ad linguæ Etruscæ illustrationem conscripsit, & novissimæ antiquitatis historias Italicas, quæ postea editæ sunt, exorsus, morte præpeditus ultra annum salutis CIO CC prætexere non potuit, Florentiæ fati concessit.

Nec multo post *Andreas Vesalius* Bruxellis in Brabantia natus præstantissimus medicus, & opere de fabrica humani corporis edito clarissimus, cum Hispaniæ pertæsus petito à Philippo, comœatu, cum Iacobo Malatesta Ariminensi copia- rum Senatûs Veneti duce in Cyprum navigasset, & ut voti in gravissimo morbo,  
dum

dum in aula Philippi commoraretur, nuncupati se religione exsolveret, inde Hierosolyma profectus esset, à Senatu Veneto honorificis stipendiis oblati, ut Patavii profiteretur, evocatus, dum redit, adversis Venetis, ad Zacynthum insulam delatus in loco solitario vitam miserabiliter finit, Eid. VIIIbris cum vix quinquagesimum ætatis annum attigisset, ab aurifabro, qui forte illuc paulò post appulit, agnitus, & ne esca feris fieret, vili funere conditus.

Nec silentio sepeliri debet *Gulielmus Morellius* Iuliano fano in Calerensi Neustriæ pago in re tenui natus. Is propriâ industriâ & in aliena juvanda rei litterariæ sedulam quamdiu vixit operam navavit, & accuratâ linguæ Græcæ peritiâ meruit, ut cum Hadriani Turnebis grande nostri sæculi ornamentum Typographiæ Regiæ Græcæ, quam, ut publico prodesset, minime dedignatus fuerat, in regionum professorum collegium cooptatus curâ se abdicasset, & quaereretur dignus tanto mu-

nere successor, à Turnebo ipso nominaretur; integrumque novennium edendis innumeris libris ac præcipuè Græcis consumpsit, ac tandem eleganti admodum Demosthenis editione adornatâ, laboribus confectus Lutetiæ defecit XI Kal. Mart.

Annum clausit *Ioan. Buteonis* mors, qui Orontii Finæi Mathematicarum artium apud nos instauratoris primùm discipulus præceptorem longè superavit, cum eo de quadratura circuli acerbè postea digladiatus: is loco nobili natus, & ut perhibetur è Germania oriundus, ad exonerandam ut sit familiam, quæ XX liberorû prole gravabatur, vitam Monasticam in S. Antonii Vienneſis cœnobio à puero professus fuerat, ubi in otio vir ad litterarum ac scientiarum illarû præcipuè studia natus multa scripsit, partim dum viveret, publicata, partim ab opicis furibus suppressa; multa itidem adinvenit; inprimis in Musicis instrumentis & machinis novis fabricandis ingeniosus, cujusmodi compluria industriæ suæ monumenta vir ab omni ambitione alienus  
qui



qui à labore & meditatione nunquam cessaret, totâ vitâ, quæ illi ad LXXV annum usque à Deo prorogata est, edidit, cumque ob turbas civileis, quæ toto regno sed maxime in Delfinatu totum superius triennium sævierant, relicto ægre Musæo suo Romam concessisset, procul à libris ex mœrore tandem contabuit.

*Michael Angelus Bonarota* Florentinus Romæ decessit, cum ætatis annum XC ageret, nostrâ ætate atque adeo post priscos Græcos picturæ statuariæ & Architecturæ præstantissimus artifex, cujus nomine ut passim orbis personat, sic plerisque locis, sed Romæ & Florentiæ præcipue, stupendi operis monumenta ejus visuntur. Huic initio cum Raphaële Urbinate pictore famosissimo æmulatio fuit, sed mortuo in ætatis flore Raphaële, qui ad majora aspirabat, longevæ ætatis beneficio facile principatum in præstantissimis illis artibus adeptus est, & ad mortem usque tenuit, plerisque suæ industriæ admiratoribus, raris æmulis aut imitatoribus relictis. Huic

Cosmus, qui summè his artibus delectabatur, tantum honorem habuit, ut ejus corpus Româ Florentiam transferri curaverit, ut in patria sepeliretur; id summâ pompâ peractum, deducantibus funus XXC præstantissimis artificibus ad B. Laurentii ædem: ubi à Benedicto Varchio publicè laudatus & conditus est, quæ omnia quia fuscus Georgius Vasarius Arretinus præstantissimus pictor & architectus singulari libro complexus est, vitâ ejus diligenter perscriptâ, & enumeratis operibus, de iis plura dicere supersedebo.

## C I O I O L X V.

**N**Ec minus hominibus litterarum doctrinâ claris hic annus funestus fuit. Nam *Alexander Alesius* Scotus magni inter suos nominis Theologus Lipsiæ, in qua XX annis docuerat XVI Kal. April. decessit.

Et post eum *Ioan. Matheſius* Roclicienſis

sis Non. VIIIbris, qui in valle Ioachimica diu docuit, regione metallis foetâ: & ex ea occasione de fossilium natura multa linguâ Germanicâ scripsit; cum vero mane concionem de filio viduæ in vitam à morte revocato habuisset, & in futura vita singulos pios parentibus suis & amicis restitutum iri, & se mutuò agnituros Lutheri exemplo docuisset, tribus post concionem horis pari fere cum Luthero morte creptus est, haud ita senex, quippe qui vix LI annum excessisset.

Eo senior, atque adeo octogenarius *Io. Langius* Leobergæ in Silesia natus, medicinæ artis præstantissimus, quam & doctissimis scriptis illustravit, Heidelbergæ, ubi apud Palatinos VII viros diu principem locum tenuit, XI Kalend. Vtil. obiit.

Extremum tandem annum clausit *Conradi Gesneri* Tigurini mors omnibus seculis deploranda, & eo magis quòd vix annum ætatis XLIX attigerat, viri longissimâ vitâ dignissimi, & quam exegisse videbitur iis, qui ætatem ejus ex librorum, quos

quos plurimos ac utilissimos confecit, industria suâ illustravit & edidit, non ex annorum, quos vixit, numero metientur. Is primum studiorum tyrocinium in Gallia Lutetiæ Parisiorum & Avarici Biturigum fecit; inde in omni litterarum genere excellens, & linguæ Latinæ ac Græcæ peritissimus, peragratâ Italiâ in patriam rediit, ubi Medicinam fecit, & Philosophiam publico stipendio professus est, cujus eam præcipuè partem, quæ historiâ naturalem spectat copiosissimis scriptis explicavit; antiquorum quoque complura monumenta, præcipuè Theologorum, primus in lucem edidit. His accessit præter doctrinam, quæ in eo eximia fuit, incredibile juvandæ reipublicæ litterarię studium, quo usque ad ultimum vitæ spiritum flagravat, cum lue pestiferâ correptus, jam viribus linquentibus, ad ordinandam non rem domesticam, sed supellectilem librariam è lecto surgeret, ut quæ vivus publicare non potuerat, ita disponderet, ut post mortem ejus ad reipublicæ utilitatem edi possent.



sent. Huic studio, abjectâ omni aliâ, præterquam salutis æternæ curâ, intentum, & plus quàm vires ferre poterant diligenter incumbentem, cum vasa se colligere quasi discessurum amicis diceret, mors eum, qui nunquam otiosus in vita fuerat, oppressit, & extremos optimi viri labores reipublicæ quasi invidere visa est; qui tamen non omnino perierunt. Nam eo mortuo ex illius bibliotheca ita ab eo ordinatâ, tanquam ex locupletissimo penu pleraque postea in lucem prodierunt, curantē Gaspare Volfio, quæ desiderium ipsius cottidie renovant. Mortuum laudavit Iosias Simlerus, & elegantissimo carmine Theodorus Beza, quo inter alia Naturam eum tanquam fidum suorum sacrorum antistitemplorare dicit, mutam deinceps futuram, nisi ipse mortuus loquatur.

Annus & hic abstulit apud nos maximum hujus ætatis ornamentum, *Hadrianum Turnebum* Andelii ad Sequanam familiâ nobili, sed in tenui re natum, virum omni virtutum omniumque litterarum

P

genere

genere instructissimum, qui politioris ini-  
 tio litteraturæ Græcæ ac Latinæ, dein Phi-  
 losophiæ in schola Parisiensi professor re-  
 gius plurima raræ eruditionis monumenta  
 edidit, & præmaturâ tandem morte statim  
 post edita illa æternitate digna adversaria,  
 summâ omnium ordinum, ad quos uni-  
 versos unius mors pertinere visa est, mæ-  
 stitiâ, rebus humanis exemptus est prid.  
 Eid. Iun. cum tantum LIII annos vixis-  
 set. Hujus corpus quo die mortuus est, uti  
 testamento mandaverat, paucis amicis il-  
 lud deducantibus, nullâque funebri pom-  
 pâ, in scholasticorum cœmiterio horâ no-  
 nâ vespertinâ conditum est, ubi sepulturæ  
 locum delegerat; quo etiam loco præstanti  
 doctrinâ medicum Iacobum Silvium pau-  
 cis ante annis sepeliri voluisse meminerat.  
 Quemadmodum boni omnes ac litterati  
 vivum summopere dilexerant, ita in eo  
 mortuo laudando incredibili æmulatione  
 certarunt; & quidem ei Io. Auratus, Dio-  
 nysius Lambinus professores Regii, Petrus  
 Ronfardus, Germanus, Valens P. P. Ioan.  
 Passera-

Passeratius, Alfonsus Delbexeus, qui postea Episcopus Albiensis fuit, Nicolaus denique Vergetius, Angeli illius Cretensis elegantiorum Græcæ linguæ characterum ad omnem admirationem & oculorum jucunditatem formatoris F. diversâ parte Io. Mercerns, Lucas Fruterius, alii, epitaphiis carminibus parentarunt; & ut erant tunc scissa ob religionis novos motus studia, mortuum quisque vindicabat, dum simul & antiquæ religionis retinentes, & novam profitentes, ad utras partes moriens ille inclinasse diceretur, multum momenti partibus suis allaturum fuisse credunt.

Paulò post mense VIIIbr. *Antonius Goveanus* debitum naturæ persolvit. Is genere Lusitanus, sed adoptione (sicut ipse, quo erat animi candore, palam profitebatur) Gallus, cum puer & litterarum rudis, ab Andrea Goveano patruo in Galliam adductus esset, tantâ fælicitate in humanioribus studiis ingenium exercuit, ut nemo purius Latine scriberet, nemo versus elegantius

gantiùs pangeret. In Philosophia vero Aristotelica tantum profecit, ut ejus patrocinium jam tum in illâ juvenili ætate contra Petrum Ramum ejus importunum oppugnatorem magnâ cum laude susceperit: postea quasi omnium scientiarum æquè capax ingenium illius esset, quodque singuli in singulis, ipse unus in omnibus præstare posset, ab Æmilio Ferreto, qui Avinionē jus civile docebat, cum Lugduni privatis studiis intentus desideret, ad filius perplexæ scientiæ professionem evocatus est, in qua rursus exiguo tempore tantos progressus fecit, rationem veram enodandarum ex antiquitate spinosarum juris quæstionum statim animo complexus, ut Jac. Cujacius, cum Tolosæ ante undecim annos in Ulpiani titulos scriberet, jam tum testatum reliquerit, Goveanum ex omnibus juris Iustiniani interpretibus, quotquot sint aut fuere, unum esse, cui, si quæretur quis excellat, palma deferenda sit. Certè ex Cujacio ipso, cum Valentia ei operam navarem, & postea sæpius audi-



vi, ita se de Goveano semper sensitse, & laudabili emulatione tunc veritum esse, ne is speratam in ea professione gloriam, quam assiduo studio & longâ vitâ omnium consensu postea meruit, sibi præriperet. Igitur Goveanus Tolosæ primùm, dein Divonæ Cadurcorum, postea Valentia & Gratianopoli jus civile magnâ auditorum frequentiam professus est, impolitorum interpretum, quorum tantus numerus est, mole rejectâ, & ardente apud nos bello Galliâ, quam summopere dilexerat, in Italiam pulsus. Et in aula Philiberti Sabaudia ducis Margaritæ commendatione honestum otium nactus (nam & in privatum Principis consilium Senator cooptatus est) morbo ex immodico, ut fertur, peponum usu contracto, Augustæ Taurinorum decessit; unus rarâ hoc ævo gloriam communi doctorum suffragio hoc adsecutus, ut & Poëta elegantissimus, & summus Philosophus, & præstantissimus juris interpret simul haberetur: quod cœlo Gallico, in quo à teneris probè institu-

tus fuerat , vir gratus acceptum referri volebat.

*Gulielmum Philandrum* Castellione ad Sequanarum oppido natum , qui & hoc anno obiit , pæne præterieram , quando is antequam è vivis excederet , se quodammodo ipse silentio sepelivit ; quanquam scripta egregia , quæ in Vitruvium , cum Romæ in Georgii Armeniaci tunc Francisci I oratoris , dein in Cardinalium collegium cooptati familiâ esset , publicavit , satis plenam fidem apud omnes faciunt , qualis is quantusque fuerit , & quid denique in antiquitate Romana & politiore litteratura illustranda , quæ tunc primum extolli incipiebat , tum in omni scientiarum genere , & in Mathematicis præcipuè præstare potuerit , si non aliam à pristinâ diligentiam & sobrietate vivendi rationem postea institisset. Verum is postquam magno ordinum urbis consensu civitate Romanâ donatus est , cum relicta Italiâ in Galliam reversus esset , non solum reliquum vitæ tempus abjectis studiis inutiliter elabi , sed  
etiam

etiam segnitie ingenii acumen hebescere passus est; & tandem sui oblitus, & amicis, quibus ob raram eruditionem notus erat, obliviscendus, Tolosæ non tam senio effectus quàm otio marcidus decessit X Kalend. Mart. anno ætatis LX, à munifico Mæcenate civitatis Archiepiscopo prætoriorum memoriâ meritorum ad B. Stephani in porticu sepultus; multa ille de pictura & statuaria antiquorum pollicitus, multa & in Mathematicis commentatus fuerat, quæ etiam se Tolosæ vidisse quidam scripsere, quàm summo studiosorum desiderio semper expetita, tam magno eorundem detrimento hætenus suppressa. Quod si verum est, profecto exorandos plagiarios illos censerem, ut tanti viri scripta, potius suppresso auctoris nomine & alieno substituto, quod P. Gillio accidisse diximus, ederent, quàm tam eximiiis & in publicum utilibus laboribus rem litterariam defraudarent.

Abstulit & hic annus *Kyriacum Stroz-*  
*zam* Florentinum patricium, qui ex morbo

bo calculi studiosis familiari, VIII Eid. Xbris anno climaeterico suo decessit Pisis, ubi XX annos Aristotelem interpretatus est, cum VIII annis ante Bononiæ professus esset, & rursus antea admodum juvenis in Academia Florentina legisset ac disputasset, ut illic mos viger, ac postea linguam Græcam & Philosophiam summâ cum laude docuisset. Libris Politicorum VIII, qui extant, nonum & decimum Græcâ linguâ conscriptos adjecit, quibus tanti viri stylum & mentem exprimere conatus est; libros etiam de prima Philosophia ex Arabum commentariis supplavit.

His merito suo adnumerabitur *Ioan. Grollierius* honestissimâ ac perantiquâ familiâ Lugduni natus, ex qua orti Imbertus Solanus & Antonius Serverius Grollierii gentiles, qui turbulentis his ultimis Galliaë temporibus regni causam regumque nomen constantissimè tutati sunt. Ioannes is cum ab adolescentia litterarum gustum & incredibilem amorem hausisset,

in



in eo jūvenili æstu artissimam cum  
 Guil. Budæo jam sene amicitiam coluit,  
 et admirandum ejus de Asse opus, cum  
 Gallicarum copiarum in Mediolanensi  
 principatu quæsturam administraret, Ve-  
 netijs ab Aldo Manutio excudendum  
 curavit, anno hujus seculi XXII, tan-  
 tumque obviâ in litteratos humanitate  
 homo Gallus in Italia meruit, ut quo  
 quisque doctissimus tunc erat, ita in ejus  
 benevolentiam se insinuare appropèraret.  
 Itaque Lud. Coelius Rodiginus, vir ævi  
 illius totâ Italiâ celeberrimus, antiquas  
 lectiones suas illi, tanquam eximio litte-  
 rarum fautori, et secundum Principem  
 suum munificentissimo litteratorum Mœ-  
 cenati, nuncupavit; exclusis dein Italiâ  
 Gallis, in regno Quæsturam, cum id mu-  
 nus nondum numero viluisset, summâ  
 fide ac diligentîâ exercuit, et in eodem  
 litterarum amore perseveravit, insigni  
 numorum antiquorum, et optimæ notæ  
 librorum supellectile comparatâ; quos  
 nullis sumptibus parcens, vir munditiæ

Q

et

& elegantia in omni vita assuetus, pari elegantia ac munditia ornatos ac dispositos domi tam curiosè asservabat, ut ejus bibliotheca cum bibliotheca Asinii Pollionis, quæ prima Romæ instituta est, componi potuerit: tantaque copia librorum fuit, ut post tot ejus in amicos largitiones, tot varios casus, quibus illi jactati ac male habiti sunt, iustiores bibliothecæ, quæ hodie Lutetiæ et aliis regni locis visuntur, non alio majore, quàm à Grollerianis libris ornamento commendentur. Numi ærei, qui optimi, cum Luetia in Provinciam migrassent, jamque in eo essent ut in Italiam exportarentur, regis Christianissimi curâ effectum est ne tanto thesauro Gallia defraudaretur, eosque grandi precio redemptos in Musæum suum cum aliis prisca ævi monumentis inferri mandavit. Grollerius autem dum serio rerum pulcerrimarum studio occupatur, homo alioqui innocentissimus, ab invidis insidiosè accusatus, de fortunis, ac pene de capite discrimen adiit, ac fortasse

casſe oppreſſus fuiſſet, niſi innocentiam  
 ipſius, quâ ſolâ nec ullâ præterea amico-  
 rum ope imploratâ, ille confidebat, non  
 indefenſam reliquiſſet. Chriſtophorus  
 Thuanus parens meus, qui ſummâ quâ  
 pollebat in ſenatu et in urbe auctoritate  
 hactenus uſus eſt, ut bonos à calumnia-  
 toribus, tenuiores à potentioribus, doctos  
 ab ignorantibus opprimi non pateretur.  
 Tandem in eodem vitæ tenore, eandemq;  
 munditiam et elegantiam ſervans vir de  
 repub. et litteris optimè meritus ad octo-  
 geſimum ſextum annum pervenit, atque  
 hoc anno xi Kal. ixbr. in ædibus ſuis Lu-  
 tetiæ deceſſit, in ſuburbio ad inſigne S.  
 Vincentij, quod nunc Germanis dicitur  
 cœnobium, juxta majus altare ſepultus.

---

CI) I) LXVI.

**I**oannes Draconites Villagenario major  
 Vittembergæ obiit XVI Kal. Maii, cep-  
 to Biblitorum æmulatione Originis et

alterius Complutensis Editionis, quintuplici nec perfecto opere clarus, quem brevi post secutus est VI Eid. Mai. *Leonardus Fuchs* Vemdingæ oppido Ratiæ natus, qui summâ cum laude Medicinam Ingolstadij ac dein Onolsbachij fecit, & publicatâ stirpium historiâ magnam laudem adeptus, tandem Tubingæ LXV. ætatis anno decessit.

Paullò post V Kal. viiibr. M. *Hieronymus Vida* Cremonensis ante xxxv annos à Clemente vii Albæ Pompeiæ ad Tana-  
rum episcopus creatus, qui primus inter Italos post Iacobum Sanazarium poeticam ad res sacras transtulit, & versibus elegantissimis ac purissimis provinciam suam excoluit; in eadem qua vixerat pietate placidè ad Deum migravit, Albæ in Ecclesia sua sepultus, eiq; postea à civibus suis, de quibus tam bene meritus erat, Exequiis in majori urbis templo magnâ frequentiâ celebratis & publicis elogijs honorificè parentatum est.

Obijt & eodem anno qui fuit illi  
cli-



climaſtericus, xvi Kal. xbr. *Benedictus Varchius*, cujus quę ſoluta et numeroſa oratione Etr uſcè ſcripſit, meritò inter doctos magno in pretio habentur. Vixit ſummâ animi libertate, procul ambitu et ſine avaritia, & in eadem ſimplicitate deceſſit Florentię, in Camaldulenſium ſodalium tẽplo ſepultus.

*Aloſius Cornarus* rarũ et memorandũ vitę longę, quam ad centeſimum annum integris animi & corporis ad extremum uſque ſpiritum ſenſibus produxit, exemplum, heic in memoriã revocandus eſt. Is ex illuſtriſſimã Venetę nobilitatis familia ortus, defectu natalium a reipub. honoribus & adminiſtratione excluſus eſt; uxorem Utinã in Iſtria Veronicam ex Spilimbergica familia duxit; et cum ampliſſima bona poſſideret, nihil non fecit, ut prolem ex ea tolleret, tandem et votis ad Deum conceptis et medicorum ope, uxoris dilectiſſimę ſed jam provectę ætatis frigiditytem ſuperavit, et cum minùs putabat, illa ex marito concepit & filiam e-

nixa est, quam ille Ioanni Cornaro Fantini F. ex Cypria Cornarorum stirpe opulentissima elocavit, ex eaque, sed jam senne, natos nepotes et pronepotes magno numero vidit; nam Ioannes ex Clara, ita filia vocabatur, VIII masculos, & tres foeminas suscepit. Infirmities ex intemperantia in adoleſcētia contractas Aloysius sobrietate & victūs moderatione emendavit, & propensionem ad iram subitam rationis vi temperavit, ut quā infirma valetudine & ira impotenti in florenti ætate fuerat, tam prospera corporis constitutione & miti natura in senectute fuerit. Quade re & libros conscripsit, jam senectutem ingressus, quibus prioris vitæ confusæ & postea emendatæ rationes explicat, & sibi longissimam vitam pollicetur. Nec spe suâ falsus est; nam centenario maior hoc anno Petavii, ubi larem fixerat, placidâ & sine doloris sensu morte decessit, uxore superstite, quæ virum charissimum haud multum ætate minor paullò post placidissimo itidem obitu secuta

cuta est, utrique ad *B. Antonij* sine pompa,  
sic enim testamento caverant sepulti.

Apud nos Septembr. mense *Carolus Mo-*  
*lineus* Lutetiae Parisiorum, unde ortus erat,  
fatis concessit, juris antiqui & Gallici con-  
sultissimus, cujus notæ in jus consuetudi-  
narium nostrum, ac aliæ doctissimæ lucu-  
brationes apud nos pro ratis juris decisio-  
nibus habentur. Hic est qui Parmensis  
belli initio, condito ab *Henrico II* edicto  
in depravatam Curiae R. in Sacerdotiis dis-  
pensandis disciplinam, cum publicato in  
edictum illud commentario in gravissi-  
mam offensionem incidisset, à patria hanc  
indignam meritis suis gratiam retulit, ut  
solum vertere cogeretur. Cum autem ab  
exilio revocatum Momorantius *E. M.* cu-  
jus ille negotia in foro Parisiensi procur-  
rabat, regi commendaret; En, inquit, ho-  
minē, qui, quod cum xxx bellatorum cis  
facere nequivisti, ut Iulium pontificem  
placatum haberes, libello edito perfecit.  
Postea etiam consultationem in Concili-  
um Tridentinum eadem libertate scripsit,  
quæ

quæ & illi perniciem creavit. Ante annum, cum barbarum à Protestantibus toto regno excitatarum virum optimum tæderet, isque se quasi illarum fau-  
 rem in crimen vocari indignaretur, libellum supplicem Senatui obtulerat  
 Februario mense, quo petebat, ut in eos inquireretur & legibus ageretur. Præ-  
 cipua accusationis capita erant, quòd  
 specie religionis seditiosos cœtus agi-  
 tarent; pecuniam sine regis mandato se-  
 quacibus suis imperarent, consistoria cele-  
 brarent, diaconos, seniores, aliosque admi-  
 nistros instituerent, stipendiis ex plebis sub-  
 stantia eis attributis: quòd his in consisto-  
 riis ministri principem locum obtinentes  
 de omnibus causis, spretâ regii Magistra-  
 tûs jurisdictione, cognoscerent; effræ-  
 nem multitudinem erroneâ doctrinâ à  
 se imbutam ad libertatem & licentiam  
 vocarent: ipsi fere exteri & hospites nul-  
 lâque legitimâ vocatione ad ministerium  
 vocati, & Genevensis administrationis si-  
 ve civilis siue sacræ disciplinam ad ever-  
 tendum



tendum regnum invehierent; Ecclesiasticos in sua functione impedirent, denique omnia facerent ut fidem regis subditorum sollicitarent. Privati autem contra se illorum odii has causas offerebat, quòd confessionem Augustanam, quæ in Germania obtinet, Genevensi & Helveticâ tolerabiliorem dixisset, & in commentariis in consuetudines Parisienses fanaticos eos & seditiosos vocasset; ea propter illos in concionibus, Synodis, ubique palam ipsum traducere, domesticos qui se observent corrumpere, & amanuenses, ne eorum operâ uti queat, minis, precio, blanditiis seducere. Vir bonus ac simplex, qui patriæ caritate, supra quàm dici potest, inflammabatur, cum emendationem in religione, quam tantopore optabat, in licentiam & factiones versam videret, admodum indoluit, ac, si vita suppeteret, religiosè promisit, fore ut exemplo suo scriptisque multos ab errore passim grassante revocaret: in eâque cogitatione paulò post animam Deo reddidit, sexagenario major.

R

Idem

Idem hic annus & nobis *Gulielmum Rondeletium Montispeffulū* natū Medicinæ arte præcellentem abstulit, à Francisco Rabelæso nostrate nihilominus contemptum appellatum in iis libris, quos ingeniosâ magis quàm omnino itreprehensibili jocandi libertate scripsit. Et certe ejus scripta ejusmodi sunt, ut tantę de se opinioni sive excitatę sive sparsę nō respondeant. Unum est quod hominis nomen maxime posteritati commendavit, quod de piscibus edidit; sed eo minore laude, quod illud potius alienę industrię quàm suę debuit, nimirum ex Gulielmi Pellicerii Episcopi Montispeffulani, viri rarâ eruditione ornati, commentariis concinnatum, quod doctissimarum annotationum, quas ille in Plinium scripserat, magno litterarum dispendio amissarum, aut hætenus suppressarum pars erat.

His addemus duos Belgas *Georgium Cassandrum* Cassanto insulâ III à Brugis Flandrorum leucis diffitâ oriundum, qui & inde sibi nomen confinxit. De eo quoniam

niam supra ad annum LXIII in Ferdinandi Cæsaris elogio tam multa diximus, pauciora nobis nunc supersunt dicenda, satisque erit, si in viro & utriusque lingue peritia, & antiquitatis cognitione, ac rerum postremo Sacrarum diligenti scrutatione præcellenti raram hoc ævo modestiam commendaverim, & iis qui ingenium in contentionibus hodie exercent, ad vitandam acerbiter in exemplum proposuerim. Nam tot dotibus instructus ille nunquam fastu intumuit, contumeliis petitus nunquam paria reddidit, nullumque ullius arrogantæ ferocis vestigium, vel in moribus, vel in scriptis ejus depressum fuit. Postquam Brugis diu docuit in Cliviam à Wilhelmo principe evocatus ad discutiendum Anabaptistarum causam Duisburgi aliquandiu hæsit, inde in Germaniam perrexit, & cum Cornelio Galtero studiorum munifico comite Coloniz in Ubiis larem fixit, & post consultationem de controversis Protestantium articulis jussu Ferdinandi Cæsaris scriptam

& ad Maximilianum missam, arthritidis doloribus confectus III Noni Feb. piè defecit, anno ætatis LII, ad B. Francisci funus prosequente Magistratu urbis, & Academia, deductus, & ante summum altare cum honorifico Elogio à Galtero amico individuo sepultus.

Castellandrum sequitur *Lucas Fruterius* itidem Brugenſis, qui Lutetiæ cum plerisque Belgis, & inter eos *Iano Duza*, *Oberto Gifanio*, *Iano Lernutio* degens, proximâ ætate dum pilæ ludo se intemperanter exercet, frigidâ potâ, statim in morbum, quem ferre non potuit, incidit, & cum vix annum XXV. attingisset, vivis exemptus est, raptimque elatus, & in vicina B. Hillarii æde conditus. Is in puriore litteratura cum excelleret, etiam multa commentatus esset, præteritâ morte præpeditus, omnia ea Gifanii iudicio ac fidei commisit, qui pari fide minimè iis usus creditur, vixque lite *Iano Duza* motâ exorari potuit, ut paucula, quæ ex tanta jactura velut ex magno naufragio exiguæ tabulæ superant, sunt publicata.

Ultimus



Ultimus dicetur *Petrus Ioannes Perpinianus* Illicis Contestanorum in Valentina diocesi natus, qui mirâ ad eloquentiam indole fuit, ejusque periculum cum in prima adolescentia Conimbricæ in Lusitania fecisset, inde in Italiam venit, & summa illa Lumina, M. Antonium Muretum & Paullum Manutium in sui admirationem traxit, Lutetiamque missus ut Iesuiticæ Societati, cui nomen dederat & quæ tunc apud nos exagitabatur, dignitatem conciliaret, habitis aliquot ad Parisienseis orationibus; præmatura morte, cum vix quidragessimum annum ætatis attigisset, sub anni exitum in Claromontana schola obiit, magnosui relicto studiosis desiderio, ad S. Benedicti tumulatus.

---

CTO IO LXVII.

**I**dem annus & *Michaelem Stifelium* Eslingensem jam octogenarium, postquam in Saxonia & Borussia diu profes-

foris munere sanctus est, levas in Thuringia abstulit, cujus libri Arithmetici reconditiore numerorum scientia referti in magno, uti debent, pretio inter doctos habentur. Post eum *Ioannes Langus Freista-* diu in principatu Teschinensi in Quadis natus VII Kal. VII br. annum LXIII supergressus, Suidnicii itidē in Silesia obiit, vel fidei Nicephori Ecclesiasticae historiae translatione ad posteritatem commendandus, quam ex veteri pulcherrimoque ac totā Europā unico exemplari Ferdinandi Caesaris iussu fecit; quod vix tandem ac diu post meā curā ac diligentia, ne periret, commodatum heic apud nos suā linguā excudetur.

In Italia *Franciscus Robortellus Utinensis*, qui magno cum strepitu Bononię & Patavii professus, & variis scriptis maiorem de se opinionem excitavit quā implevit, cū Carolo Sigonio, sed impari certamine sæpius et acerbius quā inter litterarū professores decuit, digladiatus, in iisque contentionibus, Germanorum, qui & mortuo  
honorificè

honorificè parentarunt, semper præcipuo favore adjutus, tandem ultimum diem xv Kal. April. clausit, quinquagesimum annum haud multum supergressus.

Robortellū secutus est *Octavianus Pantagathus* qui & Pacatus dici voluit, patriâ Brixianus, Collegii sacri Servorum sodalis, vir antiquâ probitate & omnis antiquitatis ac litteraturæ apprimè gnarus, ad quem cum omnium, qui litteras in urbe profitebantur, concursus fieret, sicuti olim jurisconsulti in circulis, sic ipse domi de re litteraria interrogatus respondebat, ita ut illi ab ejus colloquiis semper eruditiores discederent. Inter alios suæ doctrinæ præcipuos admiratores ac sectatores habuit Onufrium Panuinum, Ant. Augustinum & Fulvium Ursinum, viros doctissimos, qui plurima se ab humanissimo viro hausisse, & in publicum ab illo accepta communicasse ingenuè passim professi sunt. Ipse præter litteras, etiam officiis adeo in cunctos propensus fuit, ut vulgo patris cognomine in urbe coleretur. Tandem  
extremo

extremo hoc anno cum ætatis annum  
 lxiii egressus esset, optimè meritam de  
 cunctis animam Deo reddidit, iiii Kal. Ian.  
 in Servorum æde Romæ conditus.

Pantagathum præcessit *Paulus Leopardus* Isenbergæ in Flandria natus iiii Non.  
 Iun. cum ætatis annum ageret lvii vivis  
 exemptus, Græcæ Latinæque linguæ do-  
 ctissimus, quas post mortem ejus edito  
 emendationum opère non parum pro  
 tempore juvit, quarum prior decas statim  
 edita, altera diu suppressa, tandem paucis  
 ab hinc annis à Iano Grutero cum aliis  
 publicata est; de cætero homo minimè  
 ambitiosus, ut qui Bergis Divi Vinocci  
 haud longe à Dunkerca in humili schola  
 obscurus latere, quàm in luce hominum  
 honores & dignitates, quod poterat, affe-  
 ctare maluerit.



## CIC IO LXVIII.

**S**ub id *Erasmus* è Limpurgensium comitum familia episcopus Argentinensis fato concessit 111 Kal. xbr. vir pietate & eruditione prædicandus, qui puer Tubingæ à Io. Stoflero in Mathematicis, in juris scientiâ à Conrado Bruno & Ioanne Marquardo institutus, Lutetiæ Parisiorum à Ioanne Sturmio, quò se tunc ille contulerat, operam dedit; eumq; postea Argentinam evocatû scholæ præfecit, dum vixit, pacis, quam & religiosissimè coluit, studiosus, ut qui concordia Ecclesiæ ex Patrum auctoritate, abjectis, quæ pravâ consuetudine irreperant, sarcindâ censebat. Hujus viri mentio me admonet, ut aliorum virorum doctrinâ præcellentium, qui hoc eodem anno ad alteram vitam migrarunt, memoriam quantum in me est, ab oblivione asseram.

Primus ex iis occurrit Io. Oprinus Basileensis,

*leenfis*, qui secundum Frobenios nulli sumptui parcens, industria ac diligentia sua litterariam rem multum promovit, editis summa characterum elegantia innumeris veterum ac recentium monumentis, ob idque de suo & postero seculo optimè meritis, eoque magis, quòd dum in utilitatē publicam totis animi & corporis viribus incumbit, res privatas, quas admodum confusas reliquit, ita contempsit, ut plus de gloria, quàm de hereditate sua cogitasse videatur. Obiit prid. Non. Vtil. sexagenario major, & Academiae humeris elatus, in majore natalis urbis templo juxta Desiderii Erasmi, Simonis Grynæi, Io. Oecolampadii, & Seb. Munsteri monumenta sepultus est.

Post eum commemorandus venit *Onufrius Panuinus* Veronensis eremita Augustinianus, vir ad omnes & Romanas & Ecclesiasticas antiquitates è tenebris eruendas natus, quod præclara ejus & ad omnem æternitatem victura monumenta testantur; qui Alexandrum Farnesium  
Car.

Cardinalem præcipuum patronum suum in Siciliam profecutus, alienissimo & sibi & publicæ utilitati, cui in Ecclesiastica historia concinnanda inserviebat, tempore, Panhormi obiit xviii Kal. April. cum annum tantum ætatis xxxix attigisset. Postea amici Romæ homini non solum de se, sed de re litteraria optimè merito cœnotaphium ad S. Augustini marmoreum cum imagine ænea erexerunt.

Ante eum *Franciscus Luisinus*, qui patriam eandem quam Robortellus habuit, hoc est, Utinam in Foro Iulii, politiori litteratura & vitæ integritate insignis, Parmensium principi à secretis epistolis, immatura morte, cum plura ab uberi ejus ingenio sibi quisque polliceretur, ereptus est, quippe tantum natus annos xlv decessit Nonis Martiis, in majori Parmæ templo honorificè à fratribus sepultus.

Haud multum senior, quippe ætatis anno lii *Gul. Gratarolus* Bergomas artis Medicæ peritiâ clarus, quam & scriptis pere-

ruditis illustravit, Basileæ xvi Kal. Mai.  
vivere desiit.

Extremo anno iiii Kal. Ian. *Rogerius  
Aschamus* Curbiviscæ in agro Eboracensi  
natus, arta cum Hier. Osorio, Io. Sturmio, Io.  
Metello amicitia conjunctus, Elizabethæ  
à Latinis epistolis Londini decessit, anno  
ætatis liii, ab Edvardo Granta laudatus,  
qui & epistolas ejus elegantissimè scriptas  
publicavit.

CI<sup>o</sup> I<sup>o</sup> LXIX.

**V***ictorinus Strigelius* magni nominis  
inter suos theologus, qui colloquio  
interfuit, & dissensionì præcipuè causam  
dedisse dicebatur, paulò post vii Kal. Vtil.  
Heidelbergæ fati concessit, cum tantùm  
xlv annos explevisset.

*Paulus Eberus* Kitzinga Franconiæ op-  
pido natus, Vitembergæ, ubi diu docuerat,  
iiii Eid. xbr. hoc eodem anno obiit.

Eberum præcessit *Ioannes Lonicerus* Or-  
thernii



thernii in Mansfeldica ditione natus, qui cum patre defuncto ad litteras invito vitrico animum addidisset, è patria Islebiam profugit; atque postremò Vitembergam concessit, tantumque assiduo labore in trium linguarum cognitione & Philosophicis studiis profecit, ut Marpurgum cum Iano Cornario ab Hessiæ principibus evocaretur, ubi litteras Græcas diu magna auditorum frequentia ac fructu professus est, præter doctrinam, verectindix, sobrietatis ac modestiæ laude compri-  
mis conspicuus. Multa Græcorum scripta Latinitate donavit, tandemque septuagenarius hoc anno xiiii Kal. Vtilis è vita placide excessit, relicto Adamo filio, qui Marpurgo Francofurtum ad Mænum migravit, & magnâ artis fælicitate Medicinam in ea urbe fecit.

Ad Italos venio, & primus dicetur *Daniel Barbarus* Venetæ Nobilitatis præclarum lumen, ex eadem familia, quæ Hermolaum veræ philosophiæ & litterarum meliorum in Italia instauratorem olim

dedit, prognatus, philosophiæ & Mathe-  
 maticarum artium exquisitâ scientiâ præ-  
 stans, atque adeò eâdem, qua ille dignitate  
 ornatus, hoc est, Patriarcha Aquileiensis  
 designatus. Multa is scripsit, ac præcipuè  
 Pollionis Vitruvii de architectura libros  
 doctissimis post Gul. Philandrum com-  
 mentariis illustravit. Dicere solebat, nisi  
 Christianus esset, se in Aristotelis verba  
 juraturum fuisse; adeo in rerum veritate  
 pervestigandâ, eaque in singulis naturæ  
 partibus recto rationis ductu, quantum  
 & supra quàm humanus captus fert, per-  
 sequendâ sælicissimū illius ingenium ad-  
 mirabatur. Postea se totum Theologi-  
 cis studiis ut episcopali functioni magis  
 convenientibus addixit, & multa ex patri-  
 bus Græcis Latina fecit, quorum pars edi-  
 ta, pars apud hæredes manet; plura in eo  
 genere præstiturus, nisi festinata mors  
 eum, ut & Hermolaum, diutius publico  
 invidisset; haud enim multum quadra-  
 genario major Eid. Aprilibus hoc anno ad  
 Deum migravit, vilibus exequiis, sic enim  
 homo

homo ab omni vanitate & ambitione alienus extremis tabulis mandaverat, funeratus, & ad S. Francisci in vinea sinè elogio sepultus.

Hunc paucis post diebus secutus *F. Sixtus Senensis* Genuæ in Dominicanorum cœnobio animam Deo reddidit, haud ita senex, vir eruditæ diligentia, qui à Pio v dum Dominicani ordinis supremus curator esset, è tenebris errorum, ut ipse dicere solebat, & quasi ab inferis revocatus, huic sacræ militiæ nomen dedit, & insigni opere libris viii distincto gratum animum erga ipsum testatus est, quo sacrorum librorum censuram fecit, & eorum explanandorum & à falsis sectariorum interpretationibus asserendorum repetitis ex antiquitate Patrum testimoniis rationes explicavit.

Ultimus dicendus venit *Celius Secundus Curio* Kyriaci fano Taurinorum oppido natus, homo omni litterarum genere non mediocriter expolitus, qui cum eruditionis suæ famâ Mediolani ac Ticinî  
sparsâ,

sparsâ, dein Lucæ, Augustæ Taurinorum,  
ac postremò Epocediæ ob religionem  
non citra vitæ periculum exagitatus esset,  
postremò Basileam se contulit, ubi Phi-  
losophiæ & eloquentiæ studia publicè per  
xxiii annos professus est, ac tandem anno  
lxxvii ætatis viii Kal. xbr. è vita migravit;  
cum Augustinum filium summæ spei ju-  
venem, quod ejus scripta ad posteritatem  
edita abunde testantur, turbato naturæ  
ordine, ante paucos annos extulisset. Apud  
nos, non solum eruditione, sed æquitate,  
prudencia ac sollertia præstans.

*Baptista Minilius*, de quo in causa Iesuita-  
rum tanta animorum contentione ante  
quinquennium in senatu agitata, jam su-  
pra honorificam mentionem fecimus, hoc  
eodem anno in vivis esse desit; cum tan-  
tùm annos li egressus esset, vir longiore  
vita dignus, si Deus pacatam Galliam vo-  
luisset, & non potius eam novis turbis &  
tristibus scelestorum consiliorum even-  
tibus reservasset. Is in foro Parisiensi  
caussis privatorum agendis summâ dili-  
gentiæ



gentiæ, fidei, & industriæ famâ primùm  
 versatus, majori laude, postquam fisci pa-  
 tronus à Rege creatus est, magistratum  
 gessit, cum ad eam dignitatem præter eru-  
 ditionem & exactum rerum forensium  
 usum, infractam animi constantiam, ge-  
 nerosos citra vanitatem spiritus, & perpe-  
 tuum in æquali vitæ tenore amorem recti,  
 & publici boni studium attulisset : ad hæc  
 tanto ingenii acumine ac lucē excellebat,  
 ut cum jus publicè diceretur, quæ multis  
 horis ac verbis advocati partium perplexè  
 differuerant, ille uno verbo expediret ; tan-  
 tâ æquitatis apud iudices opinione, ut vo-  
 cem perorantis mox decretum sequere-  
 tur, & ipse quodammodo Præsidis verbis  
 præire videretur. Observatum à curiosis,  
 nunquam ferè senatum ab ejus sententia  
 seu rogatione dissensisse. Tandem vir  
 patriæ amans, & nominis Gallici supra  
 conditionem studiosus, vitia seculi indies  
 invalescentia, & procerū consilia ad pub-  
 licam perniciem insanabili seu furore seu  
 cæcitate inclinare ægerrimè ferens, contra-

cto inde mærore, in hydropem incidit, ex quo IV. Non. Vtil. decessit, & in munere successorem Augustinum Thuanum delegit, quem, ut familiâ bene de repub. sentiente prognatum (hæc enim verba ex ipso audita sunt) & Christophori senatûs principis, quem ille unicè dilexerat & coluerat, fratrem cum bona Regis venia, antequam moreretur, sibi succenturiari voluerat. Funus ei Senatorium decretum, & in ædem S. Ioannis, ubi sepultus est, non minore omnium ordinû luctu quàm pompâ deductum est. Mortē ejus ut optimè de regno meriti, Michael Hospitalius domum tunc relegatus, quicum ille ob consiliorum de repub. & voluntatum consensionem conjunctissimè vixerat, elegantissimis versibus deploravit, & insigni elogio decoravit.

Cl<sup>o</sup> I<sup>o</sup> LXX

**H**Aut multo post *Ioannes Brentius*  
 Veilæ imperiali Sueviæ oppido natus,  
 tus,

tus, magni nominis inter suos theologus, diuque ob id variâ fortunâ jactatus, Stugardiæ in agro Virtembergico septuagenario major fatis concessit III Eid. VII br.

Idem annus abstulit nobilissimum cognominum fratrum par, videlicet *Tili-orum* Engolismensi agro oriundorû, quorum *Ioannes* grandior natus Curia proto-notarius fuit, qui curâ, diligentia & summâ in suo munere assiduitate non solum ingētes opes, sed veram gloriam, & quâ majorem nemo nostrorum antè meruit, exactâ juris nostri & Franco-Gallicæ omnis antiquitatis cognitione sibi comparavit. Alter natus minor sacris addictus, primùm fani Brioci in Armorica, & postea Meldorum episcopus fuit, qui à puero litteris instructior, ad rerum nostrarum, quâ frater ejus excelluit, peritiam, etiam linguarum, juris prisce Ro. & Ecclesiasticæ antiquitatis exactam cognitionem adjunxit, perlustatis Francisci I permissu cœnobiorum ac aliorum locorum toto regno celebrium, cum adhuc integræ essent, bibliothecis,

atque inde peculiari sibi instructo librorum veluti penu copioso, ex quibus pleraque in utroque genere venerandæ antiquitatis monumenta publico dedit, eoque nomine magnam à sui & posterì ævi hominibus gratiam ac laudem meruit.

Paulò post Non. Ixbrib. Augustæ Taurinorum, nondum superato xxx anno, obiit *Iacobus Grevinus* Claromontio in Bellovacis natus, ingenio & rarâ eruditione præstans, qui cum à pueritia industriam in poëtica, sælicissimè exercuisset, quod *Gelodacrys* & alia edita cum raris illius ævi poëtis comparanda & æternum victura ad posteritatem testantur, ad Medicinæ studium animum appulit, in qua pari felicitàte ingenium exercuit. Nicandrum elegantissimè à Ioanne Gorraeo Latinum factum Gallicis versibus non cedente Græcis Latinisque elegantia reddidit, & de venenis commentarium Gallicè itidem scriptum adjecit, multa insuper sive edidit sive commentatus est, quæ morte præcipitata ultimam manum non receperunt.

Hominem



Hominem tot ingenii dotibus instructū  
 & amœnitate ingenii cunctos in sui amo-  
 rem rapientem Margarita, quæ Philiber-  
 to Emanueli Sabaudia duci nupsit, virtu-  
 tum insigne nostro ævo exemplar, inter  
 familiareis adscitum in Italiam secum  
 duxerat, eoque postea non solum Medico  
 sed & Consiliario in gravissimis negotiis  
 semper usæ est, adeo ut Grevino extincto,  
 se & valetudinis suæ curatore eximio, &  
 in animi anxietatibus amico solatore or-  
 batam doleret; itaque & mortuo honori-  
 ficum funus fecit, & viduam ac filiam ejus  
 Margaritam Emanuelida, quam de sa-  
 cro lavacro susceperat, quamdiu vixit,  
 penes se retinuit, & omni humanitatis ac  
 beneficentiæ genere prosecuta est, ut quæ  
 vivum dilexerat, etiam ossa ac reliquias,  
 quæ in vidua ejus ac carissima filia resta-  
 bant, insigni grati animi exemplo se dili-  
 gere ostenderit.

*Ioannes item Mercerus* Uticæ in Septi-  
 mania natus, hoc anno vivere desiit. Is  
 cum primò Iurisprudentiæ operam dedis-

set, & utriusque linguæ peritiâ apprime instructus, quantos in ea perplexa scientia progressus fecisset, Harmenopuli Epitomâ elegantissimè in Latinum versâ & illustratâ summum specimen dedisset; tandem eâ relictâ professione, quâ fere opes & celebritatem homines nostri sibi comparant, totum se sacris litteris & Hebraicæ ac Chaldaicæ linguæ inprimis studio ad-dixit; in quo diligentia, cōtentione, ac rarâ animi perspicacis fælicitate tantû profecit, ut cum sub id tempus Franciscus Vatablus è vivis excessisset, summâ omnium professorum ac doctorum consensione, is esse visus sit, qui jacturam morte tanti viri acceptam, qualem in ea lingua nulla ante ætas audiverat, facilè sarciret. Itaque Vatablo in ordinario explicandæ sacrae linguæ munere succenturiatus, vix credibile est, qualem se quantumque præstiterit; quippe qui quatuor linguarum peritissimus, ad incredibilem diligentiam acerrimum judicium attulisset; accedente rursus ad eximiam doctrinam candore, modestiâ

destiâ & summâ morum innocentia, adeo  
 ut ex ipsius pœne unius schola prodiisse  
 constet, quicumque in Gallia hodiè paullò  
 melius Chaldaicam & Hebraicam lin-  
 guam callent, turbatis postea per bella ci-  
 vilia ob religionem in Gallia rebus, homo  
 barbarum fugiens Venetias concessit, ut  
 cum Hebræis qui illic sunt, de nonnullis  
 conferret, hospitio V.C. & in eadem sci-  
 entia juris à teneris educati, tunc verò lit-  
 teris sacris operam dantis Arnoldi Ferrerii  
 regii Oratoris usus, cū quo aliquāto tēpo-  
 re conjunctissimè vixit; inde cum Lutetiā  
 repetere in animo haberet, de scriptis suis  
 recognoscendis & edendis cogitans, in  
 itinere Uticam deflexit, ubi quæ cunas illi  
 paterna domus dederat, lue populari per il-  
 las regiones tunc grassante correpto sepul-  
 chrū dedit. Ejusdē viri optimi, qui eum in  
 patriæ calamitatibus protexerat, beneficio  
 ac liberalitate servata ac post mortem ejus  
 publicata sunt eruditissima in VI minores  
 prophetas priores, Iobū, Solomonē, & po-  
 stea in Genesin commentaria: qui factus  
 licet

licet postumi, accuratam p̄rentis sui diligentiam produnt, ut vel ex iis & aliis, quæ vivus publicavit, monumentis in confesso sit, nunquam quenquam Christianum fêliciùs Hebraisasse. Ne vero totus intercidisse videretur, effecit & Iosias superstes, tâto patre dignissimus filius, qui præter exactam utriusque linguæ peritiâ & raram purioris antiquitatis cognitionem, acerrimo iudicio in iis pensandis excelluit, quod non solum in litteris, sed in castris & rebus gerendis per hæc bella civilia exercuit, deplorandâ sanè temporum conditione, quæ Musis colendis nata ingenia sive armorum vi, sive negotiorum æstu à recto studiorum cursu plerunque revocarunt.

His addam *Petrum Montaureum* Parisiensem senatorii ordinis, magni & excellentissimi ingenii virum, & in philosophia ac Mathematicis artibus, in quibus multa antiquorum illustravit, non pauca ipse adinvenit, versatissimum, ad hæc pangendis versibus magnam laudem promeritum, qui ob religionis causam bellis civilibus



vilibus variè jactatus, cum Sancerras ad Ligerim, tanquam in tutissimum & amicissimum sibi & studiis suis nidum confugisset, ex mærore contracto morbo haut ita senex eodem hoc anno decessit XIII Kal. VIIbr. à Michaelè Hospitalio amplissimo viro ac præcipuo amico versib. acerba in seculi hujus ingratitude querimoniz plenè deploratus.

---

CIO IO LXXI

**E**T ut viros doctrinâ præstantes cōmemorè; *Claudius Espenceus*, jam multo p̄sēs à nobis pethonorificè appellatus, paterno genere ex clarissima Espenceorum in Campania, materno illustri Ursinorum in Latio & regno Neapolitano familiâ ortus, sed pietate, candore, & omniū disciplinarum absolutâ cognitione illustrior III Non. VIIbr. animam de rep. Christiana optimè meritam Deo reddidit, Lutetiz ad S. Cosmæ sepultus; qui per XL annos in

Parisiensi Academia humanioribus, philosophicis ac theologicis studiis cum incredibile omnium admiratione operam navasset, à Francisco I Melodumum, ab Henrico II Bononiam, à Francisco II Aurelianū, à Carolo IX Pissiacū inter primarios religionis hoc in regno antistites nūc legatus nunc disceptator sanctissimè ac doctissimè de controversis rei Christianæ capitibus, cum delectis adversæ partis theologis summā æquitate ac moderatione egit, & voce ac eruditissimis in complures scripturæ locos editis commentariis, religionis negotium promovit, sacri etiam olim galeri decus potius meritis quam adeptus; tandem ex gravissimis calculi doloribus quod fere præmium pro vigiliis à naturâ studiosis repēditur, extinctus est anno ætatis LX, magnò sui relicto desiderio, cum unus è paucorum numero esset, qui de idoneis pacis in Ecclesia constituendæ rationibus seriò semper cogitaverit, atque adeo de tollenda è domo Dei fissura, quam multi hodie, dum præpostero pietatis

tatis ardore, strenui in ea causa videri volunt, firmant magis quam oppugnant, alienatis & obduratis adversariorum animis quos potius emendationis factâ spe & sublati offendiculis conciliari & sensim ad unionem abduci oportuit.

Eodem mense *Henricus Scrimgerus* Dondia oppido Scotiæ maritimo, familiâ nobili, cujus princeps vexilli ferendi jus in regno habet, natus; Aureliæ Allobrogum extremû diem clausit, annum LXV supergressus. Is patriâ relictâ, Lutetiam Parisiorum litterarum causâ solenni Scotis more primû venit. Dein Avaricam Biturigum juris discendi causâ profectus, Equinarium Baronem & Franciscum Duarenum celeberrimos in ea Academia professores audivit, & Iacobi Amioti, qui postea ad majores honores euectus est, tunc litteras Græcas in ea urbe profitentis commendatione, erudiendæ Bocatellorum pueritiæ admotus est, ac Bernardum postea Redonum Antistitem & magnis legationibus honorificè defunctum in Italiam se-

cutus, sub id tempus Patavium accessit,  
 quò Franciscus Spiera in ea civitate vitam  
 abruptit, ejusque historiam quæ Henrici  
 Scoti titulo vulgata est, scripsit. Nec in-  
 gratus discipulus erga præceptorem fuit,  
 quem, cum non exiguum damnum Gene-  
 væ, ædibus incendio fortuito pænè ab-  
 sumptis, accepisse intellexisset, non modi-  
 cā pecuniā ad illud sarcendum protinus  
 missā muneravit. Inde in Germaniam pro-  
 fectus Scrimgerus Huldrico Fuggero in-  
 signi litterarum & litteratorum patrono  
 operam addixit, ejusq; sumptibus biblio-  
 thecā magnā librorum rariorum tam  
 Græcorum quàm Latinorum MSS. copiā  
 instruxit; ad quos edendos Genevam re-  
 versus, Henr. Stephani, qui et Fuggeri sti-  
 pendarius erat, industriā usus est. Et No-  
 vellas Iustinianæ, quas Iacobus Cujacius  
 tantoperè post Gregorii Holoandri editio-  
 nē laudavit, ex illius officina publico dedit.  
 Ipse anno *Ch Ij LXIII* in Scholā Ge-  
 nevensi Philosophiam publicè docuit, et  
 biennio post primus in ea civitate jus ci-  
 vile



vile profiteri cœpit; quo in munere defecit, et moriens peculiarem bibliothecam optimis libris refertam P. Iungo sororis filio, qui nunc Episcopali dignitate in Anglia ornatus est, testamento legavit, quam Alexander Petri frater Genève in Britanniam transferendam curavit.

In Rætia hoc eodem anno *Ludovicus Castelvetus* Mutinæ natus obiit, qui variis cum Hannibale Caro de re ludicra alterationibus vexatus, ad extremum patriam reliquit, & litterarum studia apud Helvetios hospes antiqua persecutus, præter alia insignem in Aristotelis Poeticam commentarium linguâ vernaculâ scripsit, et Basiliæ elegantissimâ formâ edendū curavit.

Post Castelvtrum commemorandus venit *Georgius Fabritius* Chemnicensis, qui rem litterariam non mediocriter et scriptis et vivâ voce juvit et illustravit, diu illustri ludo Misenæ Hermundurorum post Ioannis Rivij obitum præpositus, et Poeticâ facultate, quam rebus sacris fere impendit, magnam laudem inter suos

adeptus, Eid. Vtil. decessit, anno ætatis lvi :  
quem paucis mensibus anteceffit *Joachimus Morlinus* Lutheri sectator, et Sambien-  
sis Ecclesiæ à Sigismundo Augusto Po-  
loniæ rege, cum res Bonisiæ ante aliquot  
annos ordinarer, Episcopus creatus.

---Turbavit et paullum reginam *Ioannis Iuelli* Devionensis, quippe vix quinquagenarij, obitus, qui Mariâ reginâ ob religionem exul, ab Elizabetha in patriam revocatus, et Sarisburiensi Episcopatu donatus, confessione fidei sub Edvardo VI receptam, contra Thomam Hardingum, qui eam aliquando probaverat, et postea recantaverat, libris editis, qui magno in pretio inter eos habentur, tutatus est.

## CIC ID LXXII.

**P***etrus Ramus* in Veromanduis natus, cum diu bonas litteras, Philosophiam, et postremo Mathematicas scientias in Prelæa schola, cui præerat, & postea in  
regio

regio auditorio docuisset, postremò erroneam in Philosophicis doctrinam invexit, Aristotelem voce et scriptis importunè oppugnans; quâ de re cum Iacobo Carpentario Claromontano magnæ controversiæ ei fuere, et antea majores cum Antonio Goveano et Ioachimo Perionio; tamen ex eo commendatione dignus fuit, quòd ingenio, diligentia, assiduitate et opibus etiam suis, quantum in ipso fuit, rem litterariam juvit, ac promovit, institutâ Mathematices professione, cui annuum vectigal 100 librarum è facultatibus suis attribuit. Is, à Carpentario æmulo et seditionem adjuvante immixtis sicariis, è cella, in qua latebat, extractus, et post depensam pecuniam inflictis aliquot vulneribus per fenestras in aream præcipitatus est, effusis visceribus, quæ pueri furentes magistrorum pari rabie incitatorum impulsu per vias sparserunt, et cadaver ipsum scuticis in professionis opprobrium diverberantes, contumeliôsè et crudeliter rapraverunt. Quod ubi ad *Dionysii Lambini*

*bini* Monstroliensis humaniorum litterarum et utriusq; linguæ Regii professoris, multisq; editis libris de re litteraria bene meriti aures pervenit, ille, qui sibi cum eodem Carpentario occultas similitudines, quamvis ob rem litterariam, intercessisse sciret, de cetero à Protestantium doctrina alienus, tamen exemplum Rami veritus, adeo consternatus est, ut ab eo erigi non potuerit, percussâq; mente in morbum gravissimum inciderit, ex quo post mensem decessit.

Hoc anno nobis ereptus est *Ægidius Tschendus* Claronensis, vir clarissimus, qui patriæ suæ historiam, h. e. Helveticam magno labore et industriâ vernaculo sermone descripsit, & cum primo de Rætia & Alpino eo tractu commentarium scripsisset, eo Latine à Seb. Munstero amico suo, se incio, publicato, indoluit vir exactæ diligentiae, nondum perfectum opus suo nomine divulgatum, ab eoq; tempore in eo recudendo laboravit, atq; adeo Historiâ universâ Helvetiorum concinnandâ,



dâ, quam tamen ad umbilicum adducere,  
non potuit, pridie Kal. Mart. morte præ-  
ventus, non tamen omnino immaturâ;  
quippe cum jam *lxvii* annos attigisset;  
post cuius obitum operis tam diu expetiti  
ad exitum persequendi cura demandata  
est Iosæ Simlero viro eâ provinciâ dig-  
nissimo, qui & illud veritaculè ab auctore  
inchoatum Latine à se versum persequi  
institit; sed non diu post decedens im-  
perfectum reliquit.

Tscheudum aliquanto post secutus est  
*Io. Volfius* Tigurinus Senatoriâ familiâ or-  
tus, magni nominis & eruditionis inter  
suos theologus. Is Petri Martyris Vermî-  
lii, qui Tiguri fixo domicilio docuerat, in-  
choata & imperfecta supplevit, & multa  
insuper scripsit, ac tandem in patria non  
ita senex, quippe cum tantum *L* annos  
explevisset, fatis hoc anno concessit, xv  
Kal. xbr. Gaspare fratre superstite, Medi-  
cinæ in ea repub. professore, cuius dili-  
gentiæ multa *Conradi Gesneri*, quæ vir  
ad publicam utilitatem natus immaturo

obitu inedita reliquerat, post mortem auctoris ab ipso publicata debemus.

Nunc Itali dicentur; primusq; occurrit *Donatus Ionotius* Florentinæ reip. ante confirmatum Mediceorum principatum quondam à secretis epistolis, qui homingentis animi, cum semel liberam patriam vidisset, amissâ libertate, vertere solum maluit, quàm in eâ manere, ubi non esset qui fuerat: & quamvis amplissimis conditionibus à Cosmo delatis, etiam præcipuis dignitatibus invitatus, nunquam adduci potuit, ut Florentiam rediret; is à teneris egregiè in litteris instructus, ceterùm ad tractandâ negotia natus, cum patriæ calamitate & spontaneo exilio sibi generosè indicto à reb. gerendis remotus esset, totum vitæ tempus in litteris & officiis privatis contrivit; & Venetiis, ut vel in aliena rep. civitatem retineret, & amissæ veluti libertatis auram respiraret, domicilium fixit, & ingrati animi testimonium de serenissima repub. commentarium summo iudicio conscriptum edidit; scrip-  
sit

fit & in illo otio de rebus Italiæ ad Paul. III, & de rep. Florentina etiam Commentarios, qui in Gadiana & in Rudolfiana Bibliotheca asservantur, magno publicæ utilitatis bono, cum Deus voluerit, publicandos. Tandem plenus annis Venetiis decessit, ibidem sepultus.

Præcessit hunc *Hippolytus Salvianus* Tiferno in Umbria familiâ nobili natus, vir multijugæ doctrinæ, & opere de piscibus inter alia scripta clarus, qui cum XXII annos in schola Romana magno concursu prælegisset, & Medicinam felicissimè fecisset, Eidibus Ap. decessit, ætatis anno LVIII, & ad S. Mariæ supra Minervam conditus est.

*Ioannes Argenterius* qui Salviano jungatur, ex Italis superest, Castro-novo in Subalpina regione loco obscuro natus, sed ingenio, quod in Aristotelis schola præcipuè exercuit, excellens: præstantissimus item Medicus, & scriptis ad posteritatem victuris clarus, qui Augustæ

Taurinorum decessit. 111 Eid. Mai. cum ætatis annum ageret LVIII, ad S. Ioannis ab Hercule filio honorificè sepultus.

Apud nos *Nicolaus Gruchius* Rotomagensis nobili loco natus, omni litterarum ac scientiarum genere egregiè instructus, & cum Ioachimo Perionio primum de Aristotelis verâ interpretatione, dein cum Carolo Sigonio de præcipuis Antiquitatis Romanæ controversiis, de quibus & scripta utriusque publicè prodierunt, digladiatus, cum ob doctrinæ famam magno concursu Lutetiæ ac Burdigalæ, dein etiam Cominbricæ à Ioanne Lusitanie rege honestis præmiis cum aliquot aliis è Gallia invitatus, Aristotelem, quod primus Græcè fecit, publicè interpretatus esset, ultimis bellis, huc illuc vagus, tandem confecto bello civili tertio à Rupellanis, qui spe diuturnioris, quàm quæ secuta est, pacis, ludum litterarium littore illo sanctonico aperire decreverant, accersitus est, &



& cum vix pedem in urbe posuisset, febre lentâ, quâ in itinere correptus fuerat, ingravescente, antequam dignam hospitibus de se optime meritis gratiam posset rependere, in ipso professionis limine Ianuario ineunte, ultimum vitæ diem clausit, eo felicior censendus, quod morte quamvis studiosis acerbâ, tumultum Parisiensem antevertit, neque urbis in qua senectutis nidum posuerat, obsidioni superfuit.

Ex nostris dicendus superest *Antonius Rodolphus Cevalerius Moncampio* vico iuxta Viram, in ulteriore Neustria natus familiâ nobili; quippe ex qua Cevalerii Agnelli fratres prodire, qui ingenium in Poetica exercuerunt. Is cum à puero linguæ Hebraicæ operam dedisset Lutetiæ Parisiorum sub Francisco Vatablo, in Angliâ Oxonii sub Paulo Fagio, inde inter domesticos Elizabethæ, quæ postea regina fuit, ascitus, cupidam discendi virginem linguam Gallicam docuit. Dein post *Edyardi VI* obitum in Ger-

maniam profectus, uxoris Immanuelis Tremellii filiam ex priore marito in uxorem duxit; ita ut vulgo Tremellii gener crederetur, cum eoque linguæ S. peritissimo majores semper in eadem progressus fecit. Dein Argentinam *Cl* *I* *LIX* evocatus est. Aureliæ Allobrogum diu post magnâ cum laude, nec minore in omnes fructu docuit, ut ex Thesauro Sancti Pagnini multâ accessione locupletato, editione ab eo tunc temporis procuratâ patet. Quadriennio deinde exacto, patriæ visendæ desiderium ut aliquâ ex parte expleret, Cadonum venit; in eaque urbe pacatè mansit, quousque bello civili recrudescente, in Angliam profugere coactus, à memori regina perhumaniter acceptus est. Factâ demum apud nos ante biennium pace, Cadomum revertit: unde tandem hoc anno post tumultum Parisiensem rursus migrare coactus, cum sibi in Angliam necessariò renavigandum videret, homo jampridem valetudenarius ad Grenezzam

ambitionis Anglicanæ insulam nause-  
 abundus divertit, in eâque morbo fatali  
 oppressus, exeunte viibr. anno ætatis  
 lxx decessit, relicto filio, qui nunc Can-  
 tuariæ degit. Præter Grammaticam lin-  
 guæ Hebraicæ exactissimam & Thesau-  
 rum, quem dixi, novam Bibliorum edi-  
 tionem, quadrilinguem aggressus fuerat  
 magnâ diligentia adornatam, cujus pri-  
 mam partem, quâ Pentateuchus & Iosue  
 liber continentur, manu ipsius eleganter  
 descriptam mihi videre contigit.

*Stephanus Szegadinus* Hungarus mag-  
 ni inter suos nominis, editis etiam ple-  
 risque scriptis, Theologus, cum pastoris  
 munere diu Badæ & Pesti inter gravis-  
 simas anxietates & ærumnas diu fun-  
 ctus esset, anno ætatis LXVII, Kevini in  
 Pannonia defecit.

Ultimum agmen claudet *Io. Genesius*  
*Sepulveda Cordubensis*, Salmantica, ubi  
 sacri Collegii sodalis erat, mortuus, cum  
 vitæ cursum cum seculo numeraret, ho-  
 mo Græcè, Latineque doctus, & Phi-  
 losophicis

philosophicis studiis claris, quod eruditæ  
 ejus lucubrationes edicæ restantur, sed  
 obnoxius, & quanquam Theologiam  
 professus ab humaniore sententiâ, quæ  
 Theologum magis decebat, alienus.  
 Nam cum Bartholomæus Casa, qui  
 Carolo V Casari à sacris confessionibus  
 erat, apud eum ante XVIII annos de  
 Hispanorum Indias ad Occidentem va-  
 stantium avaritiâ, crudelitate & libidi-  
 ne conquestus esset, tantique principis  
 mandata de re totâ certis coram cog-  
 niturus in Indias trajecisset, & reversus  
 dictis majora vidisse se testatus Pincia  
 in concilio instaret ut modus immuni-  
 licentiæ poneretur; alioqui fore, ut De-  
 us eâ immanitate irritatus imperio In-  
 diarum Hispanos exueret, & cœpta di-  
 vini verbi promulgatio illis locis, quæ  
 causa justî contra Indos gerendi belli  
 obtendebatur, minimè procederet; re-  
 perti sunt tamen, qui lucrum ex ea in-  
 temperie captantes, factum excusarent,  
 quorum causam tuendam Sepulveda  
 suscepit,



suscepit, & per divina & humana jura Hispanis, quod facerent, licere dixit; quippe qui in bello captos tanquam servos belli jure uterentur, idque libro complexus est, quem cum edere omni ratione cuperet, intercessit Casa, & Segobienſis Episcopus. Itaque negotium rursus in diverſis Hispaniæ confessionibus agitatum fuit, tandemque decretum, ut quando res ad conscientiam pertineret, Theologorum super ea ſententiæ exquirerentur. Id actum anno hujus ſeculi XLVII. Secundum hoc Compluti & Salmanticæ conſulti Theologi, poſt longas altercationes cenſuerunt, è re Chriſtiana eſſe, ut liber Sepulvedæ tanquam doctrinâ minùs ſanâ refertus non ederetur. Neque propterea Sepulveda quievit, ſed Romam ad amicos cum miſit, ut publicaretur. Cum rursus Cæſar per Oratores ſuos id prohibuiſſet, & interim omnia exemplaria in Hispania reſcripta ſupprimi curaſſet; nihilominùs Sepulveda in pertinacia perſeſeverans, & tur-

pe vinci existimans, cum Casa & Segobiensi Episcopo publicâ concertatione committi petiit, & obtinuit. Nam triennio post publica disputatio instituta est, cui Dominicus à Sancto magni nominis Theologus, & Cæsari ipsi à sacris confessionibus, interfuit, isque exitus actionis fuit, ut Cæsare aliis bellis occupato, potius permissa, quàm approbata Hispanorum in Indiis grassandi licentia fuerit.

---

M D LXXIII.

**H**ic annus Gallix abstulit *Michaelem Hospitalium, Andream Masium, & Carolum Langium*; quidni enim homines, Belgas inter Gallos recenseam? rara hujus sæculi ornamenta, sed illum dignitate præcellentem, qui per omnes togæ gradus summâ cum doctrinæ, integritatis, gravitatis ac prudentiæ incomparabilis laude.

laude versatus, ad solstitium tandem honorum pervenit, & turbulentissimis Galliae temporibus, iis etiam, qui temp. turbatam quàm pacatam malebant, suffragantibus; ob summam virtutis & constantiae opinionem, post Francisci Olivarii mortem, quem ille vivum præcipuè coluerat, Cancellarius Franciæ creatus, invidiam semper virtutis comitem magnis conatibus adversam habuit; quâ infractâ animi magnitudine diu luctatus, non victus, sed cedendo victor evasit, & ad quietem domesticam versus in honestissimo otio, quod reliquum vitæ fuit, tranquillè exegit. Dum in Aulâ fuit, indignam meritis suis gratiam rependi dolens, tamen judiciario ordine corrigendo intentus, sanctissimas leges promulgavit, quæ sanctissimi eorum conditoris memoriam apud posteros conservabunt; tandem anno ætatis circiter LXX in Vinniano suo III Eid. Mart. placidissimâ morte ad Deum migravit, condito priùs testamento, quo vitæ ante-actæ quasi redditâ ratione, pietatis

etatis in Deum, charitatis erga patriam, ingenii, elegantiae, & prudentiae quæ cum ad extremum vitæ spiritum usque comitata est, testimonium veluti consignatum reliquit. Quæ de jure scripsit, immortalitate dignissima, in tenebris hæcenus delituere, aliquando utinam magno reip. bono, lucem visura. Versus ne perirent, Vidi Fabri, quem ille vivus singulari benevolentia semper prosecutus est, pietas vetuit; qui eos huc illuc neglectim ab auctore sparsos, nostrâ etiam operâ, & Scævola Sammarthani, viri inter alias dotes harum rerum pertissimi, in iis ordinandis usus, collegit, & publico dedit. Ii versus puritate sermonis, nitore, acumine, & sententiarum pondere cum omni antiquitate certant, virumque verè exprimunt; qui non vultu tantum Aristotelis os, quod ex utriusque imaginum ubique prostantium comparatione constat, sed Solonis, Lycurgi, Charondæ ac Platonis denique sapientissimorum legislatorum pectus, mores, doctrinam, & judicium, quibus



quibus longo rerum maximarum usu & experientiâ confirmatam prudentiam junxerat, in omni vita sive privatâ, sive publicâ actione referebat.

*Mafius* VII Eid. April. Zuenaræ in Clivenfi ditione ex hydrope haud ita senex decessit, cum Wilelmo principi suo diu fidam operam in præcipui consilarii munere navasset; vir syncero, candido, & aperto ingenio; ad hæc rarâ & reconditâ doctrinâ præditus, & qui ad Hebraicæ, Chaldaicæ, ac cæterarum Orientalium linguarum cognitionem, summam animi pietatem & exactum rerum sacrarum studium attulerat; variaque in eo genere commentatus fuerat: plura etiam daturus, si viro bono per valetudinem ferè semper adversam licuisset. Specimen eorum præbent doctissimi & accuratâ diligentia scripti in Iosuan commentarii, ante biennium ab ipso auctore publicati.

At *Langius* natione Flandrus, cum in adolescentia itidem, post humaniorum

litterarum egregium studium, juris scientiæ se addixisset, inde Leodicum in Eburonibus, patriæ turbas perosus, tanquam pacatiorem locum secessit, & in Sacri Collegii sodalitium cooptatus, multa in litteris commentatus est, à Ciceronis opere præclaro, quod de officiis scripsit, exorsus; & in illo otio etiam hortorum culturæ, homo elegantiae insuetus, animum applicuit; primusque exoticos flores, ac plantas ex Indiis, ac novo orbe, non solum oculorum oblectamento, sed etiam naturæ remedia novis morbis querenti locupletandæ, undecunque collegit; ac per pulvillos disposuit; eorumque spectaculo cum Iustum Lipsium, illac fortè in Germaniam & Italiam transeuntem aliquandiu distinuisset, inde sermoni juxta serio & erudito de constantia occasionem præbuit. Tandem cum necdum Eburones suos à turbis vacuos videret, tædio vitæ correptus, studiorum cursum & vitæ unà abruptit III Kal. Vtilis, relictis imperfectis quæ præ manibus

bus habebat, ad æternitatem victuris monumentis & insigni utriusque linguæ ferè omnium M. SS. bibliothecâ, quæ huc illic distracta ac dissipata est. Lævinus Torrentius vir & cognatione & studiorum ac voluntatum consensione conjunctissimus, ejusdemque Collegii sodalis, ei monumento in majore urbis Templo erecto, parentavit.

His addetur dignitate & eruditione fortasse inferiore, cæterùm litterator insignis, editis in hoc genere compluribus monumentis, *Franciscus Fabricius* Duræ sive Marcoduro duobus à Iuliaco milliaribus in agro Coloniensi natus, qui secundum Sebastianum Corradum, Regiensem historiam Ciceronis aliosque bonos auctores maximè illustravit; & hoc eodem anno Dusseldorpii ubi docebat, debitum naturæ persolvit, immaturâ morte, quippe cum tantum ætatis annum XLVII ingressus esset.

*Ioachimus Curæus* Freistadii in Quadis natus, Silesianis annalibus bene de patria  
meritus,

meritus, Fabricio junior, XII Kal. Februarij, Geglovix sub id decessit.

Annum clausit *Ioannes Baptista Cynthus* Liliij Gregorij Gyraldi gentilis, comi vir & amæno ingenio, qui Patavij ferè vixit, & scriptis aliquot vernaculâ linguâ clauit, atq; Ferrariæ postremò in patria, annos natus LXIX decessit.

M D LXXIV.

**H**IC annus nobis eripuit duo magna Italiae & Germaniae lumina, *Paulum Manutium* & *Joachimum Camerarium* Papebergæ in Franconia anno CI<sup>o</sup> I<sup>o</sup> & eodem ipso mense, quo mortuus est natus. Et in Paulo quidem præter exactam puritatis Latinae & Antiquitatis Romanae cognitionem, quam ad Ciceronem suum illustrandum attulit, plerisque scriptis dum vixit publicatis, & post mortem à filio Aldo virtutum paternarum hærede editis, præcipua ad iuvandos aliorum



aliorum labores cura, ac per manus hæreditatio veluti jure à patre & avo tradita industria fuit, insigni illâ & omnibus seculis deprecandâ artis typographicæ officinâ, ex qua omnium ferè veterum tam Græcorum quàm Latinorum, & aliorum auctorum scripta diligenter, ut tempora ferebant, certè elegantissimè excusa, ad publicam utilitatem olim prodierunt, ut omnium confessione constet, litteras renascentes ortum suum Manutianæ familiæ debere, quæ adultiores in Germania à Frobeniis, sed maximè omnium in Gallia à Stephanis, per Cannorum spatium eâdem industriâ propagatæ, & ad summum diligentix simul & elegantix fastigium perductæ sunt. Paulus autem ante aliquot annos Venetiis Romam evocatus, ut sacrorum librorum editioni præesset, attenuato assiduis studiis corpore, cum diu præ macie in lecto decubisset, ubi cum paucis ante mortem diebus, sedulò, cùm Romæ essem, cum M. Ant. Mureto vetere amico sæpiùs in-

Z

visi,

visi, tandem optimè meritam de re litterariâ animam Deo reddidit, viii Id. Apr. ad Minervæ sepultus. *Camerarius* loco nobili, sed in modicis opibus natus, ad hæc specie ingenuâ præditus, nobilitatem generis, quantum per conditionem & ætatem licuit, nobilibus exercitiis retinuit, equitandi peritiâ insignis, de quâ ad Xenophontis librum, quem de re Equestri scripsit, à se Latine versum, ac notationibus explicatum, & peculiarem commentarium subjecit. De cætero, cum vitam ocio litterario consecrasset, post perceptam utriusq; linguæ exactam notitiam, quas & variis scriptis illustravit, non solum ad bonos auctores in utraq; lingua interpretandos, tam Poetas quàm Oratores & Historicos, sed etiam in solidioribus Philosophiæ, Mathematicarum artium & postremò Theologiæ studiis multa commentatus est. Ad quæ omnia, quod pauci ante illum fecerant, politionis litteraturæ ornamenta semper attulit, variis in omni doctrinæ genere lucubra-

cubrationib. aut dum vixit editis, aut  
 post ejus mortem à tanto patre dignis fi-  
 liis publicatis, quæ sparsim & diversis  
 temporibus ac locis per particulas edita,  
 cum eiusmodi sint ut iis ad rem litterari-  
 am plurimum emolumenti sit redundatu-  
 rum, simul omnia aliquando edi Reip.  
 maximè interest. Constans ac perpetuus  
 Philippi Melanchthonis amicus fuit, ejus  
 studiorum, voluntatum, ac consiliorum  
 particeps, & cum ipse Lipsiæ larem fix-  
 isset, & ille Vitembergæ profiteretur, per  
 litteras amicitiam eam toto tredecim an-  
 norum tempore coherunt. Et Melanch-  
 thonis quidem litteras ipse Camerarius  
 post mortem ejus studiosè collectas ac di-  
 gestas publicavit, suis non insertis; qua-  
 rum partem filij post patris obitum, tum  
 alias ad diversos duobus voluminibus di-  
 stinctas ad utilitatem publicam ediderunt.  
 Tandem vir optimus, & de repub. tot  
 exantlatis laboribus bene meritis ex hac  
 vita migravit XV Kal. Maias. Abstulit &  
 hic annus nobile par fratrum *Hieronymum*

& *Ioannem Baptistam Amaltheos* *Opitergiæ* in *Tarvisino* limite natos. Quorum ille Philosophus ac medicus præstantissimus, eâ morum suavitate fuit, ut vel solo aspectu omnium in se benevolentiam alliceret; in versibus pangendis præterea ita excelluit, ut *M. Ant. Muretus* acerrimus harum rerum iudex ei inter *Italos* palmam detulerit. Obiit in patria *XIII Kal. VIIIb. annos* natus. *LVII* ad *S. Martini* sepultus. Hic pariter *Græcè*, *Latinè*que eruditissimus in *Aula Rom.* toto vitæ curriculo versatus, ac tribus ordine pontificibus charissimus, *Cardinalibus Tridentini Synodi* interpretibus à secretis fuit; ac multa vernaculâ linguâ lusit, & fratre junior (nam tantum *XLVII* annum attigerat) ad meliorem vitam *Romæ* migravit *XIV Kal. Mart.* ad *S. Salvatoris* in *Lauro* ab *Altilio* fratris *F.* conditus.

Hos secutus est *Ioannes Guinterius* *Andernaci* *Ubiorum* oppido natus, qui cum *Daventriæ* & *Marpurgi* litteras didicisset, primum *Gosellariæ* *Ludi* moderator ac dein



dein linguæ Græcæ Lovanii professor fuit, inde Lutetiam profectus cum Gulielmo Budæo & Ioanne Lascare, quos juvenis jam senes coluit, magna conjunctione vixit, & Francisci liberalitate, commendante eum Ioanne Bellaio Cardinale eximio litteratorum omnium ac præcipuè Germanorum fautore, medicinæ lauream adeptus, ac medicus Regis salutatus est; postremò cum Divioduri Mediomatricum, exardescente per Galliam civili bello, aliquandiu Medicinam fecisset, Argentinam tandem concessit, ubi relictis compluribus ingenii sui monumentis, octogenario major hoc anno VI Non. IXb. in vivis esse desiit.

*Benedictus Aretius* inter suos plerisque scriptis editis clarus, Bernæ in patria XI Kal. Mai. haut ita senex decessit. Et ante eum incunte anno, *Ioachimus Vestphalus* Hamburgi, contra quem Beza tam animosè stylum exercuit.

*Cyprianus Leovicius* Tabulis Astronomicis diligenter putatis & Eclipsium

descriptionibus. insuper editis, quas ad annum usque Cl<sup>o</sup> MD<sup>o</sup>CVI perduxit, hoc etiam anno admodum senex Augu-  
stæ Vindelicorum decessit XII Kal.  
Iun.

Extremo demum anno prid. Eid. Xb. jam affectâ ætate, Regiomontii in Bo-  
russia ultimum diem clausit *Hermannus*  
*Cruserius* Campensis, qui consilarii pri-  
marii officio diu apud Clirensem ducem  
defunctus, cum Helionora filia Alberto  
Friderico Borussia duci desponsata, ad  
maritum proficisceretur, ei comes à patre  
attributus fuerat. Medicæ scientiæ cum  
initio operam dedisset, multa Galeni  
Latinitate donavit, & postea juri Civi-  
li omnino se addixit, & ægritudine ex  
filia obitu contractâ, quò se solaretur,  
novam Plutarchi Translationem, dum  
Xilander in eadem laboraret, fecit, quæ  
magno in precio habetur. Mortuo per-  
honorificè in majore urbis Templo, ubi  
conditus fuit Helionoræ jussu, iusta per-  
soluta sunt.

Ante

Ante eos omnes eodem anno VI Eid-  
 Febr. Genevæ, cum tantum XXXVIII  
 annos exegisset, fato functus est *Epimun-*  
*duſ Bonafidius* Chabovii ignobili vico in  
 Valentino agro apud nos natus, homo  
 probus & simplex, qui cum pedem pa-  
 triâ nunquam extulisset, tamen Hebrai-  
 cis, Græcis & Latinis litteris ita egregiè  
 instructus erat, ut in celeberrimis orbis  
 Academiis operam studiis dedisse sub  
 præstantissimis magistris crederetur; in  
 juris autem scientia, quam Valentia pro-  
 fitebatur, adeo excelluit, ut Iacobus Cu-  
 jaciſ, qui principatum illius tenebat,  
 alicubi scripserit, si moriens rogetur, ut  
 olim Theophrastus, non alium habere  
 se, quem discipulis suis posset ostendere.  
 Post tumultum Parisiensem à Francisco  
 Hotomano invitatus, Genevam conce-  
 serat, ubi jus Orientale, cujus jam spe-  
 cimen aliquod ediderat, majori opere illu-  
 strare aggressus, morte post biennium  
 superveniente, spem de se tanto viro au-  
 tore conceptam fefellit. Cui me nunc  
 tanquam

tanquam præceptor de me secundum ipsum Cujacium & Franciscum Roaldestium, quibus simul eodem tempore operam Valentiae navavi, optime merito hoc monumento parentare æquum justumque duxi.

Nec silentio præteriri debet vel Poëtica, in qua excelluit, respectu, *Reginaldus Clutinius Flaviniacus*, nobili familiâ ac Senatoriâ Lutetiæ natus, qui fratrem habuit Henricum Oisellium legatione Scoticâ militari virum insignem, qui & Romæ jura Regis per pueritiam ejus admodum labefactata animi præsentia & imperterritito atque obfirmato ad constantiam adfectu restituit, sicuti suo loco demonstravimus; & postremo ibidem decessit, ad S. Ludovici honorificè sepultus; à Ioanna Castanea Rupipozæ uxore erecto ei insigni monumento. Reginaldus autem diverso a fratre instituto, vitam solitariam ferè amplexus est, & unum & alterum elegantissimum carmen reliquit è multis quæ perierunt; quæ, qualis quantusque



tusque in eo scribendi genere esse potuerit, abundè apud doctos fidem faciunt. LXb. mense Lugduni tum senex ad Decum migravit.

His merito suo accensebitur *Ioannes Versosa* *Cæsareæ Augustæ* in *Hispania Tarraconensi* honestis parentibus natus, qui *Lutetiæ Parisiorum* admodum juvenis litteras Græcas, dein & accenso inter Reges bello, *Lovanij* magnâ auditorum frequentiâ docuit, & *Ratisbonam* in *Aulam Cæsaream* profectus, inde *Didaco Hurtado Mendoza*, & ad *Concilium Tridentinum Cæsaris* legato in contentione de *Synodo Bononiensi* transferendâ egregiam operam navavit, & cum ille *Senensium* reipub. præpositus esset, sub eodem civibus minus grato ad componendos dissidentium animos plurimum solertiâ suâ contulit, & unus effectisse creditur, ne citius *Senenses* morosam præpositi severitatem perbâ ad extrema consilia descenderint. Inde in *Angliam* sub id tempus venit, quo *Philippus Mariam*

in uxorem duxit, & postea Romam missus est, in urbe morari iussus, ut testimonia ad jura regnorum Philippi spectantia undique conquireret ac describeret, totaque rerum ac negotiorum tractatione cum innatam naturæ prudentiam admodum exacuisset, ejus quoque non vulgaria præcepta versibus, quibus inter occupationes serias pangendis plurimum semper delectatus est, passim inspersit, qui Panhormi in Sicilia Epistolarum titulo publicati sunt; tandem cum LI ætatis annum attigisset, exeunte Febr. decessit.

Dispar studio, tamen ob excellentiam artis, quam historiâ accuratè & eleganter scriptâ illustravit, *Georgius Vasarius* meruit, ut inter viros ingenio & litteris præstantes acconferetur. Is Arretij in Etruria natus, pictor & architectus nostrâ ætate excellentissimus, diu magno Etruriæ duci Cosmo omnium liberalium artium, inter quas pictura & architectura ut referretur obtinuit, fautori eximio navavit, editis passim ingenij sui ad stupendum omnium specta-

spectaculum monumentis, & tandem hoc anno climaeterico suo V Kal. Vtil. vivis exemptus est. Exinde sicuti testamento caverat, Florentiâ, ubi decessit, Arretium in patriam translatus. Quo loco, in principali secundum sedem Episcopalem templo, in sacello ab ipso juxta sumptuoso & admirando artificio extructo, sepultus.

---

CIO IO LXXV.

**E**odem hoc anno Romæ ad Deum emigravit XV Kal. Apr. M. *Antonius Boba* Casalensis, ob fidam Philiberto Emanueli Sabaudia duci navatam operam in causa Montisferrati Principatus, quâ tamen Caroli V Cæsaris judicio cecidit, ejusdem Philiberti commendatione in collegium Cardinalium ante decennium cooptratus, qui Poëticâ fælicitate & eleganter scribendi ac loquendi facultate inter alias animi dotes, nec non arctâ, quæ

mihi licet admodum iuveni cum illo,  
dum Romæ esset, intercessit, ne consuetudine  
meruit, ut ejus heic honorificam mentio-  
nem faceremus.

Nec præteriri debet *Bernardinus Rota*  
non plus generis, quam ingenii nobili-  
tate illustris, quod ille in *Pœtica Latina &*  
*Etrusca* non exigua cum laude exercuit, &  
cum totâ vitâ litteratos coluisset, exente  
hoc anno Neapoli, ubi natus erat, VII  
Kal. Ianuar. non ita senex fatis concessit.

Majore cura dicendi, si ad alia prope-  
ranti liceret, duo hac ætate Mathematicis  
studiis insignes viri, *Franciscus Maurolycus*  
*Syracusanus* *Messanæ* abbas, qui scriptis suis  
præclaras has artes plurimum illustravit,  
& *Fridericus Commandinus* nobili familiâ  
*Urbini* in *Umbria* natus, qui ad easdem  
illustrandas cum exquisitam utraque  
linguæ peritiâ attulisset, multa Græco-  
rum primis in lucem protulit, ac inter-  
pretatus est, gratiâ & favore *Francisci*  
*Mariæ Urbini* ducis excellenti harum  
scientiarum, quod in principali fastigio  
rarum



rarum est, cognitione præditi sublevatus; quibus in studiis assiduus dum Pappi Alexandrini interpretationem adornat, anno ætatis LXVI vivis exemptus est, in patria urbe ad B. Francisci in monumento majorum conditus, & ab Antonio Toronæo oratione funebri laudatus.

Eodem fere tempore & *Mathias Flacius Illyricus* summus inter Protestanteis Pontificiæ auctoritatis oppugnator, & ob eandem vehementiam Philippo Melancthon præceptor olim suo non satis æquis, post acerbis & sæpius repetitis inter Augustanæ confessionis socios contentiones, potius laboribus quam senio confectus fatis concessit.

Hunc secutus est *Henricus Bullingerus* Bremogarti Helvetiorum oppido natus, anno hujus sæculi quarto, Helveticæ confessionis post Zuinghium & Oecolampadium summus propugnator, & illo mortuo, ad Tigurinæ ecclesiæ curam vocatus, sed minore quam doctus ingenio præditus, in qua cum XLIII an-

nos exegisset, variis ac propè infinitis scriptis editis tandem senio gravis decessit XV Kalend. VIIIbr. à Iosia Simlero Tigurino viro doctissimo, qui non diu ipsi supervixit, laudatus, & variis variorum carminibus epitaphiis celebratus.

Fuit & hic annus climactericus & fatalis *Hadriano Iunio Hornano* rarâ utriusque linguæ, antiquitatis & humaniorû literarum cognitione, philosophiæ præterea ac medicinæ studiis præstanti; quod complura multiplicis doctrinæ ab eo elucubrata monumenta abundè testantur; qui cum Harlemi in Batavis suis larem postremò fixisset, obsidione illâ ante biennium memorabili cum familiâ expulsus, ad Armuidam juxta Mildeburgum in Mattiacis se contulerat, ubi cum frustra consilio ac diligentia suâ concivibus laborantibus opem ferre conatus esset, ex coeli mutatione, quod illis crassius, valetudinem ejus non mediocriter afflictauit, insuper tædio accisarum rerum, & bibli-

bibliothecæ instructissimæ imprimis in  
Harlemi expugnatione direptæ desiderio  
in letalem morbum incidit, & XVI  
Kal. Vtil. animam de repub. litteraria  
optimè meritam Deo reddidit, Milde-  
burgi curante Petro filio honorificè se-  
pultus.

Iunium præcessit *Gulielmus Canterus*  
Ultrajecti in Batavis patriâ familiâ na-  
tus, ut patriâ, sic studiorum similitudi-  
ne conjunctissimus. Nam primis utrius-  
que linguæ rudimentis sub Ioanne Au-  
rato optimo juventutis præceptore Lu-  
tetix factis, industriâ propriâ tantum po-  
stea profecit, ut editis quamplurimis  
scriptis inter eruditissimos sui sæculi nu-  
merari meruerit, plura utique præstitu-  
rus, nisi eum ex rerum Belgicarum in-  
fausto augurio mœror conceptus, & ex  
mœrore mors immatura eripuisset, nam  
non dum XXXIII ætatis annum expleve-  
rat, anno hujus sæculi XLII. IX Kal.  
Vtil. natus, & V Kal. Iunias hoc anno  
denatus.

## CL LXXXVI.

**I**N Germania & eodem anno obiit *Guil. Xilander* Augustanus, utriusque linguae apprimè peritus, & omnis antiquitatis & litteraturæ cum paucis hujus ævi comparandus; ad hæc Philosophicis & Mathematicis studiis clarus, dum vixit cum summâ egestate luctatus, atque ob id fami non famæ scribere existimatus; multa ille magno rei litterariæ bono vivus edidit; plura, quæ promisit, & quâ erat eruditione & ingenio, præstare potuit, publico daturus, nisi immatura mors eum, quippe tantum XL annos exegerat, Heidelbergæ, ubi profitebatur, intemperantiâ vitæ accelerata oppressisset.

Post Xilandrum VI Non. Jul. *Josias Simlerus Capella* in Helvetiis natus, ultimum vitæ diem Tiguri clausit, cum tantum XLV annos exegisset animi cando-  
re,



re, & omnijugâ eruditione præstans, qui Petro Martyri Vermilio successor in Schola Tigurina datus, stylum præcipuè in Samosatenos, Arrianos, Nestorianos, Eutychianos, Macedonianos & nuper veluti ab inferis hoc ævo in Polonia excitatos Tritheitas strinxit, aliis scientiis egregiè instructus, ac præcipuè Mathematicis quas & per se percepit; & summâ cum laude diu professus est, & instrumentis ingeniosissimè à se excogitatis illustravit. In bonis litteris & excelluit, & de repub. Helvetiorum commentarium magnâ prudentiâ scripsit, ac præterea de Alpibus & Valesia commentarium edidit; patriam etiam historiam ab Ægidio Tschudo viro doctissimo vernaculâ linguâ olim inchoatam publico daturus, nisi eo in litteris assiduo, & arthritide ac calculi intolerandis doloribus in horas afflicto properata mors & præclarum rei litterariæ juvandæ desiderium & conceptam de optimi viri laboribus spem abrupisset. Mortuum

laudavit Io. Gulielmus Stukius.

In Germania proxima *Conradus Heresbachius* vir dignitate & doctrinâ præstans, in majorum suorum Heresbachiano castro in Clivenſi ditione natus, hoc anno in ſuo Lorinſulano pridie Eid. VIIIbr. ad Deum migravit, cum LXXII annum exgiſſet. Commentarium in Pſalmos eruditiffimum edidit, & de re ruſticâ in illo otio poſt alios ſcripſit, non minùs morum ſuavitate de ſuis, quàm eruditione de re pub. bene meritus.

Annum clauſit *Georgij Ioachini* à natali ſolo Rætici vulgò cognominati mors, Mathematicarum artium ac rei præcipuè aſtronomicæ præſtantiffimi, quas ſecundum Regiomontanum, Copernicum, Reinoldum maximè illuſtravit. Caſſoviæ in ſuperiore Pannonia pridie Non. Xbreis catharro præfocatus anno ætatis ſexageſimo obiit, cum præter pauca, quæ publico edidit, plura ab admirabili ejus ingenio, quorum indicem in ſuam Bibliothecam Simlerus tranſcripſit, ſtudioſi expectarent.

Romæ.

Romæ magni nominis sive Mathematicus sive Medicus *Hieronymus Cardanus* Mediolano natus, hoc anno itidem obiit. Varia ejus vita, ut mores; pluraque ipse de se inauditâ in viro litteras professo simplicitate, seu libertate scripsit, quam curiosus quisquam à me exigat. Romæ cum diverso ab aliis cultu incedentem paucis ante obitum annis conspicati & adlocuti ac sæpius admirati sumus, cum celeberrimi tot scriptis hominis recordatio subiret; neque tamen quidquam in eo, quod tantæ famæ responderet, animadverteremus; eoque magis Iulij Cæsaris Scaligeri acerimum judicium suspeximus, qui divinum ingenium suum in opere de subtilitate exagitando præcipuè exercuit, inæqualitate illius ubique diligenter notatâ, qui in quibusdam interdum plus homine sapere, in pluribus minus pueris intelligere videatur. In arithmetiis multa conatus est, & invenit. Iudiciariæ quam vocant fidem apud multos struxit, dum certiora per eam, quàm ex arte possint, promeret.

Verum extremæ amentiaë fuit, imò impiaë audaciæ astrorum commentitiis legibus verum astrorum Dominum velle subijcere. Quod ille tamen exaratâ Servatoris nostri geniturâ fecit. Tandem cum tribus diebus minùs septuagesimum quintum annum implevisset, eodem quo prædixerat anno & die, videlicet XI Kalend. VIIIbr. defecit, ob id, ne falleret, mortem suam inediâ accelerasse creditus. Corpus ad D. Andreæ depositum, dein Mediolanum translatum, & ad D. Marci in majorem monumento conditum est.

---

CI<sup>o</sup> I<sup>o</sup> LX<sup>o</sup>VII.

**O**biit & hoc anno paucis postquam ex Bloesis discessit, dieb. Io. Morvillerius Bloesis honesto loco natus, quondam Aureliani episcopus, qui multis legationibus magna cum laude obitis, maximis in Gallia honoribus se semper parem præbuerat, post Hospitalium, cujus virtutem



tem sæculi iniquitas ferre non poterat, domum relegatum, sigillorum procuratione ornatus, homo probus & prudens, sed innatâ timiditate nunquam generosi consilij auctor, ideoque mediis sententiis potius præsens otium, quàm firmam in posterum pacem sectatus, fundatâ veluti alterâ ab Hospitalio in aula sectâ, cuius ad stipulatores eo plures habuit, quòd hi unionis inter Catholicos sarciendæ studio, cuncta factiosorum religionis causam falsò, vel ipsorum iudicio, obtendentium consilia & conata dissimulanda existimarent, cum alteri Guisianorum ad altiora tendentium odio, pacem quâvis ratione colendam suaderent, eâque re Protestantium causæ favere crederentur. Moriendi astitit Pomponius Belleureus summus ejus prudentiæ ac consiliorum sectator, qui mortuo in Franciscanorum æde, sicuti testamento mandaverat, sepulto honorifico elogio parentavit.

Hunc paucis diebus præcessit VIII Eid. Maij *Huldericus Viglius* ab Ayta Zuiche-

mus in Frisia natus, & ob raram juris civilis penitiam primùm multis dignitatibus à Carolo V ornatus, dein ob majorem in rebus agendis laudem à Philippo ejus filio consilij privati præses, ac postremò velleris aurei Cancellarius creatus; qui cum initio Belgij libertatem defendere visus esset, eoque nomine gratiam suorum promeritus, postea ad Hispanorum partes inclinare creditus, in Ordinum odium incurrit, & inter suspectos anno superiore captus est, sed in liberiore custodia habitus; ubi tum (nam Bruxellis fortè eram) eum officiosè invisi, & multa de conversione Belgij ex his motibus præfagientem audivi, quibus excusari volebat, quòd Hispanorum partibus favere diceretur, cum de Regia majestate, quam everti his unionis initiis providebat, factâ tectâ servandâ tantum cogitaret, ceterum ab Hispanorum immanitate, superbiâ, & avaritiâ, sic enim loquebatur, alienus: vir alioqui omni laude & propter integritatem & summam prudentiam dignus.

dignus. Sed cum in ea tempora incidisset, in quibus nihil medium putabatur inter patriæ salutem, aut obedientiæ regi debitæ fidem, haut mirum, si ille, qui tot beneficiis & honoribus virtuti suæ delatis regi devinctus erat, in obsequio & fide, quâ salvâ rempublicam quoque aliquando salvam sperabat, manere elegerit.

. Huic ut comes addatur, vel ejusdem, in qua inter Hispanos excelluit; legum & juris præcipuè & Pontificij doctrinâ meruit *Didacus Covarruvias Toletanus*, qui rectè à puero institutus in Salamanticensi Academia, in prima adolescentia Canonici juris professor, inde Burgis & mox Granatæ correctoris & auditoris munere summâ cum prudentiæ & integritatis laude defunctus; & anno hujus sæculi XLIX. archiepiscopus insulæ S. Dominici in India Occidentali electus, & undecimo post anno Civitatensem episcopatum in Hispania adeptus est, quo eodem anno Salamanticæ Academiæ instaurandæ præpositus fuit, conditis novis legibus, quæ  
in

in eâ hodie religiosissimè observantur. Dein ad consilium Tridentinum profectus, post reditum Segoviensis episcopus creatus est, & Pij III ac Philippi mandatu cum de S. Didaco in beatorum ordines referendo negotium repeteretur, probationes Compluti diligenter collegit; anno demum LXXII regij consilij, & biennio post consilij status præses, post exantlatos cum in scribendo tum in negotiis tractandis eruditionis & prudentiæ ac integritatis secundâ f. m. innumeros labores, Mantuæ Carpetanorum decessit hoc anno V Kal. VIII br. ætatis suæ LXV, bibliothecâ, quam locupletissimam habebat, S. Salvatoris Scholæ legatâ.

Post Covarruviam dicendus venit *Antonius Contius* Novioduno in Veromanduis patre regio præfecto, nam alioqui Civitas Episcopi est, natus, certi judicij & exactæ diligentiae I. C. vel teste Iac. Cujacio, qui antè XIX annos Avarici Bituricum Professor, postea Aurelianum evocatus in ea Academia jus magnâ frequentia



quentiâ interpretatus est , ubi & ei per annum operam navavi; tandem Avaricum Bituricum revocatur, & novâ juris civilis & pontificij editione magnam laudem promeritus, ac plerisque passim ingenij sui monumentis publicatis, quæ in unum corpus aliquando colligi publici boni interest, XVII Kal. IXbr. fere sexagenarius fatis concessit, ad S. Hippolyti juxta Franc. Duarenum, & Eguinarium Baronem juris in eadem Academia professores sepultus.

Eodem tempore *Petrus Danesius* Lutetiae Parisiorum natus, in Bernardinorum ædibus Lutetiae, ubi decrepitæ senectutis & ad munia publica jam inutilis nidum posuerat, debitum naturæ persolvit, octogenario major, peritissimus Græcæ linguæ, cujus Francisco I Rege professor fuerat, postea erudiendæ Francisci II Henrici II filij pueritiæ admotus, à quo & post Georgij Sylvæ doctissimi alumni mortem episcopatu Vaurenfi donatus est. Is vir in nostra ætate in omni

ſcientiarum genere doctiſſimus nihil ferè ſcripſit, ſed inſtructiſſimam librorum ſupplectilem reliquit, à ſe ſummâ diligentia toto longiſſimæ vitæ nec unquam otioſæ tempore notatorum, quæ tamen diſſipata in uſus pauperum ac diſſipata magno rei litterariæ detrimento periit.

His addam *Ioannem Gorreum* Pariſienſem patre Bituricenſi medico natum, & ipſum excellentem noſtrâ ætate medicum; quam ad ſcientiam exactâ cognitione perceptam etiam utriuſque linguæ ſummam peritiâ, & raram in utroque ſcribendi genere pedestri & ſoluto elegantiam adiecerat; quod præclara ejus monumenta, & *Nicander* imprimis Latinis verſibus ab illo expreſſus, abunde teſtantur. Sed cum vir ad ſeculi ſui ornamentum & commune reip. beneficium natus, ab omni denique ſcædo quæſtu alienus (nam nemo illum doctrinâ, exquisito judicio, humanitate, curandi felicitate Lutetiæ anteivit) turbatis temporibus lecticâ vectus ad amicū ægrum inviſendum (is erat *Guilielmus*

mus Viola episcopus Parisiensis ) proficilceretur, apparatorib. quos sicarios esse rebatur, lecticam circumfistentibus, tanto pavore exanimatus est, ut quamdiu postea vixit, vixit autem ad annos LXXII, ab eo qui fuerat alius sensimque deficere quodammodo visus sit.

Nec prætermittendus videtur *Remigius Bellaqua* Nongento Retrodi, quod hodie Angianum Francicum vocatur, in Unellis natus ; quæ eadem patria fuit Nicolao Denisoto, qui & comes Alsinous vulgo dictus est, & cognomini medico qui summâ doctrinæ famâ ad extremam usque senectutem Lutetiæ Medicinam fecit. Remigius olim Caroli Lotaringi Ellebovij Marchionis præceptor, in Poëtica Latina & Gallica excelluit; sed in Gallica præcipue se exercuit, summoque verborum delectu & exquisitâ sententiarum concinnitate versus elaboravit, tantâ curâ adhibitâ, ut quod in illo naturale ac proinde laudatum fuit, in alio affectatum, & ideo improbari potuerit; eumque ob id Petrus

Ronsardus naturę pictorem vocare solitus erat. Itaque post Ronsardum, cui quisquis secundus fuit longè ab ipso absuit, proximum locum aut tertium doctorum iudicio meruit. Nam alterum locum quidam Ioachimo Bellaio tribuunt: quamquam omnia quę fecit, non eundem laudem ubique merentur, ut de eo suo loco diximus. Tandem *Remigius*, cum post rustica sua, de lapidibus pretiosis librum pari elegantia scripsisset, quibus tumulum sibi ipse struxisse quodammodo visus est, ut pulchrè cecinit Ronsardus, vix quinquagesimum annum ingressus Non. Mart. Lutetię decessit, sodalium humeris elatus, & ad B. Augustini sepultus.

*Hannibal Cruceius* patriā Mediolanensis, deplorandus an recensendus post eos venit? vir raris ingenij & doctrine ornamentis excultus, quod vel Achilles Tatius ab eo Latinitate donatus ad posteritatem non ingratam testabitur. Is nobili & antiqua familia natus, sena tui Mediolanensi diu à secretis fuit, & grassante in urbe jam  
biennium



biennium malo, de quo supra diximus, cum placando numini elegantissimè versus, seu veriùs ad Deum ardentissimas preces quasi præsagâ mente concepisset, morbo ipso correptus vitam longiore ævo dignam V Kal. VIIIbr. abruptit cum annum LXIX ageret, à Fabritio F. ad S. Mariæ incoronatæ funeratus.

Eâdem credo lue, certe eodem tempore Tridenti ubi domicilium fixerat, absumptus est P. *Andreas Matthiolus* Senis nobilissimâ Etruriæ civitate Francisco Matthiolo & Lucretia Boninsegna natus, qui annos cum sæculo numerabat, magni nominis Medicus, & imprimis famoso illo Botanico opere toties recusò clarus, qui cum in aula Cæsarea diu magnâ cum laude vixisset, ex duabus uxoribus (nam plures alias post alias duxit) alterâ quidem Hieronymâ ex nobili comitum Varniæ in Soritia familia Ferdinandum & Maximilianum, ex altera Susanna Cherubina Tridentina

Perrum Andream sibi cognominem, Lucretiam & Euphemiam suscepit, qui paternam gloriam sive doctrinâ sive moribus intermori minimè passi sunt. Aliorum è longinquo pænè sepulta memoria revocanda.

*Petrus Nonius Alcazarie* vico haur longè à Setubalia sive Cetobriga in Lusitania natus, professione Medicus, & Mathematicarum artium peritissimus, quas & doctissimis de Arithmetica abstrusiore, Opticâ, & Astronomicâ libris editis plurimùm illustravit, olim Henrici Cardinalis, qui post Sebastiani mortem regnum tenuit, præceptor, & Conimbricæ postea harum pulcherrimarum artium professor, hoc anno morte maturâ, quippe jam octogenarius, placide ad Deum migravit, relictâ bonorum & tanti nominis hærede unicâ filiâ.

Cum paulò ante eum *Ioannes Barrosius* Olissiponæ, ubi natus erat, decessisset, fere septuagenarius, Indicâ historiâ summâ fide conscriptâ bene de suis ac omnibus,

nibus, qui harum provinciarum famâ tantum olim notarum cognitione delectantur, meritis; quæ in duas decadas primùm distincta est, cui tertia post mortem auctoris ab hæredibus publicata accessit.

Ex eadem Lusitania superest *Lud. Andreas Resendius* Eboræ honestis parentibus natus, Poëta, orator ac Theologus & melioris antiquitatis valdè peritus, qui Lovanii Grudiorum aliquandiu operam in litteris navavit, magnâque studiorum conjunctione cum Damiano à Goes civive suo vixit; pleraque scripsit, & consilio suo alios in scribendo juvit; Ambrosio Morali & Kebedo Totelano, ac denique Ioanni Vaseo Brugensi multa ad historicas antiquitates illustrandas ab iis consultus suggessit; tandemque in Henrici Infantis Portugalliæ Cardinalis familiâ jam senio gravis circa hæc tempora defecit.

Hoc & anno *Adamus Bodensteinius*  
*Philippi Aureoli Theophrasti Paracelsi*  
 ho-

hominis novitate scientiæ, quæ innatâ ingeniis humanis curiositate quamplurimos sectatores habuit, quàm rectâ Philosophandi ratione clarioris, ut primus, sic fidus, scitusque & ore & opere interpret; homo liber Basileæ solo cæloque libero exuvias mortalitatis bonâ fide deposuit; hoc enim elogio sibi parentari voluit, ætatis hebdomade septimâ, haut paulò magistro illo suo annosior, qui licet novâ Medicina sua non solum incurabilium morborum plenam sanationem, sed etiam vitæ producendæ artem profiteretur, anno hujus sæculi XLI, ætatis XLVII, vitam huc illuc intemperanter actam vagando obscurè finivit.



## CIS IO LXXVIII.

**N**Ec silentio præteriri debet, quando de clarorum virorum mortibus sermo incidit, *Laurentius Surius* patriâ Lubecensis professione Carthusianus, vir pietate & candida simplicitate præditus, cui Conciliorum editionem singulari diligentia elaboratam & S. S. vitas bona fide descriptas debemus, qui tot laboribus pro repub. Christiana exantlatis defunctus Coloniae in cella sua placidè ad Deum migravit X Kal. Iunias.

Eum paulò post secutus est *Gerardus Falcemburgius* Noviomago in Sicambriis natus, in aula Bentonii Comitis quem affectabatur, Steenvordiae VIII Eid. VIIbr. extinctus immatura morte, quippe cum tantùm quadragesimum ætatis annum ageret, vir inter omnes Belgas litterarum

D d

Græca-

Græcarum rara cognitione præstans :  
 quod cum alia ejus monumenta , tum  
 præcipuè Nonni Panopolitæ ab ipso pro-  
 curata & illustrata editio apud æquos ha-  
 rum rerum æstimatores abundè testa-  
 tur.

Sub id apud nos *Antonius Mizaldus*  
 Monlucione in Boiis natus , professione  
 Medicus, Philosophiæ & artis suæ stu-  
 diis clarus, quam alioqui Lutetiæ sum-  
 mè lucrosam naturæ arcanis scrutandis  
 homo totâ vitâ intentus ferè neglexit, &  
 editis compluribus raræ doctrinæ & ju-  
 dicii scriptis quæ à rerum peritis nun-  
 quam negligentur, in ea urbe consenuit,  
 ac denique hoc anno debitum naturæ  
 persolvit.

Obiit & hoc anno, qui fuit ei cli-  
 mactericus, mense VIIbr. *Petrus Lescotus*  
*Clanius*, familiâ nobili ac Senatoriâ Lu-  
 tetiæ natus, qui cum à puero litteris o-  
 peram daret, totum se Mathematicis dis-  
 ciplinis mancipavit, quas doctore Petro  
 Postello, magnâ felicitate percepit , &  
 cum

cum studio naturâ insito pingendi artem  
 pari felicitate excoluisset, ad architectu-  
 ram præcipuè animum appulit, in qua  
 supra omnes hujus ætatis, (absit invidia  
 dicto) architectos excelluit, ingenique sui  
 insigne specimen dedit, cum aliis ædifi-  
 ciis privatorum, tum maxime Luparen-  
 bus regiâ magnificentiâ à se designatis,  
 quæ utcumque inchoata, neque dum con-  
 summata cuncta palatia Italiæ, quæ maxi-  
 mè hujusmodi structuris luxuriat, stupen-  
 di operis magnitudine & elegantia, vel  
 Italorum ipsorum confessione superant.

In ultimus dicitur *Alexander Picolomi-  
 neus* *Aeneæ Sylvij*, qui Pontifex Pius II  
 dici voluit, gentilis, Angelo patre & Hip-  
 polytâ Sanctiâ matre Senis natus, cujus  
 civitatis cum jam Patrarum Archiepisco-  
 pus esset, virtute suâ meruit ut designare-  
 tur itidem Archiepiscopus. In eo erat  
 præter suavitatem morum cum seriâ gra-  
 vitate conjunctâ rara & exacta omnium  
 laudandarum disciplinarum cognitio,  
 quas & scriptis multiplicibus ferè verna-

culis illustravit, Aristoteli præcipuè ad-  
dictus, ad cujus perspicuam intelligenti-  
am propriâ industriâ multum contulit,  
tandemque hoc anno IIII Eid. Mart. sep-  
tuagenarius decessit, in majore patriæ ur-  
bis templo sepultus, & honorifico à Io.  
Baptista ædituo, Deiphobo Archipres-  
bytero aliisque fratribus elogio ornatus.

Picolomineo qui comes addatur, in-  
signi doctrinâ & probitate meruit Io. Bap-  
tista *Rasarius Petri* F. oppido quod à Vallæ  
Uziæ in Novariensi diœcesi sito nomen  
retinet, familiâ nobili natus. Mediolani  
prima litterarû tyrocinia fecit & Philoso-  
phiæ ac Medicinæ studiis diligenter incu-  
buit, jamque tum Philippo II cum ex  
Hispaniis veniens superstite Carolo V pa-  
tre per Italiam in Germaniam tenderet, ob  
eximias ingenij dotes innotuit; inde Ve-  
netias evocatus, artem dicendi, in qua ex-  
celluit, XXII annos professus est, arctam-  
que cum Sigonio, P. Manutio, Mureto  
nostrate, & Octaviano Ferrario, quem  
& Ticini Logices præceptorem habuerat,  
ami-



amicitiam coluit, totoque illo tempore  
vertendo Galeno, & Aristotelis aliquot  
interpretibus Græcis egregiam operam na-  
vavit, Sereniss. illi reip. acceptissimus, cu-  
jus & memorabilem ad Echinadas par-  
tam de Turcis victoriam inculentâ orati-  
one laudavit. Tantum decus Venetiis  
Philippus postremò invidit, & in Lusita-  
niam, ut in Conimbricensi schola doce-  
ret, optimis conditionibus primò invita-  
tus, cum se ob ætatem excusasset, tandem  
ut Ticinum irer, ab eodem qui jubere po-  
terat, rogatus, principe suo, cujus benefi-  
cio Hieronymi fratris in vincula coniecti  
libertatem & bonorum fisco jam addicto-  
rum restitutionem debebat, non potuit  
non obtemperare, in eâque urbe, post-  
quam eâdem quâ Venetiis celebritate ar-  
tem dicendi totum quadriennium docuit,  
febri malignâ correptus, hoc anno paul-  
lùm major sexagenario VIII. Eid. IIXbr.  
defecit. Nullâ intemperantiæ suspitione  
toto vitæ, quam cœlibem egit, curriculo  
notatus est. Ingenui ac verè liberalis viri

ad bene merendum de omnibus nati, qui erga pauperes benignus, ægrotos nullâ mercede curabat, egenos etiam ut pater sustentabat, funus cuncti civitatis ordines ad B. Augustini, cuius medio in sacello conditus est, insigni ac luctuosâ pompâ profecuti sunt. Multa ejus opera quæ lucem non viderunt, in illustrissimi & pietate ac doctrinâ præstantissimi Cardinalis Borromæi Bibliothecâ Mediolanî exstare dicuntur, quæ ut aliquando edantur, operandum est, & à tanto præfule minimè desperandum.

CL P LXXIX.

Commemorandi veniunt duo doctrinâ præstantes viri *Joannes Hartungus* Miltenbergi ad Mœnum in Franconia natus, qui Heidelbergæ primùm, dein Friburgi Brisgoiæ litteras humaniores Græcas magna cum laude professus, etiam scriptis excoluit; & *Erasmus Osualdus* in Pannonia

Pannonia superiore, quæ hodie Austria est, ortus, qui primum in patria, dein Ingolstadij, Lipsiæ, Basileæ, ac Memingæ, ac postremò Friburgi itidem professus est, Mathematicarum artium, quas & scriptis illustravit, & pariter linguæ sacræ scientiâ, exemplo Sebastiani Munsteri præceptoris sui, clarus, ut amicitia ac domicilij ejusdem ratione, sic et tempore mortis cum Hartungo conjunctissimus, eoque septennio minor decessit.

Paulo post *Ioannes Stadius* Antuerpianus utroque junior, quippe annos tantum LIII natus, Lutetiæ Parisiorum naturæ debitum persolvit prid. Kal. IXbr. Mathematicarum artium scientiâ cum primis clarus, & insigni ephemeridum ab anno *CI* *IO* *LIII* ad annum *CI* *IO* *CVI* summâ diligentia putatarum opere toto orbe celeberrimus. Is primo Lovaniæ professus, postea cum apud nos promulgatâ professione Ramæa, plerique præmio honorifico ad pulcerrimam concertationem invitati essent, & ipse Lutetiam venit, & eâ  
 ætate

ætate cum junioribus se, & imprimis cum Mauritio Bressio Gratianopolitano in pulverem hunc descendere minimè dubitavit, & iudice & auctore Francisco Foxio Candalla illustrissimo simul ac doctissimo viro, qui actioni interfuerat, brabeion cum adversario summâ animi æquitate partitus est; sed nonnihil de tanta laude delibavit, quòd dum proceribus nostris in aula tam viris, quàm fœminis absconsa, incerta, atque adeo futurorum eventa curiosius rimantibus nimis se morigerum præbet, à recta ac certissima scientiarum, quas profitebatur, via deflectere quodammodo visus est, & Mathematicorum, ut olim Cæsarum temporibus, nomen odiosum simul ac detestandum reddidit.

His addam *Ludovicum Regium Constantinensem*, qui utrâque linguâ doctissimus, cum ad eas etiam disciplinarum omne genus adjunxisset, patriæ linguæ ornandæ & excolendæ animum applicuit, & Platonem ac Aristotelem libris com.



compluribus eorū translatis Gallicè loqui docuit, cōmentariisq; eruditissimis explicavit; ac postremò dum mente à vilium rerum cogitationibus abducta, rem domesticam negligit, qui neminem totâ vitâ superiorem ferre potuerat, jam senex alienâ quadrâ vivere coactus, luctuosâ quidem reip. litterariæ, ceterum minimè ipsi importunâ morte ereptus est.

In Italia paulò ante V Kal. Vtil. Io. *Baptista Hadrianus* patritiâ gente natus, Florentiæ obiit ad S. Francisci extra muros sepultus, cum annos LXVIII explevisset, vir litteris egregiè excultus, qui Fr. Guicciardini post antiquos nemini meo iudicio posthabendi historiam accuratâ diligentîâ persecutus est, hoc est ab anno huius seculi XXXVI res in Italia gestas ex commentariis plerumque ut apparet, Cosmi magni Etruriæ ducis ingentis animi, ac profundæ prudentiæ principis luculento opere explicavit, ex quo multa me sumpsisse, atque adeo plura quàm ex quovis alio in hoc opus

translulisse ingenuè profiteor ; incorruptum quippe iudicium in iis quæ per-  
specta habuit, & fidem cum candore ac  
sinceritate animi summâ conjunctam in  
hoc scriptore deprehendisse mihi visus,  
ut mirer eum minore inter Italos, quàm  
par sit, in pretio haberi.

---

CI<sup>o</sup> I<sup>o</sup> LXXX.

**P**rimus dicetur *Hieronymus Wolfius*  
Oetingæ in Rætia natus, exactâ lin-  
guæ Græcæ cognitione clarus, qui, per-  
lustratis in adolescentia Galliæ & Italiæ  
Academiis, cum se Augustam Vindeli-  
corum tanquam in tutissimum studio-  
rum nidum contulisset, eas maximè  
scriptis & industriâ suâ illustravit, Fug-  
gerorum liberalitate sublevatus, quorum  
munificentia Zonaram, Nicetam, Gre-  
goram primarios historiæ Constantino-  
politanae scriptores ab illo summâ fide  
Latini-

Latinitate donatos debemus, ubi & literas Græcas in Annæa schola magno auditorum concursu professus est, tandemque cum ætatis annum sexagesimum quartum ageret, ex calculo literatis ferè fatali VII Eid. VIIIbr. interpestivâ magis reip. quàm sibi morte ad Deum migravit. Huic Hainzelii fratres Germani VI viri Io. Baptistæ filii egregio ad Dominicanorum monumenta parentarunt.

Wolfium paullò post secutus est *Immanuel Tremellius* Ferrariæ patre Hebræo natus, linguæ Hebræicæ peritissimus, qui cum Lucam cum Petro Martyre Vermilio & aliis in occulto Protestantium doctrinæ addictis concessisset, postremò Italiâ omnino relictâ, cum ipso Vermilio ac sociis in Germaniam venit, sicuti suo loco diximus, & Argentinæ primò domicilium fixit, deinde in Britanniam, potente rerum Edvardo VI, transmisit, quo mortuo Germaniam repetiit, & in Schola Hornabachensi sub duce

Volfango Bipontino qui apud nos decessit, aliquando docuit, unde Heidelbergam ad professionem Hebræam evocatus est, ubi Syriacam Novi Testamenti interpretationem latinitate donavit, & postea novam veteris fœderis ad Hebrææ veritatis fontes examinatam translationem molitus est, socio tanti laboris ascito Francisco Junio Biturige, qui post Tremellii obitum eandem editionem in opere alieno plus justo ingeniosus recensuit, & additis multis auctiorem potius quàm meliorem judicio multorum reddidit; relictâ postremò Heidelbergâ Diviodurum Mediomatricum, ubi olim cum ex Italia veniret, uxorem duxerat, concessit, unde Sedanum Bullionii principum sedem evocatus, ut in Academia nova linguam Hebræicam profiteretur, septuagenario proximus tandem defecit.

Nec multo post III Non. IXbr. in Hispania Cæsaraugustæ, quæ illi patria erat, *Hieronimus Surita* cum ætatis annum



num LXVII ágeret, debitum naturæ persolvit, vir ingenii omni doctrinâ instructi elegantia clarus, & prolixo ac laborioso patriæ historiæ opere à se edito, nec non Antonini itinerario variis lectionibus potius quàm commentariis illustrato, ac post mortem ejus ab Andræa Schotto publicato de patria & litteris optimè meritis, in quo id solum desiderari, imò deplorari potuit, quòd judicium violatæ fidei, quos vocant, à secretis fuerit, & cum inter suos doctissimus haberetur, & ad promerendam omnium gratiam quasi natus videretur, tamen consilióne ad privatam securitatem, an gentis fato ad tuendam dignitatem incertam, tam inhumano & longè studiosis infestissimo muneri suam industriam addixerit.

Ante Suritam *Alvardus Gomecius* Eulaliæ sexto à Toletó lapide natus, cum ætatis annum LXVI ágeret, vitam cum morte commutavit XV Kal. VIII br. qui opere de vita Ximenii Cardinalis, cui

tantum non solùm sua Hispania, sed totus orbis Christianus debet, ob Bibliorum luculentam illam in mediis ignorantiae tenebris editionem suo sumptu procuratam, pari prudentiâ & elegantîâ scripto summam gratiam à studiosis ini-  
vit.

*Hieronymus Osorius* mihi, dum Lusitana enarrarem, pænè exciderat, hîc proprio magis loco commemorandus, qui adolescens cum litteris operam in Italia dedisset cum Ant. Augustino & Ioanne Metello, Metellario Sequano I.C. in patriam reversus, primùm Silvensis, dein Algarbiorum Episcopus fuit; tum scriptis quæ multa & varia puriore ac florido stilo exarata, dum vixit, passim dedit, & post ejus mortem Hier. ex fratre nepos Romæ publicavit, tum vitæ sanctioris exemplo non solùm suis, sed toti Christiano orbi utilis, atque ad extremum in munere suo assiduus placidè ad Deum migravit, eo felicior plerisque existimatus, quòd qui Castellensium ar-  
ma

ma Lusitaniæ annus intulit, idem ipsum, ne patriæ excidio superesse cogere-  
tur, Lusitaniæ abstulit.

---

CL L LXXXI.

**E**Odem hoc anno III Non. VIIbr.  
Lutetiæ obiit immaturâ morte *Iacobus Billius Prunæus*, Sanmithaëliani cœ-  
nobii in Eremo antistes, vir non plus  
nobilitate, quàm propriâ virtute ac vitæ  
sanctimoniâ & doctrinâ ab omni fucò  
alienâ, linguæque Græcæ exactâ cogniti-  
one clarus, quam in veteribus patribus  
illustrandis præcipuè exercuit, qui ar-  
thritidis doloribus attenuato corpore, fe-  
rè in medio vitæ curriculo, quippe vix  
XLVII annum ingressus, in eâdem quâ  
vixerat, piâ animi tranquillitate ad De-  
um migravit.

Post quem commemorandus venit  
longè dispar & pietate & ingenio, sed  
fortasse haut minore famâ *Gulielmus Po-  
stellus*,

*stellus*, Barentoni vico in Neustria loco ignobili natus, qui Philosophiæ & Mathematicarum artium studia primùm professus, & inde longinquis peregrinationibus linguarum externarum ac maximè Orientalium cognitionem adeptus, innumera exotici gustûs scripta passim in Italia, Germania, & apud nos edidit, & cum Venetiis esset, virginis vetulæ cujusdam familiaritate usus, in errorem delirum juxta ac detestandum de scæminei sexûs saluari reparatione nondum consummatâ incidit; quem domum reversus inter prælegendum publicavit & defendit; verum accusatus à Theologis & à Magistratu increpitus, tantùm pro pœna omni prælectionum usu ad tempus interdictus est. Sed cum rursus prælegendi pruritu tangeretur, retractationem, libello ad Reginam parentem directo, anno hujus seculi LXVI complexus est, quâ non tam errorem fatetur, quàm interpretatione per fanaticos sensus detortâ eludit; rursusque dum Mathematica rudimenta,



rudimenta, quod illi permiffum erat, auditoribus publicè interpretaretur, eandem quaestionem reposuit, ob quam interdicto planè in posterum publicarum praeflectionum usu in Monasterium Sanmartinianum Lutetiæ relegatus est, ubi centenario proximus, & ut ipse credi volebat, impolutam à congressu Venereò naturam professus, cui robustæ adeo sanitatis constantiam tribuebat, tandem quarto post Biliū die decessit.

Nec prætermitti debet *Hubertus Languetus* Vitellij in *Ædus* natus, vir doctissimus & humanissimus, ac rerum Germaniæ, in quâ ferè totam vitam contrivit, & ubi mihi arcta cum eo amicitia fuit, peritissimus, & summus *Ioachimi Camerarij* amicus; qui cum *Augusto Saxoni* VII viro operam suam addixisset, & præcipui consiliarij officio apud eum diu defunctus in suspicionem verisset, quasi epexegetis de coena Domini à *Gaspere Pevecto* & aliis juxta Helveticam confessionem disseminatæ consilio participasset,

set, ab ea aula discessit, & se ad Arausio-  
nensem contulit. Apud quem dum gra-  
vissimis negotiis explicandis, quibus par  
illius animus erat, sedulò incumbit, mor-  
bo correptus anno climacterico suo, prid.  
Kal. VIIIbr. Antverpiæ decessit.

Ante Languetum *Andreas Papius* Gan-  
denfis, utriusque linguæ ac Musicæ Poë-  
ticæque peritissimus, quod pauca ejus  
scripta apud posteritatem testabuntur,  
Lævini Torrentij summi & dignitate &  
eruditione viri ex sorore nepos, Leodici  
dum per Caniculæ æstûs nocte silenti cor-  
pus natatu in fluvio subjecto exercet, me-  
ando, remeando, tandem fatiscens admo-  
dum juvenis defecit; triduo post ad B.  
Lamberti cujus Collegij sodalis erat, se-  
pultus, & à Iano Gulielmio Collegâ veris  
lacrymis deploratus.

Post hos *Petrus Ciaconus* Toleti in Car-  
petanis natus, Romæ ultimum diem clau-  
sit, VII Kal. IXbr. ætatis anno Lvi, in B.  
Iacobi æde, cui instructissimam Biblio-  
thecam legavit, sepultus. Vir exquisitâ in  
omni

omni scientiarum genere, antiquitatis & omnis politioris litteraturæ cognitione clarus, & quem unum video ex omni litteratorum qui ævo nostro innotuerunt, numero, qui Æmaro Ranconeto nostro comparari possit; nam nihil ferè vivens scripsit, & pauca post mortem ab amicis edita extant; sed crebra illius & honorifica in alienis scriptis mentio exactæ & reconditæ ejus, ut in Ranconeto, doctrinæ apud posteros fidem facit.

Nunc ordine Italos recensebimus. Ac primùm inter eos *Ioannem Baptistam Camotium* Asulanum, ex veteri in eo oppido familiâ ortum, qui linguarum etiam Orientalium cognitione insignis, ac Græcæ præ aliis peritissimus, cum Medicinæ operam dedisset, omissis ejus experimentis, sub Iulio III Bononiæ in Schola Hispaniensi publicè Philosophiam professus est. Dein sub Paulo IIII Maceratæ in Piceno eandem professionem exercuit; postea à Pio IV Romam evocatus Patrum Græcorum scriptis interpretandis incubuit,

buit, ac tandem hoc anno XIII Kal. Apr. in urbe anno ætatis LXXVI è vita demigravit; Timotheo filio superstite. Multa scripsit, ex quibus tantum Orationes sparsim variis temporibus habitæ, dum vixit, editæ, & Commentarij Græci in Metaphysicam Theophrasti, & translationes è Græco pleræque; plura non edita; quorum indicem ad me Italiâ transmissum longum esset & ad rem superfluum hîc inferere. Romæ paulò post decessit, anno suo climacterico, & ad Sancti Salvatoris Laureati sepultus est.

*Hubertus Folietæ* Genuæ natus, vir Latine scribendi facultate præstans, & in literario otio elati animi, qui exortis in suâ repub. turbis, novam nec equiorum iudicio absurdam de nobilium & plebeiarum familiarum distinctione sententiam cum invexisset, dialogis duobus eâ de re linguâ populari publicatis, immane quantum in se nobilium invidiam concitavit. De cætero, multa elegantissimè & acri iudicio scripsit, partim ab ipso particulatim  
pub.



publicata, partim post ejus mortem à Paulo fratre edita, quæ simul edi publicè interest. Is unus nostro ævo dignus fuit, qui sicuti spem fecerat, historias sui temporis Pauli Iovij vestigiis insistens persequeretur. Verùm per particulas earum potius gustum dare, quàm continuum opus pertextere eum in animo habuisse crediderim, quippe cum ea quæ dedit tam diffusâ sint, ut si eâdem ubertate & copiâ cætera scripsisset, res proculdubio in immensum excrevisset. Multa ex eo cum operi huic inseruerim, ac plerumque verba ipsa (nam quâ meliora potuissem?) non solum ingenuè id profiteri, sed ejus memoriam dignâ recordatione hîc recolere officij mei esse duxi.

Post Folietam *Lucas Patrus I. C.* Romæ honesto loco natus, in patriâ denatus est, VIII Eîd. VIIIbr. ad S. Nicolai in carcere Tulliano sepultus, in proprio sacello, cum annum ætatis LXIX attigisset. Puriorum antiquitatem & meliorem litteraturam ad Juris civilis interpretationem attulisse

creditus, pauca tamen in eo genere præstitit, & hanc palmam nostris hominibus reliquit.

Professionis conjunctione Pæto accensetur *Ioannes Fichardus* qui *Huldrico Zazio* maximè illustri inter Germanos I.C. *Friburgæ Briscoiæ* operam dedit; dein *Patavii & Bononiæ* eandem scientiam professus, *Francofurtum*, quæ illi patria erat, reversus, in eâque urbe syndici munere XLIV annos magnâ fidei & industriæ laude functus, ibidem septuagenarius decessit, & à *Bernardino Rutilio* vitas veterum Iuris sapientum descriptas ad ipsum *Zazium* usque persecutus est: hoc certè facto meritis ut qui tot clarorum virorum memoriam in occulto latere passus non est, silentio minimè prætereatur.

Abstulit & hic annus *Franciscum Portum* Cretâ nobilissimâ Mediterranei maris insulâ *Venetæ* ditionis ortum, *Græciæ* suæ magnum nostrâ ætate ornamentum; qui in *Renatæ Ludovici XII F. & Herculis II*  
Ferra-

Ferrariensium ducis uxoris familiâ quasi educatus, etiam Ferrariæ litteras Græcas professus, post Herculis mortem, Renatâ in Franciam reversâ, Italiam reliquit, & ut liberiolem doctrinæ quam in Renatæ comitatu imbiberat, professionem haberet, Aureliam Allobrogum concessit, & voce ac scriptis Græcos autores interpretatus ad septuagenarium annum vitam produxit, in eâque urbe defecit, à Theodoro Beza, cum quo conjunctissimè vixerat, carmine epitaphio laudatus.

Annum clausit *Franciscus Venerius* Patricius Venetus, qui Philosophicis studiis innutritus, in adolescentia de Voluntate, de Anima, de Fato, vernaculâ linguâ commentarios edidit, deinde in repub. suâ honores magnâ integritatis & prudentiæ laude gessit, & jam senex Patavinæ Academiæ instaurandæ præpositus, editis postremò de generatione scriptis, ad meliorem vitam migravit.

CI<sub>2</sub> I<sub>2</sub> LXXXIII.

**E**T ut ad litteris claros viros deveniam,  
 Elongè maximam resp. Christiana ja-  
 cturam fecit in morte *Ioannis Maldonati* lo-  
 co nobili in *Bætica Hispaniæ* nati, è Soda-  
 litio Iesuitico, egregiè à teneris annis omni  
 litterarum genere exculti, qui ad exactum  
 Philosophiæ & Theologiæ studium sin-  
 gularem pietatem, morum candorem &  
 acerrimum iudicium cum attulisset, mag-  
 nâ cum laude & frequenti omnium ordi-  
 num concursu totos X annos *Lutetiæ Pa-*  
*risiorum*, ubi & eum pueri audivimus, in  
*Claromontana Schola* professus est, unus-  
 que in causa extitisse meritò creditur ut  
 Sodalitium illud toti *Academiæ* valdè in-  
 visum, & alioqui jam prudentioribus su-  
 spectum, ob tanti viri gratiam ac cōmen-  
 dationem à *Senatu*, apud quem lis adhuc  
 indecisa pendebat, tamdiu toleraretur, &  
 eo usque dum rebus Sodalium in urbe  
 confirmatis, Maldonatus post conciliatam  
 insigni



in signi suâ unius eruditione novo ordini  
 celebritatem à Gregorio XIII Pontifice  
 Romam evocatus est, ubi vir assiduus in  
 studiis & lucubrationibus suis exacte di-  
 gerendis intentus, ex nimis vigiliis con-  
 tracto morbo, decessit VIII Eid. Ian. cum  
 paulum LVI annum supergressus esset.  
 Nihil vivens publicavit; post mortem  
 ejus, operâ ac curâ Clementis Puteani ex  
 eodem Sodalitio viri doctissimi prodie-  
 runt eruditissima commentaria in IV  
 Evangelistas Mussiponti edita, meliora  
 & integriora multorum judicio futura, si  
 superstite auctore edita fuissent; quibus  
 tamen si pari diligentia elaboratae in Acta  
 Apostolorum & Apostolicas Epistolas  
 interpretationes, quas scripsisse illum con-  
 stat, olim accedant, habebunt profecto  
 omnes docti & pii opus paucis in hac ge-  
 nere comparandum, & quod unum mul-  
 torum instar esse possit.

Maldonatum paulo post secutus est  
*Hubertus Goltrius* patre Virsburgensi Fran-  
 co-Venloë in Sicambria natus, cui an-

tiquitas Græcæ ac Romana secundum Onufrium Panuinum Antonium Augustinum, Fulvium Ursinum, debet plurimum, & qui arte cœlandi ac scriptis propriis ad utramque multum contulit, haut ita senex, vixque annum LVIII egressus, Brugis Flandrorum, ubi larem fixerat, IX Kalen. April. denatus est. Annum clausit mors *Thomæ Erasti* Badenis in Helvetiis nati, qui Philosophiæ & Medicinæ studiis hac ætate clariuit, solidis, veris, atque adeo à veteribus proditis utriusque scientiæ primordiis constanter insilens. Itaque & Astrologiam, quæ ex positu astrorum de fortunis hominum decernit, validis argumentis confutavit, & Paracelsiam Medicinam, quæ seu novitate seu vanitate suâ in Germania ac alibi tot ingenia illexit, validis itidem argumentis confutatam acerrimè insectatus est; ad ultimum etiam humanas scientias egressus, Theologica tractavit, & quæstionem de disciplina ac censuris non omnino ex suorum sententia agitavit, undè graves in Helvetiorum Ecclesiis

clesius exorta contentiones. Tandem sexagenario maior, hoc anno Basilieæ, ubi sicuti Heidelbergæ, diu antea docuerat, qui naturam tot doctissimis scriptis illustraverat, naturæ debitum persolvit, prid. Kalend. Ianuar. ad B. Martini sepultus.

---

CIO I. LXXXIV.

**F**uit & hic annus clarorum virorum morte funestus, quorum princeps commemorandus venit *Paulus Foxius* Ioannis Garmanij, Comitis F. Archiepiscopus Tholosanus, sæpius à me honorificè sicuti par fuit, appellatus, olim in Parisiensi curia senator, postea Anglicanâ & Vencrâ, dein & aliis legationibus summâ cum prudentiæ laude felicissimè defunctus. Ultimis Henrici II temporibus in illa tot innocentum virorum calamitate involutus, sed mox absolutus ac dignitati pristinæ restitutus, sicuti suo loco diximus.

Ex eo tamen cum Pontifici suspectus esset, vix tandem ei innocentiam suam assiduo obsequio approbavit; & cum Oratorem regium Romæ ageret, inter sacra morbo repentino correptus, optime meriti de patria & rege animam Deo exeunte Maio reddidit, ætatis anno LVI. Defuncto ad B. Ludovici magnâ pompâ parentatum fuit, VI Kal. Iun. Et M. Antonius Muretus magnum non solum Galliæ nostræ sed ipsius Romæ lumen, qui vivum coluerat, mortuum habitâ publicæ oratione laudavit.

Foxium secutus est *Vidus Faber Pibracius* Senatus Papiensis præses, VI Kal. Iun. vivis exemptus, paucis ante Brabantinum, cuius Cancellarius erat, diebus, elegantia & amœnitate ingenij quod ingentis Artibus à pueritia graviter non solum tinxerat, sed plane imbuerat, & exquisitâ Latine loquendi ac scribendi peritiâ, quam sub *Petro Bunsello* imbiberat, clarus, ad quam etiam versus Gallicos pangendi raram felicitatem adjunxerat. Totâ vitâ  
maximis



maximis negotiis domi & extra regnum exercitatus, ac præcipuè cum Arnaldo Ferrerio comes Concilij Tridentini celebrationi interfuit; & Henricum regem in Poloniam melioribus quàm rediit auspiciis euntem comitatus est. Tandem is haud paulò Foxio ætate minor, morbo ex mœrore, ut par erat, ex prava reip. administratione ac Antverpiano casu contracto diu conflictatus, Lutetiæ inter Arnoldi Casanovæ fratris & amicorum amplexus obiit, in Augustinianorum proximo cœnobio sepultus. Foxium & Fabrum optimos viros & Galliæ nominis studiosissimos eodem mense, quanquam longè dissitis locis, amisisse cum reip. nostræ luctuosum fuit, tum mihi imprimis, qui eorum amicitia semper familiarissimè usus sum, & quibus secundum parentes plurimum debebam; nam me ambo præcipuo amore ac tanquam filium profecuti sunt, & quicquid doctrinæ & rerum usu valeo, si quid valeo, id utrique libentissimè acceptum fero, idque pro non ingrati animi monu-

mento apud posteritatem testatum volo. Vido morienti cum me sæpius requisivisset, quo minùs assidere potuerim, gravissimâ tertianâ, quâ tunc vexabar, prohibitus fui; quâ & effectum, ut chartę ejus, quas fidei meę committere decreverat, huc & illuc disjectę magno rei litterarię damno perierint.

Apud nos & prid. Eid. VIIIbr. optimè meritam de re Christiana ac litteraria animam Deo reddidit Durocorti Remorum *Gentianus Hervetus* Oliveti pago juxta Aurelianâ natus anno S. *CLVCCCCXCIX*, qui à puero optimis artibus, & utriusque linguę cognitione instructus, primum tyrocinium fecit in erudiendo Claudio Albaspineo, qui postea unus è VI viris ab epistolis secretis Francisco I, Henrico II, Francisco II, & Carolo IX fuit; inde Lutetiam profectus Edvardo Lupseto Anglo in excudendo Galeno à Thoma Linacro Latinè verso desudanti operam addixit, eumque in Angliam redeuntem secutus, Arturo Polo instituendo à Sarisberienfi

berienſi matre appoſitus eſt, & poſtea à Reginaldo Polo Cardinali communis matris permiſſu in Italiam evocatus eſt, ut Græcis auctoriſibus in Latinam linguam vertendis operam daret, ubi ille in tanti viri familia, quæ virtutum & omnis civilis cultûs velut officina erat, diu fuit, Polo ipſi chariſſimus, & ſummorum in Italia virorum amicitiam, ob raram eruditionem & morum ſuavitatem promeritus; deinde in patriam rediit, & in Burdigalenſi gymnaſio totâ tunc Galliâ celeberrimo publicè prælegendo induſtriam exercuit; rursûſque in Italiam proſectus à Polo munificentiſſimo patrono in clientelam Marcello Cervino, qui poſtea ſummus pontifex fuit, id enixè poſtulanti datus eſt. Ubi & multa illius ſive hortatu ſeu juffu è Patribus Græcis in Latinum tranſtulit. Marcellum ipſum ad Concilium ſecutus, in quo etiam pleraſque orationes habuit, & inter eas eruditiſſimam ac commodatiſſimam pro honeſtate matrimoniorum, quæ ſanctionibus contra clandestina conjugia

jugia postea factis occasionem præbuisse creditur; sacris dein initiatus, Ioannis Hangeſti Noviodunensis Episcopi primum, dein Ioannis Morvillerii, Aurelianensis item Episcopi vicarius sacris ad populum concionibus jocavit, & Carolum Cardinalem Lotaringum ad Concilium Tridentinum proficiscentem postremo secutus est, ab eoque in Sacri Collegii Remensis sodalitium cooptatus, quod reliquum fuit in studiis assiduus exegit. Hujus vita longa & nunquam otiosa meruit ut ei longiori elogio parentarem.

*Franciscus Turrianus* obiit IX Kal. VIII. br. vico Errera in diœcesi Valentina Hispaniæ natus, vir in Theologica antiquitate & linguæ Græcæ & Hebrææ peritiâ clarus, cujus quò plura eruditi ingenii monumenta extant, eo pauciora mihi de ipso dicenda sunt; post multa tum à se, tum ex antiquis patribus Græcis edita, jam senior Iesuitico Sodalitio nomen dedit, & in Germaniam  
pro-



profectus Ingolstadii multa etiam commentatus est, ac contra Ant. Sadeelem præcipuè stylum exercuit; denique Romam revocatus, in schola Iesuitica paulò minor octogenario defecit.

His annumerabo par hominum, qui rem litterariam summoperè juverunt; prior occurrit *Huldricus Fuggerus* Augustæ Vindelicorum natus, & gente inter Germanos clarâ natus, Paulli III olim cubicularius, & postea Protestantium doctrinam amplexus, qui veterum scriptis liberali sumptu comparandis & evulgandis intentus, eâque in re Henrici Scrimgeri & doctissimi typographi Henrici Stephani industriâ usus, cum rem domesticam negligere à gentilibus argueretur, patrimonii aviti amplissimi administratione dejectus est, unde mærore contracto in melancholiæ morbum incidit, quo ferè totâ vitâ conflictatus est; apud Fridericum III Palatinum VII virum Heidelbergæ receptum sibi delegat, cui & bibliothecam fidam exilii

Hh

sui

fui comitem moriens legavit XVIII Kalend. Vtil.anno ætatis LVIII.

Hunc præcessit uno die, cum LIII annos exegisset, *Ioannes Sambucus* Firmariæ in Pannonia natus, & Viennæ placidè mortuus, professione Medicus, cuius ea fuit in veteribus libris colligendis diligentia, liberalitas in publicandis, ut principibus viris, qui hac re laudem consecuti sunt, quamvis in dispari fortuna, æquari debeat, quod Nonnus Dionysiacorum scriptor, Aristænetus, Eupapius, Hesychius Illustrius, alii ejus beneficio editi abundè testantur; alioqui alienâ quàm suâ industriâ clarior.

Eodem mense *Ianus Gulielmus* adolescens cultissimi ingenii Lubecæ natus, Avarici Biturigum, quò ad magnum Cujacium audiendum profectus fuerat, contracto ex nimis caloribus morbo, vix salutatâ urbe decessit, cum nondum XXX vitæ annum attigisset; eo magis deplorandâ morte, quòd multa, & inter ea novam Ciceronis operum ad M.

S. exemplaria diligentissime collatorum & amplius sexcentis clausulis suppletorum editionem paratam haberet, quam & ego Lutetiæ, dum is ad me familiariter ventitaret, vidi, hætenus magnâ rei litterariæ jacturâ aut disperditam aut suppressam.

Ultimus dicetur *Abrahamus Bucoltzerus* Schonoviæ in Batavis natus, opere chronologico magnam gloriam adeptus, qui Franstadiæ in Quadis decessit, XVIII Kalend. Vtil. vix annum LIV egressus.

CIo Io XXXV.

**M.** *Antonius Muretus* Ratiasti Lemo-  
vicum apud nos natus, naturæ  
debitum persolvit prid. Non. Iunias,  
cum annum LIX egressus esset, ingenio  
præstanti & ad omnia nato præditus,  
quod in politiori litteratura præcipuè ex-  
ercuit,

ercuit, utriusque linguæ peritiâ clarus, & Latinè scribendi facultate insignis, ad quæ omnia acerrimum iudicium attulit. Is primùm litteras humaniores Lutetiæ professus, dein Burdigalæ, & Augustæ Ausciorum, Pictavij etiam & Tolosæ juri civili operam dedit, atque inde relicto summo sui apud suos desiderio, in Italiam concessit anno hujus sæculi LIV, & Venetiis ac Patavij sexennium commoratus, postremò Romam amplissimis conditionibus ab Hippolyto Atestino Cardinali invitatus, in illius & post ejus mortem in Aloisii Atestini Cardinalis familia consenuit, majore semper ad eruditionis ac facundiæ præstantiam factâ cum ætate accessione. Mortuum laudavit Franciscus Bencius tanto præceptore dignissimus discipulus coram celebri cætu ad S. Trinitatis in colle Hortulorum congregato, ubi & Muretus testamento condito sepeliri voluit.

Eo senior, atque adeo longævâ ætate id consequutus ut litteras in Italia renascen-



nascenteis & pænè extinctas viderit, *Petrus Victorius* gente patritiâ Florentiæ natus, hoc anno exeunte in patria XIV Kal. Ianuar. obiit, cum annum ætatis XC excessisset, ad S. Spiritûs, quod est Augustinianorum cænobium, in monumento majorum conditus, qui alterius Petri ex eadem familia ante annos LXX mortui memoriam renovavit, & quantum ille consilio manuque remp. Florentinam difficillimis temporibus juvit, tantum ipse ingenio ac stilo rem litterariam illustravit. De quo pauciora eo mihi dicenda sunt, quòd ejus pleraque monumenta extant, quibus humaniores litteras, & antiquos scriptores tam Græcos quàm Latinos magnâ fide ac diligentia recognitos explicavit.

Ante Victorium eo longè junior fatis concessit *Carolus Sigonius* Mutinæ natus, ex qua *Iacobus Sadoletus*, & *Gregorius Cortesius* Cardinales dignitate & eruditione præstanteis, *Marius Molsa*, *Gabriel Falopius*, alii prodierunt; qui cum sub

Romulo Amasæo , litteris primùm operam dedisset , in Baptistæ Egnatij locum, qui Venetiis profitebatur, ad litteras humaniores docendas primùm à Senatu accersitus est , atque inde ad gymnasium Patavinum sibi gradum fecit, ubi cum inæquali longè adversario, sed æqualibus ferre partium studiis (contentiones quippe illorum quasi scholam in duas partes scidebant) Francisco Robortello coram voce & scriptis, cum Nicolao Gruchio nostrate absente, quem longè Robortello præferbat, tantùm scriptis diu certavit, tandemque Bononiam concessit, ubi & ultima stipendia fecit, monumentis variis editis ad eternitatem victuris, quibus antiquitatem Romanam, iisdem quibus Onufrius Panuinus, vestigiis insistent, & posteriora tempora unus post omnes maximè illustravit, clarus. Tandem cum mense Augusto Mutinam excurrisset, ut suburbanum in patria senectuti suæ pararet, domum propriam verè ac sempiternam invenit; nam morbo correptus eo loco decessit,

cessit, cum LX tantum annos exple-  
visset.

His accenscitur *Sebastianus Eeblius* gente patricia Venetus, qui egregie litteris instructus primam iuventutem capessendis honoribus insumpsit, inde ad otium litterarium revolutus, omisâ repub. ad studia familiaria se totum contulit, & opus de nummis antiquis absolvit; in Aristotelis Ethica scripsit, Timæum Platonis suis Italici dedit, aliaque Philosophica commentatus est; dein quadragesimum vitæ annum ingressus, rursus ad reipub. munia obeunda quasi vegetior rediit; in quibus cum ad annū LV assiduus fuisset, magnâ ut doctrinæ sic civilis prudentiæ famâ, exacto vitæ cursu defecit.

Paulo antè *Rembertus Dodonæus* Mechliniensis, qui D. Maximiliano II & Rodolpho II Cæsaribus in Medicina operam navavit, & rei herbariæ meliore quàm à quopiam antea ordine digestæ opere præcipuè inclaruit, & post ea Medicinam publicè apud Batavos Lugdunî magnâ

nâ peritiæ laude professus , anno ætatis LXVIII ad VI Eid Mart. è vita demigravit.

Demum XIII Kalend. VIIIbr. *Ioannes Molanus* Lovaniensis, & Theologiæ in celebri illâ Academia professor, historiæ Ecclesiasticæ, quam compluribus scriptis illustravit, admodum gnarus, quamvis jam senex, tamen immaturâ morte, quippe nondum editis, quæ plurima affecta habebat, præclaris ingenij sui in eodem genere monumentis, naturæ debitum persolvit, in patria urbe ad B. Petri sepultus.

*Ioannes Crato* Uratislaviæ in Quadis natus hoc quoque anno fatis concessit, cum ætatis annum LXVII ageret. Is prima studiorum tirocinia in Germania fecit sub Philippo Melanchthone, dein Io. Bapt. Montano præstantissimo Medico operam navavit, sub eoque excellentissimus Philosophus simul & Medicus evasit, gratamque vicem præceptori de se optimè merito rependens, Consilia ejus & alia opera aut correxit aut auxit; aut non edita publico



publico edidit. Hoc etiam raro fælicitatis exemplo ob eximiam doctrinam, & morum suavitatem cum prudentiâ conjunctam consecutus, ut tribus Cæsaribus patri, filio, ac nepoti, ordine nusquam intermisso consiliarij ac primarij Medici munere semper æquè charus ad mortem usque inservierit, ac tandem in patria placido & optato fine animam deo reddiderit.

Annum clausit mors *Petri Ronsardi* gente nobili in Vindocinis nati, qui inter pueros nobiles in Caroli Aurelianensium ducis familia educatus, & postea in Scotia aliquandiu versatus, inde grandior ad literas animum appulit, præceptore usus Ioanne Aurato, quas tantâ aviditate simul ac fælicitate percepit, ut præteritæ negligentiae damnum brevi tempore resarcierit; in Poëtica vero tantum antiquorum, quos nocturnâ ac diurnâ manu versabat, imitatione atque adeo æmulatione profecit, ut præstantissimos æquasse, plerosque ex iis superasse videatur. Nam cum genero-

sos impetus & acerrimum iudicium, quod  
 raro accidit, simul à natura haberet, hæc  
 duo ad facultatem Poëticam attulit, & ita  
 naturam arte temperavit, Graiæ Camænae  
 Latinæque spiritum admiscens, ut post  
 Augusti sæculum, quod, ut in altissima  
 pace, uberrimo ingeniorum proventu flo-  
 ruit, Poëtarum, qui post fuerunt, (citra  
 excessum & invidiam hoc dictum sit)  
 præstantissimus evaserit. Verùm homo  
 ut ingenio, sic formâ & corporis robore  
 insignis, cùm vitâ solutâ licentiosè nimis  
 ingenio indulgeret, valetudinem firmissi-  
 mam debilitavit, acerbissimis arthritidis  
 doloribus extremâ ætate conflictatus: In-  
 ter quos aliquid Poëticum semper pange-  
 bat, quod licet jam tepescente sanguine,  
 pristinam venam redolebat. Natus erat  
 eodem, quo infelicitè à nostris ad Tici-  
 num pugnatum est, anno, ut ipse in Ele-  
 gia ad Remigium Bellaqueum scribit,  
 quasi Deus jacturam nominis Gallici eo  
 prælio factam, & secutum ex illo veluti  
 nostrarum rerum interitum tanti viri ortu  
 compen-

compensare voluerit. Tandem attenuato doloribus corpore ad Cosmi-fanum in Turonibus cœnobium altero à Cæsaro-duno lapide loco amænissimo animam Deo reddidit, V Kalend. Ianuar. etiam dum animam ageret, aliquot piis versibus non pœnitendis factis, qui postea cum cæteris operibus editi sunt; in eo cœnobio, quo à Carolo rege donatus fuerat, & sepeliri voluit, testamento condito, quo heredem scripsit Ioannem Gallandium iuventutis Parisiensis optimum Moderatorem, cuius hospitio cum Lutetiae esset, familiarissimè utebatur, qui dignam tanti viri memoriae gratiam rependens, ei exequiis perhonorificis postea in Schola Becodiana sua parentavit. Mortuum laudavit Iacobus Darius Perronus, magni tunc ingenij & eruditionis adolescens, qui postea & dignitate & famâ crevit, sicuti suo loco videbinus. Statuam etiam marmoream Ronsardo in sacello Scholæ poni curavit Gallandius, & anniversario sacro ac doctis puerorum concertationibus

tionibus memoriam ejus longo post tempore celebravit.

---

CL, b XXXVI.

**H**Os rursus antecessit conditione dispar, sed dignus multas ob causas qui memoretur, *Martinus* ab *Aspilcueta* doctor *Navarrus* dictus, quod paternum & maternum genus ex *Navarra* duceret, qui *Salmanticae* primum, dein *Conimbricæ* permultos annos jus pontificium magnâ non solum eruditionis, sed pietatis ac sinceritatis famâ professus, in numeris & summæ authoritatis in eo genere editis monumentis; vir præter eas, quas laudavi in eo, virtutes, constantiâ & fide præstans, quod duobus maxime illustribus exemplis manifestum fecit; nam cum *Bartholomæus Caranza* Archiepiscopus *Toletanus*, cui multis nominibus obstrictus erat, sectariæ labis postulatus esset, ejusque rei, *Philippo* per-



permittente, cognitionem Pontifex sibi  
 sumpſisset, Navarrus quanquam octoge-  
 nario proximus, omnem ætatis & va-  
 letudinis curam amici periculo postha-  
 buit, & Caranzam Romam ductum  
 comitatus, ejus innocentiam averſo Phi-  
 lippo & ejus ministris constantissimè tu-  
 tatus est : donec rædior carceris miser  
 Caranza cum nihil contra ipsum proba-  
 retur, tandem extinctus est. Cum verò  
 sub id Romam Orator missus esset à Re-  
 ge Paullus Foxius, vir præter natalium  
 splendorem omni laude dignissimus,  
 memini, cum in ejus Comitatu essem,  
 Navarrum ad salutandum eum venisse,  
 & cum illum domi non reperisset, ad  
 Trinitatis in porticu Foxio obvium fa-  
 ctum, mox posito pileo & pileolo hu-  
 mi se prostravisse, & osculum ad pedes  
 ejus tulisse; & cum miraretur Foxius,  
 & quâ erat humanitate ac modestiâ,  
 tantum honorem deprecaretur, ac ve-  
 nerandæ ætatis senem erigere conaretur,  
 respondisse Navarrum, hunc cultum ac

reverentiam genti, ex qua Reges sui  
 prognati essent, meritò deberi; & cum  
 tandem surrexisset, nunquam precibus  
 aut jussis adduci potuisse ut caput rege-  
 ret, quanquam loco ad cœli tunc max-  
 imè frigidi injurias exposito cum Foxio  
 deambulare. Nec verò mirum fuit, ho-  
 minem probum, & in casibus, quos  
 vocant conscientiae examinandis, de qui-  
 bus & omnium peritissimè scripsit, ver-  
 satum, tantam atque venerandam suo-  
 rum regum memoriam ac cultum ser-  
 vasse, quippe cum sciret Carolum V &  
 Philippum ejus F. aliquoties super eâ re  
 ab ipsis consultus de Navarra regni, ut  
 injuriose occupati, restitutione, aut ido-  
 neâ compensatione dandâ sæpius delibe-  
 rasse, idque ipsis, ut facerent, si suæ con-  
 scientiae satisfactum vellent, auctor fu-  
 isset. Tandem post Caranzæ obitum seu  
 tædio patriæ, seu quòd ætate provectior  
 esset quàm ut in patriam rediturus tam  
 longinquo itineri se tutò committeret,  
 Romæ mansit, ubi hoc anno XI Kal.  
 Iul.

Iul. ad deum migravit, cum annos XCV  
exegisset, m. VI, d. VIII, ad B. Anto-  
nij Patavini in campo Martio sepul-  
tus.

Navarrum antecessit magnum Hispa-  
niæ lumen *Antonius Augustinus*, domo  
CæsarAugustanus, patris cognominis Ar-  
ragonix Procancellarii à regni Ordini-  
bus olim repetundarum postulati, & à  
Carolo rege Bruxellis solemnè judicio  
absoluti, F. qui politioris litteraturæ ac  
antiquitatis rarâ cognitione sibi in Italia  
comparatâ, & juris Romani ac postre-  
mò Pontificii exquisitâ scientiâ meruit,  
ut Romæ inter XII viros litium judican-  
darum à Pontifice cooptaretur; inde A-  
lisanus primùm, dein Ilerdensis in His-  
pania Episcopus creatus. Multa in Italia  
dum fuit, & postea in patria ad ater-  
nam memoriam victura monumenta  
edidit, sive edenda Fulvio Ursino ami-  
co suo & in eodem litterarum genere,  
juris scientiam excipio, versanti commi-  
sit. Tandem Archiepiscopus Tarraco-  
nensis

nenſis creatus, dum in iisdem ſtudiis perſeuerans, præcipuè in jure Pontificio illuſtrando ſudat, & jam apparatam Conciliorum tam Græcorum quàm Latino- rum editionem haberet, animam bene de repub. litteraria atque adeo Chriſtiana meritam Deo reddidit pridie Kal. Iu- nias, cum annos LXX, m. III, d. totidem vixiſſet, ad B. Theclæ in odéo à ſe pa- rato Tarracone conditus. Mortuum lau- davit Andreas Schottus Antuerpianus ip- ſius Auguſtini familiaris, oratione Lævi- na Torrentio Antuerpiæ Epifcopo in- ſcriptâ.

*Octavianus Ferrarius* Hieronymi, de quo alias dixi, F. poſt Ant. Auguſtinum dicetur, nobili familiâ Mediolori natus, qui primum litteris humanioribus & Philoſophiæ ac Medicæ in celeberrimis Italiæ gymnafiis egregiè eruditus, in Ca- nobiana Schola, cujus inſtituendæ Pau- lo Canobio auctor fuerat, annos duo- deviginti Ethica & Politica docuit. Dein juffu Senatûs Ticinum cõeſſit, & na- turalem



ruralem Aristotelis Philosophiam suscepit  
 interpretandam, quam & exoterico ope-  
 re non parum exornavit, eoque meru-  
 it ut Franciscus Vieomercatus, qui Fran-  
 cisco I apud nos tanto concursu Lute-  
 tiæ in regio gymnasio docuit, in patri-  
 am post summæ litterarum fautoris mor-  
 tem reversus, illum inter omnes delige-  
 ret, cujus judicio opera sua olim edenda  
 committeret; inde post quadriennium  
 impetratâ à Senatu veniâ, Mediolanum  
 rediit, ac denuò in eâdem scholâ pro-  
 fiteri perrexit: tandemque morbo, cu-  
 jus occasione domum repetierat, ingra-  
 vescente oppressus III Non. VIIIbr. in  
 villa sua placidè ad Deum migravit, cum  
 vitæ exegisset an. LXIIIX, m. V, d. XII,  
 à Bartholomæo Capra IC. & indivi-  
 duo vitæ socio, cui & bibliothecam le-  
 gavit, cum honorifico elogio funera-  
 tus.

Romæ & decessit hoc anno *Julius*  
*Castellanus* Faventiæ celebri Galliæ To-  
 gatae urbe natus, qui Academicas Cice-  
 ronis,

ronis, & Aristotelis de humano intellectu doctrinam discussit, & cum in urbe Philosophiam aliquot annis secundâ famâ docuisset, suppressorum stipendiorum à Sixto V, ut impensæ parceret, jacturam passus, homo ingenuus valdè indoluit, accedente ad injuriam egestatis importuno sensu, ex qua dum Episcopatu ab eodem donatus se extricare sperat, qui paupertatis tristitiam invicto animo tulerat, inexpectati beneficii lætitiâ non tulit, antequam eo frui posset subitò extinctus, cum LVIII tantum ætatis annum attigisset.

Castellano *Laurentium Gambarum Brixianum* addam, qui ingenium in Poëtica feliciter exercuit, & in familia Alexandri Farnesij Cardinalis litteratorum fautoris eximij diù vixit, & exeunte hoc anno maturâ morte, quippe nonagenarius, ad Deum migravit, ad S. Laurentij in Damaso sepultus.

Majore præconio dicendus *Hier. Columna* & ob gentis, cujus nomen præferbat, claritudinem, quippe qui à Pompeio

peio Columna Cardinali, qui regni Neapolitani prorex fuit, genus repeteret, & singularem eruditionem cum moribus suavissimis conjunctam; artam cum Io. Matthæo Aquaviva Hadrianensium Duce, viro ultra splendorem natalium, egregiâ scientiarum atque Astronomiæ ac Musicæ inprimis doctrinâ itidem illustri, amicitiam coluit, & bis mille quingentorum voluminum Bibliothecam instruxit, præter statuas antiqui operis & numos, raræque elegantix picturis ornata domum habuit, ac splendide vixit, in eoque splendore & otio multa elucubrasse dicitur, quippe utriusque linguæ non trita cognitione præditus: post elatam uxorem etiam linguæ sanctæ operam dedit, & cum sacris initiari cuperet, jam Episcopus designatus, ex malo calculi præmature III Non. April. hoc anno, ætatis suæ LIII, Neapoli decessit, ad B. Virginis in monumentum majorum illatus. Q. Ennij fragmenta collegit, disposuit, explicuit, quæ Ioannes filius quadriennio post parentis obitum

obitum publicavit, fidem apud posteritatem factura, quid à tanto viro expectandum fuerit, si diuturniorem ei vitam Deus annuisset. Præter Joannem, ex conjugē dilectissimā Pompelium honoribus quibusdam in aula Romana defunctum reliquit, ac postremò & Fabium, qui in naturali historia industriam suam hodie exercet, scriptis in eo genere aliquot jam editis, & majore in posterum spe excitatâ.

Italorum mentio atque adeo Columnæ me admonet, ne *Galeacium Caracciolum* Vici marchionem, qui hoc anno debitum naturæ procul à patria persolvit, indictum præteream. Is Nicolaum Antonium bellicum sub Arausionensi principe in Italia celebrem patrem habuit, matrem Petri Antonij Carafæ, qui Paulus III post adeptum pontificatum dictus est, sororem; Victoriam ducis Nucerini filiam in uxorem duxerat, ex qua numerosam sobolem sustulit. Sed cum sub id Petrus Martyr Vermilius Neapolim venisset, & jam tum dissemin-



disseminatam per Helvetios & in Germania doctrinam fidei in arcano instillaret, in iis sectatores habuit Ioannem Valdesium Hispanum, de quo alias dixi, & Ioannem Franciscum Cafertam Galeacio adfinitate conjunctum, & ipsum Galeacium, qui iam artam cum M. Ant. Flaminiio Victoris Columnæ Piscarij Marchionis viduæ perfamiliari, ob pietatis studia amicitiam colebat, non quòd Flaminio doctrinæ in cæteris illi addictus esset, sed quòd quædam ad justificationem pertinentia, ut alias diximus, & multa quæ pravâ consuetudine in Ecclesiam irrepsisse videbantur, emendari consultum duceret. Tandem à Valdesio & Vermilio persuasus, & cum officij causâ in Germaniam, ut Carolo Cæsari inserviret, venisset, Argentinx convento eodem Vermilio, qui interim in Germaniam discesserat, magis confirmatus, Genevam patre & conjuge ac liberis relictis concessit; cum aliquoties cum patre primum in Italia, & postea cum patre ac conjuge simul collocutus,

nec illius reverentiâ, nec amore hujus, aut liberorum collo paterno hærentium blanditiis ac lachrymis adduci posset ut propositum mutaret. Postremò Genevam reversus, quasi uxor secum prima divortium fecisset, aliam duxit anno *Clö LX*, primùm consultis pastoribus, sicuti scribunt qui eas res prodidere, Annam Fremejeram nomine jam quadragenariam, quæ viro priore defuncto, Rotomago, unde nata erat, ob religionis causam paullò ante migraverat, cum eâque in summa te-  
 unitate, quippe omnibus bonis dejectus ad annum *LXVIII* ætatis conjunctissime vixit, novo divortij probati & superinductæ uxoris non sine Protestantium invidia exemplo.

Abstulit & hic annus, qui fuit illi climactericus, *Martinum Chemnitium* Britzæ, cui Fideli cognomentum, in Vandalia natum, qui litteras primas sub Philippo Melanchthone & Georgio Sabino Vitembergæ & Francofordiæ ad Oderam imbibit. Dein se totum Theologicis studiis  
 manci-

mancipavit, in quibus assiduo labore tantum profecit, ut post Philippi præceptoris obitum, Theologorum Augustanæ confessionis facile princeps inter suos habitus sit, à Friderico II Daniæ rege, Ludovico Palatino, Augusto Saxone, Ioanne Georgio Brandenburgico VIIviris, Iulio Brunsvico, aliisque principibus & civitatibus & Ordinibus huic doctrinæ addictis in consilium super Ecclesiasticis negotiis semper adhibitus, aut absens consultus. Tandem Brunsvicæ, in qua XXX totos annos docuit, tot laboribus defunctis ac scriptis multis editis, VI. Eid. April. debitum naturæ persolvit.

Hic annus ultimus fuit *Ludovico Lavatero* & *Rodolfo Gualtero* ambobus Tigurinis & illius Ecclesiæ pastoribus. Et ille quidem Henrici Bullengeri gener multis editis scriptis etiam extra religionis controversias claruit; Hic Iosia Simleri de quo jam diximus, socer, Homiliastes inter suos celeberrimus, valde senex.

Nec prætermitti debet *Matthæus Vesenbesius*

*senbesius* familiâ patriciâ Antuerpiæ natus, qui cum juri civili operam Lovanii dedisset, eandem scientiam magnâ cum laude Ienæ & postea Vitembergæ professus est, ubi & editis compluribus scriptis hoc anno obiit, cum LV ætatis annum attigisset.

CI<sup>o</sup> ID<sup>o</sup> XXXVII.

**E***lias Vinetus* Barbezio Rupi Fulcan-  
diorum castello in Santonibus natus, qui non solum juventuti erudiendæ in Aquitanica schola, in qua Ioanni Gelidæ successit, sicuti suo loco diximus, operam sedulam navaverat, sed etiam scriptis doctissimis antiquorum monumenta plurimum illustravit, ac demum septuagesimum octavum annum supergressus, Burdigalæ in eadem scholâ animam optimè de repub. litteraria meritam Deo reddidit, prid. Eid. Maias.

Eum



Eum quinque diebus præcessit aut potius secutus est, (nam calculum pristinum Germani Protestantes retinent) *Iacobus Skekius*, ætate triennio minor, professione Medicus, qui Aristotelem & scriptis illustravit, & vivâ voce magno auditorum plausu ac cætu Tubingæ in Suevia interpretatus est, & ambobus oculis ad extremum orbatus, de cætero integris animi sensibus, in suo munere defecit.

Aliquanto post III Kal. IXbr. decessit *Ioannes Vigandus* magnæ doctrinæ inter Protestanteis Theologus, qui Matthiæ Flacio in concinnandis Ecclesiasticæ historiæ centuriis operam olim navavit, & postea in Pomesanensis in Borussia Episcopus à Stephano rege juxta pacta cum Borussæ Principibus & Ordinibus inita dictus est.

Eodemque fere tempore apud nos *Germanus Valens Guelius* Aureliani, quæ illi patria erat, Episcopus, Magduni ad Ligerim Episcopatûs castello, major

septuagenario placidè ad deum migravit, olim in familia Coliniorum educatus, & postea amplissimi Ordinis Senator, ut linguæ Græcæ exactâ cognitione & omni humaniori litteraturâ ac Poeticâ imprimis, sic morum candore ac comitate præstans.

Paullò ante Episcopus Fani Adæmari designatus fuerat *Iacobus Pamelius* Bruggis natus, & prænobili stirpe Pameliorum apud Aldenardam in Pleumosius oriundus, vir & sacre antiquitatis peritissimus, & cum multis scriptis, quibus eam illustravit, tum unâ & alterâ Tertulliani & B. Cypriani editione magnam gratiam à doctis & piis omnibus consecutus, qui Bruxellas negotiorum causâ cogitans in itinere ad montes Hannoniæ febri violentâ corripitur, ex qua præcipitato fato, vix quippe LI annum excefferat, ibidem decessit XIII Kal. IXbr. ad beati Valetrudis modicis exequiis (sic enim ultimis tabulis mandaverat) funeratus.

Sed

Sed maximè omnium tristis, & non solum amplissimo ordini, cujus magnum ornamentum erat, sed etiam cunctis regni Ordinibus, cujus bono natus videbatur, luctuosus *Jacobi Manioti* Iulioduno in Pictonibus oriundi obitus fuit, qui verè in Deum & patriam pius, ad eximium Gallici nominis studium cum regii fisci in Senatu patronus esset, generosos atque adeo regios spiritus attulerat, profundâ eruditione an facundiâ major incertum, ab omni ambitu & fucò alienus, & supra omnem opum, quas amplissimas habebat, amorem positus. Nec erat in tanto viro tot raris ingenij dotibus à Deo cumulatò quod meritò desiderares nisi firmiorem valetudinem, quæ per se debilis, assiduis pro communi salute ac regni dignitate seriis cogitationibus ac studiis multum debilitabatur, eo minore sensu, quò majore animo ad ea ferebatur; igitur, cum ex auxiliaris exercitus adventu spem concepisset, ut vel invitis publicæ quietis

perturbatoribus pax confici posset, ubi vidit Regem male consultum tam male occasione uti, ad infirmam valetudinem publico mœrore accedente, sub autumnum in gravissimum morbum incidit, qui postremo illi lethalis fuit, & cum tantum XXXVI annos exegisset, vir longiore vitâ dignissimus, patriæ ac suis morte immaturâ ac mihi, quem ob studiorum & consiliorum conjunctionem plurimum diligebat, semper deplorandâ ereptus est.

---

CIO IO XXXVIII.

**F**uit hic annus fatalis *Ioan. Viero* nobili Zelandiæ inundatæ familiâ orto, qui Philosophicis studiis egregie à pueritia instructus, Henrico Cornelio Agrippæ homini comprimis erudito, & magicis superstitionibus infami, ante L annos



annos, Gratianopoli apud nos defuncto, operam in pueritiâ navavit, adeo erga præceptorem optimè de se meritum gratus, ut opus illud, quod diu post Agrippæ mortem de hujus præstigiôsæ scientiæ vanitate luculentum edidit, ex ea occasione publicasse credatur. Medicinam magnâ cum laude fecit in aulis Caroli V, Ferdinandi, Maximiliani II, Rodolphi II Cæsarium, ac Wilielmi Cliviæ Ducis archiatros fuit, in cujus comitatu per totam Germaniam, tum in Borussia eandem artem pari fælicitate exercuit, & Teklenburgi, cum ad Arnoldum Bentheimij Comitem officiosè invisendam divertisset, morbo subito correptus decessit prid. Kal. Mart. septuagesimum secundum ætatis annum paullùm supergressus.

Vierum secutus est *Theodorus Zuingerus* Basileæ natus, & in patria mortuus VI Eid. Mart. longè eo junior, quippe tantùm quinquagesimum quartum annum egressus, eâdem professione clarus, quam & editis compluribus mόνumentis illu-

stravit ; sed majorem illi famam concilia-  
vit ingens opus, cui vitæ humanæ theatro  
titulum fecit. Cujus dulci convictu &  
colloquio cum mihi postea Basileæ mag-  
nâ cum animi voluptate frui contigisset,  
animadverti virum summâ doctrinâ &  
rarâ ingenij elegantîâ ac candore prædi-  
tum in digniore se opere industriam exer-  
cere potuisse, si non majorem nominis so-  
ceri & popularium suorum qui spissæ mo-  
lis librorum congerie ferè gaudent, quàm  
propriæ laudis rationem habuisset.

Octobri ineunte Consentia, quæ illi  
patriâ erat, in Calabria ultimum diem  
clausit *Bernardinus Tilesius*, qui Antoni-  
um patrum habuit Philosophicis studiis  
celeberrimum, ab eoque Mediolani insti-  
tutus, postea Patavij majores progressus  
fecit, & Romam sub id tempus venit, quo  
urbs ab Hispanis direpta, parumque à pe-  
riculo absuit, re omni spoliatus, hic Phi-  
losophiæ ab ipso deinceps traditæ princi-  
pium fecit, quam cum viris doctissimis,  
ubicunque eos nancisci poterat, ingenuè  
com=

communicatam semper in dies locupletavit, & amicitiam multorum illius aulae procerum, ob morum candorem cum summâ eruditione conjunctum promeruit, à Paulo IV etiam Episcopatu patrio donatus, à quo ille se excusavit, & eam militiam fratri transcripsit; ipse Consenti- am reversus uxorem duxit, liberosque ex ea suscepit, quî patrem grandævum, quippe annorum LXXIX, hoc anno extulerunt.

Ante Tilesium maturâ morte obiit Patavij in patria, Iunio ineunte, *Spero Speronius* qui ante LXIV annos Philosophiam vernaculâ linguâ publicè in amplissimo illo Gymnasio professus fuerat, Vir multis simul naturæ ac fortunæ dotibus, quæ singulæ in singulis valdè commendantur, à Deo cumulatus, ab Antonio Ricobono, celeberrimo Eloquentiæ professore, in funere laudatus, à nobilitate patriæ, splendore familiæ, fortunarum amplitudine, equestri dignitate, corporis firmitate, ac prosperâ valetudine, ingenij præstantiâ, differendi

diffèrendi ratione, Poëtica, Rhetoricâ, Scribendi peritiâ, Philosophiæ ac Mathematicarum rerû scientiâ, sacræ Scripturæ omnisque antiquitatis cognitione, rerum futurarum prudenti prædictione, quæ cum multis Principibus, quorum consuetudine frui ei longissimâ in vita sæpius licuit, charissimum reddidit.

Haut multò ætate Speronio minor *Augerius Ferrerius* VIIIbri exeunte debitum naturæ persolvit Tolosæ, ubi natus erat, Medicinam professus, quam & fælicissimè ac summo iudicio fecit, non solum in patria, atque adeo in aula, sed etiam in Italia, cum Ioannem Bertrandum Galliæ Procancellarium, & in collegium Cardinalium cooptatum, Romam usque secutus est, secundâ semper artis suæ famâ, ad quam exquisitam Astrologiæ & aliarum vulgo minùs notarum cognitionem artium adjecerat, tanti à Iulio Cæsare Scaligero, quo nullum majus huic sæculo lumen affulsit, estimatus, ut nihil ferè aliquâ meditatione dignum, sive in egrotorum

rum



rum perplexis curationibus, quæ moram patiebantur, sive in privatis studiis, inconsulto illo moliretur. Fuit illi cum Io. Bodino librorum de Repub. scriptore acrior, quàm inter litteratos decet, concertatio, in qua dum stilum exerceret, atrocissimis intestinorum torminibus correptus, qui firmâ valetudine huc usque vixerat, tandem defecit.

*Ioannes Auratus* morte sua hunc annum clausit, Ratiasti Lemovicum, quæ eadem Io. Maludano, M. Antonio Mureto, Simonio Bosio litterarum laude viris clarissimis patria fuit, natus, primùm pueris regiis erudiendis admotus, dein & ob ingenij præstantiam, & exactam linguæ utriusque cognitionem, in regio gymnasio diù professor, postremò emeritus vitam regio honorario ad extremam senectutem toleravit; Poeticâ facultate inprimis excelluit, in qua, ut alij ipso docente multum proficerent, sedulâ sælicitate effecit; siquidem ex ejus aula prodierunt cùm multa præclara fere hujus sæculi lumina,

tum rarum illud ornamentum Petrus Ronfardus, qui Aurato, quicquid in ipso ingenij, quicquid Poetici spiritûs erat, (fuit autem in eo tantum, quantum in ullo post felicia illa Augusti tempora) tanquam præceptori suo gratus discipulus acceptum referebat. Talis tantusque vir pænè octogenarius Lutetiæ IXbri exeunte decessit, eò minore sui relicto desiderio, quòd ob senium, & dilapsâ jam ob turbas exortas iuventute, inutilis ejus opera esse cœpisset, & vir ad aliorum studia ac commodà promovenda natus, qui rem familiarem totâ vitâ neglexerat, deplorandâ jampridem egestate premeretur. Extant ejus carmina, non ab ipso auctore, etsi id titulus præ se fert, sed à librariis præposterâ diligentia, cum alieni nominis dispendio lucrum captantibus edita, quibus partim aliena, partim quædam etiam ipsius, quæ tamen ille nunquam pro suis agnovisset, inserta sunt: quæ omnia recenseri, non solum tanti viri famæ, sed etiam litterariæ rei interest; quod brevi facturum

rum Scævolam Sammarthanum speramus, virum, cùm ob morum candorem, ac summam integritatem, tum ob raram eruditionem, & excellentem ingenij in hoc genere fælicitatem mihi charissimum, qui & summâ studiorum consensione ac necessitudinē cum Aurato, dum vixit, conjunctus fuit, & intimos animi ejus sensus planè perspectos habuit, ut minimè verendum sit, ne quicquid in eâ re fecerit, propterea in alieno opere ingeniosus fuisse videatur.

---

Clō Io XXC IX.

**A**Bstulit hic annus tot cladibus fustis *Franciscum Roaldesiam* Marfiliani in Rutenis humili municipio natum, virum in quo pieas & morum candor cum rarâ doctrinâ certabant. Is I.V. Divonæ Cadurcorum primùm cum Antonio Goveano; dein Valentiaë Cavarum, (ubi ei, necnon Iacobo Cujacio, qui

illum omnis antiquitatis reconditæ locupletem penum appellare solitus erat, operam navavit) ac postremò Tolosæ, quò à Io. Stephano Durantio evocatus fuerat, ad multam ætatem laude cum summâ professus, alienam potius industriam juvare, quàm proprio nomine inclarescere voluit, nullis ferè editis scriptis, cum cottidiè super gravissimis juris quæstionibus & rei antiquariæ arcanis, coram & per litteras à doctissimis viris consuleretur. Tandem mœrore ex indigna amplissimi & amicissimi viri nece concepto, ibidem paulò post, septuagenario major VIIIbr. mensè obiit, hoc unum in morte alioqui minimè molestâ dolere sibi dictitans, quòd urbem, quam puer tanquam humanioribus litteris inimicam vitaverat, senex inhumanâ tanti Senatoris cæde sceleratam aspicere, & in eâ spiritum emittere cogeretur.

Ex nostris, post eum commemorandus venit *Christophorus Plantinus*, Turo-nensis qui secundum Manutios, Stepha-  
nos,



nos, Frobenios, & Oporinum, maximè rem litterariam juvit, libris innumeris, & inter alia bibliis, ad Complutense exemplar, sed longè majore operatum elegantia, auspiciis Philippi Hispaniarum Regis editis; quæ editio illi quàm gloriosa, tam detrimentosa fuit, præposterâ ministrorum Philippi diligentia, qui pecuniam in id à Rege collatam dum asperius exigunt, Plantinum aliunde pecuniâ ab amicis mutuò sumptâ jam gravatum pænè merferunt. Vixit annos LXXV, obiit Antuerpiæ Kalen. Vtilib. in majore urbis æde honorificè sepultus.

In Germania III. Eid. Mart. obiit *Ioannes Sturmius* Sleida, quæ eadem Sleidani Historici patria fuit, in Ubiis natus, Eloquentiæ professor eximius, quam doctissimis scriptis illustravit, diu Argentinæ, magnâ cum prudentiæ & eruditionis laude, scholam moderatus, in qua sibi vivo, sed ob ingravescentem ætatem impari, (nam octogesimum annum excesserat) Melchiorum Junium gratissimum discipulum

pulum à Senatu subrogari petierat & obtinuerat.

Hunc præcessit *Henricus Mollerus*, vir in Hebraicis doctissimus, & magni inter suos nominis Theologus, qui cum diu Vitembergæ docuisset, dein. Hamburgi larem fixisset, paullò sexagenario minor ex hac vita migravit, VI Kalend. Xbreis.

Post hos recensebitur *Martinus Cromeus*, Varmiaë in Borussia Episcopus, insignis rerum Polonicarum scriptor, qui cum patriam & consilio & monumentis editis plurimis iuvisset, & illustrasset, jam senex III Eid. Mart. animam Deo reddidit, cui in Episcopatu illo successus est Andreas Bathoreus Cardinalis Stephani ultimi Regis ex Andrea fratre nepos, & per delegatos regios in possessionem mense Maio proximè missus, frustra fremen-  
tibus Borussis, qui ex sua gente hominem, non exterum ad eam dignitatem provehendum fuisse, per jura ac privilegia sua disputabant.

Ex ea natione, quippe Regio monte  
Borussiae

Borussiae oppido natus, Patavij obiit valde senex *Melchior Guilandinus* egregie literis à puero imbutus; præcipue in historia naturali ingenium exercuit, & in rei herbariae ac fossilium cognitione excelluit, ob id plerisque peregrinationibus in Græciam & Asiam susceptis, in Africa aliquandiu etiam captivus, ubi calamitatem suam in commodum vertit, multarum rerum pleniori perceptâ cognitione, quàm si fuisset in libertate; ac postremò Patavium tanquam amænissimum studiorum domicilium se contulit, ubi horti publici curam à Senatu commissam magnâ eruditionis opinione administravit, variis cum Ioanne Petro Matthiolo Senensi, cuius opus de plantis toties ac tot linguis recusum est, concertationibus digladiatus. Pauca tamen, cum multa expectarentur, ejus extant scripta, & inter ea cōmentarius de Papyro ad C. Plinium editus, in quo tamen virū tantæ existimationis multoties hallucinatum esse, eruditissimus Iosephus Scaliger contrario scripto demonstravit.

Nec

Nec meritâ laude fraudandus in eadem urbe, ex qua ipse ortus erat, denatus *Jacobus Zabarella* Comes, hos enim titulos à Maximiliano Cæsare majoribus suis concessos retinebat, diù Philosophiam magnâ cum laude, in illâ toto orbe Christiano celeberrimâ Academiâ professus, ac primum in Bernardini Tomitani locum suffectus, postea Archangelo Mercenario Picenti Collega adjunctus; quo ante XVI annos vivis exempto, in eodem munere ad extremum perseveravit, atque hoc anno post edita complura in Aristotelem scripta, debitum naturæ persolvit VIII Kalen. IXbr. ab Antonio Ricobono Rodiginio copiosâ oratione laudatus.

Majore præconio dicendus *Andreas Dudithius* ab Horehovizza, aliquando etiam Sbardellius à materno genere (mater illi quippe nobilis eo nomine Veneta) cognominatus, vir natalium claritate, ingenio omni scientiarum genere exculto, judicio, rarâ Latinè scribendi dicendique facultate, in negotiis explicandis  
 pru-



prudentiâ ac solertiâ præstans ; ad hæc totius corporis formâ , gestu , & oris renidentis gravitate conspicuus , comitate , vitæ ianocentiâ , omnium , qui unquam eum viderunt , gratiam promeritus , natus est anno hujus sæculi *CI<sup>o</sup> I<sup>o</sup> XXXIII* Non. Febr. Budæ in Hungaria , aut Budæ proximo Castello ; primum litterarum tyrocinium Patavij fecit , & in Italia P. Manutium , Fr. Robortellem , C. Sigonium , O. Panvinum , P. Victorium partim audivit , partim amicos & familiares habuit. Tantus vero Tullianæ eloquentiæ sive admirator sive sectator fuit , ut totum Ciceronem ter propriâ manu descripserit. Patavij tunc Stephanus Bathorius postea in Poloniæ Regem electus erat , cum quo subortæ jam tum occultæ sive æmulationes sive similitates , quæ cum ætate creverunt. Inde in Angliam Reginaldum Polum Cardinalem abeuntem cum Aloisio Priulo secutus est , cujus & vitam à Ludovico Beccarello Italicè scriptam eleganter Latinè vertit. Demum ex Anglia Luteti-

am venit, & illic sub optimo doctore Angelo Caninio Anglarenſi non ſolùm Græcæ linguæ & Hebraicæ, ſed etiam Orientalium peritiſſimo, denuò intermiſſis per illas peregrinationes ſtudiis, operam dedit; in Pannoniam ſuam reverſus, atque in aulam Cæſaream, quanquam admodum invenis, ob admirabilem eruditionem & morum ſuavitatem Tinninienſis Episcopuſ creatus, ac poſtea Quinqueceſienſis designatus fuit, magnasque legationes ſub Ferdinando jam tunc, & poſtea ſub Maximiliano, atque etiam Rodolfo ſummâ felicitatis & prudentiæ laude obivit. Inter hæc Tridentino Concilio interfuit, & Hungariæ ſacri ordinis nomine varias orationes ad Patres habuit; quarum duæ, altera de Communione ſub utrâque ſpecie, altera de Sacerdotum conjugio, tunc per Germaniam publicatæ ſunt. Poſtea, Sigismundo Auguſto Poloniæ Rege mortuo, in electione novi Regis ſedulam operam Maximiliano Cæſari navavit, nullumque in eâ petitione acrior

rem

rem adversarium Io. Monlucius Valentia  
Episcopus, ut ex ipso sæpius audiui, quàm  
Dudithium expertus est. Tantas tamque  
laudabiles animi dotes in religione levitas  
obscuravit; nam, sacris majorum relictis,  
Protestantium doctrinam amplexus est,  
atque ut illi inter se per Germaniam, ac  
præcipuè per Sarmatiam studiis & opini-  
onibus divisi erant, ita nunc ad has, nunc  
ad illas partes propendens diu fluctuavit,  
neutris propterea acceptus, cum & à Ca-  
tholicis, quòd primam fidem irritam fe-  
cisset, ubique exagitaretur, & inter Prote-  
stanteis quasi emanfor haberetur. In eo  
autem fluctuationis salo hærens, hoc tem-  
peramentum servabat, ut nemini, qui vi-  
am veritatis ac salutis pectore non ficto  
aut ambitiosè rimaretur, graviùs succen-  
sendum putaret, neque eos qui in religio-  
nis quæstionibus hodie tantopere exagita-  
tis erroneam opinionem tuerentur, modò  
turbulenta abesset pertinacia, pœnis atro-  
cioribus dignos censeret. Quâ de re con-  
trariæ extant luculentæ Theodri Bezzæ, &

ipsius epistolæ. Ejeratâ Episcopâ, in ux-  
 orem virginem è Regina gynæceo è Straf-  
 sia familia primùm duxit, de qua res non  
 indigna relatu memoratur. Cum adhuc  
 Episcopus esset Dudithius, in Poloniam à  
 Maximiliano legatus, & ad infantem Pon-  
 tificio ornatu, in gynæceum, in quo ple-  
 ræque nobiles virgines erant, admissus,  
 uni ex illis non priùs sibi visæ ruborem ex-  
 pressit, tantâ circumstantium admiratio-  
 ne, ut egresso legato, infans statim ab ea  
 quæsierit, quid causæ esset, cur in legati in-  
 gressu tam apertum commoti animi judi-  
 cium dedisset? illa verò, cū initio alia atq;  
 alia causata se excusasset, ad extremum in-  
 stante infante respondit, hesternâ nocte in  
 somnis visum hominem à patre matreque  
 virum sibi destinatum, totâ corporis &  
 oris specie, excepto sacerdotali amictu,  
 tam legato similem, ut memor somnij  
 tam manifestè erubuerit. Quod pro tem-  
 pore ab infante & ipsâ virgine negle-  
 ctum, vanitatem somniorum ridentibus;  
 eoque magis, quòd inter dignitate Episco-  
 pali



pali virum & virginem illam nuptias coire  
 posse, tunc vero simile non fiebat. Res  
 nihilominus biennio post exitum habuit,  
 cum pater in Cæsaris aulam, Poloniae Re-  
 gis jussu, profectus, cum Dudithio tunc  
 adhuc rei ignaro, qui jam de nuptiis cogita-  
 bat, de filia ei in matronium dandâ con-  
 venit. Quâ mortuâ, alteram ex illustri in  
 Polonia familia atque adeo famosorum  
 Sboroniorum sororem Ioannis Taronij  
 Comitis viduam duxit, matronam lectis-  
 simam, ex qua prolem suscepit. Ob id  
 Romam cum citatus non comparuisset,  
 ac propterea proscriptus esset, non ta-  
 men Maximilianus, quamvis à Ponti-  
 fice monitus, ob id ejus colloquio ab-  
 stinuit, aut operâ uti destitit. Sed cum  
 Bathorium & Suecum à Sboroviis ipsis  
 sororiis prælatos Austriacis, quibus in-  
 serviebat, mœreret, divenditis quæ in  
 Pannonia & Polonia habebat bonis,  
 in Quados cum bonâ Rodolphi Cæsaris  
 gratiâ concessit, contractoque Uratisla-  
 via domicilio, pergrandem pecuniam Cæ-

fari (quàm fælici confilio incertum) mutuò dedit, modicâ ex eâ ufurâ lautè fplendidèque victitans, in eoque otio ad priſtina ſtudia revolutus, præcipuè in Mathematicis ingenium exercuit, & arctam cum Ioanne Prætorio Ioachimico harum ſcientiarum clariffimo in Altorfiana Norbergensis reipub. Academia profefſore, quem inter domeſticos aliquando ſtudiorum comitem haberet, amicitiam renovavit, ac per litteras totâ reliquâ vitâ coluit. Placidâ & qualem prædixerat sæpe ac ſibi optarat, morte obiit VIII Kal. Martii, amicis liberisque circumſtantibus, cum non totis duabus horis decubuiſſet, Medicis, ut fit, de genere morbi diffidentibus, cum alii pulmonis abſceſſum, alii apoplexiam eſſe diſſerent, integroſque animi ſenſus ad extremum vitæ ſpiritum retinuit, Chriſtum ſalutis noſtræ propitiatorem perpetuò invocans, bi-duo ante (quod multis admiratione dignum videbitur) ad Prætorium, quem compatrem familiari compellatione nominabat,

minabat, litteras dederat; quarum in ima clausula, post pleraque non vulgares de rebus Mathematicis quæstiones, quas ei solvendas proponebat, propriâ manu hæc verba adscripserat; *Eclipsis Lunæ XV hujus mensis incidit in Aquarium, qui meus horoscopus est; si vera est Astrologia, mortem mihi adfert, aut gravissimum aliquem morbum; tu quid censes?* In omen & proximæ mortis acceptum, quòd pridie quàm moreretur, cum nondum fatali morbo correptus esset, de misero quodam quem sæpe sublevare solitus erat, quærendo famulis mandarât; nam reposcenti cum illi hominem non repertum respondissent, cras, inquit, mihi eum sublevare fortasse non erit integrum.

Ultimus dicetur *Ludovicus Guicciardinus* Iacobi F. Francisci celeberrimi & hominum prædicatione dignissimi historiarum scriptoris N. ipse Belgii accuratissimâ descriptione optime de illis provinciis, in quibus consenuit, & mortalitatem exiit, meritis, hoc anno XI Kal. Apr.

Apr. æt. LXVI decessit. Is pro salutari consilio, quod & scripto complexus fuerat, de abolenda quadragesima, malam gratiam olim ab Albano retulerat, in carcerem ignominiosum ob id coniectus. Quod Albanus postea excusavit, cum diceret, se non tam ob consiliū optimo viro succensere, quàm quòd illud iussu suo (nam fatebatur) cum scriptis mandasset, non per ipsum scriptorem, sed per alias manus in suas, præposterâ perfidi hominis gratiam suam aucupantis diligentia, illud pervenisset.

---

CI I 3 XC.

SEquuntur virorum litteris illustrium Smortes, *Francisci Hotomani*, Petro senatore Parisiensi parente Lutetiae nati, qui litteris egregiè instructus, cum juri civili operam Aureliani dedisset, ob religionis



ligionis causam patriâ profugus, Lausanæ primùm docuit. Inde à Ioanne Mon-  
 lucio Valentiaë Episcopo, & postea à Mar-  
 garita Biturigum D. evocatus, repetitis vi-  
 cibus Valentiaë, & Avarici Biturigum, ubi  
 eum aliquandiu audiui, evocatus, juven-  
 tuti in jure dicendo assiduam operam  
 longo tempore navavit, usque ad tu-  
 multum Parisiensem, post quem patriam  
 omnino deseruit, & ad Montem Pelicardi  
 in Sequanis, ac postremò Basileæ Raura-  
 corum, amissâ ante aliquot annos con-  
 iuge, larem fixit, atque hoc anno pridie  
 Eid. Febr. ex hydrope decessit, ætatis LXV  
 variis editis de jure & aliis ad antiquitatis  
 & politioris litteraturæ illustrationem to-  
 to vitæ tempore operibus, quæ simul po-  
 steà Iacobus Lectius I. C. sicuti ab auctore  
 paulò ante mortem recognita ac digesta  
 erant, publicavit. Morienti adstitit Basi-  
 lius Amerbachius I. C. mortuum laudavit  
 Io. Iacobus Grinæus.

Post eum commemorandus venit *Iaco-  
 bus Cujacius Tolosæ* natus, rarum non so-

lūm Galliaꝝ, sed universi Christiani Orbis, in quo litteræ & Iuris prudentia vigent, ornamentum, à summis juris conditoribus interpres primus & ultimus, cui quicquid puræ nativæque lucis ei scientiæ undecunque accessit, ætas hæc habet, & postera debitura est. Hæc enim elogia illi à viro doctissimo & gratissimo P. Pitheo meritò tributa sunt. Huic rarâ fælicitate, quod vix aliis post mortem datur, contigit, ut vivus vidensque laude, quam mæruerat, frueretur, & in foro ac subselliis, ubi purior juris veteris scientia, quam ille profitebatur, à pragmaticis nostris minore in pretio habetur, cum alij peculiari quisque nomine suo citentur, ipse per eminentiam Iurisconsulti nomine appellaretur. Brevi staturâ fuit & corpore compacto ac quadrato, nullis fere morbis totâ vitâ, quam continuis & improbis studiis fatigavit, conflictatus, tantumque importuno singultu interdum vexabatur, quem cessatione aliquâ & hilariore inter discipulos convictu transigebat. Tam firmâ valetudine

ne fretus hanc sortem sibi divinâ benignitate concedi optavit, & vero speravit, ut octogenarius integris adhuc mentis & corporis viribus frequenti auditorio juventuti prælegere posset, quod Philippum Decium, qui Pisis ante XXC annos docuit, fecisse meminerat. Eâ fiduciâ divinum observationum opus, cujus singuli libri XL capitibus absolvuntur, ad XL usque libros perducere decreverat, eumque sibi vitæ & scribendi finem præscripserat. Verùm civilium bellorum fœdâ subortâ tempestate, cùm vir, ut professione, sic moribus, juris & equi observantissimus, omnia jura per factiones perverti, ingenuam libertatem in qua adoleverat, corrumpi, candorem per fucos & detestandas in religione simulationes amitti, seque non jam muris, sed parietibus includi, neque tantùm à sceleratis observari, sed ad cædem oculis designari videret, expetitam longiorem vitam, si publico prodesse potuisset, melioris desiderio generosè abruptit, & mœrore confectus Avarici Biturigum Cuborum, ubi docebat, optimè me-

ritam de rep. animam Deo, à quo acceperat, piè reddidit V No. VIIbr. cum LXVIII annum ageret, publico funere elatus, & in B. Petri æde ad Avaronis pontem conditus. Mortuum laudavit Claudius Mareſcallus olim ejus auditor, & jam tunc Senator Pariſienſis, acri juxta ingenio ac probo præditus; relictâ filiâ, Bibliothecam libris & propriâ diligentia notatis, & ad manu ſcriptos codices ſummâ curâ collatis, inſtructiſſimam teſtamento publicè venundari mandavit, ut in plurium manus perveniens diſſiparetur; eo conſilio, ne ſi in unius poteſtate eſſet, præpoſterè curioſis, ex notis ejus malè intellectis, farragines librorum conſarcinandi occaſionem præberet; adeo vir reipub. juvandæ natus etiam de re litteraria poſto bitum accuratè ſollicitus fuit.

Poſt hos commemorandus venit *Gul. Saluſtius Bartaſius*, qui nobili familiâ in Auſcijs natus, militaribus ſtudijs à puero innutritus, eorum feritatem dulci Muſarum conſortio ita temperavit, in  
eâque



eâque facultate tam fæliciter excelluit, ut  
 quanquam vitio nationis à puritate Gal-  
 lici sermonis alienus, & inter arma &  
 tubas procul à doctorum commercio  
 adultus, Hebdomade illâ toties recusâ,  
 & ab aliis Latinè & Italicè certatim ex-  
 pressâ, perillustre inter hujus sæculi Po-  
 etas nomen meruit, proximumque à  
 Ronsardo nostro locum tenere à multis  
 existimetur. Stylum ejus tanquam ni-  
 mis crebrò figuratum, tumidum & Vas-  
 conicè ampullatum, Critici quidam re-  
 prehendunt. Ego qui hominis candorem  
 novi, & familiariter cum eo, dum si-  
 mul inter arma in Novempopulonia  
 incederemus, sæpius collocutus sum, pos-  
 sum testari nihil simile in ejus moribus  
 deprehendisse. Nam cum plerique tant  
 magnificè de eo existiment, summâ ipse  
 de se & opere suo moderatione semper  
 loquebatur, natalis foli & tempestatis  
 infelicitatem crebris sermonibus incu-  
 sans, per quam ei non licuisset, ut com-  
 municato cum peritis consilio de erroribus

bus suis admoneri, eosque emendare posset. Quod sedatis turbis, profectio-  
 ad nos susceptâ, cum facere apud ani-  
 mum suum constituisset, dum interim  
 Matignono provinciæ præsidi in bello  
 assiduam operam navaret, equitum tur-  
 mæ præfectus, ad plagas non bene cura-  
 tas accedente militiæ & laboris æstu, in  
 ipso ætatis flore extinctus, est mense Vtil.  
 anno ætatis XLVI, cum paulò ante Sco-  
 ticâ legatione, in qua à Iacobo VI pera-  
 manter exceptus, & honorificis condici-  
 onibus, ut secum maneret, invitatus est,  
 summâ fidei ac prudentiæ laude defun-  
 ctus esset.

Haud multo post ætate provectior,  
 quippe LVI annos natus, fatis concessit  
*Robertus Garnerius* in Cænomanis na-  
 tus, Poeticâ & ipse facultate clarus, quam  
 in cothurno Tragico præcipuè exercuit,  
 editis IX tragædijs, post Io. Perusium, &  
 Stephanum Iodellium, quæ principem  
 locum vel Ronsardi nostri iudicio illis  
 præripuerunt. Is in magno quod vocant,  
 con-

consilio assessor, turbis exortis, dum tempore cedendum putat, factiosis se immiscuit potius, quàm eorum partes secutus est, & veneni paulò ante mortem à domesticis propinati peste, uxoris periculo, devitatâ, cum tot Tragœdiarum, quæ ille ex antiquis aut externis petebat, & siccis oculis tractabat, argumenta ante oculos cottidiè obversari cerneret, tandem ex mœrore obiit.

Nostris externos adjungam. Ante alios dicendus venit *Io. Baptista Benedictus Venetus*, qui se patriciâ familiâ, ob nominis similitudinem, prognatum falsò jactabat, cum patrem Medicum Valentie Contestanorum in Hispania Tarraconensi natum habuisset, & ille porrò se Galliâ oriundum diceret. Fuit excellens Mathematicus, operamque primùm Oëtavio Farnesio Parmensium duci navavit; dein Friderici Asinarij Camerani Comitis commendatione in Emanuelis Philiberti Sabaudiaë ducis familiam transivit, cui & affirmavit fore ut Pinarollij & Savilliani resti-

restitutionem Regum Franciæ beneficio impetraret, quæ eodem quo prædixerat, anno secuta est, cum Henricus III è Polonia rediens per ejus ditionem transivit. Unicam filiam Ludovicam nomine habebat, quam turbato ordine extulit, cum ejus tristem obitum multò ante prædixisset. Latine fere nesciebat, & cum emendicato calamo in scribendo egeret, Francisci Mariæ Vialardi, qui studijs in ea Academia incumbibat, ferè operâ usus est; ejus sunt quæ contra Silvium Pellum de proportionem scripsit, Physicæ, item Mathematicæ speculationes; Gnomonica, in quâ Solaria Analemate suo dignitati pristinæ restituisse creditus est; Quæ omnia publicata sunt; reliquit & multa non edita, de Optica, Musica, Machinis, quæ per absentiam Vialardi, Bernardo Trollo moriens commendavit, & nunc in Sabaudie ducis Musæo asservantur, magno reipub. bono olim lucem visura. Obiit sexagenarius Augustæ Taurinorum XII Kal. Febr. sicuti fore prædixerat, & in B. Augustini æde sepultus est.

Haud



Haud multò post *Iason Denores* Cyprius, & nobilitate generis, quam ex Neustria nostra repetebat, & eruditione clarus, qui jam XIII totos annos moralem Philosophiam in Patavino Gymnasio profitebatur, post ingentem in Cyprio à Turcis occupatâ acceptam cladem mærore acerbissimo oppressus est, ob Petrum filium unicum propter nobilis Veneti, quicum in rixa ad manus venerat, cædem in exilium pulsum, ex eoque vitam hoc anno cum morte commutavit. Inter alia quæ scripsit, cum de Poetica differens, Tragicomœdias pastorales quæ hodie inter Italos usurpantur, tanquam monstra quædam & nullo veterum exemplo, contraque Poeticæ priscæ leges ab imperiis rei antiquariæ introducta exagitasset, Baptista Guarinùs lectissimus eques Ferrariensis, qui sub id Pastorem fidum magno plausu ubique in Italia exceptû ediderat, eum sermonem ad injuriam suam pertinere existimans, defensionem sub nomine Verati publicavit, quam Apologiâ con-

trariâ statim Denores refutavit. Sed dum alteram defensionem meditatur Guarinus, morte minime fatali Denores concessit, quæ nisi dilectissimi filij calamitate fuisset præcipitata, alterius Verati lectione accelerari potuisse credita est. Tantâ siquidem vi eloquentiæ simul & asperitate ac verborum amaritudine in Iasonem inductus est Guarinus, ut Archilochum ipsum in Lycambem lambos stringentem eo scripto superasse passim jactaretur.

*Julius Alexandrinus* pænè indictus præterierat; hoc anno Tridenti extinctus octogenario quatuor annis major, qui Medicinam sælicissimè sub Cæsaribus fecit, & multa scripsit. Maximiliano autem valedudinario principi carissimus fuit, ab eo amplissimis honorib. donatus, quos in filios licet naturales tanta imperatoris indulgentia transcripsit.

Extremo hoc anno *Flaminius Nobilius* Lucentis familiâ patriciâ, Philosophiæ cultioris peritissimus, & extremâ ætate Theologiam professus, post egregiè navatam in  
 Latino.

Latinorum Bibliorum à Sixto V procura-  
tâ editione operam, cùm Româ in patri-  
am migrasset, anno æt. LVIII ad melio-  
rem patriam migravit, ad B. Mariæ ab  
Antonio fratris F. sepultus.

Ex eadem Italia prodiit *Hieronimus*  
*Zanchius* Bergomas, qui paullò post Petri  
Martyris Vermilij discessum ob eandem  
causam Argentinam concessit, & Vermi-  
lio in Angliam evocato, anno LIII in mu-  
nere successit. Postea Clavennæ in Rætia,  
dein Basileæ usque ad annum LXXVIII,  
ac postremò Neapoli Nemetum docuit,  
ac tandem Heidelbergæ XII Kal. Xbr. de-  
fecit anno æt. LXXV, ad B. Petri hono-  
rificè tumulatus. Scripsit multa quæ pro-  
fundæ in Theologicis studiis eruditionis  
fidem faciunt, quorum partem, dum vixit,  
in lucem dedit, partem filij, quos plures  
reliquit, post mortem ejus publicarunt,  
summamque in scribendo moderationem  
servavit, & à scissura olim sarcindâ mini-  
mè se alienum ostendit; annum quippe  
agens LXX Fidei confessionem ad Ulixem

Martinengum Comitem Barchensem & patricium Venetum scripsit, & tam suo quàm familiæ propriæ nomine, sic enim titulus præfert, edendam curavit: quâ protestatur, se à Romana Ecclesia non simpliciter & in omnibus defecisse, sed in illis dutaxat rebus, in quibus ipsa defecit ab Apostolica, atque adeo à seipsa veteri & purâ Ecclesiâ, neque alio decessisse animo, quàm ut si correctâ ad priorem Ecclesiæ formam redierit, ipse quoque ad illam revertatur, & communionem cum ea in suis porro cœtibus habeat: quod ut tandem fiat, toto animo Deum comprecari. Quid enim pio civi optatius, quàm ut ubi per Baptismum renatus est, ibi etiam in finem usque vivat, modo in Domino:

Amarior eo Romanæ Ecclesiæ & Pontificij nominis oppugnator *Iacobus Andreanus* qui Ioanni Brentio in Tubingensi Academia successerat, sæpius cum pastoribus Genevensibus congressus, & ante quinquennium cum Theodoro Beza ad  
Pelicardi



Pelicardi montem, nuper vero Badæ coram Iacobo Marchione cum Ioanne Pistorio, disputatione sub anni superioris exitum institutâ, cum res illi ex voto non successisset, sive ex mœrore, sive jam annis ac laboribus fractus, domum reversus Ianuario proximo ineunte decessit. Iacobus autem post solutam disputationem, dimissis Augustanæ confessionis pastoribus, majorum religionem per ditionem suam restituit. Nec diu hic rerum status duravit, nam mox dysenteriâ correptus VII Eid. Vtilis ex hac vita migravit, Elizabethâ Florentij Culembugij in Batavia reguli F. gravidâ relictâ, quæ aliquantò post peperit Ernestum Iacobum ditionis heredeni. Hujus tutelam levir viduæ & defuncti patruus Ernestus Fridericus Badensis cum suscepisset, statim ablegatis Pontificiis Augustanæ Confessionis ministros revocavit.

Nec silentio prætereundus videtur *Nicodemus Frischlinus*, quanquam non nisi cum præfatione dicendus, Balingæ ve-

tuſto Sueviæ oppidulo natus, quippe qui  
 cum ingenio nec mediocri ad Poëticam  
 facultate & Aſtronomiæ rei ſcientiâ vale-  
 ret, vitâ ſolutiore & impotenti blaterandi  
 libidine, non ſolùm famam litteris quæſi-  
 tam obſcuravit, ſed fortunam ſuam omni-  
 no evertit, ac poſtremò indignum vitâ lit-  
 terariâ exitum habuit. Nam cum Græcij in  
 Stiria, dein Lubeci in Carniola, dum in iis  
 Aſtriacæ ditionis principiis Auguſtana  
 Cōfeſſio toleraretur, nec nō Friburgi Briſ-  
 goiæ, ac poſtremò Brunſuicæ in Saxonia  
 in juventute inſtituendâ multum tempo-  
 ris triviſſet, in Sueviam reverſus & Tubin-  
 gæ aliquandiu profeſſus, poſtremò ob  
 eandem linguæ petulantiam, in arcem  
 Hohen-Anracenſem ditionis Virtember-  
 gicæ ſub cuſtodia conjeſtus fuit, ex qua  
 dum evadere conatur, rupto funiculo quo  
 ſe demittebat, in aliam atque aliam pe-  
 tram ſubjectam præcipitans, confractis  
 miſerabiliter membris, interiit prid. Kal.  
 Xbr. vix XLIV ætatis annum ſuper-  
 greſſus.

Ulti-

Ultimi referentur *Franc. Salinas & Ambros. Morales*. Salinas Ioannis, qui quæstorium munus sub Carolo V exercuit, F. Burgis natus, vix decennis oculorum usum amisit, cum Didymo Alexandrino quadamtenus ob id comparandus, quippe indole innatâ fretus, dum orbitati solatium quærit, tantum valuit, ut non solum exactam utriusque linguæ cognitionem sit adeptus, sed etiam in Mathematicis artibus maximè excelluerit, ac præsertim in Musica, de qua eruditissimos libros reliquit, qui tanti à peritis harum rerum fiunt, ut aliunde potius quàm ab hominis industria profecti credantur. Inter hæc & Poëticam excoluit & ex Martiale Hispano ipse Hispanus quædam fælicissimè linguâ vernaculâ transtulit; in Paulli IV & Ferdinandi Alvari Toletani Albæ ducis gratia floruit, à quo dum regni Neapolitani summam præfecturam teneret, opimo S. Paneratiij cœnobio donatus est; Ioannis Alvari, Tolerani denique Gasparis Quirogæ Roderici Castrensis, nec non Antonij Perrenoli

Perrenoli Granvellani Cardinalium familiaris fuit, & arctissimam longè cum Lud. Legionensi Augustiniano eremitâ divinorum librorum in Academia Salmanticensi interprete, cujus elegantissima in Canticum Canticorum explanatio exstat, ob studiorum & consiliorum consensu nem, coluit amicitiam, ubi Musicæ professor eximius consenuit, ad annum usque LXXVII, quo in vivis mense Febr. esse desit.

*Morales* patriâ Cordubensis, Antonij præstantissimi Medici F. in litteris humanioribus & antiquitate patriâ indagandâ egregiè doctus, ab initio cum Dominicanorum Sodalitio nomen dedisset, à sodalibus ordine motus est, quòd vesano impetu instigante, ad refrænandas libidines sibi virilia exemplo Origenis Adamantij amputasset. Itaque ad priora studia revolutus Compluti, ubi studuerat, rursus Oratoriam professus est, & libris editis historiam patriam valdè illustravit, & à Floriano Campensi inchoatam persecutus, usque



que ad obitum Veremundi III Regis Legionensiu, hoc est, annu *Clō XXXVII*; ac tandem in eadem Academia LX major, hoc anno vitam cum morte commutavit.

Vtili mense itidem dignum flagitiosâ vitâ exitum habuit *Marcus Bragadinus* Mamugna vulgo dictus, in Insula Creta natus, ex cognomine familiâ Venetâ originem repetens, qui olim in Capucinorum, quos vocant, Sodalitio monasticam professus, postea abjectò cucullo, præstigiis suis magnum nomen meruerat, & fastosæ vitæ ostentatione multiplicandi aurum callere creditus, secreti illius periculum Venetiis fecerat in edibus Iacobi Contareni patricij Veneti, Hydrargyro in aurum sed exiguâ quantitate transfuso; Pataviique, quo se contulerat, magnus ob id ab omnis generis hominibus concursus fiebat, donec paulatim fraude & flagitiosâ nebulonis improbi vitâ detectâ, ipse clam in Noricum confugit, ubi in Aula Bajoariæ principis dum porro iisdem præstigiis

Lq

fucum

fucum facere non desinit, principis jussu comprehensus ac Monaci securi percussus est. Unà & duo canes nigri Scloppetorum ictibus confossi, totidem malignos spiritus quibus ille ad præstigias suas abutebatur, celare crediti.

CI<sup>o</sup> I<sup>o</sup> XCI.

**A** Pud nos Julio mense decessit sexagenario major *Jacobus Amiotus*, humili loco Meloduni patre Ianio natus, ob magnam eruditionem Caroli IX & Henrici III pueritiæ erudiendæ appositus, & ab iisdem admodum opimis sacerdotiis ditatus, ac Episcopatu Autissiodorensium & magni Eleemosynarij dignitate ornatus, qui seu senij infirmitate, sive muneris necessitate, cum ad gregem suum assidius esset, Autissiodorensium furori, ut tunc tempora erant, morigerum se nimis gessisse,

sisse, nec satis grato animo memoriam tot beneficiorum ab alumnis acceptorum conservasse plerisque visus est. Huic Heliodori *Æthiopica*, & Longi *Pæmenica* vernaculâ linguâ fælicissimè expressa debemus, quanquam suppresso interpretis nomine edita sunt. His præludiis periculum ingenij fecit, quod in majorum vigiliarum operibus postea exercuit, Diodoro, ac præcipue Plutarcho, licet majore plerumque elegantia, quàm fide, Gallicè redditis.

Ante Amiotum *Antonius Chandeus*, qui primùm *Zamariel*, dein *Zadæel* nomine ex Hæbraico detorto dici voluit, antiquâ nobilitate in Segusianis ortus, *Genevæ* ex febre hæctica obiit III Non. Mart. ætatis anno LVII, cum scribendo seu docendo totos XXXVI annos insumpsisset, inter suos magno in pretio habitus, & variis multorum scriptis præcipuè à Francisco Turriano è Sodalitio Iesuitico per Germaniam exagitatus.

Post eum ex nostris commemorabitur

*Hugo Donellus* clarissimus Iuris interpres, Cabilone ad Ararim natus, qui cum primum Avarici Biturigum diu docuisset, post tumultum Parisiensem solum patrium vertere coactus, Lugduni Batavorum aliquanto tempore hæsit, ac postremò ob suspiciones, de quibus diximus, in Altorphiana Norimbergensis Reip. celeberrima Academia nidum senectutis posuit, & pridie Eid. Majas fatis concessit, eodem quo Cujacius ætatis anno, eo minore famâ, quòd illius famæ voce & scriptis obstrepere totâ vitâ pro ludo habuerit.

Nostris addetur *Adolphus Metkercus* patricius Brugensis, vir litteris egregiè instructus, qui cum per eas inclarescere cœpisset, æstu motuum, qui Belgium concusserunt, abreptus, totam vitam legationibus obeundis ac negotiis tractandis ordinum primarius consiliarius consumpsit, ac tandem apud Elizabetham Angliæ Reginam orator, hoc anno XVII Kal. IXbr. Londini obiit, cum climactericum suum mensibus sex superasset, mœrore ex

Nicolai.



Nicolai filij admodum strenui ducis ad Daventriam interfecti nuncio, ut creditum est, contracto.

Metkerco adjungetur, si non natalium claritudine par, at litterarum commendatione non inferior, *Victor Giselinus* à municipio Ostendæ propinquo Santfordano, in quo majores ejus honorificum locum tenuerunt, atque adeo à Cornelio Giselino genus ducens, qui Lovanii cum Iusto Lipsio & Iano Lernutio prima in litteris fecit stipendia, & inde simul in Sequanos Dolam profecti sunt; ipse in eâ urbe Doctoris Medici cepit insignes, angustia rei domesticæ pressus, & à Lipsio luculentâ oratione laudatus est, Otio & Musis quàm arti suæ addictior, cujus rei fidem fecerit vel Ovidiana Metamorphosis tanto studio ac diligentia edita: In Prudentio Poetâ Christiano, quem & castigatiorem edidit, majora commentatus est, quæ non perfecit; partem enim Iani Lernutii fidei commisit. Tandem per has turbas Vinocij-fanum,

oppidum cœnobio nobile, haut longe à Dunkerka venit, à Moslinio præfule invitatus honorario, quo se sustentavit, donec ægritudine oppressus, haut sexagenario major, die ante ex arte prædictâ quâ sibi abeundum esset, placidè ad Deum hoc anno migravit.

Ante eos omnes Romæ *Antonius Carafa* Cardinalis LIII annos natus, Romæ obiit pridie Eid. Ian. Is Reginaldum equitem & Ioanellam ex eâdem familiâ in regno Neapolitano perillustri parentes habuit, & à teneris annis in studiis litterarum educatus, cùm Gul. Sirleco præceptore usus linguæ Græcæ exactam cognitionem sibi comparasset, sub Paulo IV gentili suo primitias honorum in aulâ illa adhuc adolescens degustavit, & post ejus obitum, eâdem, quâ rota illa familia pœnè conflagravit, invidiâ oppressus, etiam opimis sacerdotiis, quæ possidebat, à Pio IV injuriosè spoliatus est, quibus demùm à Pio V Carasarum beneficiario restitutus est, qui & gratiam novo bene-

beneficio cumulavit, Carafâ in Collegium Cardinalium cooptato; qua in dignitate constitutus, vir pietati & studiis devotus, Iuri canonico emendando, Decretalibus epistolis colligendis, & Bibliorum Græcorum ac Latinorum, quæ Sixti V auspiciis facta est, editioni præfuit, operâ & industriâ usus Petri Morini presbyteri Parisiensis, Antonij Aquisi, Flaminij Nobilis Lucensis, Fulvij Ursini, aliorum, & post præceptorem Sirlecum Bibliothecarius, etiam scholæ Maronitarum à Gregorio institutæ patrocinium suscepit, & cum in Conciliis Græcis ac Latinis concinnandis laboraret, morte præcipitatâ gloriam præreptam Friderico Borromæo Cardinali suarum virtutum æmulatori transcribit. Mortuum laudaverunt certatim Thomas Bozius Eugubinus, Cæsar Baronius nobilis annalium Ecclesiasticorum scriptor, & luculentâ oratione Franciscus Benicius. Corpus ad S. Silvestri in monte Quirinali cum humili elogio, sicuti mandaverat, depositum fuit.

Eâdem

Eâdem in urbe IV Non. April. debi-  
tum naturæ persolvit *Henricus Gravius*  
ætatis suæ LV, qui post XX annorum  
publicam sacrae Theologiæ Lovanij pro-  
fessionem à Sixto V & Gregorio XIII  
evocatus, ut Patrum edendorum emenda-  
tioni præesset, in primo urbis ingressu, cum  
maiores honores in illâ aulâ sperare pos-  
set, defecit, ad S. Mariæ Teutonicæ se-  
pultus.

Meruit & sive moribus, sive eruditio-  
nis in hoc sexu raræ præstantiâ, ut quan-  
quam latere voluerit, testimonio nostro  
innotescat, & plerisque fæminis, quæ seu  
jactatione populari, sive præstigiis hodie  
tantam famam meruerunt, præferatur,  
*Laurentia Strozzia* Zachariæ F. Kyriaci à  
nobis perhonorificè loco suo commemo-  
rati soror, quæ cum vitam religiosam sep-  
tennis vovisset, & Sandominicano Sodali-  
tio Prati in Etruria, in cœnobio S. Nico-  
lai, nomen dedisset, Græcam Latinam-  
que linguam in illâ solitudine apprimè  
didicit, & hymnos Latinos in cunctos fe-  
stos



stos dies juxta Ecclesiæ Romanæ usum  
metris, & Horatij imitatione, felicitate  
mirâ panxit, in devotæ vitæ exercitiis ac  
studiis quandiu licuit assidua; ac tandem  
ex purpurata febre anno ætatis LXXVII  
in cellâ suâ ad beatorum sedes migravit,  
III Eid. VIIbres.

---

CI 15 XCII.

**A**ugerius Gislerius Busbequius, vir eru-  
ditione, rerum agendarum peritiâ,  
candore & probitate insignis, qui unam  
atque alteram legationem ad Portam  
Othomanicam sub Ferdinando Cæsare  
magnâ suâ cum laude gessit, & elegantissi-  
mis ac lectu jucundissimis epistolis expli-  
cavit, ex quibus quàm plurima in hos an-  
naleis me transcripsisse ingenuè profiteor;  
cum in Belgium, hoc est, in patriam  
cum totâ familiâ remeaturus aditer se ac-  
cinxisset, & securitatis diplomata à rege  
& fœderatis haberet, nihilominus fœde-

ratis juxta Dieppam in Neustria captus ac re omni suâ spoliatus, ad hæc crudeliter post tor injurias habitus est, unde dum litteræ à Meduano expectantur, ex indignatione moerorem in senio lethalem contraxit, ex coque intra paucos dies decessit V Kal. IXbr.

Busbequij me mentio admonet ut de aliis quibusdam eruditione & dignitate præstantibus viris agam. Primus commemorabitur Io. Vincentius Laureus, Tropæa celebri Calabriae urbe natus, modicis sed honestæ conditionis parentibus, qui in familia Carafarum Nuceriae Ducum educatus, cum Alfonso Neapoli, & postea Patavio litteris operam dedit, ubi utriusque linguæ cognitione sibi comparatâ, ad Philosophiæ & Medicinæ studia eâdem ingenij felicitate se contulit, in quâ plurimum excelluit, & P. Paulo Parisio Consentino Cardinali primum operam navavit, ubi familiaritate usus Hugonis Boncompagni, meruit ut dulci honestissimæ inter ipsos amicitiae animum olim subeunte

eunte recordatione, ab eo postea Pontifice creato in Collegium Cardinalium cooptaretur, ad quam dignitatem antequàm promoveretur, post Parisij obitum operam itidem suam addixit Nicolao Gaddio Cardinali, dein & Francisco Cardinali Turnonio apud nos, à quo & opimis in Aruernis donatus est sacerdotiis. Inde mortuo Turnonio, in Antonij Navarrae regis familiam, à Guisio, ut aiunt, insinuat<sup>us</sup> est, cum metus esset, ne ille ab uxore & aliis, qui in comitatu ejus erant, persuasus ad Protestantium partes inclinaret: Antonio dein intra VII menses extincto, cum Hippolyto Cardinali Ferrariensi, qui tum munus legati in Gallia obibat, Romam revertitur, aulae continuo usu & frequenti Magnatum familiaritate, ad insignem Medicinæ scientiam, rerum agendarum sollertiâ sibi comparatâ, quâ effectum est, ut in illo prudentissimorum virorum theatro protinus à Pio V Montisregalis Archiepiscopus creatus sit, legationibus obeundis destinatus, inter quas

Rr 2      insignis

insignis illa fuit, quam sub Gregorio XIII  
 ad Sigismundum Augustum Poloniæ re-  
 gem, & post ejus obitum, Henrico And-  
 um Duce in regem electo, obiit, ac rursus  
 cum Stephanus Bathorius in regnum va-  
 cuum venit, ubi & dexteritate ingenij  
 effecisse putatur, ut Ioannes Suecus qui  
 sororem Sigismundi Augusti, & Annæ  
 Stephani uxoris in matrimonio habebat,  
 pereorum, quos commemoravi, sugge-  
 stionem passus sit Antonium Posseninum  
 è sodalitia Iesuitico virum litteratum &  
 tractandis negotiis summè idoneum, in  
 aulam suam introduci, qui Sigismundum  
 filium cum omni suâ familiâ ad sacra ma-  
 jorum reduxit; tandem à memori Pon-  
 tifice Cardinalis creatus, jam tum oculos  
 in se omnium converterat, quasi & ipse  
 supremam dignitatem adepturus esset,  
 ad idque casus ferè ei exitialis in augu-  
 rium trahebatur. Nam cum juvenis olim  
 ad Urbem primùm venisset, & spectacu-  
 lis in pervigilio B. B. Petri & Paulli ce-  
 lebrari solitis interesset, casu in taurum  
 furen-



furentem incidit, ab eoque cornibus in altum sublatus sine noxâ dimissus est. Certe postquam Cardinalis creatus est, in comitiis Sixt. V. Urbani VII, Gregorij XIII, Innocentij IX, & Clementis VIII honorifica semper ejus mentio facta est, nihilque magis ei nocuit, quàm quòd operam olim Antonio Regis parenti addixisset, quod artificiosè ab Hispana factione in virum optimum & doctissimum, quem non tam Gallis addictum, quàm partibus suis minimè favere noverant, detortum est, ut illum collegio ex eâ causâ suspectum redderent; tandem cum toties spem summi magistratûs sacri, quo & dignissimus fuisse creditur, degustasset, septuagenarius anno exeunte XVII Kal. Ian. placidè ad Deum migravit, testamento condito, quo magni pretij supellectilem omnem congregationi ægris inservientium legavit, ut qui ex scientia ægrotos curandi prima fortunæ incrementa ceperat, eosdem hæredes haberet. Corpus sicuti mandaverat, sine ulla pompa

ad S. Clementis, quem titulum Cardinalis habuerat, cum modico elogio conditum est.

Ante eum *Michael Montanus* eques haut sexagenario major vitæ ultimum diem clausit, XV Kal. VIIIbr. in montibus Petrocoriorum, à quibus nobili familiæ nomen, ita dictus, olim in Burdigalensi Senatu assessor dignissimus cum Stephano Boetiano, quem & vivum indissolubili amicitia persecutus est, & mortuum summâ religione coluit, vir libertatis ingenuæ, quam Conatus ejus, sic enim immortalia sui ingenij monumenta indigitavit, ad omnem posteritatem testabuntur. Burdigalæ Major, quæ dignitas primaria Provinciæ proceribus atque adeo præfectis defertur, dum Venetiis esset, electus, & à Iacobo Matignone Aquitaniæ præside consiliis de rerum summâ per hos motus adhibitus, mihi, dum in ea Provincia in Aula, atque adeo Lutetiæ postea cum ipso versarer, studiorum & voluntatum consensione conjunctissimus.

Ex

Ex eodem genere commemorandus  
 superest *Fridericus Furius Cariolanus* Va-  
 lentiae Contestanorum natus, Montano  
 nostro minimè abnuendus comes, qui  
 cum prima litterarum stipendia Lutetiae  
 fecisset, inde Lovanium profectus cum  
 Bononia Siculo Theologiae professore de  
 bibliis in vernaculam linguam vertendis  
 acri disceptatione contendit, eamque in  
 scripto comprehensam in Germaniam  
 profectus publicavit, atque ob id censoriae  
 notae postea acumine perstrictus est. Ve-  
 rum rarâ hominis eruditione, & singulari  
 animi candore atque caritate perspectâ,  
 Carolus Caesar optimus ingentiorum cen-  
 sor eum & periculo exemit, & ex Germa-  
 nia ad Philippum filium misit, à cujus co-  
 mitatu ille deinceps nusquam discessit, &  
 ardente bellis Belgio, nihil non fecit, ut  
 conciliandarum rerum ratio iniretur, sicuti  
 suo loco demonstravimus. Scripsit & de  
 consiliis & de consiliarij officio, & totâ vi-  
 tâ coelebs, Pinciae ad meliorem vitam haut  
 paullum Montano senior hoc anno mi-  
 gravit.

## CLO I 5 XCIII.

**H**Oc anno fatis concessit Romæ XI Kal. Vtil. *Latinus Latinus* Viterbiensis, octogesimo ætatis anno, ad S. Mariæ in viâ lata sepultus, ut præfert tumuli ab ipso addita inscriptio, ultimum gentis Latinæ caput, qui sacris veterum Patrum libris emendandis, ac præcipuè Tertulliano ad M. S. codices recognoscendo operam totâ vitâ navavit.

Sed longè maximam non solùm Germania, sed ubicunque litteræ in pretio sunt, Christianus orbis jacturam fecit, vivis exempto *Ioanne Leunclao* nobili Angrivario utrâque linguâ doctissimo, juris Romani Græcique consultissimo, & rerum Turcicarum apprimè perito, ad quas linguæ ipsius Bysantinâ peregrinatione comparatam cognitionem, exactam ultimæ historiæ Græcæ lectionem & acre ac admirandum judicium attulit; quod non  
solùm



solùm in scriptis ab ipso, dum viveret, publicatis, sed in iis quæ post mortem eius edita sunt, elucet. Tandem sexagenario paullò minor, vir longiore vitâ dignus Viennæ Austriacæ eodem mense Iunio defecit, non solùm sui, sed & Constantinopolitanæ historiæ, cujus spem fecerat, relicto incredibili desiderio.

---

CI 5 IO XCIV.

**H**Oc anno, mense Februario ad meliorem vitam migravit octogesimum quartum annum supergressus Cadilliaci in arce sua ad Garumnâ *Franciscus Foxius Candala* longe illustrissimâ familiâ natus, quæ tot reges, principes, præsules ac præstantes belli duces orbi Christiano dedit, sed eruditione ac moribus multò illustrior, qui modicam in litteris institutionem, festinatâ honorum in gentili aula prensatione, jam in ipsâ pueritia interruptam suo pte ingenio supplevit, & quæ vix

Sf

alij

alij optimis præceptoribus præcuntibus  
 percipiunt, insitâ ad artes ac præcipuè Ma-  
 thematicas perdiscendas naturâ facili ita  
 in teneris annis hausit, ut earum amorem  
 ac studium toto longissimæ ac honoro-  
 ficentissimæ vitæ cursu nunquam intermi-  
 serit, & in illis multa adinvenit, atque  
 ad veterum scita ingenij facilitate addide-  
 rit, ultimo elogio summam pietatem &  
 caritatem non solum erga genus huma-  
 num, sed etiam erga litteras testatus, cum  
 & in antidoti salutaris à se reperti confe-  
 ctionē, ne sumptu parcituri deterrerentur,  
 & in Mathematicam professionem Bur-  
 digalē institutam annumvectigal legavit.  
 Opera ejus ad immortalitatem scripta,  
 quandiu orbis stabit, durabunt; & im-  
 prudens sim, ni tanti nominis comme-  
 moratione immensis laboribus nostris  
 decus addi sperem; adde etiam ingratus,  
 si, qui vivum, dum in Aquitania essem,  
 assidue colui, mortuo hac animi memoris  
 testificatione non parentâsem.

Haut multo post pridie Non. Maias

*Plautus*

*Plautus Bencius* patrimoniali *Etruriæ* oppido, cui *Aquæ-pendenti* nomen, natus, virtute & eruditione quàm natalibus clarior, ex hoc mortali carcere ad sempiternam evolavit felicitatem, vir candidis moribus, ac miti ingenio, magnatibus ac litteratis æquè gratus, qui *M. Antonio Mureto* nostrati operâ *Romæ* navatâ tantùm Latinè scribendi facultate sive versibus sive solutâ oratione valuit, ut dignissimus tanto præceptore discipulus haberetur. Postea sodalitio Iesuitico nomen dedit, & *Plauti*, quod parentes indiderant, nomen in *Francisci* mutavit, & elegantissimis orationibus ac versibus in ea societate editis opinionem de se conceptam superavit, hanc quæ de se optimè merito præceptori gratiam rependit, ut hominem in litteris humanioribus senescentem ad studia pietatis provocaverit; quem & mortuum laudavit. Decessit *Romæ* fere quinquagenarius.

*Claudius Puteanus* *Clementis* in senatu celeberrimi *caussarum* patroni *F.* hunc

etiam annum morte suâ funestum fecit,  
 haut multo Bencio junior, qui à puero sub  
 optimis magistris Ioanne Stracelio, Ha-  
 drianò Turnebo, Ioanne Aurato, & postea  
 Dionysio Lambino litteris operam dedit.  
 Inde ius civile sub principe jurisperitorum  
 Iacobo Cujacio didicit, & variis in pere-  
 grinationibus doctissimorum toto orbe  
 virorum familiaritate usus, Ursini, Victo-  
 rij, Manutij, Sigonij, ipsorum testimonio  
 meruit, ut primas inter litteratos teneret,  
 honorificè ubique in eorum scriptis ap-  
 pellatus. Nam nihil scripsit, iudicioque  
 peracri, quo in censendis aliorum scriptis  
 plurimum valebat, potius alienæ gloriæ  
 quàm propriæ servivit. Demum in ordi-  
 nem amplissimum cooptatus, ut in litte-  
 ratorum confessu, sic in illo Senatu prin-  
 cipem locum facilè tenuit, cunctis ejus in-  
 corruptam probitatem, in enodandis Iuris  
 quæstionibus profundam doctrinam, in  
 solvendis litium tricis scilicet etiam stupenti-  
 bus, arctissimam in Italia amicitiam coluit  
 cum Ioanne Vincetio Pinello Patricio Ge-  
 nuensi



nuenſi omni litterarum genere ac rerum cognitione viro excultiſſimo, & Philoſogorum fautore eximio, quam crebris officiis, poſtquam domum rediit, ſemper renovans, ad mortem uſque ſervavit. Bel-  
lorum civilium incommoditates domo pulſus conſtantiſſimè pertulit, ac ſine ullâ privati ſenſus ſignificatione, in moderata fortuna ingentes ac ſupra conditionem generoſos ſpiritus gerens, ut quanquam numeroſâ prole auctus, tamen alieno prorſus ab omni quæſtu animo vixerit, omnemque rei domesticæ curam dilectiſſimæ conjugi Claudiæ Sanguineæ tanquam ſe indignam reſignaverit. Ad extremum morbo ſtudioſis fatali correptus eſt, ingenti calculorum ſtræ velut rupe in renibus enatâ, quæ meatibus intercluſis ventriculum ſubvertit, & optimè de Re-  
pub. meritum civem mihi proximâ quidem cognatione cum ejus uxore, ſed arctiore ſtudiorum & voluntatum conſenſione longe cum ipſo conjuncto, & bonis omnibus Kal. Xbribus eripuit. Elatus eſt

Senatorio funere ad B. Sulpicij in paterno monumento conditus, veris prius laudibus à viro laudatissimo Achille Harlæo amplissimi ordinis principe in Senatu laudatus, & postea multis multorum carminibus epitaphiis, quæ à Christophoro, Augustino, Petro, dignissimis tanto patre filiis, publicata sunt, deploratus.

Annum fere clausit mors *Gerardi Mercatoris* Iuliaco oriundi, & Rupelmondæ in Pleumosiiis nati, qui Silvæ-ducis sub Georgio Macropedio primis litterarum rudimentis initiatus, postea Lovanii Philosophicis studiis ac Mathematicis dein artibus se totum mancipavit, & admodum juvenis ad sculpendas tabulas animum applicuit, Gemma Frisio præceptore & auctore; atque inde in familiaritatem Caroli V venit, instrumentis Mathematicis mirâ arte ejus jussu fabricatis, quæ bello contra Protestantes suscepto, dum Cæsar castra ad Ingolstadium haberet, fortuito incendio liquefacta ac consumpta sunt; postea Lovanio Duisburgum cum uxore

uxore ac liberis migravit, & in familia il-  
 lustrissimi Wilielmi Cliviæ Ducis hono-  
 raria stipendia fecit, & Cl. Ptolomei ta-  
 bulas restituit ac elegantissimè descrip-  
 sit. Cumque de edendis totius orbis tabu-  
 lis jam à se elaboratis cogitaret, cognito  
 Abrahamum Ortelium idem opus urgere,  
 inchoatum laborem inhibuit, donec Or-  
 telius exemplaria omnia sua distraxisset, ne  
 aut industriæ aut commodis viri amicissi-  
 mi præcipitatâ suorum editione officeret.  
 Postea jam inclinatâ ætate, ad Theolo-  
 gicâ studia animum adjecit, & harmoni-  
 am Evangelicam & alia in sacros libros  
 conscripsit, cum Chronologiam antea  
 scripsisset ad Solis & Lunæ cursum ex-  
 actissimè putaram, quam Onufrius Panui-  
 nus harum rerum acerrimus iudex tan-  
 ti fecit, ut omnibus ab aliis ubicunque edi-  
 tis præferre non dubitaverit. Tandem  
 vir tot laboribus pro re litteraria exantla-  
 tis bene meritis, senio confectus, Duis-  
 burgi ubi larem posuerat, decessit IIII.  
 Non. Xbr. cum annos XXCII, menses  
 VIII,

VIII, & XXVIII dies exegisset.

Nec silentio præteriri debet *Orlandus Lassus* rei Musicæ præstanti scientiâ nostrâ ætate clarissimus, Bergis in Hannonia natus; nam hæc præcipua Belgij laus est, quòd semper inter alias nationes excellentibus rei Musicæ Doctoribus abundavit; is fato excellentium symphonicorum, adhuc puer ob vocis suavitatem aliquoties plagio raptus, cum Ferdinando Gonzagæ in Sicilia & Mediolani operam aliquandiu navasset, dein Neapoli, & postea Romæ jam grandior biennium præfuisset, post peregrinationes in Galliam & Angliam cum Iulio Cæsare Brancatio susceptas, tandem in Belgium rediit; aliquot annis Antuerpiæ versatus, unde ab Alberto Baioariæ Duce evocatus, larem in ejus aula fixit, & uxorem duxit; postea à Carolo IX Rege magnis præmiis invitatus ut Musici chori sui, quem generosus princeps circa se semper lectissimum habebat, magisterium susciperet, cum in eo esset, ut familiam & fortunas suas in Galliam



liam transferret, superventu mortis Caroli de via, in quam jam se dederat, revocatus, rursus quam Alberto parenti, eandem Guilhelmo ejus filio operam addixit, & cantionibus harmonicis tam sacris quam profanis omnium linguarum passim XXV annorum spatio editis celebratissimus, maturâ morte Monaci hoc anno III Non. Junias decessit, cum LXXIII excessisset.

Postremus dicitur *Cornelius Bonaventura Bertramus* Thoartio nobilissimo Tremolliorum oppido in Pictonibus honestâ familiâ natus, qui Lutetiæ prima literarum fecit stipendia sub Hadriano Turnebo, & I. Straelio, dein sub Angelo Caninio Orient. linguarum petitissimo Hebraicæ operam dedit: inde Tolosam & Divonam Cadurcorum profectus, juris civilis scientiæ incubuit, atque interim linguam Hebraicam à Caninio præceptam cum Francisco Roaldesio tunc temporis jus civile in ea Academia proficiente penitus imbibit, cumque vix in tumultu Cadurcensi, de quo suo loco diximus, infe-

stas persequentium manus effugisset, Ge-  
 nevam se contulit, biennioque post sedem  
 vacuam per A. Rodolfi Cevallerii, de quo  
 pariter ad annum LXXII locuti sumus, ab-  
 sentiam nactus, linguam Hebraicam publi-  
 cè in eâ urbe docuit, ac sub id tempus the-  
 saurum Santis Pagnini magnâ accessione  
 ex observationibus Ioan. Merceri, ipsius  
 Cevallerii, ac suis locupletatum edidit; nec  
 non & Hebraicæ linguæ & Arameæ com-  
 parationem, & de Politia Iudaica com-  
 mentarium, qui ex omnibus ejus operi-  
 bus maximè commendatur. Postea reli-  
 ctâ Genève, Frankentalam in Palatinatu  
 profectus, anno LXXXVI, in suo mune-  
 re assiduus lucubrationes Frankentalenses  
 à loco dictas publicavit; ac tandem à Ber-  
 natum Republica Lausanam evocatus, in  
 publica professione anno climacterico suo  
 defecit.

Primus

CL<sup>o</sup> ID<sup>o</sup> XCV.

**P**rimus dicetur *Lævinus Torrentius*, patriâ Gandensis, qui cum literarum tyrocinium in pueritia Lovanii fecisset, Bononiæ juris civilis & melioris antiquitatis cognitionem non vulgarem adeptus est, doctissimorum virorum, qui tunc in Italia florebant, Patavii, Romæ, Venetiis, consuetudine usus, ingeniumque in pangendis versibus præcipue exercuit. Domum reversus, ab Everardo Marciano Cardinali Leodicensi Episcopo ob singularem eruditionem cum summâ morum probitate conjunctam in familiam ascitus, & honorifico sacerdotio donatus. Demum variis legationibus summâ cum prudentiæ laude defunctus, post Franciscum Sonnum primum Antverpiæ Episcopum eâ dignitate post receptam à Parmensi urbem ornatus

est,

est, in eoque munere septuagenario major decessit VI Kal. Mai.

Eodem die quo Torrentius ad Deum abiit, ex hac vita migravit Romæ ad S. Onufrii à Collegii sodalibus sepultus *Torquatus Tassus*, Bernardi, cujus et Epistolæ & carmina vernacula extant, E. annos natus plus minus XLV, vir admirabili ac portentoso ingenio, qui insanabili in adolescentia furore correptus, cum in Ferrariensi Aula degeret, & nihilominus per dilucida intervalla, tanto judicio, elegantia, ac castissimo stylo plurima & solutâ & pedibus astrictâ oratione scripsit, ut misericordiam, quâ plerique ejus vicem prosequerantur, tandem in stuporem verterit, dum furore illo, qui in aliis mentes efferat aut hebetat, ingenium ejus veluti defæcatum, in rebus inveniendis expeditius, inventis aptè digerendis acutius, & sententiarum gravitate ac verborum delectu ornandis copiosius à morbo surgit, & quod sanissimus quisque vix summâ curâ ac labore per otium extunderet, ipse post violentam



lentam mentis errora agitationem sponte ac felicitate mirâ perficit, ut non alienatione mentis percussus, sed æstro divino percitus videretur. Hæc qui nesciat, quæ omneis, qui in Italia fuerunt, noverunt, & de quibus ipse interdum in scriptis suis, quamquam sobriè, conqueritur, & divina ejus scripta legat, aut de alio quâsi de Tasso me loqui, aut ab alio quàm Tasso hæc scripta pronunciet, necesse est.

Idem mensis funestus fuit tribus de republica literaria bene meritis in Saxonia professoribus, *Reinero Reinuccio Steinheimensi*, qui Syntagmate genealogico ac historico summâ diligentia ac fide concinnato aliisque scriptis magnam gratiam à studiosis inivit, & literas diu in Academia Iulia professus, eodem, quo illi, de quibus modo dixi, die in vivis esse defuit; & *Michaeli Neandro Soraviae in Quadis nato*, qui in Isfeldiensi schola à Thoma Scangio præfule postremo ad Hercyniam institutâ totos XL annos trium linguarum cognitione clarus docuit, ac septuagenarius decimo

post Reineccium die defecit. Tristior quò  
 acerbior mors fuit *Valentis Acidalii* Wisto-  
 chii in limite Brandenburgico nati, adoles-  
 centis summæ spei & eruditionis, qui post  
 Italicam peregrinationem cum Uratislavi-  
 am rediisset, inde Nyssam evocatus, mor-  
 bo familiari, quem ex nimis vigiliis in ad-  
 ornandis Plautinis divinationibus contra-  
 xerat, correptus, tertio post die VIII. Kal.  
 Iun. decessit, cum vix annum XXVIII ex-  
 cessisset.

Annum clausit *Gulielmus Vitakerus*, u-  
 troque parente Lancastrensi familiâ hone-  
 stâ in prædio Holmio natus, magni nomi-  
 nis inter suos Theologus, qui Iuelli Salis-  
 beriensis sive imitatione sive æmulatione,  
 cum Edmundo Campiano, Ioanne Du-  
 ræo, Thomâ Stapletono, aliis totâ vitâ scri-  
 ptis disputavit, & Cantabrigiæ obiit, quan-  
 quam vix XLVII ætatis annum superasset,  
 ita viribus defectus, ut instar infantuli pla-  
 cidè ac sine ulla convulsione spiritum ef-  
 flaverit.

Hoc eodem anno ad vitam æternam

VIII Kal. Iun. evolavit octogenarius *Philippus Neri*, patriâ Florentinus, Francisco & Lucretiâ Soldâ parentibus natus, qui secundâ sanctitatis vitæ famâ Romæ diu vixit, congregationē presbyterorum Oratorii fundavit, Cæsari Baronio ex eodem sodalitis sacerdoti, qui postea in Cardinalium collegium cooptatus est, Annalium Ecclesiasticorum adversus Magdeburgicorum Theologorum Centurias scribendorum auctor fuit. Ejus vitam ac facta dictaque, quandiu Romæ vixit, libris III copiosè ac fere dietim scripsit Antonius Gallonius, ut qui plura scripserit, Nerio & ipsius gloriæ tam præclaro præconi injuriam fecerit.

---

CID ID XCVI.

**F**uit hic annus multorum virorum literis illustrium mortibus tristis. Primus memorabitur *Franc. Toletus* Corduba utriusque

utriusque Senecæ cunis nobilissimâ Batice civitate, cæterum humili loco natus; qui animi virtutibus & sedulâ institutione, quod ipsi à natalibus deerat, supplevit, Salmantica brevi magnum nomen adeptus, ita ut Philosophiæ Professor primâ adolescentiâ fuerit, quod non nisi jam ætate pro-  
 vectâ alii consequuntur. Postea pietatis studiis cum se totum devovisset, Jesuitico Sodalitio, quod illo tempore passim in Hispania & præcipuè Salmantica florebat, nomen dedit, & Romam evocatus, Gymnasio cum aliquot annis præfuisset, à sacris concionibus Pio V, post Benedictum Palmium & Alphonsum Salmeronem, fuit, & magnis negotiis par tractandis, Io. Franc. Commendono Cardinali in Germaniam ad Maximilianum Cæsarem & Sigismundum Angustum Poloniae regem, ut de sacro foedere contra Turcas iciendo ageret, legato comes additus non minorem prudentiæ, quàm antea eruditionis ac pietatis laudem meruit. Dein sub Gregorio VIII magnis negotiis disceptandis adhibitus fuit,



fuit, & sub Sixto V. Bibliis recognoscendis operam navavit, ac tandem à Clemente VIII, primus ex ea Societate, in collegium Cardinalium cooptatus est. Ante triennium in negotio de regis cum Sanctâ sede reconciliatione admodum promptam & egregiam navavit operam. Ac tandem hoc anno XVIII Kal. VIIIbris in palatio Vaticano placidè ad Deum migravit, LXXIV annum supergressus, & ad S. Mariæ majoris marmoreo tumulo à Basilicæ illius sodalibus, quibus pecuniam ad pios usus legaverat, honorificè conditus est. Scripsit multa, quorum præcipua sunt quæ in Aristotelem, deinde in Ioannem, Lucam, & Epistolam ad Romanos edita sunt. Conciones ab eo habite, & scriptis postea mandata, nondum lucem viderunt.

Ante Tolentum cō quadriennio major prid. Kal. Mart. Pisis obiit Pet. Angelus Barga Etruriæ Castello natus, variis peregrinationibus in adolescentia per Græciam & Asiam exercitatus, & postea Pisis complures annos in florentissimo gym-

nasio humaniores litteras professus, & Romæ in Comitatu Ferdinandi Medicis tunc Cardinalis postea commoratus. Poëticâ præcipuè excelluit, & Cynegetica ejus ac Syrias meritò inter complura alia egregia excellentis illius ingenij monumenta commendantur. Virginiam filiam reliquit, quæ patris exuvias in sepulchrum Boccarum, quæ familia in ea civitate nobilissima est, Iosepho Bocca permittente, in majoris templi cœmeterio recondi curavit.

*Fridericus Sylburgius Vetteris*, quod Car-  
torum oppidum est, ortus, minimè præ-  
termittendus videtur, qui quàm plurimâ  
veterum, præsertim Græcorum, scripta  
partim jam edita, denuò recognita, ac va-  
riis lectionibus, notis indicibusque illu-  
stravit, partim primùm ipse summâ curâ  
adhibitâ publicavit, eoque nomine mag-  
nam ab omnibus, qui rei litterariæ con-  
sultum cupiunt, & à posteritate non in-  
gratâ inivit gratiam, eoque majorem me-  
ruit laudem, quòd in tam laudabili pub-  
licæ

licę utilitatis promovendę studio assiduus,  
 propriam gloriam contemnere visus est.  
 Decessit Heidelbergę XV Kal. Mart.  
 non ita senex, sed improbo labore ac  
 vigiliis attenuato corpore, ad B. Petri se-  
 pulchus.

Sub id & *Janus Duza* Iani & littera-  
 rum & fortitudinis in Lugdunensi obsi-  
 dione olim probatę nomine clari filius,  
 juvenis admirabili ingenio, excellenti do-  
 ctrinâ cum rarâ morum suavitate conjun-  
 ctâ præditus, cum ex peregrinatione lon-  
 ginquâ rediisset, quasi in portu naufragi-  
 um fecit, anno ætatis XXIV ereptus.

Ut nostros dicam, *Nicolaus Vignerius*  
 feriis Paschal. Lutetię decessit, Barro ad  
 Sequanâ in Campania nostra anno  
 Clod. Io. XXX natus patre fisci patrone,  
 nec tenui nec obscurâ familiâ, sed attritis  
 opibus, ob bella civilia solum vertere co-  
 actus est, & in Germaniæ Principum au-  
 lis aliquandiu Medicinam fecit. Inter  
 Philosophiæ & præstantissimę illius sci-  
 entię, in qua sæliciter excelluit, studia præ-

cipuam habuit Historiæ omnīs & tempo-  
 rum ad exactum calculum putatæ rationis  
 cognitionem, & jam ante Onufrii Panui-  
 ni & Caroli Sigonii Fastos editos illu-  
 strandæ antiquitati Rom. eandem curam  
 impenderat, ab iis interdum diversa sen-  
 tiens; & tamen cum illi prævertissent, ne  
 actum agere videretur, ab iis edendis, quæ  
 erat modestiâ, abstinuit, & de Fastis com-  
 mentarium vernaculè scriptum, quo tan-  
 tum quosdam eorum annos in antiquita-  
 te controversos discutit, publicare satis ha-  
 buit. Multa præterea illustrandæ Historiæ  
 scripsit, sed inter alia insignis extat opus  
 Chronologicum ab ipso, cum beneficio  
 pacis post longam à suis absentiam honori-  
 ficis à Rege stipendiis invitatus Lutetiam  
 venisset, editum, quo à primis mundi in-  
 cunabulis certas temporum epochas, Im-  
 periorum Regnorumque initia & conver-  
 siones, veras populorum & familiarum  
 origines, admirabili curâ ac judicio excus-  
 sit, digessit, explicavit. Ecclesiasticam Hi-  
 storiâ Autori postumam, cum nondum  
 ultimam



ultimam ejus manum recepisset, Nicolaus  
& Ioannes filii publicarunt.

Post eum commemorandus venit *Ioannes Bodinus* in Andibus natus, & puer, ut quidam certò affirmarunt, in Carmelitarum cœnobio vitam religiosam professus, dein voto immaturâ ætate facto solutus, gnaviter litteris operam dedit, linguarumque non vulgari peritiâ sibi comparatâ, omnium artium circularem ambitum animo ingenti complexus est: cumque initio in foro Parisiensi patronum egisset, contentiosæ illius militiæ pertæsus, scriptioni se totum addixit, periculoque in Oppiani Cynegeticis ingenii facto, quæ & eleganter Latine ac scitè vertit, & doctissimo commentario interpretatus est, egregio documento per illa quantum in literis humanioribus valeret, edito; mox animum ad majora appulit, & post methodum historicam, & de re monetaria accuratas contra Malastretum dissertationes, opus magnum de Republicâ Gallicè publicavit, in quo ut omni scientiarum genere

non tincti, sed imbuti ingenii fidem fecit, sic nonnullis, qui rectè judicant, non omnino ab ostentationis innato gentis vitio vacuum se probavit. Postea & Dæmonomaniam Gallicè itidem scripsit, in qua dum materiam ab aliis tantoperè agitatam adversus Ioannis Wieri plerumque sententiam enucleatius retractat, magicæ rei ac vetitarum istiusmodi artium crimen minimè effugit. Dum hæc scriberet, à Rege Henrico III, qui literatis disceptationibus per otium oblectabatur, ad familiare secretum cum plerisque aliis viris doctis sæpius est admissus, magnamque laudem ex iis reportavit, quippe qui ingenium innumerato haberet, & paratum ad omnia quæ proponerentur, pulcherrimam rerum copiam, quâ pollebat, acri memoriâ effunderet; æmulatione dein quorundam, qui in aula plus poterant, cum se gratiæ locomotum videret, in Francisci Alençoniorum Ducis, qui postea Belgicarum provinciarum Ordinibus deferentibus principatum inivit, familiâ ob raram eruditionem

nem & non vulgarem rerum externarum cognitionem honorificum locum tenuit, eumque in Angliam & Belgium aliquot annis secutus est. Postea eo mortuo, Lauduni Clavati præturâ donatus est, ad quam se recepit, & jus magnâ probitatis & integritatis opinione assidue dixit, usque ad annum ClO IO XXCVIII, quò turbatis ubique rebus, cum ab initio Protestantium doctrinæ addictus crederetur, neque tunc ab ea multùm alienus putaretur, Henoticæ factioni cum aliis novem dedit, & multa de Rege, legitimoque ejus successore haut satis dignè pronunciavit, quæ magno factionisorum plausu ubique evulgata sunt. Sed eum errorem admirabili de insperata horum motuum clausula prælagio statim emendavit, annumque & mensem, quò pax, cum minùs putabatur, coitura esset, prædixit, eventusque ejus judicium comprobavit. Demùm hoc anno ineunte Maio septuagenario major pestiferâ lue correptus, publicato priùs naturæ theatro, quo rerum causas ac effectiones ad principia sua repetitas

repetitas exequitur, quasi cycneâ cantione  
vitam variis studiis, sic & fortunâ agitatam  
Lapoduni clausit.

*Lambertus Dan. sus* Aureliano natus ca-  
stris in Septimania, quo se Orthefio, in Be-  
nearni pago, ubi docebat, contulerat, de-  
cessit.

*Anutium Foesium* & hic annus abstulit,  
qui Divoduni Mediomatricum natus, Lu-  
tetię Parisiorum post utriusque lingue ex-  
actam peritiam, & Philosophiæ decursum  
curriculum, Medicæ laureæ sumpsit insig-  
nia, atque inde in patriam reversus, XL  
annos medicinam summâ inter cõcives  
suos peritiæ ac fælicitatis laude fecit, à Lo-  
taringiæ principibus sæpe per occasionem  
evocatus, quibus tamen operam suam li-  
bertatis ingenue & in studiis assiduus nun-  
quam addiscere voluit. Principium lucu-  
brationum à libro II Hippocratis de mor-  
bis vulgaribus fecit, quem Latine versum  
copiosissimis commentariis explicavit an-  
no ætatis XXX; dein Pharmacopœam quo-  
que edidit; Postea cum Oeconomiam Hip-  
pocratis



pocratis sive Nomenclatorem publico dedisset, certatim non solum à Gallis, sed Germanis & Italis rei Medicæ studiosis rogatus fuit, quòd Hippocratis editio à Hieronymo Mercuriali nuper publicæ expectationi minime satisfaceret, ut ipse totum Hippocratem vertendum susciperet, quod periculo perfectæ tanti auctoris cognitionis in Nomenclatore suo facto, probè confecturum eum cuncti rebantur. Igitur opus multarum vigiliarum aggressus, Græca ad MS. exemplaria & plerasque editiones contulit, & exacto studio elaboratam versionem ac commentarios addidit, suâq; industriâ effecit, ne Gallia, quæ in re medica inter cæteras nationes semper primas tulit, in principe tantæ scientiæ scriptore cedendo Italis Germanisve cederet. Tandem emeritus senex post tot exantlatos pro republicâ labores annos natus LXVIII urbe in patria decessit VII Kal. VIIIbris.

Eodem mense anno æt. LVI decessit  
*Q. Septimius Florens Christianus*, Gulielmi  
 ex nobili in Armorici familiâ oriundi,

quique inter Henrici II medicos prima-  
 rium locum tenuit, etiam literis elegan-  
 tioribus haud mediocriter excultus, ut ex  
 Ocelli Luciani versione patet, filius; sic di-  
 ctus, quod numero quintus ex compluri-  
 bus liberis septimo mense natus esset. U-  
 triusque linguæ peritiâ & versuum iisdem  
 linguis pangendorum laude cum priscis  
 ipsis comparandus: ad hæc ingenio excel-  
 so & liberali præditus, ut nihil serviliter &  
 contra animi sententiam, ut aliis placeret,  
 quod plerique alii calamo venali hodie fa-  
 ciunt, scriberet. Interdum mordacior, ita  
 tamen ut non tam sensum doloris in eo-  
 rum ingeniis, quos mordebat, quàm sti-  
 mulum ad se ab iisdem amandum relin-  
 queret. Itaque Petrus Ronfardus, qui Poë-  
 ticam nostrâ ætate ad summum culmen  
 evexit, & Vidus Faber Pibracius, à me tam  
 sæpe honorificè appellatus, postquam à  
 Florentæ aculeatè perstricti sunt, ab eodem  
 amari & laudari in magna gloriæ parte  
 duxerunt. Regi, qui nunc sæliciter impe-  
 rat, ab institutione fuit, & cum Aurelia-  
 no,

no, ubi munia quædam militaria strenuè obierat, Vindocinum lares transtulisset, in oppidi ab Henoticis occupatione oppressus, & expugnatione postea captus, memoris discipuli benignitate è manibus grassatorum ereptus est, qui pretium pro ipso exsolvi curavit. Pleraque scripsit Græcè & Latinè, nec non & vernaculâ linguâ, quorum maiorem partem apud Claudium filium adhuc latent, aliquando lucem magno studiosorum & elegantiorum ingeniorum bono visura.

Amico artâ mecum necessitudine conjuncto, quod inscripta mihi ipsius quædam ad æternitatem victura monumenta testantur, alterum uberibus lachrymis deplendum cogor adjungere, *Petrum Pithæum* Augustobonæ Tricassium natum, familiâ nobili ex inferiore Neustria oriundum, virum nostrâ ætate maximum, sive probitatem morum, & veram nec fucatam pietatem, sive ingenium excellens, exactamque & omnium rerum, quas perpectas habuit, (habuit autem plus quàm

alius quisquam multis retro seculis) reconditam cognitionem, & tum in suis, tum in alienis cernendis acre & ab omni livore purum iudicium spectes; cum enim sic vitam instituisset, ut commoda publica ubique propriis negotiis præverteret, toto laudatissimæ ejus vitæ decursæ spatio in literarum studiis sic versatus est, ut assidue exquirendo & scrutando bibliothecas, antiquorum scripta vel à mendis, vel ab interitu vindicaret, vel alios quos in ea re aliquid posse judicabat, exhortando, impellendo atque juvando, nullo tempore non aliquid moveret ac promoveret, sub ipsum vitam ex tum B. Hilarii fragmenti historicis & Phædri Augusti liberti fabulis publicatis. Et ut alia in illum meritò à Nicolao Fabro individuo vitæ & studiorum Pithæi comite cumulata elogia non fileam, nemo meliùs unquam unum quempiam auctorem novit, quàm ipse omnes antiquos utriusque linguæ scriptores, quos ad unum legerat, ad vetera contulerat exemplaria, & concoxerat. Nemo priva-



ra & domestica negotia exactius tenuit, quam ipse Gallicam externamque historiam, origines populorum, descriptiones temporum, successiones familiarum, bella, foedera, conventiones, vel exterorum inter se vel nobiscum gesta, leges, mores, consuetudines provinciarum, singularumve urbium, quarum omnium rerum à teneris annis indefesso labore sibi perfectam notitiam tum ex vulgatis libris, tum etiam ex bibliothecis antiquis, archivis regiis, Senatûs, Rationarium, urbium, Monasteriorum comparaverat, instrumentorumque ipsorum atque actorum bonam partem propriâ manu descripserat. In jure autem civili Romanorum ad illud fastigium pervenerat, ut de eo, celeberrimoque ejus præceptore Iacobo Cujacio dici jure potuerit, hunc discipulo præripuisse ne primus Iurisconsultus esset, illum præceptori, ne solus. Verùm hæc omnia, quæ in quovis homine singula magnum virum & cum cura dicendum efficiant, in Pithæo coacervata, eundem ad summum laudis

culmen evehebant, quantula portio sunt illius sapientiæ, quam ingenii, judicii que felicitate ex rerum cognitione assiduâ lectione atq; usu comparatâ, velut ex antiquorum omnium inventis, qui sapientiæ commendatione floruerunt, conflatam sibi quæsierat? quantum à civili prudentia absunt, quâ præditus ille non solum de privatis rebus & fori maximâ cum facilitate & æquitate respondere ac statuere, sed etiam de iis, quæ ad summam Remp. spectant, sapienter deliberare, consiliorum exitus prospicere, dubiis ac periculosis eventis providè occurrere noverat? nam quamvis ab omni ambitione vitæque fulgore, nisi quem virtus emitteret, alienissimus vixerit, & honores ac magistratus vel ultrò delatos semper respuerit, tamen patriæ juvandæ desiderio, quo ultra modum flagrabat, eos, quos sua sors clavo admovebat, assiduè excitabat, aut commonefaciebat, suggerebatque quæ vel ab antiquis paribus negotiis probata fuerant, vel ipse, ut erat peracri ac solidissimo judicio, faciendâ existi-

existimabat; nec illi temerè quicquā magni  
momenti aggrediebantur, de quo non ante  
Pithæum consulissent, ita ut privatus pub-  
licum negotium, & absque purpura perpe-  
tuum magistratum gessisse videatur; inno-  
centiā atque inflexo per omnes vitæ par-  
tes probitatis tenore id præterea consecu-  
tus, ut non solum Togatorum doctissi-  
mus, sed & prudentissimus Iurisconsultus,  
civis optimus, ac planè vir bonus audiret.  
Præter innumera veterum scripta è tene-  
bris, dum inter nos degeret, primùm eru-  
ta, aut meliora publico data, moriens re-  
liquit Conciliorum Gallicorum diligen-  
ter conquisitorum ac digestorum collectio-  
nem Francisci fratris viri doctissimi fidei,  
ut ederet, commissam; vixit annos LVII, ad  
æternam beatitudinem evolavit, Novi-  
genti ad Sequanam, quo se grassante Au-  
gustobonæ Tricassium per illum autum-  
num populari morbo contulerat, Kalend.  
IXbris natali suo; quo eodem die parens  
meus ante XIV annos obiit, quem Pithæus  
& vivum coluit, & mortuum in me porro  
colere

colere non desit, ita ut incomparabilis amici morte, quicum partiri curas, & non solum de studiis, sed etiam de Repub. consilia communicare consueveram, cœptæ Historiæ pensum protinus è manibus excusserim, abjecissemque prorsus, nisi tanti viri & de me ac patriâ tam bene meriti memoriæ hoc debere existimassem, ut quod illo auctore inchoaveram, ad publicam utilitatem, cui nostram in ea parte industriam prodesse olim judicabat, quamvis tanto adjutore destitutus, aliis undecunque quæ ab illo solo ab initio speraveram, conquisitis subsidiis ad exitum tandem perducerem.

---

CI<sup>o</sup> I<sup>o</sup> XCVII.

**A** Pud nos hoc anno *Gilbertus Genebrardus* patriâ Arvernus, professione Benedictinus, Semurii in Heduis, ubi opimum Sacerdotium habebat, in vivis esse desit,



defuit, sexagenario major, qui diu literas Hebraicas magnâ frequentiâ in regio auditorio Lutetiz docuit, & per has turbas non interveniente regii nominis autoritate, Aquensis Archiepiscopus creatus est, ob idq; dignitate eâ, rebus per pacem ordinatis, statim exutus, in causâ regni, & scriptis suis, quæ complura & multijugæ eruditionis plena evulgavit, iniquior & acerbior, & vitâ quàm stylo temperatior creditus.

Huic comes addetur *Suffridus Petreius* Leovardix in Frisia natus, qui cum Lovanii in pueritia literis Græcis naviter operam dedisset, veterum Græcorum scriptis in Latinum vertendis animum applicuit, & postea à Frisix ordinibus invitatus, origines, colonias, nobilitatem, libertatem, jura gentis suæ illustranda suscepit, in quibus altiùs repetendis dum admistis fabularum figmentis nimiùm stylo indulget, multorum reprehensiones incurrit, ut *Uboni Emmio*, qui eandem provinciam summâ fide ac admirandâ simplicitate postea exe-

entus est, potius lampada tradidisse, quàm  
 ei in scribenda historia patria præluxisse vi-  
 deatur. Gliscentibus demùm Belgicis tu-  
 multibus, homo tranquillitatis amans Co-  
 loniam Ubiorum concessit, ubi uxore ela-  
 tâ, ac vitæ instituto mutato, sacris initiatus  
 est, & in eo otio tandem fere septuagena-  
 rius mense Februario ex hydropse decessit, à  
 conterraneo suo Vibrando Aufckema I. C.  
 ultimo elogio decoratus.

Quinquennio senior eo *Gabriel Palæo-*  
*tus*, patriâ Bononiensis, Virili proximo  
 ad vitæ æternæ præmia migravit, juris Ci-  
 vilis scientiâ, ac Theologicis studiis, vitæ  
 sanctimoniâ, morum gravitate insignis;  
 ac tandem post omnes Aulæ Rom. hono-  
 res inoffensâ famâ decursos, in Collegium  
 Cardinalium à Pio IV cooptatus, & post  
 Sixti V mortem, paullùm abfuit, supre-  
 mum sacri ordinis magistratum consecu-  
 tus; scriptis etiam in illa fortuna editis ad  
 posteritatem egregium nomen promeri-  
 tus.

Paullò post ibidem Romæ haut multo  
 quinqu-

quinguagenario major exeunte VIII bri  
cælebs decessit *Aldus Manuccius* ( sic enim  
repetitâ ad Florentinam familiam gentis  
suæ origine postea dici maluit ) Paulli F.  
Aldi N. Aldi Rom. abnepos , cujus ma-  
jores tantum rei literariæ contulerunt ,  
quantum superiorum temporum barba-  
ries illi abstulerat ; ipse Bononiæ literas hu-  
maniores magnâ frequentîâ professus est ,  
& editis tam propriis quàm paternis ad  
omnem eternitatem victutis monumentis ,  
longè maximam ab omnibus gratiam me-  
ruit.

Anto eos Romæ ibidem obiit VIII Eid.  
Febr. cum ætatis annum LXVII ageret ,  
*Franciscus Patricius* , Clissæ in Istriæ fini-  
bus ditionis Venetæ oppido natus , & ut  
ajebat, Senis oriundus, qui literis Græcis &  
Latinis egregiè instructus ad Philosophiæ  
studia animum applicuit. Sed dum ex in-  
genio suo natas & à communi plerumque  
sensu abhorrentes sententias in scriptori-  
bus interpretandis consecratur, à plerisque  
reprehensus, & in Peripateticis discussioni-  
bus,

bus , ac novâ de universis Philosophiâ , cum adhuc Ferrariæ esset , ante sexennium editâ , complures adversarios habuit ; & novam Philosophiam quidem censurâ notatam paullò ante mortem retractavit. Ferrariæ totos XVII annos Philosophiam Platoniam docuit , Alfonso II perquam familiaris , & à Clemente VIII , qui ejus operâ olim usus fuerat , cum primum Pontifex renunciatus est , magno stipendio Romam evocatus , *Parallela militaria* statim publicavit , multâque alia præterea scripsit , quæ in amicorum scriniis inedita jacent.

\* Huic comes addetur *Franc. Raphelengius* Lanoii ditionis Insulanæ in Pleumosiis oppido natus , postea Christophori Plantini gener , qui in Typographica cum egregiam sub focero operam diu navasset , relictâ Antuerpiâ , Lugdunum Batavorum concessit , & linguarum Orientalium vel teste Scaligero valdè peritus , etiam Arabicam publicè magnâ cum laude professus est , de qua *Lexicon* postumum ab eo dum viveret , summâ curâ & labore compositum prodiiit,



prodiit; & tandem non ita senex, vix enim annum LVIII excesserat, ad alteram vitam migravit XII Kalend. Veil.

Ultimus referetur *Hier. Commelinus* aliàs Santandreams dictus, natione Gallus, qui translato è patria Genevam primùm, dein Heidelbergam domicilio, rem literariam multùm juvit, editis tum veterum Græcorum plurimis nunquam antea editis monumentis, tum Athanasio imprimis, & B. Io. Chrysostomi magnâ operum parte, in quibus & propriâ industriâ multum contulit, & immaturâ morte hoc anno exeunte nobis ereptus, filiis tandem curam quasi hæreditario jure demandavit.

CIO IO XCVIII.

**U**T viri litteris clari memorentur, *Benedictus Arias Montanus* linguæ sanctę apprimè peritus ac summè pius, Bibliis Complutensibus elegantiore formâ recu-

dendis à Philippo destinatus, egregiam admodum operam in eorum editione cum Fabritiis Boderianis fratribus Falezianis Antuerpiæ navavit, unde sibi æmulos tanto odio accendit, & in iis Leonem Castrensem, qui de LXX interpretibus commentarium scripsit, ut ad causam dicendam citatus Romam, vix veniâ impetratâ, pro tantorum laborum præmio secessum in Bætica sua, in quo se bonâ conscientia fretus sacrorum librorum lectione ac lucubratione solaretur, acceperit, ubi & hoc anno decessit, ætatis LXXI Hispali proximæ ad S. Iacobi, cujus collegii ipse sodalis erat, sepultus.

Huic ut amicitia, sic fato conjunctus fuit *Abrahamus Ortelius* Antuerpia nobilissimo orbis aliquando emporio natus, qui rei Geographicæ ab ineunte ætate studiosus maximè eam partem nulli labori aut sumptui parcens illustravit; neque ob id peregrinationes longinquas suscipere, ac multoties totâ vitâ repetere recusavit, edito pulcherrimo orbis terrarum Theatro, & renovatâ

vatâ antiquorum locorum per Tabulas propriâ industriâ eleganter depictas memoriâ, Synonymorumque ingenti opere edito, ac tandem septuagenario major in patria cælebs decessit IV Kalend. Vtil. ad B. Michaelis monumento insigni sepultus.

Paullò post *Ioachimus Camerarius* Ioachimi à nobis semper honorificè appellati F. cum patris scriptis colligendis & edendis, & arte suâ & consilio non solùm principes viros, sed & amicos & probitatis ac eruditionis nomine sibi commendatos plerisque totâ vitâ demeruisset, Norimbergæ, quò familiam transtulerat, annos LXIV natus IV Eid. VIIIbris obiit.

Nec silentio prætereundus *Dominicus Lampsonius*, qui in pictura & Poëtica se pari sælicitate exercuit, & ut vicem Lamberto Lombardo præstantissimo pictori, quo magistro in eâ arte usus erat, redderet, ejus vitam accuratissimè descripsit, ob idq; Ernesto Bajoaro Leodicensium Episcopo & postea Coloniensi VIIviro charissimus, demum senex Leodicum concessit, eaque  
in

in urbe placidè ad Deum hoc anno migravit.

Majore præconio dicendus *Henricus Stephanus* Roberti, cui tantum res litteraria debet, F. Lutetiæ Parisiorum natus, qui patris æmulatione cum scriptoribus Græcis edendis & castigandis sedulam operam navasset, tandem & penum amplissimam linguæ Græcæ dedit, de sua posteraque ætate ob id optimè meritus. Postea variis peregrinationibus diu in Germania vagus, cum patriam oblivisci non posset, Lugdunum se contulit, & hoc anno fere septuagenarius ineunte Martio vitæ & tot exantlatis pro Republica litteraria laboribus finem fecit.

---

CLD ID XCIX.

**H**Oc anno Februarius morte virorum literis illustrium funestus fuit; nam XIII Kalend. Martii *Paulus Paruta* patricius



cus Venetus, cum in Hispaniam, ut apud Philippum novum Regem in parentis morte & ipsius ad regnum inauguratione solenni officio defungeretur, legatus à Senatu ordinatus esset, ad meliorem vitam transiit, anno ætatis LVIII, vir rarâ in explicandis negotiis sollertiâ & eloquentiâ, quas virtutes variis legationibus in Italia ac præcipuè apud Clementem VIII, cum Ferrariam venit, & Margaritam Austriam, cum ad virum deduceretur, exercuit, & scriptis, quæ magno in pretio inter prudentiæ civilis sectatores meritò habentur, consignavit; testantur hoc de perfectione Politicâ libri & commentarii Politici vernaculo sermone exarati, quos Soliloquio pietatem & veram animi magnitudinem spirante clausit, & de bello Cyprio historiâ, quâ meruit ut ipsi patriæ historiæ scribendæ cura à repub. demandaretur.

Triduo ante in eâdem urbe anno ætatis LIX *Josephus Zarlinus* Clodienſis, Musicæ artis scientiâ, quam doctissimis illustravit commentariis, clarissimus, fatis

Z z

concessit,

concessit , ad D. Laurentii sepultus.

Eodem die & ætatis anno *Alfonfus Ciaconus* , professione Dominicanus , lænæ in Bætica Hispaniæ , quam Oningin apud Livium & Plinium fuisse putat Ambrosius Morales , natus , rei antiquariæ peritissimus , & secundum Petrum Ciaconum Toletanum cognominem potius quàm gentilem suum , suæ Hispaniæ magnum lumen , post edita pleraque ingenii sui monumenta , Romæ , ubi jam pridem domicilium fixerat , ad meliorem vitam migravit , & ad D. Sabinæ honorificè tumulatus est.

Octavo post die dignitate major , nec doctrinâ inferior , *Garfias Louisa* in Sacræ Historiæ veritate indagandâ admodùm diligens , & Conciliorum Hispaniæ collectione editâ magnam inter suos laudem consecutus , & ut pueritiæ Philippi III erudiendæ apponeretur ob id promeritus , cum ante annum Archiepiscopus Toletanus post renunciatam ab Alberto Archiduce dignitatem creatus esset , Compluti ex mœnore animi , ut creditum fuit , quòd post cumulos

cumulatos à Philippo II honores indignam à suis sub novo principe gratiam re-  
pendi videret, vir omnis injuriæ impa-  
tiens defecit LXV ætatis anno.

Ultimus dicetur *Ioannes Levineius* Gan-  
denſis Clarâ Levini Torrentiî digniſſimî  
Antuerpiæ Epifcopi ſorore natus, qui ve-  
ſtigiiſ avunculi inſiſtens, rem literariam  
non mediocriter diligentia ſuâ adjuvit, &  
cum in Plantiniana Bibliorum editione  
Græca cum Guil. Cantero ſedulam ope-  
ram navaret, poſtea ſuam induſtriam Gul.  
Sirleto & Antonio Carafa Cardinalibus  
eodem opere Romæ adprobavit. Multa  
præterea Patrum Græcorum Latina fecit,  
& dum Gregorium Nyſſenum Græcè inte-  
grum publico dare meditatur, hanc quin-  
quagenario major ætate Deum migravit eid.  
Jan. juxta Torrentiî avunculi corpus in  
majore urbis baſilica conditus.

C I O I O C.

**E**lvius Vrsinus patriâ Romanus , vir Græcè Latineque doctissimus, ac purioris antiquitatis indagator diligentissimus , qui complura veterum utriusque linguæ scriptorum monumenta aut primus edidit , aut edita dedit meliora , artâ cum Octaviano Pantagatho, Gabriele Færno , Latino Latinio , Paulo Manutio studiorum consensione conjunctus , ac præcipuè cum Antonio Augustino , quandiu Romæ fuit , cujus postquam in Hispaniam discessit , plurimas lucubrationes suâ industriâ illustratas publicavit , in familia Alexandri Farnesii Cardinalis eximii litteratorum fautoris diu vixit , & septuagenarius ineunte Maio obiit , ad D. Ioannis Lateranensis , cujus sacri Collegii erat sodalis, sepultus.

Paullò post *Antonius Ricobonus* Rhodigino



gino Venetæ ditionis oppido natus, Patavii diu humanarum litterarum & Rhetoricæ præcipuè professor, qui multa in eo genere scripsit, & Patavini gymnasii historiâ diligenter collectâ non mediocrem à sui Collegii sodalibus gratiam meruit, ex calculo ingenti in vesica enato in eâdem urbe, ubi profitebatur, decessit.

Eos præcessit *Conradus Dasypodius* patre Helvetio natus, nobilis artium Mathematicarum professor, quas editis Græcis plerisque nondum vulgatis auctoribus illustravit; cumque integrum harum præclarissimarum disciplinarum ac omnibus suis partibus absolutum ex priscis illis scriptoribus Græcis corpus publicare meditaretur, Argentinæ, ubi natus erat, Eid. April. anno ætatis LXVIII in vivis esse desit.

*Carolus Vtenhovius* Gandavi patritiâ familiâ natus, & totâ fere vitâ vagus, sed in litteris & Poëticâ constans, cum olim in familia viri illustris Paulli Foxii, dum oratoris regii apud Elizabetham Angliæ Reginam munere fungeretur, diu fuisset, po-

stremò uxore ductâ Coloniz in Ubiis sedem fixit; in Dionysiaca Nonni, in quibus multum laboravit, quæ habebat aut pertusus operis, aut ab aliis præventus, cum magnam de iis spem concitasset, non absoluit; tandem Kalend. Vtilib. vitam hoc anno finivit, ætatis LXIV.

Ante eum mense Maio apud nos *Petrus Faber* Vidi Pibracii à nobis sæpius honorifice commemorati gentilis, qui ad clarum familiæ in Novempopulonia decus probissimos mores & singularem antiquitatis omnisque divini & humani juris cognitionem attulit, & doctissimis scriptis præceptoris sui *Iacobi Cujacii* vestigiis insistens testatam ad posteritatem fecit, postquam amplissimis togæ honoribus defunctus est, & Principem in Senatu Tolosano locum postremò totum triennium tenuit, sexagenario major ad Deum migravit.

Litteris,

CIB IJC I.

**L**itteris, & in litteratos præcipuo amore  
 ac studio, prudentiâ & humanitate  
 clarissimus, Nonis Vtilib. Patavii ubi an-  
 te XLI annos otii honestissimi sedem po-  
 suerat, *Ioannes Vincentius Pinellus* origine  
 Genuensis, Neapoli natus, optimè meri-  
 tam non solum de Italia sua, sed de toto  
 orbe Christiano animam Deo reddidit,  
 cum ætatis annum LXVIII ageret, in cu-  
 jus laudibus commemorandis, quas alii  
 singularibus libris fusiùs pro merito ex-  
 plicaturi sunt, ne nimius sum, nunc Tito  
 Pomponio ipsum comparasse satis habe-  
 bo, quippe qui Veneti, ut ille Attici, à  
 serenissima Republica, quæ ipsum impen-  
 sè dilexit, nomen promeritus, & in pri-  
 vata vita prænobilis familie decus ser-  
 vans, amicis cuncta humanitatis officia  
 sedulò ac prolixè præstaret, aliosq; quam-  
 plurimos,

plurimos, quos mutuâ virtutis opinione in Gallia, Germania, Hispania, ac longinquioribus Europæ partibus sibi conciliaverat, diligenti literarum mutatione coleret, ut non solum iis, qui cottidiano convivio fruebantur, gratissimus, sed etiam aliis passim quamplurimis utilissimus esset. Bibliotheca ejus insignis tot annorum spatio & sollerti curâ collecta variam fortunam post ejus obitum sortita est, & cum hærede conflictata, quod amplius ex Paulo Gualdo Vicentino, qui ejus vitam certè dignam quæ ab omnibus legatur, descripsit, Lector poterit cognoscere.

Post Pinellum commemorandus venit *Tycho Brahe* eques Danus astrorum verâ scientiâ & observationibus longo tempore in sua Uranopoli & magno sumptu factis, omnium concordibus suffragiis principis Astronomorum nomen promeritus, qui Chersoneso Cimbrica relicta, cum in Germaniam proximam se recepisset, in aula Rodolphi Cæsaris aliquandiu floruit; cum Wilielmo Hesso, qui & in eadem scientia excelle-



excellerat , artâ studiorum necessitudine  
 conjunctus , & Pragæ hoc anno IX Kal.  
 IXbris decessit , cum vitæ annos LIV ,  
 menses IX, dies XIX tantum exegisset , vir  
 & scriptis à se editis secundum Ptolomæ-  
 um , Ioannem Regiomontanum , & Ni-  
 colaum Copernicum imprimis clarus , &  
 postea à Iacobo Keplero , cui præclaras in-  
 genii sui reliquias , ne perirent , quasi te-  
 stamento legavit , publicatis illustrior.

Huic addemus *Richardum Streinium* in  
 Austria liberum Baronem , antiquitatum  
 Romanarum , quas & scriptis illustravit ,  
 cognitione præstantem. Is unam & alte-  
 ram pro Ordinum Belgicorum libertate  
 defensionem , sed suppresso nomine , ve-  
 ritus Austriacorum Principum , quibus sub-  
 est , offensionem , publicavit , & postre-  
 mò in Theologicis stylum exercuit , & ad  
 Robertum Bellarminum admonitionem  
 expresso nomine scripsit , atque hoc anno  
 in patria in vivis esse desiit.

His & accensebitur *Ioannes Heurnius*  
 perhonestâ familiâ è Belgio oriundâ Ul-

trajecti natus, qui cum ad Medicę artis stu-  
 dia animum appulisset, ejusque in patria  
 fundamenta jecisset, Lutetiam venit, &  
 Ludovico Dureto regio in ea scientia pro-  
 fessori eximio operam navavit, tanti præ-  
 ceptoris non ingratus discipulus, & do-  
 ctrinæ ejus summus præco; dein Patavium  
 profectus, ac postremò Ticinum, utrobique  
 magnos in ea scientia præcipue sub Ca-  
 pivacio & Mercuriali progressus fecit, &  
 in patriam reversus, erectâ Lugduni Bata-  
 vorum anno CIO IO LXXXI Acade-  
 miâ, ad medicam professionem cum Rem-  
 berto Dodonæo Mechliniensi honorificè  
 à curatoribus evocatus, in studiis assiduus  
 consenuit, editis plerisque scriptis; cum-  
 que prosperâ semper antea valetudine usus  
 esset, calculo laborare cœpit, cujus crucia-  
 tibus totum triennium divexatus, tandem  
 III Eid. Vtil. anno ætatis LVIII, die na-  
 tali suo obiit; in mortui vesica reperti se-  
 ptem calculi nucis juglandis majoris mag-  
 nitudine, & formâ, singuli drachmas duas  
 pendentes, misera ad libros assiduè seden-  
 dentium stipendia.

Meruit

Meruit & *David Chytraeus* qui tot virum,  
quantum in ipso fuit, memoriam ab obli-  
vione asseruit, ne ipse inoblitus relinqua-  
tur, qui in Suevia, *Braënheikemæ Vi-*  
*tembergenfis* principatus oppido natus,  
*Tubingæ & Heidelbergæ* Studiorum ty-  
rocinia fecit, & à *Megalopolensibus* duci-  
bus evocatus, diu *Rostochii* professus est,  
ac tandem septuagenario major hoc an-  
no III Non. Vtil. placidè ex hac vita mi-  
gravit.

---

## C I O I O C I I.

**H**Oc anno Aprili mense ad meliorem  
vitam in patria migravit *Lazarus Su-*  
*perantius* patricius Venetus, cujus extat de  
rebus Turcicis magni judicii ac prudentiæ  
commentarius.

Et eodem fere tempore itidem Venetiis  
decessit *Maximus Margunius* Cytherensis  
Episcopus, natione Græcus, qui S. Patrum

aliquot reliquias è communi naufragio vix servatas & secum asportatas publico dedit, & sua quædam eleganti stylo, nam Poëticâ excellebat, admiscuit.

In Germania *Paullus Melissus Schedius* Mellerstadii in Franconia natus, qui ingenium Poëticâ, ætatem peregrinationibus exercuit, & postremò Heidelbergæ, ubi Bibliothecarii officio fungebatur, anno climacterico suo decessit XV Kalend. Mart.

*Martinus Rulandus* Frisingensis Cæsareus Medicus, scriptis editis clarus, Pragæ IX Kalend. Maias ex hac vita demigravit, Hungarico, de quo nuper scripserat, morbo correptus.

Eâdem professione & Mathematicarum præterea scientiarum cognitione clarus eum paullò post secutus est *Gaspar Peucerus* Budissinæ natus, Philippi Melancthonis gener longâ vitâ & scriptis ac fortunâ clarior; nam LXXVIII annos vixit, & post Carrionis chronologicam epitomen completam, & de divinationibus opus recognitum



cognitum, decennali carcere ab Augusto Laxone VIIviro vexatus, vixque sub Christiano filio libertati restitutus, publicato de eâ re libro, Dessaviæ ultimum vitæ variis molestiis jactatæ diem VIIbri mense clausit.

Mense proximo *Franciscus Iunius* in Biturigibus Cubis apud nos natus, itidem obiit Lugduni Batavorum peste absumptus, cum tantum annum LVII attigisset, vir desultorio ingenio, qui multa conatus, an adsecutus sit quod moliebatur, doctorum erit judicium.

Utimus commemorabitur ex nostris *Joannes Passeratius* Augustæ Tricassium natus, Latinæ linguæ Professor dignissimus, qui fælicitate versus pangendi, etiam Gallicos, & solutâ oratione scribendi ac bonos scriptores interpretandi diu magnam laudem in Parisiensi Academia meruit. Homo emunctæ naris, & cui aliena vix placerent, ultimo elogio vovit, ne manes sui malis carminibus onerarentur; itaque pauci mortuum laudarunt, dum verentur, ne.

voto ejus minùs respondeant; obiit mense VIIbr. senio effœtus, amissâ oculorum luce, & jam fatiscence ingenio, cum vel vitæ cupidissimi vivere velle desinunt.

---

## CICCO 15 CIII.

**N**Ec omittendi sunt viri litteris clari, & in iis *Iac. Monavius* Uratislavien-  
sis patricius, & doctrinâ propriâ atque humanitate, & Iusti Lipsii commendatione clarus, qui diem ultimum vitæ clausit in patria, cum LVI ætatis annum ageret.

Quem secutus est *Andreas Cesalpinus* præstantissimus Peripateticus, qui cum diu Pisis docuisset, & scriptis famam nominis propagasset, à Clemente VIII evocatus, archiatros ejus fuit, & Romæ decessit.

Initio anni VII Kalend. Mart. Lutetiæ Parisiorum anno climacterico suo ad Deum migravit *Franc. Vieta* Fontenaio in inferiore

inferiore Pictonum provinciâ natus, vir  
 ingeniosâ & profundâ meditatione, cujus  
 vi nihil illi inaccessum in abstrusioribus  
 scientiis, nihil quod acumine mentis pos-  
 set confici, difficile confectum fuit. In Ma-  
 thematicis præcipuè industriam inter alias  
 occupationes & negotia, à quibus capax &  
 indefatigabile ejus ingenium nunquam  
 vacavit, totâ vitâ exercuit, in quibus adeo  
 excelluit, ut quicquid ab antiquis in eo ge-  
 nere inventum, & scriptis, quæ temporis  
 injuriâ aut perierunt aut obsoluerunt, pro-  
 ditum memoratur, ipse assiduâ cogitatio-  
 ne invenerit & renovarit, & multa ex suo  
 ad illorum ingeniosâ reperta addiderit.  
 Tam profundâ autem meditatione fuit,  
 ut sæpius visus sit totum triduum conti-  
 nuum in cogitatione defixus ad mensam  
 lucubratoriam sedere, sine cibo & somno,  
 nisi quem cubito innixus, nec se loco mo-  
 vens ad refocillandam per intervalla na-  
 turam, capiebat. Scripta ejus rara, neque  
 tamen pauca, quòd ea sumptu suo cuden-  
 da curaret, & exemplaria penes se retine-  
 ret,

ret, quæ amicis homo longè ab omni avaritiâ positus, & harum rerum peritis liberaliter distribuebat. Multa & adfecta reliquit, quibus præclaras has artes, repetitâ veterum memoriâ, summo studio instauravit, quæ Petri Alealmi Aurelianensis, cujus industriâ à se, dum in vivis ageret, excultâ utebatur, fidei ab hæredibus commissa sunt, ex eoque thesauro postea tam ab ipso, quàm Alexandro Andertono Scoto & aliis multa deprompta sunt, & in lucem edita, quæ admirationem in animis harum rerum peritorum majorem indies excitant, & immortalem ejus gloriam intermori minimè patiuntur. Hadrianus Romanus, cum problema omnibus totius orbis Mathematicis construendum proposuisset, Vieta illud continuò solvit, & cum castigationibus & auctario & Apollonio præterea Gallo ad Romanum remissit, tantâ cum Romani admiratione ut confestim ille iter in Galliam corripuerit, ut hominem sibi antea ignotum conveniret, & postea arctam cum eo amicitiam coleret.



coleret. Cum Romanus Herbipoli, ubi relicto Lovanio domicilium fixerat, Lutetiam venit, Vieta aberat, ad suos Pictones profectus, ut valetudinem jam infirmam curaret. Quâ re cognitâ, quamvis adhuc C Leucarum nostratum iter restaret, Romanus obfirmato semel animo in viam se dedit, & ad Vietam prius per literas monitum contendit, cum quo totum mensem fuit, & de quæstionibus, quibus ad eum instructus venerat, per otium egit, & majora omnia spe in homine minimè fucato cum stupore admiratus est, tandemque post amplexus & ægrè vale dictum pro tam honorificâ ad se profectione Vieta hospitem reducendum ad limitem curavit, et sumptus in eam rem necessarios suppeditavit. Tanti autem conatus in Apollonio factus est, ut Vietæ æmulatione Marinus Gerardus Racusinus præstantissimus Mathematicus anno VII post Apollonium redituum ediderit, unâ cum supplemento Apollonii Galli. Doluit mihi valdè quòd tam stomachosè cum eo alter-

catus fuerit initio Scaliger, cum de cyclo-  
metricis inter ipsos ageretur; sed vir gene-  
rosus hunc Vietam ignorabat, & ægrè pro-  
pterea ab illo reprehendi ferebat, cum non-  
dum satis perpendisset an citra paralो-  
gismum quod probandum susceperat de-  
monstrasset; itaque postea honorificâ re-  
cantatione seipsum castigavit, & in arca-  
no præcipuam erga Vietam ab eo tempo-  
re reverentiam servavit. Paullò antequam  
moreretur Vieta, in Kalendario Liliano de-  
fectus magnos ab aliis jam notatos cum a-  
nimadvertisset, de forma quæ in Ecclesia  
Romana recipi posset, seriò cogitare coepit,  
& Kalendarium novum, quod verè Gre-  
gorianum appellabat, construxit, ad Ec-  
clesiastica festa & ritus accommodatum,  
quod typis mandatum cum relatione de  
ejus ratione ad Ecclesiasticos doctores an-  
no CIƆ IƆ C Cardinali Aldobrandino  
Lugduni obtulit, cum ille de pace cum  
Sabaudo acturus, à Pontifice ad Regem ve-  
nisset, sed nullo successu, sicuti proficis-  
centem, cùm mihi consilii sui rationem  
expo-

exposuisset, amicè monueram; quippe qui animo providerem emendationem apud Principes Christianos adfectione tantâ insinuatam, & per prensationes postremo receptam non facile vel in melius mutatu-  
 tuos eos, qui ulla in re errasse aut errare posse ne fateantur, pro imperii arcano ducunt. Sane cum Aldobrandinus post pacem factam Romam revertisset, & Christophorus Clavius, qui pro Lidio tot editis jam scriptis anticipatâ opinione propositam emendationem protinus rejecisset, gravem ad eum expostulationem misit Vieta, nec si diutius superfuisset, eo stetisset contentio, nec qui mortuo barbam vellere non dubitarunt, eo superstite, si ausi essent, non vapulassent. Ita autem de Clavio sentiebat Vieta, antequam ob illam contentionem contra eum exacerbari potuisset, optimum eum esse Mathematicorum Elementorum interpretem, & eximiâ facilitate, quæ ab inventoribus obscurius in quavis eorum parte tradita sunt, explicare; cæterum quantum ad scientiam,

ita scribere , ut scribendo quæ scribit primum discere videatur , nihilque de suo ingenio addat , sed excribat omnia , suppressis ferè eorum à quibus proficit nominibus , nullo operæ præterea pretio , nisi quod sparsim , confusè , & minus dilucidè ab aliis scripta ipse colligit , ordinat , & ita perspicuè proponit , ut ex alienis propria efficiat. Leve est quod dicam , vel ipso iudice Victâ , quod tamen quivis alius magni fecerit. Res Hispanorû longè latèq; sparset ut cōmunicatione & consiliorû consensione conjungantur , secreto egent , ad quod illi vastam & longiùs plerumq; iusto respicientem prudentiam adhibent , literis exsolito & incognito charactere exaratis uti solent , brevioribus ad singulos , ad universos amplioribus , & ordinem & charactere subinde per otium interpolant , vertunt , mutant , ne tempore secretum emanet. Sed cum hoc faciunt , longo temporis spatio opus habent , quò præfectos longè ad Indias positos moneant. Tale erat illud notis amplius **Q** compositum instrumentum ,



strumentum, quo per bella infesti adeo decennij contra nos utebantur, quo tempore pleraque eorum interceptæ litteræ valde prolixæ, quibus consiliorum suorum rationes explicantur, quibus ij, qui vulgo his in rebus industriam suam exercent, ob notarum tantam multitudinem expedire se minimè poterant. Itaque ad Vietam Regis jussu missi nihil tale cogitantem, & qui satius habuisset aliâ quâvis in re ingenium suum fatigare; qui familiari sibi in studiis gravioribus meditatione illud totum expiscatus, & plerasque deinceps alias maximi momenti, reperto semel arcano, nullo negotio interpretatus est. Quod res Hispanas totum biennium valdè contrurbavit, qui, re per nostras vicissim interceptas detectâ, necessitatem instrumenti, quod inexplicabile rebantur, mutandi impositam dolebant. Itaque illi qui ad odium & invidiam nihil non comminiscuntur Magicis artibus, nam aliter fieri non potuisse, à Rege id factum passim & Romæ præcipuè, non sine risu &

indignatione rectiùs sentientium, per emissarios suos publicabant.

His senior, & quia voluit obscurior *Vidus Coquillius Romanus* Novioduno Æduorum, quod nunc Nivernium dicitur, & illustrissimorum Clivensium seu Gonzagarum principatûs caput est & civitas Episcopalis, natus, post obitum illustrior, scriptis ejus publicatis, quæ vivus presserat, nunc vel invitatus in hominum memoriam retrahendus est. Lutetiæ primùm litteris humanioribus, dein Iuri utrique operam dedit, & in foro Parisiensi aliquandiù versatus, Patavium petiit, ut se Mariano Socino juniore, cujus tunc nomen erat celebre, recoquendum daret; inde patriam repetiit, nunquam inde migrare certus, & æquitatis ac doctrinæ laude inter suos clarus, consulentibus facilem ad se aditum præbebat, à sordibus alienus, & erga tenues munis; nec in litteris interea cessabat, nam jus consuetudinarium, cujus cognitione præcipuè excellabat, dum jus municipale proprium interpretatur,

pretatur, maximè illustravit, & Historiam præterea patriam magnâ fide ac diligentia scripsit; item accuratissimas de Gallicanæ Ecclesiæ juribus, quæ nunc ubique exagitantur, observationes collegerat, quæ plagio perierunt: dum domi lateret, à popularibus tribus ordinum regni conventibus in lucem productus est, iisque magnam ab omnibus gratiam reportavit; à Principib. suis generali provinciæ procuratore decoratus fuit, & in eâ mense Maio major octogenario vir de sua ætate & posteritate optimè meritus decessit.

---

CIJ IJ CII.

**H**is litteris illustres addentur, & ante Homnes *Ianus Duza* Norduvicus nobilissimâ Bataviæ familiâ ortus, qui cum Liræ primùm, dein Delphis, ac postea Lovanij & Duaci prima litterarum fecisset stipendia, in patriam reversus, in  
Lugduni

Lugduni Batavorum, cui ab Arausionensi præfectus fuerat, obsidione sustinendâ egregiam operam navavit, & Musis cum Marte optimè convenire suo exemplo docuit; etiam post pacem Bataviæ redditam, & foris bellum emissum, Academiae in servata urbe condendæ ab initio auctor, postea conditæ totos XXIX annos curator, mox in Curiæ Senatum cooptatus, tredecim annos in eo munere complevit, & anno LIX in vivis esse desit. Poeticâ præcipue delectabatur, in qua ingenium varij generis carminibus editis exercuit; etiam patriæ Annaleis scripsit, multiplici lectione, & admirabili memoriâ promeritus ut Bataviæ Varro, & Academiae commune oraculum vulgò vocaretur. Mortuum laudavit carmine insigni Iosephus Scaliger, sicuti & cognominem filium naturæ ordine turbato ante elatum tanto parente dignissimum laudaverat.

Sub id & *Christophorus Colerus* in Franconia natus, qui in litteraturæ politioris studiis magnam de se spem excitaverat,  
ante



ante annos in Austria obiit; quem *Iacobus Typotius* paullo post secutus est, homo Belga, qui in negotiis tractandis sollertiam affectavit, & in aula Suecica diu fuit, *Carolo Sudermaniæ Duci*, ac tandem Regi cum *Sigismundo Poloniæ Rege* nepote tunc dissidenti percarus; de quo & relationem ad *Gulielmum à S. Clemente*, qui Regis Hispaniarum res apud *Cæsarem* procurabat, pari candore ac prudentiâ scripsit, & præterea alia quæ ejus ingenium ad majora natum produnt; sed non diu supervixit, & hoc anno factis *Pragæ*, non ita provecâ ætate, concessit.

Eâdem in urbe *Obertus* quoque *Gifannus* *Buræ* in *Sicambriis* natus VI Kal. Vtil. septuagenario major ultimum vitæ diem clausit. Is prima litterarum rudimenta in Belgio suo, atque adeo *Lovanij* cum imbibisset, industriam suam primùm in *T. Lucretio* exercuit, quem post *Michaelem Marullum Byzantium*, qui tantum auctorem misere interploraverat, & secundum

Dionysium Lambinum nostratem , qui in eo laudabilem operam navavit, nobis meliorem dedit; dein totum se Iuris scientiæ ac Philosophiæ studiis mancipavit, denique Argentinæ jus civile professus est, tanto cum plausu , ut inde magnis stipendiis invitatus, in aulam Cæsaream migraverit, & qui in adolescentiæ æstu Protestantium doctrinæ tunc per Belgium invalescenti nomen dederat, senex ad majorum sacra rediit : & Consiliarij Cæsarei titulo ornatus voce & scriptis rem litterariam multum promovit.

Nunc viri à tutelari patriæ numine, hoc est, à Mercuriali quodam urbis Episcopo, cujus festum celebratur X Kal. Iun. cognominati memoriam celebrabimus. Is fuit *Hieronymus Mercurialis* Foro Livij in Umbria natus, anno 1610 XXX antiquâ utrinque familiâ, nec modicis opibus; Patavij cum tirocinium in Philosophiæ & Medicinæ studiis foeliciter fecisset, à civibus suis admodum iuvenis ad Pium IV legatus missus est, & ex ea occasione  
in

in familiam Alexandri Farnesij Cardinalis  
litteratorum fautoris eximij concessit, in  
qua totum septennium mansit, in illo-  
que otio primum ingenij sui factum dedit  
Gymnasticam. Inde Patavium ad Medi-  
cam professionem vocatus, jam famâ ejus  
inclarescente, à Maximiliano Cæsare,  
cùm gravissimo morbo laboraret, in au-  
lam evocatus est, à quo perſanato multa  
honorifica munera accepit, & Patavium  
sub annum LXXIII repetiit. Ibi XVIII  
annos Medicinam fecit & docuit. Bono-  
niæ postea aucto stipendio per quinquen-  
nium, & postremò Pisis XIV annis ad  
CI<sup>o</sup> I<sup>o</sup> CC usque aureos honorario ex-  
currente idem munus exercuit, & cum  
frustra à multis Principibus evocatus esset,  
otium litterarium vitæ aulicæ semper præ-  
tulit; tandem ingravescente ætate, patri-  
am repetiit, ubi qui semper valetudine  
prosperâ usus fuerat, calculi morbo per  
XXX dies acerbè vexatus, vitam de Re-  
pub. optimè meritam cum morte com-  
mutavit V Eid. IXbr. ad D. Mercurialis

in odéo à se magnificentissimè extructo  
sepultus, quò & paullò ante V Kal. IXbr.  
D. Mercurialis reliquias transferri cura-  
verat. Fuit egregiâ corporis formâ, &  
sanctissimis suavissimisque moribus, ad-  
hæc doctrinâ præstanti, quod multa ejus  
scripta testantur, à discipulis ferè publica-  
ta, ut si quid in iis peccatum esset, ea citra  
famæ & existimationis jacturam emen-  
dandi summâ prudentiâ ac modestiâ liber-  
tatem sibi servaret. Quædam & in Hip-  
pocratem non omnino edita, & in Ari-  
stotelis problemata reliquit.

Ultimus memorabitur *Arnoldus Offatus*  
nulli horum posthabendus, jam multo-  
ties à nobis perhonorificè appellatus, ut  
minimè emortualem diem expectari o-  
portuerit, ut memoria ejus celebraretur,  
sicut in plerisque aliis evenit, qui nullam  
alioqui partem in historia faciunt; eoque  
licet pauciora de tanto viro dicenda oc-  
currant, iusta tamen vel amicitia ergò, quæ  
mihi artificissima cum eo intercessit, cum ali-  
quâ grati animi testatione persolvenda  
sunt.



sunt. Is in Novempopulonia nostra pago  
juxta Augustam Aufciorum ignobili or-  
tus, obscuris adeo natalibus ut cognatos  
& adfineis prorsus ignoraret, & pauperes  
ac domesticos, nullos præterea, hæredes ha-  
buerit; sed donis ingenij, doctrinâ, pie-  
tate, morum probitate, & insitâ pruden-  
tiâ à Deo largissimè cumulatus, facilè na-  
taliū defectum tantâ accessione supple-  
vit, ut Romæ in amplissimo orbis theatro  
cæteros omnes natalium splendore & aliis  
fortunæ præsidiis illustreis æquaverit, ple-  
rosque superaverit, æquabili irreprehensi-  
bilis vitæ tenore omnium amorem & ad-  
mirationem promeritus, sicque in illa Au-  
la totis XXXI annis se gessit, ut nemini be-  
ne sentienti dubium reliquerit, quin si  
peccati originalis, quod vulgo vocant, fo-  
mes non obstitisset, quâ moderatione  
maximos honores in eâ citra ambitionem  
decurrerat, eodem in studio pergens ad  
summum Ecclesiasticæ potestatis fastigi-  
um inoffenso pede vaderet. Vixit annos  
LXVII, menses VI, dies XX, ad B. Ludovici  
sepultus.

## CIC I D C V.

**V**iri & litteris clari & longâ vitâ memorabiles, quod in ejusmodi hominibus rarum, his adtexentur. Ante alios *Pontus Thiardæus Bissianus* dicitur, nobili familiâ in Heduis natus, qui exactâ trium linguarum cognitione, & in juvenili ætate, excultus, seculo illo, quod apud nos Poëtarum proventu abundasse Henrico II Rege diximus, in Poëticâ vernaculâ primùm lusit, dein Mathematicis artibus & Platonica doctrinâ se totum mancipavit, ac postremò Theologicis studiis, in quibus omnibus multa, sed ferè Gallicè scripsit, reconditæ scientiæ ubique plena. In aula etiam vixit, & Henrico III gratiosus, sicuti suo loco ostendimus; ab eo Cabilonensi Episcopatu donatus est, & paullò ante mortem octogenario major, de rectâ nominum impositione commentarium vulgavit,

gavit, & ad Phil. Iudæi libellos à se illustratos pro auctario addidit; cum in libris assiduus esset, cibo multo, quippe vasto corpore, utebatur, & generosa vina, qualia illis locis circa Araxim nascuntur, aquâ nullâ admistâ citra temulentiam bibebat, cumque dormitum ibat, quod mirum est, largo se meraci haustu sine valetudinis dispendio proluebat. Tandem cum XX amplius annos sacro munere magnâ pietatis & doctrinæ laude defunctus, Cyrum ex fratre nepotē sibi superstitem substituisse, integris animi & corporis sensibus ad meliorem vitam migravit, VII Eid. VIII br. ætatis anno octogesimo quarto.

*Theod. Beza*, qui patrum in Curia Parisiensi Senatorem habuerat, Vezeliis itidem in Heduis natus, Biffianum sex diebus antevertit, ingenio hilario ac eleganti, & longâ vitâ satis notus, quam LX totos annos in studiis & lucubrationibus exegit, eaque tantum provectus, ut antequam moreretur, veris vitæ, quæ eam desiderabilem efficiunt, subsidiis præsenio

senio destitueretur : siquidem presentium memoriam , debilitatâ quippe mente evanidam amiserat , præteritorum , dum ingenio valebat impressam servaverat. Itaque & totos Psalmos Hebraicè , & quodcunque caput ex B. Pauli Epistolis proposuisses , integrum Græcè recitabat , nec in iis , quæ olim didicerat , iudicio carebat , sed quæ dixerat statim obliviscebatur : in hoc mentis obliuioſo languore ferè biennium perseveravit , & cum ad concionem ire vellet , subitâ convulsione correptus ac lecto impositus vitam finivit. Vixit annos LXXXVI, menses III, dies XIX. Laudavit mortuum Antonius Fa-  
jus , & carmen elegans & adfectûs plenû veteri amicitia cum eo conjunctus Scaliger fecit , addito etiam de fato urbis , in qua decessit , omine , quod tamen hæcenus eventu caruit.

Bezâ rursus annosior , & summus Bezæ amicus *Robertus Constantinus* annum clausit, Cadomo in Neustria inferiore natus , trium linguarum peritissimus , &  
Græcæ



Græcæ præcipuè ac Latinæ, qui longam vitam in studiis & peregrinationibus consumpsit. Fuit & Iulii Cæsaris Scaligeri domesticus, & commentaria in partem Theophrasti ab auctore non edita post ejus mortem publicavit, quod à plagii crimine, cujus aliquando infimulatus fuit, cum liberat; vixit usque ad CIII annum, integris corporis & mentis sensibus, & memoriâ adhuc validâ, quæ in longævis ex omnibus animi facultatibus prima debilitatur & vacillat; & tandem pleuritide correptus exeunte hoc anno VI Kalend. Ianuar. defecit.

His macrobiis rarum longæ vitæ & connubialis concordie addam ex Emanuele Demetrio exemplum *Viri & femina* è plebe, ideoque obscuri nominis, quorum ille CIII annos, hæc XCIX expleverat, cum uterque LXXV in matrimonio conjunctissimè vixissent, longæ vitæ pro cunulo fælicitatis accessit quod Philemoni & Baucidi pro summo beneficio Deos concessisse narrant fabulæ, ut

alter alteri tantum tres horas supervixerit,  
& ambo Delphis in Batavia simul hoc  
anno terræ mandati sunt.

Post hos dicendus venit *Simo Marionus*  
Novioduno Heduorum sive Nivernio  
perhonestâ familiâ natus, qui juris scien-  
tiâ ac eloquentiâ præcipuè in nostro foro  
diu claruit, quod actiones aliquot foren-  
ses ab eo editæ abundè testantur. Dein ad  
dignitates evectus, se semper iis parem  
præbuit, & patroni fisci munus pari elo-  
quentiæ & sollertis judicii laude exercuit,  
jura regia, libertatem publicam, regni dig-  
nitatem ubique constantissimè tutatus.  
Obiit Lutetiæ III Eid. Febr. cum LXIV  
ætatis annum tribus mensibus excessisset,  
& ad S. Medici sepultus est.

---

CIO ICVI.

**N**unc viri litteris illustres, qui hunc  
annum funestum morte sua fece-  
runt

runt, memorabuntur; ac primus inter eos *Sofredus Calignonus* Navarræ Cancellarius, Gratianopoli in Allobrogibus natus, ingenio, doctrinâ, rerum usu & in iis explicandis sollertiâ, ac morum suavitate cum paucis comparandus. Olim mihi à puero & in scholis arcta cum eo familiaritas fuit, quæ per bella locorum distantis & variis casibus aliquandiu disjuncta, postremis temporibus coit, & in edicto Namnetensi condendo, cum eo communem operam per triennium integrum navavi; quinquagesimum sextum annum aliquot mensibus supergressus fuerat, cum in lethalem morbum incidit, totâ vitâ jucundissimus, quæ subito in merorem vertit, & gravedine primùm tentatus, cum ad meam vocem se excitasset, vocem mihi funestam statim reddidit, *non tam viris bonis vitam esse optabilem*, tristi non solùm morbi sui sed etiam rerum nostrarum in posterum augurio.

*Philippus Porta* Autrici Carnutum natus, ad Boni-portis cœnobium, cui An-

tistes erat , haud longè ab Arcuensi ponte ad Sequanam prid. Non. VII Ibris ad Deum migravit, cum LXI ætatis annum ageret; is vitam placidam, & ad benè de cunctis merendum institutam, in Poëtica nostra exercuit, in qua excelluit, ut secundum Ronsardum, Bellaium, & Bellaqueum principatum in ea obtinuerit; Neque minùs propterea rebus maximis gerendis par; nam dum Annas Ioüsa, Henrico III Rege, quasi rerum in Aula potiebatur, ipse in Ioüsæ ingenio regnavit, & eo sublato, ad pristinam studiorum consuetudinem rediit: in illo otio Gallicam Psalmorum paraphrasim omni laude dignam meditatus.

Nec multò post *Reginaldus Belnensis* Senonum Archiepiscopus, quem adolescens & vir senem & grandævum assidue colui, optimè meritam de Rege & nomine Gallico animam Deo à quo acceperat, reddidit, pænè octogenarius. Hic vir constantissime Regias partes calamitosissimis temporibus tutatus est, sicuti illustri



At illius ubique in superioribus mentione vidimus, cum diceret, *religioni, nisi salvâ republicâ, consuli non posse, salvam autem rempublicam servari non posse, nisi legitimâ successionem servatâ*, ob idque cum sublimiore dignitate esset dignissimus, ab ea semper exclusus fuit. Cætera quæ de ingenio ejus, comitate, ac miro temperamento addi possent, commodius alibi dicentur.

Nunc *Iustus Lipsius* venit cōmemorandus de quo pauciora dicenda sunt, cum ipse victuris ad omnem posteritatem scriptis satis se illustrem toto orbe præbuerit. *Iscanio III* à *Bruxellis* miliaribus natus honestâ & antiquâ familiâ, moribus & eruditione seipsum magis nobilitavit, & *Lovanii* hoc anno ætatis *LIX* continuis pro re literariâ laboribus finem imposuit. Totâ vitâ *Iosephum Scaligerum* coluerat, ab eo vicissim redamatus, qui exemplo suo alios ad celebrandam ejus memoriam provocavit, ut nullum à suis cum quibus vivebat, illustrius monumentum

hodie extet, quàm quod illi Scaliger Lugduni Batavorum à se, Hugone Grotio, Dominico Baudio, Daniele Heinsio, aliis structum erexit.

Huic addetur *Helias Putschius* domo Antuerpianus, Augustæ Vindelicorum oriundus antiquâ familiâ, qui postea cum patre & matre Stadæ celebri Saxoniae urbe haut longè ab Hamburgo consedit, ibique litterarum tyrocinio factò, postea patre elato à vitrico benignè educatus, Lugdunum Batavorum concessit, & auctore Scaligero Grammaticorum Latinorum editionem aggressus est, quam & ad exitum perduxit, sed cum notas ad eam pararet, Stadam reversus, morbo fatali prohibitus est, qui cum vix XXV annum aliquot mensibus supergressum, cum plura ab ejus egregia doctrina expectarentur, intra paucos dies absumpsit.

F I N I S.



ELOGIUM

IAC. AUG. THUANI

EX EPISTOLA V. CL.

*Iſ. Caſauboni præfixâ Iof. Scaligeri Opuscu-  
lis quæ eſt in magno volumine ,  
Epiftola CCLXIII.*

\*\*\* **A** Pud illos certe, qui ubivis loco-  
rum doctrinâ & virtute pari li-  
brâ ſunt ornati, illuſtriſſimi nominis tui  
auctoritatem, Præſes ſapientiſſime, ad  
commendationem huius libri abundè ſa-  
tis valituram, dubitare non poſſum, qui  
ſciam, unum hodie inter rogatos eſſe te,  
quem non magis dignitas hæc ampliſſi-  
ma, magnis in rempublicam meritis tibi  
parta, univerſis Franciæ populis reddat  
venerabilem, quàm inuſitatæ ingenii  
dotes, quibus excellis, cunctis totâ Eu-  
ropâ

ropa probis doctisque hominibus admirabilem. Nam quum tuâ olim operâ variè ui, multò antequam nascereris, destinasset magnus ille mundi arbiter, omnia liberali manu in te contulit per quæ aliquis ad veram solidamque gloriam potest pervenire. Nihil hic dicam de antiqua generis nobilitate, de Majorum imaginibus, & cæteris, quæ vulgo dona fortunæ vocitantur, patrem quoque tuum si lebo, virum maximum, qui ordini amplissimo totos viginti annos quum principem locum obtinens præsidet, omnium sibi virtutum invicem confectarum & coherentium inesse comitatum, & privatim & publicè dictis, factis liquidò comprobavit. Hæc enim etsi ad honorem tuum pertinent, magnoque tibi sunt ornamento, longè tamen illud magis quòd in primâ statim adolescentiâ cum te præbuiſti, quem nullo negotio omnes intelligerent majorum suorum claritudini gloriæ esse præoptare, quàm meritis ipsorum splendorem suum debere: adeo ut  
 nemo



nemo jam tuta fuent, qui id agere te  
dubitaret, ut quod hunc tibi patens  
præferebat, posteris ipse olim præfer-  
res, igitur in studia liberalium artium  
& Iuris Civilis Romani non secus illâ  
ætatē incubuisti, ( rarâ quâdam felici-  
tate nactus Valentię Segalariorum tem-  
pore eodem præceptorem quidem I.  
Cujacium, condiscipulum verò, sed æ-  
tate grandiorē, I. Scaligerum ) ac si  
ille solus ad gloriam aditus tibi pateret;  
aut in illo solo præsidio spes omnes tua  
niterentur. Studio legitimo defunctus  
& peregrinationibus quas ad multas  
Europæ partes suscepisti, publicę rei ad-  
ministrationem auspicias, per varios  
deinceps honorum gradus, ad hanc il-  
lustrem dignitatem conscendens, in di-  
versis muneribus, functionibus & lega-  
tionibus probatus; mentis altę confi-  
lium, moderationem animi, fidei ac mo-  
rum constantiam, adversis rerum im-  
mersabilis undis, ita perpetuo usurpasti,  
ut multum sæculi tui hominibus datur.

rus fueris: etiam si nihil præter exem-  
 plum dedisses; in tanta enim rerum va-  
 rietate, quantam illis difficillimis tem-  
 poribus experiri contigit, cum quidem  
 plerique hominum de fortuna penden-  
 tes, alternis Vatinii, alternis Catones  
 erant, æqualitatem vitæ per omnia con-  
 stantem sibi servasse, neque ullo un-  
 quam casu graviore concussam ab in-  
 sita probitate de scivisse, aut perfecti sa-  
 pientis, aut (ut Stoicis placet utamur)  
 ejus erat qui perfectam sapientiam pro-  
 ximè accederet. Hoc illud est tempus  
 quo Henrici M. castra sequens, inter tu-  
 multus castrenses rerum toto orbe me-  
 moriâ tuâ gestarum, præsidis ad tan-  
 tum inceptum multò antè magno stu-  
 dio provisus, historiam ~~compendi~~ scri-  
 bere instituit: qua in scriptione quan-  
 tâ diligentia & fide, (nam sermonis  
 elegantiam omitto) sis usus, omnes qui  
 legerunt scire possunt: nos hoc amplius  
 scimus, quantas inter curas, quam bre-  
 vi tempore, horis tuis subcivis bene  
 utendo,

utendo; propositam incho materiam ad  
scribendum peregeris: nam qui neque  
muneri tuo laboriosissimo, neque regis  
obsequio ullā unquam in parte defue-  
ris; annis tamen XII, & mens. VI,  
libros CXXVIII rerum memora-  
bilibum admirandā varietate refertos  
consecisti; opus in eo genere litterarum  
maximant omnium quā unquam post  
T. Livii Annales sunt edita. Quemad-  
modum autem olim ad rempublicam  
ita animatus accessisti, ut universorum  
consiliorum & ~~politicarum~~ <sup>maximarum</sup> tuorum su-  
prema lex esset salus regni, non autem  
factionis alicujus studia; ita cum res  
gestas es orsus litteris mandare, non uti-  
que id spectasti, ut ea diceres quæ his  
aut illis grata essent futura, sed quæ Hi-  
storix Regina Veritas pateretur; cuius  
generosissimi propositi hoc præmium  
tulisti, ut tunc demum historix legiti-  
mæ majestas nostris hominibus coepa sit  
intelligi; quando per Europam libri tui  
circumferri sunt coepti: hinc illi plausus

& acclamationes bonorum, tibi paniter  
 ac seculo gratulantium, ex Italia, His-  
 pania, Germania, Polonia, & ultima  
 etiam Livonia, in hanc urbem ad te &  
 amicos tuos transmissæ. Enimvero, tam  
 perditis moribus & adeo inimicis vir-  
 tuti temporibus esse aliquem animi in-  
 victi virum, qui non gratiâ, non metu  
 à veritate in Historia scribenda deflectat,  
 è re publicâ humani generis est. „ Quid  
 „ dicam de illo immenso tuo in litteras  
 „ amore: quem quidem eximie de-  
 „ clarasti, cum in contexendis Annali-  
 „ bus tuis, eorum interire memoriam  
 „ non es passus, qui ad illarum illustra-  
 „ tionem in hac ipsarum *παλινδρομία* vel  
 „ mediocrem saltem aliquam symbo-  
 „ lam contulissent. Non erat alienum  
 huic loco de tuis erga me beneficiis  
 commemorare: quæ etsi fateor existi-  
 tisse quàm plurima; illa tamen præcipua  
 ex omnibus, ut mei sunt mores, mihi  
 videntur existimanda, quæ cum ratio-  
 nibus meorum studiorum sunt con-  
 juncta;



juncta ; illa igitur quantum tibi de-  
 beant , si dicere aggrediar , longum fac-  
 ciam. Nunquam ego te conveni , ut  
 non ea ex te audirem per quæ melior  
 & doctior possem discedere ; nunquam  
 à tuo congressu temerè discessi , quin ad  
 amorem patriæ , studium pietatis , ho-  
 nesti atque litterarum , novâ quasi flammâ  
 succensum me sentirem. Nunquam  
 sermonum tuorum factus sum parti-  
 ceps , cum tu de officiis vitæ , de sa-  
 lute aut interitu rerum publicarum , de  
 studiis , de omnibus omnium ætatum  
 scriptoribus dissereres , quin subiret il-  
 licò animum species admiranda & ra-  
 rò admodum per seculorum intervalla  
 mortalium oculis conspecta Idea il-  
 lius Politici omnibus numeris absoluti ,  
 quem maximus Philosophorum in scri-  
 ptis suis informans *ὁ ἐν πᾶσι περὶ τῶν ἀνθρώπων*  
 appellat , & omnium artium , discipli-  
 narum atque studiorum *ὁ ἐν πᾶσι* statuit  
 & judicem. Quod si mediocri diligen-  
 tiâ id sum consecutus , ut vigiliarum

mearum aliquis ad Studiosos fructus  
 perveniat, eoque nomine gratiæ mihi  
 nonnihil debetur; tibi profectò ejus  
 gratiæ, quantulacunque ea est, pars  
 debetur multò maxima: qui & re &  
 consilio studia mea subinde adjuvans,  
 assiduus ἐρωδιώχης instas, & quod o-  
 lim Ambrosius Origeni, id ipse es mi-  
 hi. Verùm de tuis in nos meritis, erit,  
 spero, alio tempore plura dicendi lo-  
 cus: quando ut aliquod grati animi  
 pignus tibi exhibeamus, de domo nu-  
 merationem faciemus; nam nunc qui-  
 dem mutuum sumimus, & alienâ arcâ  
 utimur. Deum veneror, Præses am-  
 plissime, ut te bono publico & littera-  
 rum natum, cum nobilissimâ conjugē  
 singularis exempli foeminâ, etiam si  
 olim fuisset, ac suavissimis pignoribus  
 vestris, omni bonorum genere cumu-  
 latum quàm diutissimè præstet incolu-  
 mem. Faxint Superi, ut hæc præcel-  
 lens gloria virtute & studiis litterarum  
 collecta, πασι παιδῶν μεταλαμπαδεύομένη

THUANÆ genti fiat propria, & in na-  
tis natorum perpetuò hæreat. Vale.

Dat. Lut. Par. cio iocx.





*Imprimatur Thomas Wykes.*  
*Octob. 12. 1639.*







# *Index Nominum Chronologicus & Alphabeticus.*

A		<i>Anno Pag.</i>		<i>Anno Pag.</i>	
A	Nd. Alciatus	1551	16	Joan. Bonfadius	1560 76
	Pet. Appianus	1552	23	Joan. Brodaus	1563 90
	Georg. Agricola	1555	39	Step. Boetianus	1563 91
	Vitus Amerbachius	1557	53	Mar. Borraeus	1564 96
	Bened. Aretius	1574	173	Theod. Bibliander	1564 97
	Anto. Augustinus	1586	247	Joan. Buteo	1564 100
	Iul. Alexandrinus	1590	290	Dan. Barbarus	1569 133
	Io. Auratus	1588	265	Enimund. Bonafidius	1574 175
	Iac. Andrianus	1590	292	M. Ant. Boba	1575 179
	Iac. Amiotus	1591	298	Hen. Bullingerus	1575 181
	Val. Acidalius	1595	326	Remig. Bellaqua	1577 195
	Pet. Angelius	1596	329	Joan. Barrosius	1577 198
	Rom. Amasæus	1558	57	Adam Bodensteinus	1577 199
	Arnold. Arlenius	1561	84	Jac. Billius	1584 215
	Bonif. Amerbachius	1562	87	Abr. Bucoltzer	1584 235
	Mich. Angelus	1564	101	And. Bathoreus	1589 270
	Alex. Aleius.	1565	102	Jo. Bap. Benedictus	1590 287
	Rog. Aschamus	1568	132	Gul. salust. Bartaffius	1590 287
	Jo. Argentæus	1572	155	M. Bragandinus	1590 297
	Hier. Amaltheus.	1574	172	Aug. Gisl. Busbequius	1592 305
	Jo. Bap. Amaltheus	1574	172	Phi. Bencius	1594 315
B					
	Petr. Bernbus	1547	6	Cornelius Bertram	1594 321
	M. Bucerus	1551	15	Jo. Bodinus	1596 333
	Eberard. Bilichius	1552	20	Tycho Brahe	1601 360
	Laz. Bonamicus	1552	24	P. Thiardeus Biff.	1605 382
	Xistus Betulcius	1554	35	Regi. Belnensis	1606 389
	Jo. Bugenhagius	1558	55	Jo. Brentius	1570 138
	Jo. Bellaius	1560	73	Theod. Beza	1605 383
	Joach. Bellaius	1560	75	C	
				Greg. Cortesius	1548 8

	Anno	Pag.
Io. Cochleus	1552	20
Ishod. Clarius	1555	41
Sebast. Corradus	1556	47
Aug. Caninius	1557	54
Ianus Cornarius	1558	56
Lælius Capilupus	1560	76
Barth. Cavalcantius	1562	89
Sebast. Castallio	1563	94
Io. Calvinus	1564	96
Aloisius Cornarius	1566	117
Georg. Cassander	1566	122
Cxl. Sec. Curio	1569	135
Lud. Castelluetras	1571	149
Ant. Rod. Cevallerius	1572	157
Loac. Curatius	1573	167
Ioan. Bap. Cynthius	1573	168
Ioach. Camerarius	1574	168
Herm. Crusenius	1574	174
Reg. Clutinius	1574	176
Fred. Commindrius	1575	180
Gal. Canterus	1575	183
Hier. Cardanus	1576	187
Didach. Covarruvias	1577	191
Ant. Contius	1577	192
Hannib. Cruceius	1577	196
Petr. Ciaconus	1581	218
Io. Bap. Camotius	1581	219
Io. Crato	1585	240
Hier. Columna	1586	250
Galiac. Caracciolus	1586	252
Mar. Chemnitius	1586	254
Mar. Cromerus	1589	270
Iac. Cujacius	1590	281
Ant. Carafa	1591	302
Frid. Furius Cærol.	1592	311
Fr. Fox. Candala	1594	313
Hier. Comelinus	1597	349
Q. Sept. Flor. Christ.	1596	337

	Anno	Pag.
Ioach. Camerarius	1598	351
Alfon. Ciaconus	1599	354
David Chytræus	1601	363
And. Cæsalpinus	1603	366
Christ. Colerus	1604	376
Iosep. Calignonus	1606	386
Rob. Constantinus	1605	384
Iul. Castellanus	1586	249
Vid. Coquillius Ro.	1603	374
D		
Io. Dabravius	1553	31
Fr. Duarenus	1559	62
Io. Driander	1560	83
Io. Draconites	1566	115
Petr. Danesius	1577	193
Bemb. Dodonæus	1585	239
And. Dudithus	1582	272
Iason Denores	1590	289
Hugo Donellus	1591	300
Ianus Duza	1596	331
Lamb. Danæus	1596	336
Conr. Dasypodius	1600	357
Ianus Duza	1604	375
E		
Io. Bap. Egnatius	1553	32
Paul. Eberus	1569	132
Claud. Espenceus	1571	145
Tho. Erasmus	1583	225
Sebast. Echinus	1585	239
F		
Ant. Flaminus	1551	17
Her. Fracastorius	1553	33
Io. Ferus	1554	35
Fran. Franchinus	1554	37
Gemma Frisius	1555	40
Oron. Finus	1555	44
Io. Forsterus	1556	47
Io. Fernelius	1558	55

<i>Anno Pag.</i>			<i>Anno Pag.</i>		
Io. Bap. Falengius	1559	72	Ioan. Gulielmus	1584	234
Gab. Facinus	1561	83	Iaur. Gambarus	1586	250
Gab. Fallopius	1562	88	Rod. Gualterus	1586	255
Ara. Ferronus	1563	92	Melch. Guilandinus	1589	271
Leon. Fuchsius	1566	116	Lug. Guiccardinus	1589	279
Luc. Frutérius	1566	124	Rob. Garnerius	1590	286
Georg. Fabritius	1571	149	Victor Gifelinus	1591	301
Franc. Fabricius	1573	167	Henr. Gravius	1591	304
Hub. Follieta	1581	220	Gilb. Genebrard.	1597	344
Io. Fichardus	1581	222	Obert. Gifanius.	1604	377
Paul. Foxius	1584	127	H		
Huld. Fuggerus	1584	233	Gaspar Hedio	1552	21
Nicod. Frischlinus	1590	293	Iac. Hollerius	1562	87
Anut. Foëtins	1596	336	Mich. Hospitalius	1573	162
Q. Sep. Flor. Christ.	1596	337	Conr. Heresbachius	1576	186
Petr. Faber	1600	358	Io. Hartungus	1579	206
Ger. Falcemburgius	1578	201	Io. Bap. Hadrianus	1579	209
Mat. Flacius	1575	181	Franc. Hotomanus	1590	280
Aug. Ferrerius	1588	264	Io. Heurnius	1601	361
G			Gent. Hervetus	1584	230
L. Greg. Giraldu	1552	24	I		
Sigil. Gelenius	1554	36	Iustus Ionas	1546	3
Petr. Gillius	1555	44	Paulus Iovius	1552	25
Io. Gelida	1556	48	P. Fr. Iambularius	1564	97
Luc. Gauricus	1559	72	Ioan. Iaellus	1571	150
Nich. Gerbelius	1560	82	Donatus Ianotius	1572	154
Io. Bap. Gellus	1563	93	Hadrianus Iunius	1575	182
Hen. Glarianus	1563	94	Georg. Ioachinus	1576	186
Conr. Gesnerus	1565	103	Fr. Iunius	1602	365
Ant. Govcanus	1565	107	Donatus Ianetius	1572	154
Io. Grollicrius	1565	112	L		
Gul. Gratarolus	1568	131	M. Lutherus	1546	2
Iac. Grevinus	1570	140	Marg. Labretana	1549	9
Nic. Gruchius	1572	156	Wolfgang. Lazius	1555	38
Io. Guinterius	1574	172	P. Loticus secundus	1560	82
Io. Gorraus	1577	194	Bassianus Landus	1562	89
Alv. Gomecius	1586	213	F f 2		
Hub. Goltzius	1583	225	Io.		



<i>Anno Pag.</i>		<i>Anno Pag.</i>	
Jo. Langius	1565 103	Petr. Montauricus	1570 144
Paulus Leopardus	1567 128	Joach. Morlinus	1571 150
Eraf. Limpergensis	1568 129	Franc. Maurolycus	1575 180
Fr. Luifinus	1568 131	Joan. Morvillerius	1577 188
Jo. Lonicerus	1569 133	P. And. Mathiolus	1577 197
Dion. Lambinus	1572 152	Anto. Mizaldus	1578 202
Carol. Langius	1573 165	Jo. Maldonatus	1583 224
Pet. Lescotus	1578 202	M. Ant. Muretus	1585 235
Hubert. Languetus	1581 217	Joan. Molanus	1585 240
Lud. Lavaterus	1586 255	Jac. Maniotus	1587 259
Aloisius Lipomanus	1558 60	Henr. Mollerus	1689 270
Jo. Vincent. Laureus	1592 306	Ambr. Morales	1590 295
Latinus Latinus	1593 312	Adolph. Metkererus	1591 300
Joan. Leunclaius	1593 312	Michael Montanus	1592 310
Orl. Lassus	1594 320	Ger. Mercator	1594 318
Dom. Lampsonius	1598 351	Ald. Manuccius	1597 347
Carf. Loaisa	1599 354	B. Ariss Montanus	1598 349
Jo. Levineius	1599 355	Max. Margunius	1602 363
Justus Lipsius	1601 389	Paulus Mehlus	1602 364
Cip. Leovicus	1574 173	Jac. Monavius	1603 366
M		Hier. Mercurialis	1604 378
Marius Molza	1548 9	Simo Marionus	1605 386
Jo. Montanus	1551 19	N	
Sebast. Munsterus	1552 22	Pet. Nannius	1557 52
Olymp. Fulv. Morata	1555 41	Petr. Nonius	1577 198
M. Ant. Majoragius	1555 43	Mar. Navarrus	1586 244
Salmonius Macrinus	1557 53	Flamin. Nobilius	1590 290
Jac. Micyllus	1558 56	Mich. Neander	1595 325
Ph. Melancthon	1560 78	Phil. Nerius	1595 327
Wolf. Musculus	1563 93	O	
Gul. Morellius	1564 99	Apd. Olander	1552 21
Car. Molinaeus	1566 119	Jo. Oporinus	1568 129
Bap. Menilius	1569 136	Eraf. Olualdus	1579 206
Jo. Mercerus	1570 141	Hier. Oforius	1580 214
Pau. Manutius	1574 168	Abrah. Ortelius	1598 350
And. Masius	1573 165	Arnold. Ossatus	1606 380
Petr. Martyr	1562 86	P	
Jac. Milichius	1559 72	Conra. Pellicanus	1555 38



Anno Pag.		Anno Pag.	
Jo. Pena	1558 36	Bernard. Rota	1575 180
Joach. Perionius	1559 68	Lud. And. Resendius	1577 199
Con. Peiringerus	1547 6	Joan. Bap. Rafarius	1578 204
Jo. Pierius	1550 12	Lud. Regius	1579 208
Ferd. Non. Pincianus	1552 27	Pet. Ronfardus	1585 241
Simo Portius	1554 35	Frant. Roaldefius	1589 267
Gul. Philander	1565 110	Reiner. Reineccius	1595 323
P. Jo. Perpinianus	1566 125	Fr. Raphelingius	1597 348
Octav. Pantagathus	1567 127	Ant. Ricobon	1600 356
Onuf. Paruipus	1568 130	Mart. Rulandus	1602 364
Alex. Picolomineus	1578 203	S	
Gul. Postellus	1581 216	Jacob. Sturmius	1553 31
And. Papius	1581 218	Jo. Sleidanus	1556 46
Lucas Patus	1581 221	Julf. Caf. Scaliger	1558 58
Fran. Portus	1581 222	Rob. Stephanus	1559 69
Vid. Fab. Pibrac	1584 228	Jo. Schonerus	1547 60
Jac. Pamelius	1587 258	Jac. Sadolerus	1547 67
Christ. Plantin.	1589 268	Georg. Sabinus	1560 81
Claud. Puteanus	1596 315	Kyrianus Strozza	1563 111
Petr. Pithæus	1594 339	Mich. Stifelius	1567 125
Saffr. Petreius	1597 345	Vist. Strigelius	1569 132
Gab. Paleotus	1597 346	Sixt. Senentis	1569 135
Fr. Patricius	1597 347	Hen. Scriverius	1571 147
Paul. Paruta	1599 352	Hippolyt. Salvianus	1572 155
Jo. Vin. Pinellus	1601 359	Steph. Szegadinus	1572 159
Gasp. Pucerus	1602 364	Io. Genes. Sepulveda	1572 159
Jo. Passeratius	1602 365	Iofias Simlerus	1576 184
Phil. Porta	1606 388	Laurent. Surus	1578 201
Helias Putschius	1606 390	Joan. Stradius	1579 207
R		Hier. Surita	1580 212
Erasm. Reinholdus	1553 30	Io. Sambucus	1584 234
Jo. Bap. Ramusius	1557 50	Car. Sigonius	1585 237
B. Renanus	1547 5	Iac. Skekius	1587 257
Jo. Ruuius	1553 29	Spero Speronius	1588 263
Gul. Rondeleius	1566 122	Franc. Salinas	1590 295
Amarus Ranconetus	1559 64	Ant. Sadeel	1591 299
Fr. Robortellus	1567 126	Laur. Strozzi	1591 304
Petr. Ramus	1572 150	Frid. Sylburgius	1596 330

	Anno	Pag.		Anno	Pag.
Henr. Stephanus	1598	352	Ioach. Vespheus	1574	173
Lazar. Superantius	1602	363	Ioan. Versola	1574	177
Loisa Sigza	1560	77	Greg. Vafarius	1574	178
Io. Sturmius	1589	269	Hold. Viglius	1577	189
T			Franc. Venerius	1581	223
Nico. Tartalea	1557	51	Pet. Victorius	1585	237
And. Tiraquellus	1558	61	Mart. Visembecius	1586	255
Iac. Tufanus	1547	5	Elias Vinetus	1587	256
Had. Turnebus	1565	105	Ioan. Vigandus	1587	257
Egidius Tschoudus	1572	152	Germ. Valens	1587	257
Imman. Tremellius	1580	211	Ioan. Vieri	1588	260
Franc. Tyrianus	1584	232	Gul. Vitakerus	1595	226
Octav. Terrarius	1586	248	Nic. Vignerius	1596	331
Bernard. Tilefius	1588	262	Fulv. Ursinus	1600	356
Lev. Torrentius	1595	323	Car. Uttenhovius	1600	357
Torq. Tassus	1595	324	Franc. Vieta	1603	366
Fran. Tollerus	1596	327	Ioach. Vadianus	1551	19
Iac. Typotius	1604	377	Iod. Villichius	1552	23
Georg. Trissinus	1550	13	W		
Io. Tillius	1570	138			
Tillius Iunior	1570	139	Hier. Wolfius	1680	210
V			X		
Franc. Vatablus	1547	4			
Io. Vafius	1550	11	Gul. Xilander.	1576	184
Ed. Vottonus	1555	40	Z		
Io. Vergara	1558	62			
Mel. Volmarius	1561	85	H. Zuinglius	1531	1
And. Vafalius	1564	97	Ia. Zieglerus	1549	11
M. Hieron. Vida	1556	116	Theod. Zuingerus	1588	261
Bened. Varchius	1566	117	Iac. Zabarella	1589	272
Io. Volfius	1572	153	Hieron. Zanchius	1590	291
			Iof. Zarlinus.	1599	353

FINIS